


Dunyo  
adabiyoti  
kutubxonasi

# Шарль ЛОРАН

НАПОЛЕОННИНГ  
ЖОСУСИ



Тарихий роман

# Шарль ЛОРАН

НАПОЛЕОННИНГ  
ЖОСУСИ



Т о ш к е н т 2 0 1 6

**УЎК: 821.133.1-311.6**

**КБК: 84(4Фр)**

**Л - 730**

**Лоран, Шарль**

**Наполеоннинг жосуси: роман. Шарль Лоран / Рус тилидан  
Рустамжон Умматов таржимаси. – Тошкент: Янги аср авлоди,  
2016. – 288 б.**

**ISBN 978-9943-27-801-1**

Француз адаби Шарль Лораннинг мавзур асари ўқувчини XIX асрнинг бошлари – Наполеон Францияси даврига сайдириб, буюк саркарда Наполеон Бонапарт, жосус Карл Шульмейтер ва соҳибжамол Берта ҳамда улар қарамогига олган, томирида қироллар қони оқаётган асранди бола Ганс каби қаҳрамонларнинг тақдиди ва ички кечинмалари орқали урушнинг суронли онларига олиб киради.

Нафақат бадиий завқ, балки 1805 йилдаги Франция-Австрия ўртасидаги зиддиятларга оид тарихий маълумотлар билан етарлича танишиш имконини ҳам берувчи ушбу асар ўқувчининг суюкли китоблари қаторидан ўрин олади деб умид қиласиз.

**УЎК: 821.133.1-311.6**

**КБК: 84(4Фр)**

**Рус тилидан  
Рустамжон Умматов  
таржимаси**

**ISBN 978-9943-27-801-1**

**© Шарль Лоран, «Наполеоннинг жосуси», «Янги аср авлоди», 2016 йил.**

## БИРИНЧИ КИСМ

### ЖОСУС ҚҰЛГА ТУШДИ

— Энди яна муқаллид бўлиб, баджаҳл чолнинг афтини кўрсатиб берасан-да, а?

Саккиз яшар қизалоқ ана шундай деди ва қўлидан тутган отаси томон оёқ учида тикланишга интилди. Унинг қалин соchlари олтинранг бўлиб, паришон кокиллари елкасида тебранарди. Қизча қора барқут жиякли қизил юбкача кийиб олган, торгина карсети остидан оппоқ кўйлагининг енги ва бурмалари кўриниб турибди.

Унинг бу ўтинчи дадасининг нариги қўлидан ушлаган акасининг жигига тегди. У синглисидан уч ёш катта эди.

— Лизбетанинг айтгани бўлмайди, — деди у. — Бизга бошқачароқ муқаллид бўлиб, яххиси аскарга айланга қол. Эслагин, охирги марта тақлид қилгандинг-ку.

Лизбета биркесар қизлардан эмасди. Унга қолса, эрмакнинг эски-янгилиги аҳамиятсиз, фақат хурсандчилик бўлса бас. Инчунин акасининг таклифига жон дея қолди.

— Тўгри, тўгри, аскар... Ганс билади-да. Урушга кетаётган жангчи...

Ота кулимсиради ва «маъқул» дегандай, иккөвига бош иргади. У болаларининг қўйини қўйиб юборди-да,

бир неча қадам нарироққа кетди. Ака-сингил йўлнинг ўртасидан ёнма-ён юриб бораверишди. Иккови ундан кўз узмай, чексиз қизиқиш билан кузатар эдилар.

Бу киши зоҳиридан оддий шаҳарлик бўлиб, келбатли ва бақувват кўринарди. Уст-боши ва мулоим чеҳрасидан страсбурглик савдогарга ўхшатиш мумкин эди. Эгнидаги тўқ жигарранг сюртукнинг тутмалари темирдан, бўйинбоги калта ва қора, этиклари ишли эди. Қоп-қора барра телпагининг гардиши қайрилма, усти яssi, пешонаси соябонли. Кўлида ваҳимали гаврон тутган бўлса-да, пашибага ҳам озор бергудай феъли йўқ эди. Бироқ уни ҳамиша ҳам хушфеъл деб бўлмасди. У кундузлари бир зумдаёқ важоҳатини бошқалай олишини болалар кўп бор кўришган. Бундай дақиқаларда овозини таниб бўлмагани устига кўзларининг тузи ҳам ўзгариб кетарди. Ака-сингил ҳарчанд уринсалар-да, бу сирнинг тагига етолмасдилар.

Мана ҳозир ҳам болаларга илтифот қилиб, қиёфасини батамом «янгилай» кетди. У қўлининг оҳиста ҳаракати билан сюртукнинг қайирмаси ва кўтарма ёқасини росмана ҳарбий бичимга келтирди. Панталонини сал юқорилатиб, чаккасида селкиллаёттан қизгиш-малла соchlарини қулоқлари ортига силлиқлаб таради. Телпаги эса кўзбойлогичнинг сеҳрли таёқчаси теккандай кивер<sup>1</sup> шаклига кирди, гавдасини гоз қилиб, мундир кийган ҳолга келди. Ранг-тузи но маълум ола-була чулкиси гўё этик кийгандай ўта эпчил ҳаракат билан фойиб бўлди. Болалар қийқириб юбориши:

– Бу жандарм-ку! Ҳа, ҳа, жандарм!

Икковининг шодон ва беғубор чуғурлаши тинмасиданоқ жандарм ўрнида қуролланган гренадёр на-

<sup>1</sup> Кивер – жандармлар бош кийими. (Романдаги барча изоҳлар таржимон қаламига мансуб.)

моён бўлди. У ҳозиргина қилич мисоли ерда судраб юрган таёқ биқини ва елкага тирагиб, қилт этмаётган милтиққа айланди. Кивер ўрнида эса мўйна телпак пайдо бўлди.

Болалар ҳайрат ичра чапак чалиб юбориши. Ўша заҳотиёқ ака-сингил қошида соябонсиз чарм фуражкали егеръ пайдо бўлиб, сюртук қўққисдан қисқарди-да, егеръ энди доломан<sup>1</sup> кийган гусар қиёфасига кирди. Ҳар бир тақлиддан сўнг бу одамнинг юзини ҳам мутлақо таниб бўлмасди. Ҳурпайган соchlари «ювош» тортиб, итнинг қулоқларидаш шалпайиб қолар ёхуд кокил тусини олар эди. Бежирим мўйлови диккайган йигирма яшар суворий жангчи ўша ондаёқ тунд юзини шопмўйлов эгаллаган кекса ҳарбий бўлиб қоларди. Кўзлари бир кулгили кўринса, бир чақчаяди. Юзида гоҳо қатъият ва бир зумда бешафқатлик зухур этади. Алқисса, у ўзи тақлид қилаётган шахсларни чуқур ўрганган ва муқаллидлик санъатида камолотга эришган эди. Шуниси ҳам борки, унинг бу камолоти фақатгина юз ҳаракатидаги маҳоратдагина эмас, тақлид учун танланган шахснинг феъл-атворини, қурол туттандаги соҳт-сумбатини ифодалашда ҳам сезилиб турарди.

Қўққисдан ўйиннинг белига тепиши. Ака-сингил бир сўз демасдан олға томонга ишора қилиши. Ота ортига ўгирилиб, олдиндаги булутдай чанг-тўзонга тикилди, олисроқда ҳам чанг кўринарди. Тўзон оралаб чопаётган отлар ва улар судраган одам тўла аравага кўзи тушди. Аравада нимадир ярақларди, чамаси қурол-аслаҳа бўлса керак.

У болаларни йўл четидаги ўт-ўлан қоплаган ёндамага олиб ўтди. Бу ер шамол ва чанг-чунгдан холи бўлиб, ўткинчиларни бемалол томоша қилиш мумкин эди.

<sup>1</sup> Доломан – тутма ўрнига чилвир-ип ишлатиладиган, тик қотирма ёқали куртка. У гусарлар мундириининг асосий унсурларидан бири бўлган.

Энди яқинлашаётган аравалар ва отларнинг дукурлаши яққол эшитила бошлади. Гулдурос кулгулар орасидаги узук-юлуқ аскар қўшиқлари кейинги аравалардаги бақир-чақирга уйқашиб, мислсиз шовқин-суронга айланарди. Ўн чоғли овоз ҳарбий сафар маршини баланд пардаларда куйламоқда.

Қувониб кетган болаларнинг кўзлари чарақлаб, тутинган оталарига мамнун назар солиши: улар манави қувноқ манзара унга қандай таъсир қилаётганини билмоқчи бўлишарди.

Яшиндай яқинлашиб келаётган карвон ўзида фақат чексиз шодлик ва гулдурос кулгиларни мужассам этганди. Ака-сингил эса йўловчиларни яхшироқ кўриш учун бир-бирига ёпишиб олганди.

Бу Саверн атрофида кенг тарқалган оддий экипаж эди. Қизил юзи чўғдай чақнаган аравакаш йигит деярли тик туриб олганди. У ҳарбий ҳамроҳларининг тўхтовсиз хандаларидан шунчалар жўшиб кетгандики, қамчиси ҳам гўё қўшиқ оҳангига мутаносиб қарсилларди. Бошидаги мўйна қалпоги чаккаси томон қийшайиб, тулки тумоги белигача осилиб қолган, ечилаётган бўйинбоги елда ҳилпиради. Ўн икки аскар араванинг ўнгу сўлига ўтириб олишган. Ўртада қиличлар, милтиқлар, мўйна қалпоқлар уюми. Уларнинг тамаки бурқситиш ва ашула айтишдан ўзга ҳеч бир ташвиши йўқ. Орқадаги араваларда ҳам шу аҳвол, фақат улардаги кучерларнинг шашти биринчидаги-дек эмас.

Хуллас, бири-биридан баттар тупроққа ботган «хонанда» аскарлар тўла қирқта арава ўқдай учиб ўтди. Бу генерал Удинога қарашли гренадёрлар батальони эди. Аррасдаги алоҳида дивизия энг сара жангчилардан ташкил толғандики, Наполеон ҳам қойил қолиб, уларни ҳатто ўз гвардиячиларидан ҳам забардаст деб

биларди. Мазкур дивизия Булондан Страсбургтагача ва Па де Калэдан Рейнгача бўлган олис ва сермашаққат йўлни босиб ўтишганди.

Аскарлар Англияга жўнатишар деб ўйлашганди, бироқ буйруқ Германия томонга бўлди – сабаби но маълум. Фақат энг тажрибали жангчилар Наполеоннинг ҳийласини билишларидан лоф уриб, мақтаниб қўйишишарди. (Биринчи консул даврида Маренго жанги бўлиб тарихга кирган ҳарбий юриш, шунингдек, Наполеон бошчилигидаги Миср экспедицияси уларнинг ёдидан чиқсан эмасди.) Улар ўзларига аён режани тубандагича шарҳлашарди:

– Кўриб турибсизларки, Ламаншдан ўтишда бизга қалқон вазифасини адо этувчи Вильнев флоти келмади ва энди бекорхўжа бўлиб ётибмиз. Чўмилиш мавсуми ўтиб кетди, бинобарин, император шамоллаб қолишимизни истамайди ва шу боис бизни Рейн тарафга йўлламоқчи. Афтидан, у ерда руслар билан австрияликлар бизнинг йўқлигимиздан фойдаланиб, бир балони бошлиш тадоригида: бориб, улар билан икки оғизгина гаплашиб қўямиз. Унгача адмирал Вильнев бир амаллаб Булонга етиб келади ва биз ҳам у ерга баҳорда қайтиб борамиз.

Гап шундаки, Наполеоннинг фармонига биноан гвардиячилар, араслик гренадёрлар ва бошқа аскарларни Па де Калэдан кемаларда эмас, бутун Франция ҳудуди бўйлаб араваларда ташилмоғи зарур. Ҳамма бекатларда бунинг учун отлар шайлаб қўйилган бўлиб, ҳарбийлар пошналарини едириб тупроқ кечмасдан гарбдан шарққа қараб бетўхтов йўл босадилар. Бу ҳақда газеталарга ёзиш тақиқлаб қўйилди.

Тўгри, ҳар куни аравадан-аравага ўтавериш аскарларнинг жонига оз-моз тега бошлаганди. Улар бақувват отлар қўшилган пикардияликлар уловида юриб

кўришди, аргумоқлар ўқдай учиб, адирларга ҳам қийнналмай тортаверарди. Иль де Францга етгач, у ердаги шарабанларда<sup>1</sup> ўтириш қулай бўлсада, отлар оғир юкка дош беролмай имилларди. Аммо йўл азоби – гўр азоби деган мақолнинг бор ҳақиқатига Бри, Суассон ва Шампанда мубтало бўлишди: бу ерлардаги икки гилдиракли аравалар жуда расво эди. Ҳарбийлар Эльзасдан бошлаб эркинроқ нафас олишди, аравалар соз, походни аямай тўшашган, кучерлар дилкаш ва хушчақчақ эди. Ана энди жангчиларга жон кириб, томоқ йиртиб куйлай бошладилар.

Тўхташ ва дам олиш жойини белгилашга масъул мансабдорлар колоннадан анча олдинроққа ўтиб кетишиган. Лекин чангта беланган бир гурӯҳ зобитлар экипажлар теварагини назорат қилиб боришарди. Командир карвоннинг охирида – ем-хашак ортилган сўнгги арава ортида келаётган эди. У чорпахил, юзи буғриқиб кетган, кўзлари тийрак, аммо беғубор боқарди: нигоҳи йўл ёқасидаги болаларга тушди ва алланимани эслади шекилли, жилмайиб қўйди. Эҳтимол, уйида кутаётган, анави икки болакайдай ўз фарзандлари ёдига келгандир. Яна ким билсин?

Кеч кирди. Чанг-тўзон босилди. Йўлга аста-секин сукунат чўқди. Кўрганларидан кўнгли чоғ Ганс ва Лизбетанинг энди уйга қайтгилари келиб, ота бўлмишга қарашди.

У эса ҳарбийлар ўтиб бўлгунча миқ этмай кузатди. Гўё бекор тургунча бекор ишла деганларидаи уларни санаб чиққанди. Бироқ зарҳал мундирли генерал ҳам сафланиб ўтаётган аскарларини зоҳирсан бўш-баёв мана шу одамчалик синчковлик билан кузатмасди. Ҳамма аравалар кетиб бўлгач, у ёндафтарини олиб ёза бошлади:

---

<sup>1</sup> Шарабан – бир отли арава.

«1805 йил 24 сентябрь. Ҳозиргина беш юз кишилик гренадёрлар батальони Саверндан Страсбург томонга ўтиб кетди. Ҳарбийлар кўринишига қараганда, соғлом ва қатъий интизомда. Менда алоҳида таассурот қолдирган хусусият шуки, соchlари қайчиланган, лекин упа сепилмаган аскарларни бутун илк бор кўрдим. Шунинг учун ҳам уларнинг энгил-боши хийла тоза эди, демоқчиманки, агар соchlарига упа сепилганда қукуни уларнинг қизил ёқасини ўта кир қилиб юборарди. Айтишларича, ушбу янгилик Франция ҳарбийлари учун тўла-тўкис жорий этилар экан.

Мана шу ярим минг жангчи Келнинг муқобилида саккиз кундан буён кўр тўкиб ётган ўттиз беш минглик қўшиннинг бир қисмидир. Страсбург тарафдага вазиятдан хабарим йўқ, лекин эшитишинга қараганда, Мангейм, Спир ва Майнцда сон-саноқсиз аскар тўпланаётган эмиш. Таниш қўмондонлардан ҳеч кимни учратолмадим. Бонапарт тўрт кун бурун жасур жангчиларини «Фахрий легион» ордени билан тақдирлаб, сўнгра Булонга қайтиби. Афтидан, у кетиши ниятида эмас. Ҳатто дабдабали зиёфатлар ташкил этмоқда. Шунга қарамасдан, мен тилга олган катта қўшин жамланиши бежизмас, бунда жиддий бир гап бор ва уни яхшироқ билиб қўйиш керак. Валинеъматининг махфий топшириги билан Германия сафарига кетган Кавалерия генерали, маълум ва машҳур Миорат ҳалигача қайтгани йўқ. Куни кеча генерал Берtran қайтиб келди, унга ҳам хуфёна буйруқ берилиб, иттифоқчиларнинг қўшинлари хусусида муҳим маълумотларни аниқлаш топширилганди. Улар шунчалар нўноқлик билан ниқобланган эдики, қандай қилиб душман қўлига тушиб қолмади – шунисига ҳайронман.»

Бизнинг бўш-баёвгина шаҳарлик ана шуларни қайд этгач, дафтарчани киссасига жойлади ва овозини кўтарди:

— Қани, болажонлар, энди қайтамиз!

Улар шаҳар сари йўлга тушдилар.

Бироқ ярим мил юрмасданоқ ўзлари икки соатгина бурун ўтган жойни таний олмай қолиши. Йўлнинг уч юз метр олдиндаги кўхна тепаликка туташ қайирмасида кавланаётган ертўлаларни кўриб, ҳайрону лол қилдилар. Учовлон чумолидай қайнаёттан одамлар устидан чиқишганди.

Бу ерда бояги араваларда ўтган гренадёрлардан бўлак аскарлар ҳам жуда кўп эди. Улар олис йўлда увишган оёқларининг чигалини ёзиб, югуриб-елган кўйи ўзларига қўналға ҳозирлашарди. Отлар бўшатиб олинган аравалар йўл ёқасига тартиб билан териб қўйилган, ранго-ранг гренадёрлар ёнидан жой олган бошқа қисмлар ҳам қудрат ва интизом бобида улардан қолишимасди.

Алқисса, қуролли аскарлардан иборат тошқин шаҳар остонасигача ёйилиб кетганди. Атрофда инсонлардан ташкил топган тўлқинни томоша қилгани келган ҳар нарсага қизиқувчан болакайлар гоҳ олға, гоҳ орқага чопқиллар, жойлашув жараёнидаги ҳарбийлар галаси мана шу шумтакалар кузатуви остида ҳавас қилгудай орасталикка эришаётганди.

Ваниҳоят чодирлар тикилиб, гулханлар ёқилди. Аравалар «эшаги»даги милтиқлар устига байроқлар ўраб қўйилган, гўё найзалар бешикка белангандек эди. Само сокин, дуд булутлар сари ўрлайди. Тутун билан вазмин гангур-гунгур садолари ҳам шаҳар осмонига тараларди.

Бу ерда батальон ёки бригада эмас, ҳатто дивизия, балки бутун бир армия жойлашганди!..

Болаларни етаклаган киши бундай манзара рўпарасида ҳайратдан донг қотиб, таққа тўхтаб қолди. Шунчаликки, у ака-сингилнинг саволомуз нигоҳла-

рини ҳам пайқамади. Ахийри бир қарорга келиб, катта йўлгача чўзилган жонли девор орасидан ўтиб кетавермоқчи бўлди.

– Мумкин эмас! – қичқирди соқчи, у артиллериячи бўлиб, қиличини қинидан сугурди.

– Нега мумкин эмас? Ахир мен ўз уйимга бораётган бўлсам-чи? Страсбург фуқаросиман, болаларим билан сайдан қайтиб...

– Жудаям афсусдаман, муҳтарам дадавой, аммо менга шундай буйруқ берилган. Паркимиз<sup>1</sup> анави ерда, жудаям яқин, шу боис йўл кечга қадар ёпилди.

– Кўйсангиз-чи, биродар, манави гўдаклардан хавфсираманг, замбаракни мажақлай олишмайди. Келинг, мени ўтказиб юборинг, ишончим комилки, буйруқ бизга татбиқ этилмаса ҳам бўлаверади.

– Бўлиши мумкин. Лекин менинг қўлимдан ҳеч нарса келмайди. Ана зобит, истасангиз ўзидан сўраб кўринг...

Посбон ишора қилган зобит худди буюргандай батальон командири эди. Икки жажоқи болакайнинг тўхтатилиб, жангчига ҳайрон боқиб турганига унинг ҳам эндинина кўзи тушганди. Ёнидаги ҳамроҳи эса капитан экан. У тилласоч кичкинтойларни эслади ва соқчидан сўради:

– Нима гап ўзи?

– Командир, манави киши болалари билан шаҳарга ўтиб кетмоқчи.

– Страсбургликмисиз, – сўради зобит. – Кимсиз, отингиз нима?

– Шульмейстер, Карл, Людовик, де-ла-Месанж кўчасидан, баққолман, тамакифурушлик қиласман.

– Ҳарбийда бўлганмисиз? Ёшингиз нечада?

– Ўттиз бешга кирдим, командир жаноблари.

<sup>1</sup> Парк – қўшин таъминотига тааллукли кўчма ҳарбий омбор.

- Нега жавоб бермайсиз, аскарлик хизматини ўтаганмисиз?
- Полковник Савари мени шахсан билади..
- Демоқчисизки, полковник Савари танишингиз эди?..
- Ие, у ўлдими?
- Йўқ, у ҳозир дивизия генерали, жанговар жандармлар командири ва разведка хизматлари бошлиғи. Сиз бари бир саволимга жавоб берганингизча йўқ.
- Мен аскарликда бўлган эмасман, командир.
- Нима учун? Кўринишингиздан тоғни урсангиз талқон қиласиз-ку?
- Франциялик эмасман-да.
- Унда қаерликсиз?
- Янги Фрейштатдан.
- У қаёқда ўзи?
- Страсбургдан тўрт милча масофада, Рейннинг нариги соҳилида.
- Шунаقا экан, бу ерда нима қилиб юрибсиз ва Саварини полковник чогидан қандай танийсиз?..

Яқиндагина болаларни кулдириб қувонган, сиёқидан ниҳоятда мўмин-қобил ва соддадил кўринган одамнинг асаби бу савол-жавобларга зўрга чидаётганди. Бир неча бор жеркиб ташлагиси келса-да, ўзини босди. Сўнгги саволгина унинг сабр-бардошини адойи тамом қилди. У батальон раҳнамосининг кўзларига тик боқди-да, шундай жавоб қайтарди:

- Генерал Моро Рейн дарёсидан ўтар чоги французларга катта хизмат кўрсатгандим. Шу хизматимнинг мукофоти ўрнига бу жойда яшаш имтиёзини беришган. Тўгри, қўлимда милтиқ ва қилич бўлган эмас, бошимда мўйна телпак ё оёғимда шпорлар йўқ эди, бироқ, башарти мен бўлмаганимда, Гогенлинден остонасида немислар устидан қозонилган зафар чиппакка чиқиши ҳеч гапмасди.

— Вой-бўй, менинг қаҳрамоним! – деди командир истеҳзоли оҳангда. – Агар гапларингиз чин бўлса, ҳазилакам саркарда эмассиз. Лекин айни ҳолда сиздаги ватанпарварлик жудаям гаройиб: ахир сизнинг кўмагингиз билан Моро янчиб ташлаган немислар ватандош оғаларингиз-да. Хўш, ватанингиз у ёқда эканига ўзингиз иқрор бўлмадингизми?

Зобит шундай деб, шарқ томонга қўл чўзди.

– Киши ўзини қадрлаган мамлакатга мансуб ва ўзи хоҳлаган мамлакатга хизмат қиласди.

– Эҳтимол шундайдир. Бироқ шахсан мен ўз юртини севмагани ҳолда унинг ёвларига хизмат кўрсатётган кимсаларга ишона олмайман. Қани, ҳой тўртовинг, бу ёққа келларинг! – буюрди командир.

Аскарлардан бир нечтаси командирнинг буйругини бажаргани келаркан, ҳалитдан бери миқ этмай кузатиб турган капитан Шульмейстер томонга юра бошлади. Боши ғавғода қолажагини пайқаган Шульмейстер яшин тезлигида ҳаракат қиласди: у қўлларини сюртук бурмалари орасидан чиқариб, болакайнини эркалаган мисоли боши ва елкасига енгил қоқиб қўйди. Айни ҳолда зийрак киши синчковлик билан қараса, бунда бир сир борлигини пайқай оларди. Шундан кейин Шульмейстер қилт этгани йўқ. У анавиларнинг кўзига тап тортмай тик боқди, шубҳасиз, уларга ўзини ҳибста олиш буюрилганди. Болакайнинг кўзлари гўё шундай дерди: «Дада, кўнглингни тўқ қиласвер! Сен менга ишониб топширган нарсани олдириб қўймаслигим зарурлигини тушундим... у курткамнинг ёқаси остида турибди. Кўздан гойиб бўлишим биланоқ уни яхшилаб яшириб оламан. Кўрқма! Хотиржам бўл!»

Лизбета бўлса, унга ёпишиб, кўрқсанидан йиғлаб юборишга шай эди.

– Командир, – мурожаат қиласди Шульмейстер, у кейинги лаҳзаларда мутлақо ўзини босиб олганди,

– менинг тақдирим хусусида қандай буйруқ берганингиздан хабарим йўқ. Аммо умид қиласанки, шўрлик гўдакларимни қўналга ортидаги шаҳар дарвозасига элтиб қўйиш ҳақидаги буйруғни дариф тутмасангиз керак. Агар иккови ўша ерга етиб борса, кўнглим тўқ бўларди, чунки ака-сингил у ёғига уйни топа оладилар.

– Дарҳақиқат, бундан осони йўқ, – таъкидлади командир. – Капитан, айтинг, кичкинтойларни уйга обориб қўйишишин. Мен иккови бирор корҳолга йўлиқишини сирам хоҳламайман... Сиз эса, дўстим, мен билан юринг.

Ранги бўзарган, кўзлари чақноқ йигитча ўтакаси ёрилган синглисисининг қўлидан тутганича сержант кузатувида йўлга тушиб, кўздан гойиб бўлди. Айни шу дамда де-ла-Месанж кўчасининг баққоли ғамгин бош эгган ва қўллари шалвираган алфозда тўрт аскар қуршовига тушиб, қўмондошлиқ қароргоҳи томон борарди.

## **БЕРТАНИНГ ХАВОТИРИ, МАРШАЛНИНГ ТАҲДИДИ**

Месанж кўчасидаги дўкон эшигида турган мунис ва мафтункор аёлнинг қадду қомати пештахтадаги тамаки ё атторликка хос лаш-лушларнинг ношонро на муҳитига мос келмасди. Унинг олтиндай жилвалианаётган соchlари ўртасидан фарқ очилган бўлиб, икки тарафдаги кокиллари чаккасидан айлантириб ўриб қўйилганди. Дераза ортида кўргазмага қўйилган ширинлик ва тамаки, лента ва газмол, темир ва мис, майда-чуйдалар ёнидаги аёлнинг қаймоқдай чеҳраси, қоп-қора шаҳло кўзлари, олтин-кумушу зеб-зийнатлардан холи ва эльзасча одми кастюмдаги нафис жуссаси дўконни янада безаб турарди. Унинг латиф қомати гўзал бир жонли ҳайкал эдики, дўкон бўсағасида ҳозиргина қад ростлаган деяверасиз.

Зоҳиран йигирма яшар кўринса ҳам, аслида йи гирма беш ёшда эди. Ҳусну латофати ўтган-кетганини шунчалар сеҳрлаб қўйгандики, аёлнинг ёшини суриштириш ақлга сифмасди. Шунингдек, унинг боши очиқ қиз ёки оиласи жувон экани ҳам ҳеч кимнинг хаёлида йўқ. Барча унинг беҳад гўзаллигига қалбан иқрор бўлиб, шунинг ўзи етарли эди.

Айни дамда Бертанинг нигоҳи кўчанинг қарши тарафида, Броли хиёбони сари интизор боқарди. У саломлашган қўшниларнинг таъзимларига ним табассум билан жавоб қилас, тўпланганларнинг бугуни янгиликлар ҳақидаги гап-сўзлари ҳам қулогига кирмас эди. Ҳарбийлар ташрифи туфайли бошланган гайриоддий бесаранжомликни ҳамсоялари қатори Берта ҳам кўриб турарди, албатта. Бир неча соатдирки, кўчалар гала-гала жангчиларга тўлиб-тошганди, лекин уларнинг қиёфаси ва мундирлари шаҳар аҳлига мутлақо нотаниш эди. Дақиқа сайин уни бундай бесамар кутишдан чалғитаётган харидорларнинг хизматига Берта Шульмейстер аранг улгуарди. Мудҳиш ва азоб тўла бир гусса юрагини эзив, мавҳум ваҳима лабларига гўё қулф солиб қўйганди. У ҳатто янги мижозларнинг хушомадинию нимагадир харидор бўлганини ҳам эшитмасди. Ундаги бу паришон кайфиятни жонкуяр қўшнилар сезишибди ва улардан энг яқини кечки пайт суриштириб қолди:

– Шульмейстер хоним, бугун жа-а камсухан кўринасизми?

– Эрим келмаяпти, – деди у, – болалар билан кетганига анча бўп қолди. Улар ҳарбийлар орасидан шаҳар томонга ўта олишмасмикан деб ташвишдаман.

– Бу иккаласи сизни кўп ҳалак қиласиган бўлди-да! Башарти туқсан болаларингиз бўлгандаям бунчалик қийналмасдингиз! Ўзи нимадан қўрқяпсиз?

– Билолмадим. Тўгри, Карл эҳтиёткор ва бақувват, лекин қизиқувчан, ҳар нарсанни яқиндан кўраман дейдид. Мен худди шунисини ўйлаб...

– Қўйсангиз-чи! Эрингиз юлдузни бенарвон уради-ку! Ҳозир кўрасиз, сиз ўнг томондан келишини кутасиз, у эса сўлдан келиб, «воҳ» дейди...

Савдогар йигит дўкон бекасига гап уқтириб бўлгач, қаҳва олишга кирган харидор аёл ҳам суҳбатга қўшилди:

– Менинг кичкинтой болаларга жоним ачиди. Ахир ота-оналари шўрлик жажжиларни оломон орасида судраб юришади-я! Бечоралар оёқ остида қоп кетса нима бўлади?

Улар суҳбатга андармон экан, эшикдан кираётган заиф ёргуни кимнингдир гавдаси батамом тўсиб қолди: остоңада бўйчан бир одам пайдо бўлди.

У келишган ва забардаст киши эди. Ўрмон мисоли қалин ва қундуздай соchlари чаккасида селкиллар, қулоқлари кўриниб-кўринмасди. Уст-бошига қараганда, нотаниш меҳмон давлатманд савдогарга ўхшарди. У эгнига катта ёқали узун сюртук ва оёғига панталон устидан қайтарма қўнжли этик кийганди. Бармоқла-рига қимматбаҳо узуклар тақиб олибди. Унинг қиёфа-сидан хушфель қатъият, бепарво дадиллик ва хийла калондимоглик сезилиб турарди. Тилига қараганда жанублик бўлса керак. У навжувон дўкондор хонимга ўта мулојимлик ва айни дамда ҳукмфармолик билан сўз қотди:

– Соҳибжамол бўтам, шу ерда темир-терсак билан савдо қилувчи... исмини ҳозир айтаман... шошманг-чи!.. Ҳа-а, Карл... Карл Мейстер яшайдими?.. Мейстердан олдин нимадир бор эди, аммо ёдимдан... Умуман, кимни сўраётганимни ўзингиз билмайсизми?

- Маъзур тутасиз, тақсир, бу уйда темир-терсак билан савдо қиласиган одам йўқ... Тўгри, менинг эримни Карл Шульмейстер дейишади, лекин унинг тижорати...

- Э-э, унинг тижорати билан нима ишим бор?.. Мен унинг эл кўзини бўяш учун қилаётган машгулотини айтдим. У эски темир-терсакларни сотарди, энди эса кўриб турибманки, алламбало олхўрию тамакига ўтибди, булар мени тариқчаям қизиқтирмайди. Бироқ уни кўришим ва бўлак масала устида бир дақиқа гаплашиб олишим керак. Айтишларича, у божхонага панд бериб, контрабанда билан шугулланаркан. Ҳатто шундай гаплар борки, эрингиз божхона ходимларини гоҳо ўққаям тутармиш. Худди мана шулар хусусида у билан сұхбатлашмоқчиман. Мен атайин ўзим ёлғиз келдим: аввало, уни чўчитгим йўқ, қолаверса, кийинишга бориш... ва шерикларимни... бошлаб келиш учун вақтим зое кетарди... Эрингиз қаерда? Ҳўш!..

- Бирортаям сўзингизга тушунолганам йўқ, тақсир, – деди хавотирдан юраги увишган Берта. – Ҳозир ўзим ёлғизман... Малол келмаса, сал кечроқ...

- Ие, кечириб қўядилир! Ҳали у келгани йўқ демоқчимисиз?.. Бўпти, кутиб ўтиравераман.

Жувон эътиroz билдиrmоқчи бўлди:

- Бироқ, тақсир...

- Бас! Мугомбирликни йигиштиринг, хонимча! Юпунгина дўконингизга ташрифимдан қувонинг, бу ерда жиндай ўтириб, тин олиш ўзимгаям ёқиб тушкидилардан аллақанчасини башка жойлардан кам Аполлонга ўхшамоги зарур...

Бу ўзига бино қўйган ~~ЗАМ~~ тақаббур зот бунаканни ~~ЗАМ~~ хушомадлардан аллақанчасини ~~ЗАМ~~ башка жойлардан кам ~~ЗАМ~~

«хотамтойларча» улашган бўлса ажабмас. Аниқки, ўзи илтифот қилган ҳар қандай аёлнинг баҳтиёрликдан терисига сифмай қолишига ҳам унинг ишончи комил. У Берта Шульмейстерга боқаркан, гўё кўзлари тилга кирарди: «Наҳотки, марҳаматли эмасман! Ахир оқил одамман-ку! Мени рад этиб бўлти!» Аммо унинг бу қарорлари аслида гўллик бўлиб, масхарага арзирди, холос.

Шу аснода Шульмейстер хонимнинг ранг-рўйи мутлақо бўзариб кетганди. Нотаниш киши кирган дамдаёқ харидорлар дўконни тарк этиб, Берта у билан ёлғиз қолганди. Манави қўпол ва сурбет хушомадлар ниқоби ортига фитна-фасоднинг ҳар турини тўқувчи устаси фаранг шахс яширинганини Бертанинг кўнгли сезиб турарди. Бироқ бундан аввал унинг аёллик гурури түғён кўтарди:

– Мен ўзимнинг уйимдаман, ёлғиз қолишга ҳаққим бор... Қолаверса, кеч бўлди, дўконни ёпишим зарур. Марҳамат қилиб, бу ерни бўшатиб қўйсангиз?

Нотаниш киши яйраб кулиб олди. Эшитганларига ақл бовар қилмасди, бу ҳайратланарли ва тайриодатий эди. «Кетинг» дейишга журъатнинг топилганини-чи!.. Афтидан, бу аёл сўзининг одобдан эмаслигини хаёлига ҳам келтирмасди. Кетиш... Ундан кета қолишини сўради, ҳатто буюрди-я!.. Энди унинг қора кўзлари аёлга яна ҳам қизиқиброқ тикилди. Шунчалар сулув, шунчалар латиф бўла туриб, меҳмонни қувиб солмоқчи!..

– Азизам, сиз мени умуман танимадингиз, энди бунга шубҳам қолгани йўқ. Бунга ишониш қийин бўлса-да, бари бир тан олиш керак. Мана энди гап топилиб қолди! – овозини кўтарди у. – Аммо анави овсар Берtranнинг айтишича, мен ўз суратимни ўзгартира олмас эмишман!.. Наҳотки сиз менинг кимлигимни билмасангиз? Худо шоҳид, бундай вазиятда қолишим

етти ухлаб тушимга кирган эмасди! Келинг, яхшироқ разм солинг-чи!.. Хўш?.. Бари бир танимаяпсизми?

У яна хандон уриб хоҳолай кетди.

- Аммо, тақсир, - деди Берта тушунарли қилиб, - модомики сизнинг номингиз мен хоҳламасам-да, уйимда тунаб қолишингизга далил бўла оларкан, бўлти, қани кимлигингизни айтингчи! Отингиз нима? Агарда айтишни истамасангиз, марҳамат, дўконимни бўшатинг, қолаверса, мен эшикни полиция талаб қилганидай кечикмасдан беркитишим зарур.

- Эй гўзалим, ростини айтсан, бу мулоҳазаларингиз билан фариштага ўхшайсиз! Полиция хусусида хавотирланманг. Мабодо келиб қолса, ўзим пешвоз чиқаман ва кўнглингиз тўқ бўлсинки, минбаъд бошингизни оғрита олмайди.

- Бўлса бордир, тақсир, бироқ эшитиб қўйингки, ҳомийлигингизга мутлақо зормасман! Менга хиралик қилишингиз ақлдан эмасди, энди эса хафа қила бошладингиз. Агар дарҳол кетмас экансиз, ёрдамга чақираман.

- Жин урсин! Бўтам, ахир ўзим сиз сўраган ўша најжоткорман-ку! - у аёл қаршисида бўй-бастини ростлади. Унинг айни ҳолдаги сиёқи артистона бўлса-да, унда сир ва салобат яққол намоён эди. - Эрингизни кутиб ўтиришимга ижозат бериш учун кимлигимни билгингиз келяптими? Марҳамат, била қолинг. Мени Мюрат дейдилар!

Берта унга бепарво назар солди-да, такрор савол берди:

- Мюрат?

- Ҳа, Мюрат - империя шаҳзодаси, Франциянинг ҳам адмирали, ҳам маршали. Наполеоннинг куёви, биринчи даражали «Фахрий легион» ордени нишондори. Энди менинг бу ерда қолишимни маъқул кўрарсиз, сулув қиз?

– Шаҳзода, куч-кудрат ва шон-шуҳрат бобида қанчалар зўр бўлсангиз, сиздан кетишингизни сўраётган аёлга зўравонлик қилиш ҳуқуқингиз шунчалар кам деб биламан! Бироқ Франция маршали бу оқшом ўз қўналғасини мана шу дўконга кўчирмоққа саъй қилгудай бўлса, унга қандай туйғулар етовида жой берганимни ўзи бемалол тушуна олади... Хуллас, мен кета қоламан.

– Ие, сулувхон, ҳали шаҳзодаларга тоб-тоқатимиз йўқми, а?

– Мен уларни тан олсамгина ҳурмат қиласман. Илтимос, ўзим кета қолайин...

– Йўқ, йўқ, ўтинаман! Мени ташлаб кетманг! Ажабо, шундай аёлсизки, маҳващдек соҳибжамоллик устига дадил бетгачопарлигинги ҳам бор ва буни хаспўшламайсиз ҳам... Кетишини хаёлингизгаям келтирманг, жин урсин!.. Мени сеҳрлаб қўйдингиз, ала-лоқибат бу ерга нима учун келганимниям унудим. Ҳеч қиси йўқ, каминага биргина табассумингиз кифоя, эрингизни афв этаман.

– Эримни?.. Нима демоқчисиз ўзи? Унинг боши хатардами? Гуноҳи нима?

– Уми? Деярли бегуноҳ. У Францияга душман бўлганларнинг жосуси, бор гап шу! У қўшинларимиз ҳракати ҳақида австрияликларга маълумот бериб турган. Баварияда бизнинг анчагина дўстларимиз бор, эрингизнинг хоинлигига далил-исботни ўша ерда топдим. Бу тўғрида императорга маълум қилдим, уни отиб ташлашни буюрса ажабмас!.. Бай-бай-бай қўрқитиб юборганим кўриниб турибди. Сизни безгак тутяпти-ку! Ахир нега жагимни очдингиз, жин урсин!..

У беихтиёр далда бериш учун аёлнинг ёнига ўтди. Бу ҳракат аввалигидай шунчаки хушомад бўлмасдан, аксинча, чинакам жонкуярлик эди. Ҳар аёлга ошиқ бўлувчи бу жигарсўхта шу тобда самимий йигитга айланиб қолганди.

– Бу қип-қизил түхмат, – деди Берта уни кўксидан итариб. – Эрим – фариштадай покдомон инсон. Ҳа, фариштадай, билиб қўйинг! У – энг оғиркарвон, содда ва ҳалол одам. Сиз унинг бошидан мағзава тўқяпсиз, у эса икки етимчани сайр қилдириб юрибди, биз бу шўрлик болаларни фарзанд қилиб олганмиз, бағри-мизни очганмиз... Сиз келганда учовларини кутаёт-ган эдим... Қанақасига у жосус бўлади? Нега ундей дейсиз!.. Сизга айтдим-ку, у болаларга ҳарбийларни кўрсатиш учун оп кетди!..

– Етар, аслида сизга индамасам бўларкан. Бу ҳақда ортиқ бош оғритманг, мен ўзим тафтиш қила-ман, ўзим тагига етаман. Эрингиз душманга хабар бераетгани ҳақида мени ишонтиришганди, агар бу тасдиқланмаса, асло хавотир олманг. Маршал Мюрат ваъда берадики, унга ҳеч нарса бўлмайди.

Бертанинг ўтинч ва ишонч тўла кўзлари умид билан боқаркан, маршалнинг қалбида гасконияликларга хос жўмардлик уйғонди-да, актёрчасига тантанавор хитоб қилди:

– Мен сизга Франция шаҳзодаси сўзини бердим!

Шунинг устига гўё унинг акс садосидай, қўққисдан шодон қаҳқаҳа жаранглади. Остонада икки олтинсоч болакай кўринди ва жувон улар томон отилиб, севинганидан қийқириб юборди:

– Хайрият! Келишди-я!

Таассуфки, уни яна қайғу босиб қолди! Ахир икко-ви холос-ку! Уларни олиб келган кичик зобит зинада турганча аёлга разм соларди.

– Эрим қани? – сўради у оstonадаги кузатувчидан.

– Билмадим, хоним. Менга иккала болани олиб келиш буюрилган. Ўйлайманки, буларни етаклаб юрган одамни командир ҳибста олди.

– Түшунтириб гапир! – Мюратнинг гулдуроос овози жаранглади. – Ундан аввал қаддингни гоз тут ва дарҳол айт, қаёқдан келдинг?

Сержант дўконга кирди. У ўзини бунчалар сўроққа тутаётган оддий кийимдаги ғалати одамга бир сидра разм солди. Сўнгра пошналарини бир-бирига уриштириб, ўзини ростлади-да, чапдастлик билан қўлини чаккасига тегизиб, орасида «ҳа, маршал», «йўқ, маршал» деганича, нимаики кўрган бўлса, муҳтасар айтиб берди.

Аслида у тузукроқ тушунтиrolгани ҳам йўқ. Сержантнинг сўзича, қандайдир томошаталаб киши тақиқланган қўналға оралаб ўтишга интилибди. У ўша ондаёқ франциялик эмаслигини тан олибди. Тўхтатилгач, қаршилик ҳам кўрсатмабди.

- Ажнабий эканига ўзи иқрор бўлдими?
- Ҳа, маршал.
- Қайси давлатдан?
- Немис эди шекилли.

Ганснинг ранги ўчиб кетган бўлса-да, шаҳд билан унинг сўзини бўлди:

- Карл дадам уларга шу ерда яшашга рухсати борлигиниям айтди.
- Жудаям зўр! – деди маршал ва ён дафтаридан бир вараққа нималарнидир ёзиб, сержантга тутқазди: – Кўмондонга манави буйруғни берасан. Зудлик билан жўна!..

Мюрат дўконга кирганидан буён илк бор ўзини шаҳзода сифатида намоён этди ва батамом гурбатда қолган жувонга тасалли бериш учун деди:

- Хоним, эрингизни қўйиб юборишади ва қайтиб келади. Эртага эрталаб менинг бош штабимга борсин, уни кутиб тураман. Сиз бу гапимни эрингизга етказасиз деб умид қиласман, гаплашиб олишим керак. Унга дахлдор ҳамма нарсадан хабардор бўлишим зарур. Ўзингиз мард ва эътимодли аёл экансиз, сизга мутлақо

ишондим. Ўйлайманки, сиз билан бундай муомалада бўлаётганим яхши ниятда эканини ўзингиз мушоҳада қила оласиз... Ахир дарҳол чора кўришга ҳаққим бўлгани ҳолда, бу ишни тўхтатиб туришим ҳазилакам гап эмас. Бироқ энди кечиктираман: бу сизга етказган азиятим эвазига мен тўлаётган товонки, афсусдаман. Ўзимга номуносиб бу ишни Рейннинг нариги ёғида бошлаб, бугунги оқшомда якунламоқчи эдим. Бунақа машгулот каминага мутлақо синашта эмас, зеро, мен душман билан доимо фақат жанг майдонида тўқнашган аскарман. Буни ҳализамон қайтиб келадиган бадбахтга уқтириб қўйинг. Жуда қаттиқ тайинлангки, энди ҳар қандай найрангбозлигининг бозори касод, Худо кўрсатмасин, қочиб қутулишни ўйласа, бу тентаклиги фақат ўзига зарар. Менинг яхшилигим шуки, шу ерда тураверишига имкон бераман, аммо унинг шахси шубҳалардан батамом холи бўлмагунча ҳар бир қадами назоратда бўлади. Агарда мен бўлакча йўл тутсам, император ва ҳарбийлар наздида ўзимга хоин маршал деган тавқи лаънатни орттириб оламан. Яхши қолинг, хоним, хафа бўлманг ва ҳар бир сўзим қулогингизда турсин!

У бекага таъзим қилди ва чиқиб кетди, маршалнинг алп қомати қоронгилик қўйнида ғойиб бўлди. Аёл эса кутилмаган шумхабар зарбидан гарангсиб қолаверди. У иккала норасидани қанотига олганича жиққа ёш кўзларини бир нуқтага тикиб, таёқдай қотганди.

## ЭР ВА ХОТИН

Салдан сўнг Берта эс-ҳушини йигиб олди. Анқайиб туравергани билан бўлмасди-да. Одатий ташвишлар уни аста-секин овунтирди. Дўконни қулфлаб, чироқларни ўчирди ва болаларни овқатлантиргач, жой-жойига ётқизди.

Лизбета ухлаб қолди ва Берта энди чиқиб кетмоқчи әдик, Ганс ғивирлай бошлади. У қўлини чойшаб устига чиқариб, курсига ташланган кўйлагига узатди-да, ниманидир олиб, ёстиғи остига яширди. Берта ундан сўраб ўтирмади, сабр қўйлоқчи бўлди. Ҳеч қанча ўтмасдан Ганснинг кўзлари юмилди. Икковини ҳам ўз фарзандидай севган Берта Ганснинг хуфёна ҳаракатидан ташвишланиб, бола эҳтиёткорлик билан яширган нарсани оналарча жонсараклик билан ёстиқ остидан олди ва эрининг ёндафттарчасини дарҳол таниди. У бирор бор вараклаб кўрмаган эса-да, муқовасини биларди. Ўша ондаёқ унинг шуурида нимадир ялт этди: нега буни Гансга бериб қўйибди? Ёмон хаёлга борди: наҳотки Мюратнинг айтганлари ҳақиқат бўлса?..

Унинг вужудини титроқ босди, сирли дафтарни олиб, ҳамма эшикларни беркитди. Сўнгра шоша-пеша бошидан-охиригача вараклаб чиқди. Шунда унинг айrim саҳифалари йиртиб олинганини пайқади. Хўш, нега? Карл уларни йиртиш билан далилни йўқотган... ё айблашаётганидек, ўзини ёллаган душманга берган бўлса-чи?

Мавжуд варакларга мутлақо аҳамиятсиз гаплар ва қандайдир иероглифлар ёзилган бўлиб, Берта тушунолмади. Умуман, дафтарчада аёлдаги шубҳаларни тасдиқловчи ҳеч нарса йўқ бўлиб, бирорта аниқ исбот бўлгудай маълумот ёзилган эмасди!

У ана шу мушоҳадалар билан сўнгти саҳифани очди.

Мана энди ҳаммаси равшан. Хоинлик содир бўлгани аниқ. Рад этишнинг иложи йўқ. Аёл кўзи кўриб турган ҳақиқатни рад қилишга қанчалик интилмасин, манави сатрлар унинг бу уринишини чиппакка чиқараверарди:

«Валинеъматининг махфий топшириги билан Германия сафарига кетган кавалерия генерали, маълум

ва машхур Мюрат ҳалигача қайтгани йўқ. Куни кеча генерал Берtran қайтиб келди, унга ҳам хуфиёна буйруқ...»

Берtran!.. Мюрат ҳозиргина афтидан шу номни тилга олганди шекилли? Ўша! Энди аёнки...

У давомини ўқий кетди:

«Улар шунчалар нўноқлик билан ниқобланган эдики, қандай қилиб душман қўлига тушиб қолмади – шунисига ҳайронман.»

– Айгоқчи! Жосус!..

Аёл ғам-аламда ўйга чўмди: ўзи суйган, жондай эъзозлаган эри жосус экан...

– Ҳибсга олишаётганда ёндафтарини болага бериб хўб иш қилиби-да, – хаёл сурди у. – Анави ёзувлар тайёр далил бўларди-қоларди!.. Шубҳа йўқки, ушбу маълумотларни холис ниятда қоғозга туширмаган, билъакс дафтарини бунчалар яширмаган бўлур эди.

Бертанинг кўзлари жиққа ёшга тўлиб, миясига қон тепди. Салгина бурун ўзи билан суҳбатлашган машхур қўмондоннинг улугвор сиймоси кўз олдида жонланди.

– Ҳалиги кишидай ҳарбий асло сотқин бўлиши мумкин эмас! – кўнглидан кечирди у. – У ғаним устига тикка босиб бораркан, ортидаги аскарлари кўрсин учун мағрур кўксига олтинранг нишонларини тақиб олади. Айтишларича, ҳеч қачон калта қиличдан бошқа қуроли бўлмас экан, унинг ҳам узунлиги ов миттиғидан ортиқмас. Жангчилар боши узра кўтарилиган ана шу шпагадан маршални танир эмишлар. Аслида унинг бу яроги ҳеч маҳал ажал тифи бўлмаган. Мюрат урушни бошқаради, зафар йўлида изланади, лекин душманни ўлдиришни бошқаларга ҳавола этади...

Унинг эри эса!..

Бертанинг ақли ўзига келиб, анчагина шубҳали нарсаларни эслай бошлади. Хўш, товар олишга бор-

ганини ёки қай бир идорадагиларнинг бюрократлиги туфайли кечикканини баҳона қилиб, ярим тунгача қайларда юради ўзи? Ёки айтайлик, чегара миңтақасида яшовчиларнинг ҳаммаси озми-кўпми контрабандага қўл ургани каби, Мюрат тўғри таъкидлаганидек, Шульмейстер ҳам божхонанинг кўзини шамгалат қилиб, уларга қарши ҳийла ё қуролни ишга солган бўлса-чи? Аммо унинг машғулоти фақат контрабанданинг ўзимикан? Эҳтимол, у тун пардаси остида душманларга маълумот берадигандир? Дарвоҷе, қарзларни тўлаш ва алламбало совғалар учун пулларни қаёқдан олмоқда?

Ана шу дамда Берта ўзини хиёнаткорнинг ҳамтоворидай ҳис этди...

Бироқ яхшиямки қалбларни туташтирувчи оловли ришталар бирданига, дарҳол узилиб кетавермайди. Бертанинг шуурида ақл бовар қилмас иснод ва тенги йўқ лазиз хотираларнинг ўзаро кураши бошланди...

Бу хотиралар унга шунчалар яқин эдики, болдай таъмини ҳамиша қалбида тұярди! У садоқатли ва севикли ёрини оқловчи далилларни топа кетди. Бертанинг марҳума опасидан қолган етимларни фарзандликка олишда Шульмейстернинг олийжаноблигини унутиб бўладими? У болаларни ўз фарзандидай кўрмаяптими? Иккови билан ўйнайди, ўқиши-ёзиши ўргатади, уларнинг келажаги устида оталарча қайғуради. Аёлинин чин ошиқлардай сужидики!..

– Сотқин? – куйиб кетди Берта. – Ахир у эр ва ота эди-ку! Йўқ, бу ақлга сифмайди ахир!

Шу пайт эшик очилиб, Шульмейстер кириб келди.

Аёлининг бўзарган ва аламнок чеҳрасини кўрибок, бу ўзи туфайли деб ўйлади:

– Сен бечорани ташвишга қўйдимми, а? Болалар келишдими?

56 Берта қўли билан имо қилди:

– Улар хонасида, ухлаб қолишиди.

– Худойимга шукур! Зўравонликни қараб қўй! Ақлинг бовар қилмайди... Ие, сенга нима бўлди ўзи? Намунча ҳаяжонланмасанг?

Берта ўзини тиклади ва нигоҳи эрининг кўзлари билан тўқнашмаслиги учун ерга боққанча ёндафтарни узатди.

– Бунда ёзилганларни ўқиб чиқдим, – деди у. – Илк бор шундай қилишим, аввал дафтарчангни очган ҳам эмасдим. Бироқ шу биринчи ножӯя ишим мени суюнтиргани йўқ. Мен ўзимча тушуниб... қўрқиб кетдим. Айт-чи, мени овунтира оласанми? Ўз қўлларинг билан битилган гапларни тушунтириб бергин-чи. Агарда бунга бегоналарнинг кўзи тушгудай бўлса, не хаёлларга борарди?.. Мен, ўз жуфти ҳалолинг, Шульмейстер деган номингни жон деб қабул этган ва бор садоқатини сенга бағишлаган бир аёл нима деб ўйлайин?.. Нега индамаяпсан? Айта қолсанг-чи, ахир сен бу маълумотларни хоинлик ғаразида ёзган эмасдирсан, а? Ёлвориб сўрайман, буни душман давлат томонидаги кимгадир сотиш учун ёзмаганингни исбот қил!.. Оқшом чоги сени ахтариб келишди... ҳибсга олиш учун.

– Ким келди? Гапир, гапира қол!

– Ие, ҳали бор гапинг, бор жавобинг шуми? Бoshинг қанчалар хатарда қолгани ҳақидаги хабарни мендан эшитмоқчимисан? Лоақал менинг жонимга не кўргилик чанг солиши мумкинлигини айта олмайсанми? Ахир умид билан бир ёстиқقا бош қўйган рафиқанг эдим-ку, Карл! Менинг қисматим сеники эди, сеники бўлиб қолаверади! Сен шуни, худди шуни эсда тут! Менимча, ёнингда жондай яқин одаминг тураркан, у хусусида қайғуриш зарур. Сен ҳамиша менинг

хаёлимдасан. Наҳотки манави охиривой, машъум ва жирканч қылмишга қўл ураётиб, мен ва болалар сендан кўра кўпроқ жабр чекишимизни ўйлаб кўрмадинг? Сени ўлдириб қўйишлари мумкинлиги, биз эса қаровсиз, ҳамма юз ўтирган, иснодга ботган ҳолда ёлғиз қолишимиз, бу мамлакатдан бадарга бўлишимиз ҳам хаёлингга келгани йўқми? Мен бу ерларда муқим яшаб, баҳтиёр ҳаёт кечирмоқчи эдим-ку!.. Карл, рафиқанг бўлишдан ор қилишим ҳам сенга бари бирми?

– Бу нима деганинг? – жавоб қайтарди Шульмейстер. – Сени қанчалар севишимни билмайсанми? Бу дунёда бошқа илинжим йўқ ва нимаики қилсан, фақат сен учун қиласман!

– Худди шуни билганимдан сенга ишонаман ва шунинг учун ҳам ҳозир мени уйда кўриб турибсан. Агар шубҳаланганимда, жиноят қилишга қодирсан ёки машъум бўлса-да, бирор узрли баҳона топа олмайсан деган хаёлга борганимда, қайтишингни кутиб ўтирмасдим. Ҳайё-ҳай деб, бошим оққан томонга кетворардим.

– Жиноят дейсанми?

– Бизга бағрини очган давлатга хиёнатни, бизни ризқига шерик қилган юртга сотқинлигингни оқлаб бўлади деб ўйлайсанми? Шунақами ҳали?

– Бу мамлакат – менинг ватаним эмас!

– Унда ватанинг қаёқда? Дарёнинг нариги соҳилидами? Германиями? Ахир ўзинг улар сенга кўп бадкорликлар қилишгани, уларни итингдан ҳам ёмон кўришингни, шу боис ҳам тўйимиз арафасида уларнинг додини бериб қўйганингта иқрор бўлмабмидинг? Шундайми ахир?

– Жуда тўгри.

– Бу юртларнинг барини сотоверсанг, ахийри мен қай ватанга бош ураман?

– Берта, ҳаддингдан ошмаяпсанми? Ўйлаб гапир.  
– Сен менинг ишонган тогим, хожамсан, аммо ҳаётимда биринчи марта сенга беҳурматлик қилган бўлсам, бу менинг айбим эмас, Карл. Биласан, эр-хотин умрдошлик қиларкан, айни чоғда шодлик ва ғам-гуссани ҳам ўзаро бирга баҳам кўришлари зарур. Бир ёстиққа бош қўйишигина кифоя қилмайди. Икков дўст, ўртоқ бўлиши керакки, икковнинг яқинлиги бир жон – бир танга, ор-номуси ҳам ягона бойликка айлансин. Сен-чи, Карл, номусимизнинг бошига не кунни солмоқдасан? Қонимизни, жонимизни нима қиласан?..

Шульмейстернинг тоқати тоқ бўлди ва қўл силтаб эшик томонга юзланди. Унинг бети лип-лип учар, бағоят ранжигани кўриниб турарди. Жувон ҳам эшик сари отилди ва эрининг йўлини тўсди.

– Йўқ, ҳеч қаёққа кетмайсан! – қичқирди у. – Бундай қилсанг пасткашлик бўлади, мен бунга йўл қўймайман, боиси сен пасткаш одамлардан эмассан. Колаверса, қочиб қутуламан десанг, чучварани хом санайсан, негаки сен кузатув остидасан ва дарҳол қўлга тушасан – бу хусусда мени огоҳлантириб кетишиди. Йўқ, – қўшимча қилди у, – ўз хатойингни менинг кўз олдимда тузатишинг шарт. Энди бас, Карл, бир неча дақиқа мард бўлгин-да, бор гапни очиқ-ойдин айтиб бер. Токи сен ҳаммамизни мубтало қилган хатардан қутулиш йўлини биргаликда ўйлайлик ва биргаликда ёруғликка чиқиб олайлик. Менга ишон ва иқрор бўл! Тез орада икковлашиб уринамиз ва бу иснод саҳифасини умр дафтариңдан чиқариб ташлаймиз.

– Сен фариштасан! – деди Шульмейстер ва аёлининг қўлини кафтлари орасига олди. – Сен менинг барҳёт виждонимсан ва манави таңбеху даккиларингнинг ҳаммаси айни ҳақиқат. Аммо нима учун мендан

ноҳақман деган иқрорни талаб қиласан? Ахир мен одамлардан ёмонликдан бошқа нарса кўрмадим ва алалоқибат, ёруғ дунёда ҳаммага қарши қафтигма туфлаб қўйгандим. Буни пул топиш ниятида қилганим ҳам тўғри, сен учун, болаларни деб, ҳар куни кўзим кўрган, қулогим эшитган маълумотни пулга ўтказганман. На чора!.. Бу мушоҳадаларим учун мендан бунчалар қаттиқ ёзгирма! Буни изоҳлаш учун менда шундай бир узрли сабаб борки, уни сен билмайсан. Йўқ! Ўзимни оқлашга уринмайман. Модомики сен мени койир экансан, демак, мен ноҳақман! Сенга нима деб кетишган бўлса, билганингча уларни айтиб бер. Ўргат, мени тўғри йўлга сол. Жонгинам Берта, сенинг баҳтиёргилинг ва хотиржамлигинг учун қанча куч ва матонатим бўлса, барини сарф қиласан. Сени ишонтириб айтаманки, ўзимнинг жиноят содир этаётганимни билмасдим. Бари бир энди пинҳона касбни батамом йигиштираман, лекин бу соҳада жа-а устаси фаранг бўп кетувдим. Сенга манзур бўлиш учун нима десанг, ҳаммасини уддалай оламан. Эшлиб қўй, ҳаммасини! Фақат сенга маъқул келса бас, барча нарсадан кечаман, исталган шартингни адо этаман менга ҳеч-ҳеч малол келмайди, оғирлик қиласан!..

Шульмейстер шундай деб, ягона халоскори қошида бош эгди. Унинг бу ҳолида ўз қадрини ерга уриш эмас, оғир бир ташвиш ва соддалиқ намоён эди. Шубҳа-гумонлар туфайли қалби озурда бўлган дарёдил аёл уни кечирди. Шульмейстер хотинининг юрагини ҳалигача тушуна олмаганини самимият билан англаб, ўзининг надомат чекаёттанини ҳам далиллай олганди. Эртага тонгда Мюрат ҳузурига бориб, борҳақиқатни очиқ айтишга ваъда берди.

— Ана ундан кейин келажакда нима қилишни ўйлаб кўрамиз, — кўнглидан ўтказди жувон.

и<sup>и</sup> Ва Берта ўзигагина хос латофат билан эрининг пинжига кирди, бошини унинг елкасига қўйди. Шульмейстернинг кўзлари шишгандай ва йиғлагандай эди.

Аммо минбаъд унинг кўз ёши тўкилмайди!

## НАПОЛЕОН БИЛАН ЮЗМА-ЮЗ

Эртасига тонг чоги Шульмейстер Мюрат қошига йўл олди. Уни префектуранинг<sup>1</sup> залига олиб киришиди. Хонада икки киши бор эди: бири – Страсбург шаҳри префекти<sup>2</sup> Шеे Шульмейстерга таниш бўлиб, наригиси зоҳиридан ҳозиргина олис сафардан қайтганга ўхшарди. Эгнидаги орден-медалсиз кавалерия полковниги либосини чанг-губор қоплаган бўлса-да, калон зотлардан экани кўриниб турибди. Одмигина нишон қадалган катта ва қора шляпаси столга ташлаб қўйилганди. Атрофидағи олий мартабали ҳарбийлар тик тургани ҳолда биргина у стулга ўтириб олган, ҳамма унга эҳтиром билан муомала қиласди. Шульмейстер унинг салобатли кўринишига дарҳол эътибор берди. У анави «касби» туфайли кишиларни зимдан кузатишга уста эди. Айниқса бу одамнинг тарошланган рангпар юзи, қўйкўзларининг ўйноқи ва ўткир нигоҳига диққат қилди-да, ўзига-ўзи савол берди:

– Бу ким бўлди ўзи?

Нотаниш зодагоннинг диққат билан, айни чоғда қилт этмай ўтириши уни қизиқтириб қолганди. Пөлковник мундириининг одимилиги унга кўрсатилаётган иззат-икромга сира мос келмасди. Унинг кимлиги ҳақида ўйлаб, Шульмейстернинг боши қотиб қолганди.

– Бу – қўмондон! Бу – бошлиқ!..

<sup>1</sup> Префектура – шаҳар ҳокимияти.

<sup>2</sup> Префект – шаҳар ҳокими.

Мюрат ва префект Шульмейстерга саҳнадаги совук ижро чилардай туюла бошлади.

Нотаниш амалдорнинг оппоқ ва ингичка қўллари столдан кўтарилиди-да, сўроқни бошлашга имо қилди.

- Отингиз Карл-Людвиг Шульмейстерми?
- Ҳа, маршал.
- Қай жиноятда айбланаёттанингизни биласизми?
- Ҳа, биламан.
- Хўш, бу ҳақда нима дейсиз?
- Ҳеч нарса дея олмайман. Бу – ҳақиқат.
- Бундан чиқдики, қўшиналаримиз ҳаракати борасида эрцгерцог Фердинанд штабига маълумот бериб турганингизни тан оласиз, шундайми?
- Ҳа, тан оламан.
- Бу «бежирим» ҳунар билан қачондан буён шугулланасиз?
- Сиз эрцгерцог қўшиналари ҳақида маълумот тўплаш учун Германияга кетган куни бошлаган эдим, маршал жаноблари.
- Ие, менинг ишим – бошқа масала-ку, ўйлайманки, бу борада мени айбдор қилмассиз...
- Йўқ, албатта! Бу гапни ўзимни оқлаш даъвосида айтмадим. Фақат вактни аниқлаб олишингиз учун эслатдим, холос.
- Хўш, айнан қандай сирларни ёвларга сотдингиз? Сизни огоҳлантириб айтаманки, бу гапларнинг бир қисмини Баварияда қўлга олинган қоғозлардан билиб бўлганман.
- Кўзим кўрган ҳамма нарсани, – жавоб қайтарди Шульмейстер. – Масалан, қўшиналарнинг олдинроқ Булонга йигилган гуруҳи пайдар-пай Рейн бўйига кўчирилиши ҳақида хабар бердим. Дарё кечувларидаги аскарларнинг тахминий сони тўғрисида маълумот юборгандим. Страсбург томонларга келсак, бу

ерларни жуда яхши биламан, ҳарбий ҳаракатларни ўта яқиндан кузатиш ва ўрганиш имкониятим бор. Агар буни мен қандай амалга оширишим сизни қизиқтирса, мана қўлимда куни кеча битилган хуфянома турибди. Унга мен «юмалоқбошлар» аталувчи арас гренадёрлар батальони кўчирилаётганини қайд этгандим. «Юмалоқбошлар»нинг энди соchlарига упа сепишмаётгани, менимча жудаям соз. Айни хабарни ҳам биринчи имкон тугилиши биланоқ у ёқقا ҳавола қилмоқчи эдим. Кечаки мени ҳибста олишган чоғи ҳам шу ёзув киссамда эди, уни мен дафтарчамдаги вараққа туширгандим.

- Ие, сизни тинтиб кўришгани йўқмиди?
- Албатта, чўнтакларимни титкилашди, бироқ мен уни ўғилчамнинг ёқаси қатига яширишга улгурувдим.
- Хўш, буни менга нима учун айтиб беряпсиз?
- Қилган ишимдан нечоғли пушаймон эканимни далиллаш учун... Француз қўшинларига зиён етказишим нотўғри қилмиш эканини билмасдим-да.
- Билмасангиз билиб қўйингки, бундай ишларда кейинги пушмон – ўзингга душман! Айгоқчи қўлга тушдими – тамом: унинг иқрор бўлиш-бўлмаслигидан қатъий назар, ё отиласди, ё осиласди!
- Чин дилдан иқрорлигимни инобатга олиб, осиш ўрнига отиб ўлдиришингиздан умидворман, холос.

Сўроқнинг ҳамма воситаларини сарфлаб бўлган Мюрат энди қандай савол беришни ҳам билмасди. Шульмейстернинг изоҳ ва иқрор сўзлари шунчалар қонуний ва батафсил эдики, тергов батамом якунига етганди. У индамасдан қўлидаги дафтарчани егерлар полковнигига узатди.

- Бас, Мюрат, – деди у, – бўлак гапингга ҳожат қолганиям йўқ!

Сўнгра у жосуснинг ёзувларига бир сидра назар солди-да, Шульмейстерга тикилиб қолди:

– Маълумотларингизни буюк герцогга қандай жўнатардингиз?

- Сўнгисини Ульмга юборувдим.
- Биласизми, етиб борганми, йўқми?
- Уч кун бурун қўлига теккан бўлиши керак.
- Охирги қоғозингизни у қачон олади?
- Бутун эрталаб.
- Унда нималар ёзилган?
- Французлар Рейндан ўтибоқ, Қора ўрмон дараси орқали аввал синалган ҳужум усулини қўллашмоқчи эканини ёзувдим. Қўшинлар ададини олтмиш минг чамалаган бўлсам-да, лекин...
  - Лекин?.. Очиқроқ айтинг!
  - Лекин иқрорманки, ўз хабарларимга энди ўзим ишонмаяпман.
  - Хўш, нега?
  - Шунинг учунки аввало, турли кечувлардан ўтадиган ҳарбийлар миқдорини айни чоғда бир яrim минг ҳисоблагандим. Қолаверса, бутун дунё аввал си наб кўрган жанг усулларини қўллашда генерал Бонапарт нечоғли устомон ва қув эканини энди-энди билib турибман.

Шульмейстер ана шу сўзларни айтар экан, тепа сочи тикка бўлган префект қаддини ростлади ва унга танбеҳ беришдан ўзини тия олмади:

– Ундай эмас, «император Наполеон ҳазрати олийлари» деб тилга олиш шарт!

Шульмейстер соддадиллик билан эътиroz билдириди:

– Мен унинг номини Италия генерали эканлиги билан уйғун тилга олдим, зоро, французлар императорини камситиш ниятим йўқ эди.

«Жосуснинг бу сўзларидан полковникнинг силлиқ юзига табассум қалқди.

– Шундай экан, – деди полковник, – агарда ҳозир «Бонапарт»нинг асл режасини билиб олсангиз, ўша лаҳзадаёқ улуг герцогнинг зобитларига хабар қилардингиз. Тўғрими? Манави одам гарчи мени танимаса-да, аммо режаларимни сезиб турса: бундай вазиятда ҳарбий ҳийлаларимни душман билмайди деб умид қилишим мумкинми ахир? Наҳотки ғанимларни сохта маълумотлар билан чалғитиб юборишнинг ишончли воситаси бўлмаса!..

Наполеон Шульмейстерга қараб тутоқиб кетди:

– Сизга бу ерда пишириб қўйибдими? Хўш? Ҳа-а, билардим!.. Қулоқ сол, Мюрат, ҳаммаси жонимга тегди!.. Айт, манавини кўзимдан йўқотишин!

– Уни нима қилайлик, олампаноҳ, буюринг!

– Бўпти, кейинроқ... яхиси, тўхтанглар! Уни он кетишинасин, шу ерда тургани маъқул. Ундан ҳозироқ у-бу гап сўраб қоларман...

Наполеон иккilanарди. Айгоқчидағи зукколик унсурлари уни ўйлантириб қўйганди.

«Эҳтимол, ундан битта-яримта гап олиш мумкин-дир. Хўш, нима тўгрисида? Иттифоқчи ёвлар қўшини хусусидами? Бу ўзига маълум-ку! Уларнинг қайларда экани-чи? Эрцгерцог Карлнинг юз минг жангчиси Италиядада турибди, эрцгерцог Фердинанд ва генерал Мак қўмондонлигидаги саксон минг киши Ульмда жойлашган, Кутузов раҳнамолигидаги олтмиш минг рус аскари яна ўттиз кун йўл босибгина етиб кела олади. Ҳар ҳолда айни дамгача мана шулар аниқланган. Россия подшоси катта қўшин тўплаётган эса-да, у ҳали шунчалар олисдаки!.. Ундей бўлса, душманларнинг жанговар режалари-чи? Бироқ уларда бундай режанинг ўзи йўқ...»

Наполеон шуларни кўнглидан ўтказаркан, жоссдан бирон нимани суриштиришга эҳтиёж қолмаганини хulosа қилди. У елкасини қисди-да, Шеега маҳбусни шу хонада ушлаб, кўз-қулоқ бўлишни пичирлаб тайинлади. Префект ходимларига иш буоратётган аснода Наполеон виқор билан Мюратнинг қўлтиғидан олди-да, ўзига ҳозирланган ҳашамдор хосхонага отланди. Император остонаядан ҳатлаш чоғи тағин тўхталиб қолди. Юлдузни бенарвон ургудай ўткир кўринаётган агентнинг орқасида экани унга асло маъқул келмаганди. Шу боис жосусга назар солди, лекин у жойида йўқ!

Бир дақиқа аввал ҳам қуёш нуридан ёп-ёруг дераза олдида турган малла-қизгиш соchlари паҳмоқ, зоҳирان нимжон ва бечораҳол шаҳарлик қаёққа гойиб бўлди? Ердан чиққандай унинг ўрнида қаққайган йигит эса девкелбат бўлиб, бошига нимдош парик, эгнига ҳарбийча мундирдай сирмаб тугмалangan сюртуқ кийиб олганди. Этигининг жуфтланган пошналари, бошини тўғри ва ғоз тутиши, жангу жадалларда тобланган қўрқмас ва матонатли ҳарбийларга хос ўткир ва қатъий нигоҳи – бутун қиёфаси кўпни кўрган аскарни эслатарди.

– Сизга бу ерда нима бор? – сўради Наполеон. – Ҳалиги киши қани? Наҳотки сизни префект юборган бўлса?

Шульмейстер ўз ишидан кўнгли тўлиб, мамнун жилмайди.

– Мен генерал Макни алдай олишга қодирлигими ни сизга исботламоқчи эдим, холос, – деди у. – Модомики энт ўткир ва синчков инсоннинг кўзларини янглишири олган эканман, демак...

Император таажоқубда қолганини яшира олмасди. У жосуснинг қошига бориб, атрофини бир сидра

айланди, аслида оддий кийим ўзгариши бўлган бу «тугилиш»ни текшириб чиқди. Наполеон Шульмейстернинг жанговар афт-ангорини кузатиб турган лаҳзалардаёқ унинг юзига беозор ифода қалқиб чиқди, диккайган мўйлаби ҳам ювош тортди, ўқрайган кўзлари энди қувлик билан боқарди, манглайдаги ажинлар гойиб бўлди. Шульмейстер бир силтаниб, бошидаги қора парикни юлиб олди ва Наполеоннинг кўз олдида энди бояги баққолнинг ўзгинаси туради.

- Тасанно! – деди император.
- Гап йўқ! – хитоб қилди Мюрат унга жавобан. – Бунақа томошани Франконанинг пантомима саҳнаси-дагина кўрардик. Аммо калласи танасидан жудо қи-линар чоги қиёфасини нечоғли ўзгартира оларкин!..
- Тўхтанг! – деди беҳад қизиқиб қолган Наполеон.
- Менимча, ҳамма сир ана ўша калланинг зўрлигида. Қани, мени у билан ёлгиз қолдирларинг-чи!

– Бу сиз учун хавфли бўлмасмикан?

– Йўқ, менга ҳеч қандай таҳдид йўқ, боринглар!

Мюрат маъқул кўрмаса-да, ноилож чиқиб кетди. Унингча, бундай шубҳали одамга ишониш ва у билан танҳо қолиш ақлдан эмасди. Устига-устак жанговар юришлар тақдирини ҳам унинг қўлига топшириб қўйиш бориб турган бемаънилик!.. Дейлик, у ақлли ва маккор киши! У Наполеоннинг заиф томонини аниқлаб, ўша тарафдан уни қўлга олди, лекин ўзи-га айнан шугина кераклигини ошкор этгани йўқ... У пасткаш бир югурдак, бирваракайига ҳам Павелга, ҳам Пётрга хизмат қилгандай бўлади-да, икковиниям доғда қолдиради. Бунинг сотқинлиги ҳам, жосуслиги ҳам иккиёклама, у ўта ғаразли ва тубан, иккиюзлама-чи нусха! Имкон борича ҳар бир қадамини кузатиш зарур... Дарвоқе, бу кимсанинг хотини беҳад гўзал-ки!..

## ЖОСУС ЖАНГ ҚИЛИШ ИШТИЁҚИДА

Наполеон Шульмейстерни синчилаб кўздан кечирди. Мират чиқиб, эшик ёпилгач, у яна ўтириб олди.

– Мен юборганимни айтиб, генерал Саварига учрайсан, – деди у. – Нега жонланиб қолдинг? Сен Саварини танийсанми?

– Ҳа, олампаноҳ. Мен... бир пайтлар унга ёрдам қилгандим, – жавоб қайтарди Шульмейстер.

– Унда янайам яхши! Генерал сенга олтин ҳисобида йигирма беш минг пул беради... Яна нимага чайқаляпсан?

– Пул керакмас демоқчи эдим.

– Ошиқма, у пул сенгамас, бошқаларга аталган.

– Унда майли.

– Энди сўзимни бўлмай турасан. Гапларимни обдан тушунишга ҳаракат қил. Сен шу бугуннинг ўзидаёқ яёв йўлга чиқасан. Қаёқча борсанг, истаганингча менга хиёнат қиласвер, бунга рухсат бераман, ҳатто талаб қиласман. Тўхта, мана кеча ўзинг ёзган қофоз, ундаги маълумотларни кўнглинг тусаганча фош эта веришингга ижозат. Аммо Ульмда шахсан ўзинг бўлишинг зарур. Мак билан учраштиришларини талаб қиласан. Қаттиқ уриниб, унинг ишончини қозонасан, шундан сўнг охирги хуфяномангдаги маълумотларни унга батафсил изоҳлаб бергин. Пул ана шунда керак бўлади. Унинг штабидаги разведкачилардан ўта ақлли бирортасини ёллайсан, у сен айтган гапларнинг ҳақиқатлигини тасдиқласин. Бугун – 26 сентябрь, сен шундай ҳаракат қилгинки, кечи билан 8 октябрга қадар менинг ҳарбий режаларим душман қўлида бўлсин. Ана ундан сўнг озодсан, тўрт томонинг қибла.

– Айтганларингиз жуда осон, зоти олийлари, бироқ шунисиям борки...

- Хўш-хўш?
- Яъни мен сизга арзимаган маълумотларният юборавермасам демоқчийдим. Негаки улар менинг ортимдан кузатишлари аниқ, башарти алоқага чиқишига уринишим сезилиб қолса... Кўяверинг, офтоби олам, кўнглингиз тўқ бўлсин: янгилик топсам, уни жўнатиш йўлиният топаман-да.
- Келишдик. Демак, гапларимга тушунибсан. Энди айтиб қўяй, ҳозир шу ерда турган префект бадарға этилганинг ҳақида буйруқ ёзиб беради. Хотининг ҳам бирга кетади, ишончимни оқлаганингдан сўнг иккаловингга рухсат бераман, қайтиб келарсизлар.
- Бироқ болаларим ҳам бор, ҳазрати олийлари, асраб олганман, ҳали жуда ёш, ўғил ва қиз.
- Бу тўғрида бошимни оғритиб нима қиласан? Улар ҳақида хотининг бош қотирсан! Хоҳлаган ерингда қолдириб кетишинг мумкин... Масалан, Қора ўрмон дарасидаги қишлоқлар ёмонмас. Нотинчлик йўқ, мутлақо бехавотир!
- Бош устига, олампаноҳ.
- Энди айт-чи, нега пул керакмас деяпсан?
- Унинг эвазига бошқа бир илтифотингиз...
- Нима?
- Жанг қилмоқчиман.
- Жанг қилмоқчисан? – таажӯжубланди Наполеон.
- Ҳа!.. Кўриб турибманки, ҳазрати олийлари, ортингиздан эргашганларни покомон, гоҳида эса қаҳрамон инсонлар дейишади, чунки қудрати етган ҳар қандай топшириқни дўндиришади. Ахир улар кучли-да, шунинг учун ғанимни ё ўлдирадилар, ё асир оладилар. Башарти заиф бўлганларида-чи? Душмандан догда қолардилар. Ўйлайманки, бундай вазиятларда мен ҳам уларчалик иш кўрсата оламан ва буни жанговар синовдан ўтказсам дейман... Танҳо

ўзим жонимни хатарга қўйиб, йўлларда ёлгиз дайдир эканман, ушлаб олсалар ҳам ёки панд берсам ҳам, бири сотқин дейди, иккинчиси душман дейди ва икковиям мендан ҳазар қиласади, нафратланади. Ахир бу «касб-кор» соҳибининг матонати жанг майдонидаги аскарницидан камми? Қолаверса, пул эвазига хизмат қилишни кўнглим кўттармаяпти-да... Истардимки... лоақал иззат-икромга лойиқ бўлсан-да, ширин сўз билан мукофотласалар дейман.

– Вой жин ургурей! – койинди Наполеон, ўз кўнглидаги одамни учратганидан унинг кайфи ниҳоятда чоғ эди. – Аммо айтганингдай, аскарнинг хизматини «касб-кор» десак, бу «хунар» фидойиликдан иборат. Унинг ўз юртини бегараз ҳимоялашдан бошқа муддаси йўқ. Жангчи яширинмайди, ошкора қон кечади, душман муқобилида афтини ўзгартириш унга бегона. Сен эса...

– Мен – танҳоман, улар эса минг, ўн минг, юз минг ва ҳаммаси биргаликда урушга кирадики, сиз уларнинг номайи аъмолини билиб-кўриб, таниб турасиз. Тўгри, мен ўзимни танитмаслик учун уст-бoshимни ўзгартираман, ниқобланаман, бироқ улар ҳам хавф тугилган заҳотиёқ ўзини панага олишмайдими? Жангчилар дарахтлар, уйлар орасида, тупроқ уюмлари ортида яшириниб, ажалга чап беришмайдими ва айтинг-чи, шунинг ўзи мендаги кийим алмаштириш ва ниқобланишга ўхшамайдими?

– Сен тентаквойнинг ақлинг бажо, – унга эътиroz билдириди Наполеон. – Аммо ватан туйгуси ақлдан ҳам юксакларда туради. Хўш, французмисан? Унда нечун Францияга хиёнат қилувдинг? Энди эса менга Германияни сотмоқчи бўп турибсан.

– Подшоҳим, бир қошиқ қонимдан кечсангиз ва хафа бўлмасангиз-да, шу хусусдаги арзимни айтсам.

Айнан сиз ва сиз каби биқинига қилич таққанларнинг «шарофати» билангина ватандан айрилиб, жосуслик касбига гирифтор этилганман. Ахир ўйлаб кўринг, мурғаккина гўдак чоғимдаёқ бири келса, бири кетадиган қўшинилар босиб олган ва кунпаякун қилган қишлоқларнигина кўрдим. Ёруғ дунёда кўз очиб-очмасимдан рўпарамда уруш пайдо бўлди ва у мени ҳамон таъқиб этмоқда. Қишлоқилар, аскарлар, зобитлар – ҳаммаси мени тўхтатар ва сўрар эди:

– Олдинда душман йўқ эканми? Ёвнинг сони қанчалигини билмайсанми? Унга қай томондан ҳужум қиласа бўлади?

– Бунисиям етмагандай, баъзида уларга қулай манзилни кўрсатиб беришим учун мени судраб, бирга оп кетишарди. Ўшанда мени отбошига чилвирлаб, елкамга тўппонча қадаб олардилар. Оқибатда жоним ширин кўриниб, австрияликларга йўл кўрсатсам, мени французлар жосус деб лаънатлашарди. Ёки аксинча, найза ўқталган французлар хизматида бўлсам, австрияликлар «хоин» дея, қўлларини бигиз қилишган!.. Ана шундай муҳитда улгайдим ва ўша шароитда уйландим, бирорнинг сирини бошқасига сотишдан қутулайин деб кўп уриндим. Бўлак бир тириклийнинг бошини тутиш қайғусида Палантинатдан Швабиягача, Эльзасдан Бавариягача излаб-қидириб кўрдим, афсус, урушдан бўлак даромадлироқ ва гуллаб-яшнаган бозорни тополганим йўқ. Жангу жадал бизнинг музофотларда бўларди, ҳозир ҳам етарлича бор. Биз унинг кўлами, катта-кичилигига қараб, қандай ҳаракат қилишнинг ҳадисини олганмиз. Омадгоҳ унга, гоҳ бунга кулиб боқади, бироқ бу борада унинг ўзига хос нозик жиҳатларини ҳам билиб бўлганмизки, сир олмоқчи бўлганлар тўхтовсиз бизга мурожаат қилаверадилар. Хуллас қалом, ана шу зайлда исти-

лоларнинг мажбурий иштироқчиси бўлдик-қолдик. Саргузаштталаблик эса бизларни маккорлик билан ёлланган кўнгилли чақимчиларга айлантириди, пул тўлашлари ҳам, суд қилиб, осиб юборишлари ҳам бор гап. Чегаралар эса сон-саноқсиз аскарларингиз оёғи остида йўқ бўлиб, текислаб ташланган, энди ўша чизикларни қандай топишни билмаймиз. Худди ана шу боисдан ҳам бизни гоҳ у тарафда, гоҳ бу тарафда кўрасиз, алқисса, ким ёкиб қолса, ҳали унинг, ҳали бунинг ғалабасига хизмат қиласкерамиз-да. Биздан жирканувчилар мутлақо ноҳақ, зеро, бўлак йўл тутиш учун ихтиёrimизда бошқа чора ҳам йўқ.

– Бироқ мен шундай шахсларни ҳам биламанки, – эътиroz билдириди Наполеон, – улар ўша «текислаб ташланган» деган чегарада ҳам адашиб қолганлари йўқ... Чунончи, Клебер страсбурглик эди, мен унга Франция маршали унвонини беришим мумкин ёки Келлерман ҳам ўша жойдан ва уни Вальма герцогига айлантириш ниятим бор!

– Зоти олийлари, гўстоҳлигимни маъзур тутасиз, ўша Клебер қўлингизда француз генерали бўлгунича, Австрия поручиги эмасмиди? Аммо мен на герцог ва на маршал унвонига асло даъвогар эмасман. Менинг ягона ўтинчим бор: башарти сизга маъқул бўлгудай жанговар хизмат кўрсата олсам, сиз олампаноҳ билан ёнма-ён турмогимга ижозат этсангиз кифоя, унвон берасизми-йўқми, бунинг аҳамияти йўқ. Аммо беватан қолган бир бечораманки, мени ватанли қилмогингиз керак. Мен ҳукмфармо эмасман, инчунин, шу лаҳзадан бошлабоқ фармонингизга бўйсунмоқ қалбим амри бўлиб қолади. Шундай жангчи бўламанки, сизга, фақат сизга бор куч-гайратим, садоқатим билан хизмат қиласман. Қуруқ мақтанчоқ эмаслигимни ва шаҳзода Миратнинг ҳамма-ҳамма зафарлари ҳам

менинг шижаатимчалик рұхингизни күтариб, юрагингизга құдрат бера олмаслигини тез орада үзингиз билиб оласиз.

- Мюратни яхши күрмайсанми? – сүради Наполеон:
- Мен камтарона жасорат ва абжир күч-қувватни яхши күраман, олампаноҳ.

Наполеон эътиroz билдири:

- Абукирда<sup>1</sup> Мюрат душман устига шундай отилдики...
  - Ахир у ерда одам ниҳоятда күп әди ва ҳамма күзлар уни кузатиб турарди-да.
  - Мюрат Миср әхромларида<sup>1</sup> ҳам, Маренгода<sup>1</sup> ҳам ҳазилакам жанг қилмаган.
  - Унинг бунақа жасоратлари анчагина, түгри айтасиз, ҳазрати олийлари. Лекин мен сизга шундай зафар гулчамбарларини оп келаманки, ҳалигача ўша Мюратингиз бундай ғалабаларни көлтирган әмас.
  - Эҳтиёт бўл! Ўйлаб гапир! Мюрат бу масалада гаров боғлашса, ютмай қўймайди!
  - Менга худди шуниси керак!
- Наполеон қизиқсаниб савол берди:
- Намунча уни ёмон күрмасант?
  - Қайдам? – жавоб қайтарди жосус. – Сабабини ўзим ҳам билмайман. Эҳтимол, у кўркам бўлгани ва ўзимнинг овсарлигим туфайлидир.

---

<sup>1</sup> Абукир ва Миср әхромларидаги тўқнашувлар Наполеоннинг Мисрға босқинчилик юришида (1798–1801) бўлиб ўтган. Маренгодаги (Шимолий Италия) жангда Наполеон қўшинлари австрияликлар устидан йирик ғалабага эришган ва шунинг натижасида француздар фойдасига Люневиль (Франциядаги шаҳар) сулҳи тузилган әди.

## ИМПЕРАТОРНИНГ ҚАХРИ КЕЛДИ

Кель яқинида бирлашаётган қўшинлар Рейнни кечиб ўтишдан олдин икки кун ҳордиқ чиқариши кўзда тутилганди. Бутун соҳил бўйини эгаллаган корпусларнинг қўмондонлари ўта махфий тарзда Страсбургга чақиртирилди. Император улар билан узоқ кенгашиб, қатъий қарорга келди: ҳеч қандай ҳарбий ҳийлага эҳтиёж йўқ. Душман шунчалар ғафлатдаки, ҳужум бошланиб, дастлабки жанглар бўлмагунча французларнинг асл муддаосини англаb етишдан ожиз. Энди режанинг қандай амалга оширилишига келсак, буни император ўзигина билади. У бир ой бурунги мўлжалидан асло чекинмаган ҳолда бутун Европанинг фикрини мутлақо чалғитмоқчи эди. Ана шу ниятда Страсбург аҳли учун кечки зиёфат ташкил қилиб, ўзининг барча генералларини таклиф этди.

Бир неча соатдан сўнг Париждан Жозефина<sup>1</sup> етиб келди. Келин-куёвнинг асал ойи ўтиб бўлган бўлсада, энг шукуҳли тонглари мана энди отмоқда эди. Латофатли ва айни чоғда енгилтак креол қизи<sup>2</sup> Нотрдам ибодатхонасида эрининг қўлидан маликалик тожини кийганига бир йил бўлди. Лекин уруш-юришлар даҳоси бўлмиш зотнинг куч-қудрати ва закоси баҳш

<sup>1</sup> Богарне Жозефина (1763–1814) – Наполеоннинг биринчи хотини. Жозефина аввал (1779–1794) генерал Александр Богарнега турмушга чиқсан бўлиб, генерал Богарне сотқинликда айбланган ва 1794 йили қатл этилган. Наполеон Жозефинага 1796 йилда уйланиб, Австрия императори Франц I нинг қизи Мария Луизага никоҳланадиган бўлгач (1809) ажрашган. Ж. Богарне Наполеон Бонапартдан олти ёш катта эди.

<sup>2</sup> Креол қизи – европалик истилочиларнинг Америкадаги мустамлака мамлакатларда тутилган авлодларини креоллар деб аталарди. Айни ўринда Жозефинанинг Мартиникада (Кариб денгизидаги орол) таваллуд топганинга ишора қилинмоқда.

эттан ўшандаги мутлақо тасодифий буюклик лаззати ва ширин масрурлик ҳали ҳамон уни тарк этмаганди.

Жозефина ёшига нисбатан беҳад кўхлик кўриниб, бутун яна ҳам очилиб кетган унинг ҳусну жамолига соя солгувчи айрим чизгилар шоҳона салобатга уйгуналашиб, ўзига ярашиб турарди. Унинг иштироки Наполеон дадиллик ва журъат билан ташкил эттан бугунги бални безаши тайин. Жозефинанинг Страсбургга учиб етиб келиши унинг базми жамшидларга ишқибозлиги ва дабдаба деса, ўзини томдан ташлаши туфайли эди. Малика ўзининг хиромон одимларию акобирларча нафосати билан энг навниҳол ва энг сулув хонимларни ҳам куйдира олишини биларди. Яна соҳир ва мафтункор табассуми ҳам бор. Буни у гўё атрофидагиларга беихтиёр ҳадя этар, аслида эса маликайи олия бу кулги билан ўзидағи чарчоқни ниқобларди. Ёш сарой хонимларини ҳаяжонлантирувчи ва ҳасадини қўзғатувчи энг асосий «жоду» унинг жисми ва руҳидаги табиий таманнолик эди.

Жозефинадаги ишваю истиғно шунчалар мукаммал эдики, бугунги тантананинг гултожи бўлиш унинг қонуний ҳаққи саналарди. Зеро, шундагина у императорнинг рафиқаси бўлган илк давларда уюшган душманлар томонидан унинг маликалик тожига тажовуз қилиниши оқибатида юзага келган хавотирдан қутулгандай бўларди. У ёғидан келсангиз, Наполеон Жозефинадан бор-йўқ имконини ишга солиб, энг аъло даражада ясаниб, безанишини талаб қилас, бундан эркагу аёлнинг ҳасади келиб, ичи куйишини истарди. Ана шундай эъзоз оғушидаги маликанинг сехрли ва хушбахт табассумига қарши Австрия, Россия ва ҳатто қўшинидан кўра пули билан мақтанадиган Англия нима ҳам қила оларди?..

Кечки соат тўққизда офтобдай чарақлаган Жозефина Наполеон билан биргалиқда префектура залига

кириб келди. Бошдан-оёқ шойи-барқут, қимматбаҳо тошлару олтин-күмүшга бурканган, бежирим соchlари устидан жавоҳир тўла тож кийган маликанинг ҳусну тароватига гап бўлиши мумкинмасди! Наполеон ҳам табассумда. Унинг чақноқ ва ўйноқи нигоҳи зобитлар ва хонимлар оралаб, таниш чеҳраларни топди. Илк жанглардаги қуролдош биродарларига боқиб, император гўё ўтган кунларни эслаб дерди: «Ўн биринчи йил ёдингдан чиққани йўқми?», «Сен-чи, Тулондан кейин, Италия ва Миср юришларидан бери нима қилиб юрибсан?», «Ёнимда эканинг далда беради, умидим сендаги матонат ва садоқатдан!», «Эртага ҳам кечагидай бўш келма!»...

Ўнг томондаги бир гуруҳ меҳмонларнинг либоси байрамона эмаслиги дарровда Наполеоннинг назарига тушди. Уларнинг ўртасидаги биргина одам ясан-тусани билан алоҳида ажralиб турарди: кўкси зарбоф нишон ва аксельбант<sup>1</sup> билан безалиб, мўйна қалпогига оппоқ йирик жигалар тақилганди. Уни қуршаган зобитлар эса худди тил бириктиргандай оддий жанговар мундирларни кийишган. Уларнинг устида ҳарбий юришларда асқотадиган оғир шинель, шойи чулкисиз оёқларида эса жанг майдонлари «ёдгори» бўлмиш чанг-губор ҳам бор эди. Бундай базмларда кийиниш қоидасига беҳад талабчан Наполеон шу тобда бундан ҳайрон бўлгани йўқ, ранжимади ҳам.

Аксинча, унинг чеҳраси янада яшнаб кетди: уларни бу қиёфада кўриб, кўзларида ишонч ва илтифот ҳислари нурланди. У қадамларини секинлатиб, маликага мурожаат қиларкан, овозини баланд кўтарди:

– Кўряпсанми, Жозефина, мана шу азаматлар олдида тўхтасанг, уларга тўйиб-тўйиб боқсанг арзиди. Мана бу тўртовлон империямни кўтариб турган

<sup>1</sup> Аксельбант – ҳарбийлар тақадиган зарбоф чилвир.

буюк устунлардир. Сен уларни кўргансан: эслагин, башанг мундирларда Тюильри қасрига ташриф буоргандилар. Қара, бутун душман қўлидан зафарни юлиб оладиган жанговар уст-бошлари билан келишибди!.. Мана бу Даву – Германиянинг додини берувчи йигирма олти минг кишилик учта корпуснинг раҳнамоси. Таниб ол: Султ – тўртинчи корпус қўмондони, қўлида қирқ минг аскари бор. Бу эса Ней – ботирларнинг ботири, бор-йўги йигирма тўрт минг йигит берганман, лекин унинг ёлғиз ўзи уларнинг ҳаммасига бас кела олади. Манави саркардамни Ланн дейдилар, уни Португалиядан Булонга чақиртириб олдим. Энди Страсбургдан Венага қадар ёнимдан жилмайди, нега десанг, унинг иштирокисиз мен буюк ишларни қила олмайман. Бундан ташқари Бернадот деган лочиним бор, Ганновердан йўлга чиқиб, ўн етти минг кўпни кўрган жангчиси билан учиб келмоқда. Мармон эса Голландияда эди, у ҳам бу ёқقا отланган, тез орада йигирма минг аскарни байробим остига қўяди. Бугун эрталаб ундан хабар олдим: шунчалар олис сафарда атиги тўққиз кишини йўқотиби, улар ҳам орқада қоп кетган экан. Яна бир Ожеро деганинниям билиб қўй: Бретанидан чақирдим, ўн беш минг кишилик фахрийлар қўшини билан саккиз кунда етиб келади... Миорат тўғрисида гап бўлиши мумкин эмас: уни залга кириб келаётгандаёқ кўргандирсан, қара, қанчалар кўркам, офтобнинг ўзгинаси-я! Азизам, жон дўстим, сен булардан икки оғиз қалб сўзингни аяма, айт, айтақол! Ахир Франциянинг тақдири мана шу дағал қўлларда! Булар – менинг таянчим, ишончим!

Шундан сўнгти воҳеадан қалблар титради, юраклар ийиб кетди... Маликайи олиянинг сиймоси қандайдир бир дақиқа давомида Ватанинг, бутун бир миллатнинг жонли рамзига айланмоғи керак эди.

(У зар чекилган оппоқ күйлак кийиб, устидан мүй-на қадалган қызил барқут мантия ташлаб олғанди.) Жозефина Наполеоннинг қўлқопли бармоқларини салгина чимчилаб қўйди: бу билан гўё ўзини манави баҳодирларга яхшироқ таништириб қўйишни сўрарди. Саркардаларнинг сўник ва паришон нигоҳлари маликада: у эса бор эҳтироми ва шавқли ҳисларини жамлади-да, сарой аҳлига хос назокат ва улугворлик билан таъзим бажо қилди.

Ҳаяжонлар авжи шунчалик эдики, гўё айни дамда Франция ўз маршалларига бош эгарди.

– Офарин! Ташаккур! Ҳаммаларингизга бош эгаман! – деди малика қўмондонларга қараб ва аста тикланиб, қоматини гоз тутди.

Жозефина уларнинг чанг-чунг мундирларига ҳам улуглик, ҳам илтифот билан боққанича катта зални узунасига кесиб ўта бошлади, атрофда ҳаяжонланган издиҳом ҳурмат билан бош эгиб турарди.

– Вой жин ургурей, – деди Ланн ёнидаги одамга шивирлаб, – бу жонивор чакки эмас шекилли, қотириб қўйди-ку!

Унинг қоп-қора митти кўзлари пирпиради ва мижжаларидағи маржон томчиларни яшириш учун ютиниб олди. Наполеон «Ҳарбийлар Ролани»<sup>1</sup> деб ном берган бу қўмондон (Ожеро йўқ кезлари) энг кўнгли бўш ва йиглоқи одам эди.

Даву билан Сультнинг муносиб таърифдан оғизлари қулоқда бўлиб, ҳузур-ҳаловатга ёлчиб қолишганди. Нейга келсак, унинг чехраси ял-ял ёнарди, бўйнидаги ажинлари ва оловранг соchlари гўё тилладай товланарди.

<sup>1</sup> Жан Мари Ролан (1734–1793) – Буюк француз инқиlobи раҳнамоларидан бири, жирондистлар ҳукуматида ички ишлар вазири бўлган. Айни ўринда Наполеон томонидан маршал Ланн ана шу арбобга қиёсланган дейиш мумкин.

Мюрат эса... у эгнидаги ясан-тусаннинг мақтовини эшитди, холос.

Базм бояги тантанаворликни йўқотган бўлса ҳам, тезда жўшқин тус олди. Наполеон Жозефинани залнинг четроғидаги сарой хонимлари даврасида қолдириб, ўзи бошқа хонага ўтиб кетди.

Аммо Жозефина учун бугунги бал кекса ашрофлардан бўлмиш баъзи эски танишларини ўзига янада оғдириб олмоқ учун ўта муҳим баҳона эди. У атрофида ана шуларнинг, юлдузни бенарвон урадиган ёш ҳарбийлару янги зодагонларнинг парвона бўлишини ёқтиради. Унинг ёнидаги кекса граф Коленкур ҳозиргина императорнинг тансиқ илтифотига мұяссар бўлган маршалларга ошкора ҳавас билан боқиб қолганди.

– Қадрдоним герцогиня, – деди Жозефина ёнидаги Ларошфуко хонимга қараб, – де Коленкурнинг қўлидан туting-да, Ней, Ланн ва бошқа саркардалар қошига етаклаб боринг. Бу киши уларнинг номини эшитган, холос. Мени айтди денг ва улар билан танишириб қўйинг, – у ўзининг содик қўриқчисидан сўради. – Шундай қилсак сизга маъқулми, азиз дўстим?

Доимо хушчехра мўйсафид Коленкур эҳтиром билан таъзим қилди:

– Ташаккур! Уларни табриклаш мен учун катта шараф, зоти олиялари! Шундай буюк баҳодирларни фақат олисдангина кўра олишимдан доим армон қилиб юрардим.

– Менимча, сизга уларнинг дағаллиги малол келмас, а? Тўгрими? – сўради Жозефина. – Ахир биласиз-ку, булар уруш ва матонат фарзанди, бинобарин, таманно давралардан кўра, жанговар қўналғаларда кўпроқ жавлон уриб ўрганишган.

– Ие, зоти олиялари, буни парвойимгаям келтирмайман. Биласиз, ўзим ҳам кекса ҳарбийман ахир.

Коленкур шундай деб, Ларошфуко хонимга илтифот билан кўл чўзди.

– Марҳамат қилиб, дастлаб маршал Лани билан таниширсангиз, – деди у саркардалар томон боришаркан. – Бу киши менга жудаям ёқади. Асл ҳарбийларга хос қадди-қоматли, кўркам одам. Шунисиям борки...

– Нима экан у? – сўради Ларошфуко хоним.

– Сизга очиқ айта қоламан: у сочларига упа қўяди, бу унинг энг илтифотли, хушфеъл маршал эканидан далолат бўлса керак.

Герцогиня хоним бунга жавобан шўх бир гап айтмоқчи эди, бироқ муносиб сўз тополмади шекилли, индамай ўша томонга юраверди ва Ланнга танишитирди:

– Ҳазрати олиялари каминага де Коленкур жанобларини топшириб, сизга таниширмогимни тайинлаган. Бу киши кекса генерал, улуг хизматлари бор. Ҳамиша шон-шарафлар ишқибози бўлган бу зот кўпдан буён сиз билан кўришмоқча иштиёқманд эди.

Ланнинг чеҳраси мулойим ва қувноқ табассумдан ёришиб кетди, у Коленкурнинг қўлларини сиқиб, астойдил кўришди:

– Беҳад мамнунман, оқсоқол! Оқсоч қуролдошлар мен учун жуда азиз, зеро, улардан ҳамиша ниманидир ўрганиш мумкин. Айтинг-чи, сиз хизмат қилган қўшин икки оёқлимиди ё тўрт оёқлими?..

Таажжубланган Коленкур қўққис йўтал хуружини тўхтатолмай қолдики, бу билан унинг ҳайронлиги ҳам билинмади.

– Оббо жин ургурей! – давом этди Лани. – Афтидан, биз ибтидой қироллик жамиятига тушиб қолганимиз шекилли?

Бу аснода Коленкурнинг дарди янада жунбушга келдики, маршал овқат тиқилған мисоли «оқсоқол»-ни енгил «дўппослаб» қўйди.

– Шайтон! Иблис! Нима бало, бу кўксов шекилли. Бунинг сабаби аён, бобой! Сабабини биламиз, бобой!

Коленкур газабини базўр жиловлаб олди. У аччиқланган бўлса-да, ўзидағи бу исённи енгиб, илжайди ва попукли қанд тўла қутичани маршалга тутди.

– Ие, зўр-ку! – кесатди Ланн. – Ҳали шириналкаријам бор экан-да!. Ажабо, хоҳ ишонинг хоҳ ишонманг эски тузумнинг чирик зобитлари ўзларини сийлашга жа-а устакор-да.

Унинг оғзидағи-оғзида, бўғзидағи-бўғзида қолди, чунки адъютантларидан бири ёнига келиб, қулогига алланималарни шивирлади. Маршал ўша лаҳзадаёқ бўлакча тус олди:

– Мени афв этасиз, Коленкур жаноблари. Икки баҳодир ўғилнинг отаси экансиз-ку! Улардан биттаси йигирма етти ёшдаёқ карабинерлар полкининг полковниги унвонини олибди... Шунинг ўзида равшанки, сиз асл француз экансиз. Ватан ҳимоясига ўғлонлар улғайтирибсиз! Бирорлар каби пулга ружу қўймабсиз, икковини ажнабийларга ёллантиrmаганингиз жудаям зўр!.. Изн беринг, мен сизни бир ўтиб қўяй.

У ижозатни кутиб ўтирмасдан аристократнинг елкасидан маҳкам қисиб, бағрига босди...

– Шавкатли аскар! Беназир қўмондон! – дер эди Коленкур бир неча дақиқадан сўнг маликага. – Аммо, ё Парвардигори олам, гап-сўзи тантиқ, жудаям ғалати экан ўзиям...

Жозефина сўз қотди:

– Граф жаноблари, ҳаммадан кўра Ланн билан танишмоққа ошиқсан ўзлари эмасмидилар?

– Шундок өдөрдүм. Лекин бирйұла башарамга маршаласыга упа-әлиқ чапланиб, ўша ондаёқ күзимга тупроқ сочилиши етти ухлаб тушимга кирганды.

– Башқаларға ҳам таништириб қўя қолишинми?

– Ташаккур, ҳазрати олиялари, жиндей тұхтаб турайлик, мен ўзимга келиб олмасам бўлмайди. Ҳе йўқ, бе йўқ, унинг упа сепилган сочларини танлаб ўтирганини қаранг-а!

Ларошфуко хоним оловга лампамой қўйди:

– Ҳали сиз Ожеро билан учрашганингизча йўқ!..

– Қанақасыга? Демак, буниси ҳолва демоқчи-сиз-да, а?..

Кутитмаганда Наполеон кириб келди. Лекин бу сафар боягина Жозефина билан қўлтиқлашиб юрган хотиржам ва баҳтиёр қиёфада эмасди. Унинг ранги оқарган, лаблари бўзарган, қошлари чимирилган. Нигоҳи маршалларни топди-да, секингина имлади. Издиҳом уларга йўл бўшатди. Ўша ондаёқ император кирган эшик бўсағасида калон зотлар тўпланишди. Наполеон ўзининг тилларда достон бўлиб кетган мундирида, оқ шойи панталон ва чулки кийиб олганди. Даву, Ней, Сульт ва Ланн жанговар либосда, Мюрат эса байрамона ясанган. Маршал Дюрок ҳам шу ерда: у Пруссиянинг ёш қиролини Наполеон томонга оғдириш учун Берлинга бориб, куруқ қўл билан қайтиб келганди.

– Иккиланяптими? – сўради император. – Менга панд бермоқчи эканми? Биламан, бир қарорга келиш учун аввал кимнинг зўрлигини аниқлашга мажбур қиласди, холос. Мана энди ўзидан кўрсин! Бернадот ва Мармон унинг Анспахдаги мулклари оралаб ўтишади. Бунга яхшиликча кўнса, дўстона ўтилади, билъакс, ёвларча ҳаракат қиласиз. Мен унга кўрсатиб қўяман ҳали! Мюрат, сен зудлик билан йўлга отлан, вақт

ганимат. Кечқуруноқ тезкор полклардан түрттасини олиб, дарёни кечасан. Тун бўйи бетўхтов йўл босиб, икки авангард полк билан биринчи дефиледа<sup>1</sup> пайдо бўласан, полкларнинг нариги иккитаси кейинги дефилега боради. Аммо шундай ҳаракат қилгинки, гўё жанубий йўналишга кетмоқчи деб ўйласинлар. Душман кўринган заҳоти орқага чекиниб, йўлда давом этавер. Сендан олдиндагилар ҳам мана шу буйруқса биноан иш кўришлари керак. Ундан кейинги жанговар кўрсатмаларни бошқа полклардан бериб юбораман. Отлан!.. Дарвоҷе, гапларимни қулогингга қуиб ол: ҳақиқий уруш бошланиб кетмасин! Жангта киришни тақиқлаб қўй!

Наполеондан фармойиш олгач, Мюрат жигадор мўйна қалпогини кийиб, ташқарига отланди. Барча хонимларнинг мафтун нигоҳлари унинг суксурдай қоматига қадалди, бироқ Мюрат илк бор ўзини кўзкўз қилишдан воз кечганди. У буюк бир қўшиннинг энг олдинги сафида байроқдор бўлиб жангта борардики, аёл зотига қараб қўйгани ҳам фурсати йўқ.

Бу орада Наполеон бошқа маршалларга ҳам буйруқ беришда давом этарди.

## ЖОСУС ИККИ АСКАРНИ ДОГДА ҚОЛДИРДИ

Эрталабки соат тўрт. Страсбург қаршисидаги понтон кўприк. Соқчибоши ҳозиргина қоғоз узатганmallasoch кишини синчилаб текширувдан ўтказди. Ҳужжатда тубандагилар ёзилган эди:

«Б у й р у қ:

Ушбуни кўрсатувчи Карл-Людвиг Шульмейстер янги Фрейштат (Германия) фуқароси бўлиб, зудлик

<sup>1</sup> Дефиле – ҳарбий атама, дара-тог йўли, камбар, ёлғизоёқ сўқмоқ.

билин Франция ҳудудидан чиқиб кетиши зарур. Бинобарин, хоҳ фуқаровий, хоҳ ҳарбий бўлсин, барча раҳбарлар Шульмейстерни оиласи ва юклари билан мутлақо монеликсиз ўтказиб юборсинглар! Бироқ шуни эътиборга олинсинки, Шульмейстер мазкур буйруқни 28 сентябрь тонгига қадар зинҳор кечиктирмай адо этмоғи лозим, бильъакс, унга нисбатан бошқа жиддий чора кўрилади.

Префект Шее.

Дивизия генерали Савари.»

Зобит буйруқ билан танишгач, қоронғилик қўйнида кўриниб-кўринмаётган аравага ишора қилди:

- Аравада нималар бор?
- Хотиним, ана ўзиям кўриниш берди, – шу дамда экипаж устидаги ёпқич сурилиб, Берта кўринди. – Орқароқقا сомон тўшалган, устида болаларимиз ухлаб ётишибди.
- Рапорт ёзиш учун аравангизни текшириб кўрмасам бўлмайди.
- Текшираверинг! Фақат илтимос, болаларни уйғотиб юбормасангиз, сиздан беҳад миннатдор бўлур эдим.

Шу аснода катта фонар тутган аскар яқинлашиб, аравани кўздан кечира бошлади. Зобит ҳам ўз навбатида қараб кўрди, бироқ кичкина жомадон ва уйқудаги икки боладан бўлак ҳеч нарсага кўзи тушгани йўқ.

Берта ўгирилганда, унинг юзига ёруғ тушиб, латиф чеҳраси, олтин соchlари тобланиб, худди нурчамбар оғушидаги малакнинг сиймоси намоён бўлди.

– Ёпирай, бунчалар соҳибжамол! – донг қотиб қолди зобит. – Бўпти, немис жаноблари, кета қолинглар, аммо минбаъд бу манзилда қорангиз кўринмасин!

– Ўтган ишга саловат, капитан! Умид қиласманки, худди шу ерда яна учрашамиз, фақат қўлимда мутлақо қонуний ҳужжатим бўлади!

Зобит бунга жавобан Бертанинг сулувлигидан кўнгли ийгани учунгина майин кулиб қўя қолди. Шульмейстер аравадаги ўриндиққа жойлашди ва отга қамчи босди.

Бир оз юришгач, хотин эрига сўз қотди:

– Ҳеч нарсани эшиتاётганинг йўқми? Ўнг томонда туёқлар дупурлаб, қурол-аслаҳа жаранглаяпти шекилли.

Шульмейстер отнинг жиловини тортиб, дикқат билан қулоқ солди. Дарҳақиқат, нарироқдаги катта йўлдан туёқларнинг бир маромдаги шовқини эшитилаётганди. Темирлар ҳам гўё бир меъёрдаги бу садоларга ҳамоҳанг жарангларди. Сурон олислаб бораётган бўлса-да, билгич одамга бунинг тагида не синоат борлигини пайқаши қийин эмасди.

– Камида бутун бир полк кетмоқда, – деди Шульмейстер ўзи билан сўзлашгандай ним овозда. – Жин ургур, улар қайси йўлдан юряпти ўзи? Афтидан, Фрейбург тарафга отланган шекилли... Энди билдим. Бу кўзбўямачилик, анавиларни... чалғитиш учун зарурий чора. Бу – ҳарбий ҳийла. Асосий ҳужум у ёқда бўлади, аммо суворийлар бу ёқда кўриниб туришади. Йўлга! Ҳа, йўлга! Модомики тоғ ортига бемалол ўтмоқчи эканман, бирор дақиқаям кечикмаслигим шарт!

У жиловни қаттиқроқ силтади. Бертанинг кўзлари саволомуз боқарди.

– Қулоқ сол, – деди Шульмейстер отни қамчилар экан, – тезда Оффенбургга етиб оламиз, дарё билан ораси нари борса ўн беш вёрста холос. Сени у ерда қолдириб, ўзим яёв кетавераман, тонг отмасдан нарироқ бориб олишим керак. Кеча эски қадрдонимиз Родекни огоҳлантирганман, уницида бирор ой турансан. Бу покдомон одам биздан кўп яхшилик кўрган ва

сениям, болаларният жуда кўнглига яқин олади. Бундан ташқари, сенга уйидан жой бериб, зиён қилмаслигини ўзиям билади. Учовингизни бағрига олишга шай эканини ўз кўзларинг билан кўрасан ҳали.

– Сен-чи?

– Менми? Жонгинам Берта, мен Ульмга боришим керак, зиммамдаги бурчим...

– Бурчинг... кимнинг олдида? Таассуфки, Карл, сенга берилган топшириқ яна аввалгидай кимнидир алдашдан иборат эмасми?

– Азизам, эй бедор виждоним, кўнглинг тўқ бўлсин! Мени хизматга олган инсоннинг марҳамати билан ҳаётни янгидан бошлаймиз ва уйқудаги икки норасиданинг эртанги тақдиридан хотиржам бўламиз. Мен жудаям муҳим вазифанинг ижросига жавобгарман, ёвга зарба бериш учун танҳо ўзим фақат олға боришим керак, душман кунпаякун бўлишига ишончим комил. Бўлак бирор кишининг қўлидан келмайдиган бу «ҳунар»ни менга юклашгани озодлик ва афв этилганим эвазига тўлайдиган бадалимдир. Мен буйруқни бажариб бўлгач, ўзинг кўрасан, ҳийла-найрангларимни, яшириниб юришларимни бас қиласман. Азиз рафиқам, менга ишонавер ва мард аёл бўлгин!

Берта дилсиёҳ ва хавотирланган кўйи жимиб қолди... Олдинда эрини мудҳиш хатарлар кутаёттанига жувоннинг ақли етарди. Бу таҳдид уни ҳам ваҳимага соларди, ҳам орини келтиради. Ақл-идроқининг олис ва пардали нуқтасида, фақат қалб кўзигина илғай олувчи бир бурчида васвасали фожеанинг қонли манзараси яққол намоён бўлди. Тасаввурида бир рота жангчи милтиқ ўқталган ҳолда отишга шай турибди, уларнинг рўпарасида кўзлари боғланган одам; ерга тиз чўктириб қўйилган – бу маҳкум эри Карл... Унинг яқинида қадди баланд, зарҳал мундирда, шля-

пәсига оппоқ жигалар қадалган суворий буйруқ беришга ҳози्रу нозир, қўлидаги қиличини биргина силкиб қўйса кифоя...

Филдирак тошга урилиб қарсиллаганды хаёли паришон Берта бир сапчиб тушди: у отишма бошланди деб ўйлаганди... Карл уни пинжига тортиб, ваҳимасини тарқатиб юборди, бундан аёл жилмайиб қўйди. Шульмейстер шарқ уфқига ишора қилди:

– Қарасанг-чи, хотин, ахир янги кун бошланмоқда!

Қуёшнинг ilk нурлари ҳали Швабиядаги Кичик Альпнинг узоқ чўққилари ортида эса-да, ёриша бошлаган тонг ёғдусида йўллар гира-шира, водий тараф эса хийла равшан кўринарди. Сайҳонлик зинапоя мисоли баландлаб, нишаб тог ёнбағрига туташади. У ёғига қуюқ Қора ўрмон бошланиб, унинг ортида Оффенбург қишлогининг кулранг тахлити элас-элас кўзга ташланарди.

Унгача хийла йўл бормикан?.. Йўқ, аксинча, бизнинг сайёҳлар қишлоқ бўсағасига етиб келишганди. Йўлни узайтириб кўрсатаётган кўз алдамчилиги энди саробдай тарқалди. Похолга бурканиб уйқуни ураётган Ганс ва Лизбетани уйғотишга кўнгли бўлмаган Шульмейстер аравадан иргиб тушди. Жиловни қўлига олган Берта отларни қишлоққа буаркан, жосус қўли билан «хайр» ишорасини қилди. Шульмейстер илонизи сўқмоқ бўйлаб олга интилди.

Жосус дилхуш кайфиятда ёнданмага тирмациб бораверди. Ўз ихтиёринг билан эмин-эркин юришдан, кўзлаган мақсадинг сари олға боришдан ортиқ ҳузур борми?.. Яширин сирларни сотувчи ёки хоин эмас, Наполеоннинг аскари ва қўшиннинг пешқадам чопари бўлиш қанчалар шараф, қанчалар ифтихор! У ўзини тавқи лаънатдан ярим-ёрти қутулгандай, юзи ёруг бўлиб, кўкси кўтарилгандай сезарди.

Шульмейстер хушманзара сүқмоқдан тез орада росмана йўлга чиқиб, кўзига атроф янада гўзалроқ кўринди. Йўл – беназир ва ажойиб-да! У ҳаммага баробар: бой ҳам, камбағал ҳам, тунда ёввойи маҳлуқлар, кундузи паррандалар bemalol ўтаверади. Ўрмон дейсизми, водий дейсизми, уларнинг хўжайинчилик қиласидиган эгалари бор. Йўл-чи, у доимо очиқ, хоҳлаган одам юриши мумкин. Бунинг чегараси йўқ, йўловчнинг бардошига биноан ҳордиқ манзили олис ҳам, яқин ҳам бўла олади, ҳаттоқи уфқ олдингизга тушиб кетаверади, яқинлашганинг сайин ахийри ғойиб бўлади.

Шульмейстер илдам юриб, ҳар замонда ортига ўтириларкан, тонгти туман оғушидаги Рейн водийси тобора бепоён ва нурафшон қиёфада намоён бўларди. Унинг олдида ястанган Гегенбах йўли ўқдай тўғри бўлиб, ундан Гейзах яқинидаги тоғларнинг қоқ ўртасига, кейин Вюртемберг водийсига чиқиш мумкин.

Жосуснинг нигоҳи ўнг томондаги Лар шаҳарчасига тушди... оломон чумолидай гужгон ўйнарди.

Бу қанақаси? Каллайи саҳарда бунча издиҳом қаёқдан тўпланиб улгурди? Ишга отланган ишчи ва дехқонлар одатда чанг-тўзон кўтаришмасди. Қолаверса, эрталаб йўллар бунақа тирбанд бўлмасди, иннайкейин, фуқаролар қоп-қора галаларга айланиб, ипга чизилгандай батартиб ҳаракат қилишмайди. Нима гал ўзи?

Шульмейстер қояга ўтириб, киссасидан олган дурбинини кўзига яқинлаштирди-ю, хитоб қилди:

– Э-э, эсим қурсин! Ахир отлари тунда дупурлаган суворийлар-ку! Улар бу ерда дам олиб, энди йўлга шайланмоқда. Ҳа-а, ана, қиндан сугурилган қиличлар ҳам яраклаяпти... Ҳозир бургуларини чалишади... Жуда соз! Ана, драгунлар мусиқаси ҳам янграй кетди!

Демак, драгунлар бўлса керак. Ярақлаган дубулгалир ва милтиқларнинг товланиши кўриниб турарди. Чоги улар шу томонга чиқмоқчи эди. Зудлик билан түёқни шиқиллатиб қолиш керак!

Шульмейстер ўрнидан қўзғолиб, дурбинини чўнтағига солди ва ортига ўгирилди. Бироқ ақл бовар қилмас ҳайратдан бир сапчиб олди: ҳозиргина отдан тушиб, жиловини тутган икки француз гусари тўппонча ўқталиб туришарди.

Улар ердан чиқдими ё кўқдан тушдими?

Шульмейстер Наполеоннинг фармойишларидан бехабар бўлиб, бу ҳарбий ҳийланинг тафсилотини хаёлига ҳам келтиролмас, йўналишинигина тахмин қила оларди холос. Драгунлар қўшни водийга йўл соларкан, шу аснода Мюратнинг аввалроқ жўнаган иккинчи полки Оффенбург дефилеси остоналарига етиб қолганди. Шульмейстерга рўпара келган иккала гусар унинг соқчилари эди. Улар жосус қояга чиқиб, дурбинини олган дамдаёқ кўришган ва кимлигини аниқлаш, башарти зарурат тугилса, қўлга олиш учун етиб келишганди.

– Қимиrlама! – буюрди уларнинг каттароги. – Сен қизилбашара кўзингдаги «замбаракча» билан нима қилмоқчисан?

Карл мутлақо беақл тасқара қиёфага кириб, ҳеч балога фаҳми етмаётгандай мўлтайиб тураверди. Сўнг индамай уларнинг олдига борди.

– Демак, французчани билмайман демоқчи бўляпсанми? Жуда соз! Ҳали тилингни чиқариб қўямиз! – деди иккинчи аскар. – Сўлоқмондай одам экансан, бунчалар анқовлик сенга уят эмасми?

– Уэр, жаноби гусарлар, балки немисча гапира оларсиз, а?

– Қара-я, сайраб қолди-ку!.. Бас, саволга жавоб беринг, тезроқ!

- Мен жангчиларни томоша қилиб, ҳалигиндей...
- Қаерликсиз?
- Оффенбургда тураман, муюлишдан кўринадиган қишлоқ. Аnavи ёқда, ярим соатлик йўл.
- Демак, айланиб юрган эдингизми? Нима бало, чўнтақдаги анави ўйинчоқ ҳам кўнгилхушими?
- Албатта! – деди Шульмейстер.
- Ие... унақа экан, ўша лаънати... отинг ўчгурнинг номи эсимдан чиқди... қишлоғингиз у ёқда бўлса, нега энди бу ёққа кетяпсиз?.. Ана холос! Довдираб қолдингиз-ку! Афсус! Мен пайқаб қолдим-да, а? Хоҳласангиз, ўзим айтиб бераман. Бу ерда кўрганларингизни йўлнинг нариги бошидаги кайзерчиларга сотасиз-қўясиз! Шунақами?
  - Сизни ишонтириб айтаманки...
  - Ади-бадини бас қилинг! Яхшиликча олдимга тушинг, акс ҳолда, ўзингиздан кўрасиз!

Шульмейстернинг хаёлига келган биринчи ҳадик шу эдики, шу тобда ҳар қандай эътиroz бефойда. У бошини ҳам қилиб, муте қиёфага кирди ва ўзини иккала аскар қўлига бажонидил топширмоқчидай улар томон яна бир неча қадам ташлади. Ветеран<sup>1</sup> елкасига қарсиллатиб мушт солганда ҳам, рекрутнинг<sup>2</sup> панжалари ёқасидан бўғса ҳам Шульмейстер заррача бўйинтоблик қилгани йўқ. Аммо шу аснода ақл-хуши аста-секин ўзига келиб, хотиржамлик билан вазиятни обдан чамалаб кўрди.

Уларга бўйсуниш керакми? Ёки қаршилик қилган маъқулми?

У бундай бемаъни аҳволга дабдурустдан мубтало бўлганди. Нима қилсин: қочишига уриниб, ўлиб кета қолсинми ё уларга «хўп» деб, Наполеоннинг топши-

<sup>1</sup> Ветеран – тажрибали, кўпни кўрган аскар.

<sup>2</sup> Рекрут – ёш, хизматдаги янги жангчи.

ригини барбод этсинми? Рўпарасидаги осмондан тушган икки ғаним айнан Шульмейстер хизмат қилаётган тарафнинг аскарлари.

Башарти ўзини гусарлар қўлига топширгудай бўлса, зобит ҳузурига ҳайдаб боришади. Зобит эса сўраб-сурештиради, Шульмейстер уни қониқтирадиган гап айттолмайди. Албатта уни тинтиб кўришади: ёнидан катта пул ва ҳужжатлар чиқади, алалхусус, унинг немис эканига исбот бўлмиш бадарга буйруги топилади, бу эса французлар учун беҳад шубҳали қоғоз! Шульмейстерга қутулишнинг йўли ҳам йўқ эмас: ўзи олган топшириқни айтиб берса, уни қўйиб юборишади, бироқ бу ҳарбийча шахмат ўйинида жосус мот қилинди деган сўз.

Таваккал! Ортидан юз бор отиб, юз бор қувласинларки, қочиб қутулгани яхши!

Бу қарор унинг миясида яшин тезлигига пишдики, иккала гусар эгарга тирмашгандаёқ Шульмейстер қилар ишини қилиб бўлганди...

Начора, беайб Парвардигор! Боятдан бери жавраб турган ветеран зўр жангчи бўлса-да, ҳарбий низомнинг қули эди. Бинобарин, у қонун-қоидага тўлаттўқис амал қилиб, чап қўли билан аввал отнинг жиловини бир тутам ёлга қўшиб ушлади, кейин тўппончасини филофига жойлади-да, сўл оёғини узангига қўйиб, ўнг қўли билан эгарнинг қошидан чангллади. Аммо ветеран ердан яrim кўтарилиган лаҳзада Шульмейстер шартта эгилиб, унинг ўнг оёғидан тутди-да, бор кучи билан улоқтириб юборди. Оқибатда шўрлик отидан ҳам анча баландроқقا «парвоз қилди» ва жониворнинг нариги тарафига узала тушди.

Айни лаҳзада иккинчи гусар эгарга тирмашиш билан андармон бўлиб, оти қурмагурнинг девдай жасади бу ҳолни тўсиб қолганди. У оёқларини узангига

жойлаган дамдаёқ ҳайратдан донг қотди: шеригини ҳам, икковлари асир олган немисни ҳам гүё ер ютиб юборганди. Ҳар дами ганимат бўлган Шульмейстер ўрмалаганича ғофил гусар минган отнинг чотидан ўқдай ўтди-да, қуюқ ўрмон ичкарисига учди.

Гўл қилинган иккала аскар бир-бирига бақадай анқайди. Аввалгиси бир амаллаб ўрнидан турар, иккинчиси эса эгарда мувозанат сақлаш хусусидаги низомни «мўйсафид» шериги нега фаромуш қилганини билолмай гаранг, гўё икков нигоҳлари билан ўзаро маслаҳат қилишарди.

– Жин ургурей, – қийқирди ветеран, – қани у?

Таъбир жоиз бўлса, соқовлик ҳам гоҳо жуда пурмаъно бўлмоғи мумкин, ушбу нуқтаи назардан қаралса, иккинчи гусарни бундай «воизлик» камолотида Цицероннинг<sup>1</sup> асл вориси дея оламиз. Яъни унинг сўзсиз қисилган бир елкаси қулогига тегиб турарди, иккала кўзи ола-кула, оғзи ланг очилган: бор вужуди билан гўё қуролдошига шундай жавоб айтарди:

– Мен билолмай қолдим!

Шу пайт сўл тарафдан ёввойи маҳлук юргургандай шатур-шутур эшитилди ва рекрутнинг эси дарҳол ўзига келди. У тўппончасини олиб, отмоқча чоғланди.

– Аҳмоқ! – бақирди ветеран. – Буйруқ эсингдан чиқдими? Отиш мумкин эмас-ку! Қувамиз!..

Икков отларга қамчи босиб, мутлақо овсар қизилюз дехқонни тутиш учун поёнсиз йўлда уча кетдилар.

<sup>1</sup> Цицерон Марк Туллий (эр. ав. 106-43) – қадимги Римнинг атоқли сиёsat арбоби, воиз ва адаби, лотин адабий тилининг асосчиларидан бири. Цицерон сўзлаган нутқлардан 58 тасининг мукаммал матни (узуқ-юлук битиклар бу ҳисобга кирмайди) ва 800 та мактуби сақланиб қолган. Улар муҳим психологик ҳужжат ва лотин тилининг кўҳна ёдгорлиги бўлиш билан бирга қадимги Римдаги фуқаролар урушининг муҳим тарихий манбасидир.

Шульмейстер контрабандистлардан ҳам тезроқ чопарди. Қоялар ва тўқай орасидаги офтоб уни йўлдан адаштирмайдиган бехато мўлжал эди. Чархи кажрафторни қарангки, у қуёшга интилиб, нажот истаб шарқдаги душман тарафга қочар, гардан эса изига тушган дўстлари қувиб келарди!

У таъқибчилар ўтадиган сўқмоқдан кўндаланг юриб, йўлни қисқа оларди. Бир-икки бор улардан қутулгандай умидланди ҳам, негаки отлар дупури олислаб, пасайиб борарди. Лекин шовқин батамом тингани йўқ. Наҳотки французлар ўрмонни беш қўлдай билишса? Ахир улар ажнабий экани устига бу ёқларга илк бор келган-ку!..

Йўқ, бу ерда бошқа бир гап борга ўхшайди. Йигирма дақиқа мобайнида бетўхтов чопқиллаган Шульмейстер нафас ололмай қолганди. Унинг юз-кўзини, қўлларини тиконли буталар қонатиб ташлаган, қадамларида бояги суръат қолмаган эди! Неча бор дарахтларга урилди, гулларнинг илдизига, оёқ остига ёйилган шохларига қоқилди, йиқилди. Манглайидан шаррос тер қуялади... Ортиқ чопишга тинка-мадори йўқ...

Шульмейстер тўхтаб, вужуди қулоққа айланди. Отлар дўзах девларидай чопмоқда! Боягилар ҳолва экан суворийлар яна ҳам кўпайганди. Энди пайига тушган изқуварлар икки кишигини эмас: ўнг-сўлидан, орқа-олдидан қуроллар жарангি, отлар туёғи, одамлар овози эшитилмоқда!

Шульмейстер қуршовда!

Шак-шубҳа йўқки, анави иккаласи кўргиликлари-ни катталарга айтиб беришган ва уни қўлга олиш учун ўрмонга взвод, балки бутун бир эскадрон юборилган.

Эскадронми? Буниси ҳар ҳолда ёмон эмас! Ахир эскадронда штаб зобити, лоақал капитан бўладики, унга гап уқтириш мумкин... Хўш, Шульмейстер нима

дэя олади? Унинг гапига ким ҳам ишонарди? Сўзини тасдиқловчи буйруқ ёки ёзма гувоҳномаси йўқ. Аксинча, бор ҳужжатлари ҳам уни душманга «ем» қилиб беради, холос.

Манави таҳликали вазиятдан чиқишнинг ягона йўли – пул ва қофозларни ерга кўмиш, холос. Агар у астойдил ҳаракат қиласа, яқин беш дақиқа ичидан уни тута олмайдилар.

Шульмейстер дарровда устки кийимини ечиб, Савари берган йигирма беш минг тилла устидан боғланган камарини ҳам бўшатди. Буклама паккиси ер кавлаш учун очилиб, йўсин устига ташланган, чукурга шубҳали юкини яшириши керак эди. Бироқ Шульмейстер бирданига таққа тўхтаб қолди: миясига оддийгина, лекин ажойиб бир фикр келгандики, бундан завқланиб қулиб юборди...

Анави пичоқча бари бир хизмат қиласи, аммо энди унинг вазифаси буткул бўлакча. Жосус уни ишга солиб, сюртукнинг ўнгарини иккига бўлди. Лахтакнинг биттаси билан бўйини иягигача ўрагач, у дагалгина сербар ёқага айланди-қолди. Наригисини яна икки қисмга ажратиб, оёқларига чирмади ва бу лахтаклар қулранг чулкисини яширди. Чакалакда чопаверганда абжаги чиқсан шляпаси фуражка тусини олди, малла соchlари устидан қон-қора парик кийди-да, дурбинни буталар орасига улоқтириди. Сўнгра маймундай чапдастлик билан дараҳтдан-дараҳтга, шохма-шох ўтиб, шовқин-сурон камроқ шарқса эмас, аксинча, йўлга яқинроқ ва ўта сершовқин, аскарлар оёғидан ер ҳам зириллаётган кунботар томонга борди. У гусарлар квартирмейстерини<sup>1</sup> пайқади-да, атайин кўриниш берди: ўтакаси ёрилиб бокаёттан қашшоқ қишлоқига кўзи тушган зобит қичқирди:

<sup>1</sup> Квартирмейстер – аскарларнинг ётоқ ва озиқ-овқат таъминотига масъул зобит.

— Ҳой одамзод! Биз бир ноҳарбий нусхани ахтариб юрибмиз, соchlари сап-сарик, кулранг чулки кийган. Мабодо қўрганингиз йўқми?

«Одамзод» фуражкасини олмасдан француз ва немисча сўзлар омухталанган ғалати бир шевада жавоб қайтарди:

— Nain, montsir of titsir, rien fu... (Йўқ, зобит жанублари, ҳеч балони қўролмадим.)

Бу девонавор шева нашъя қилган жангчилар уни масхаралаб кулиб юбориши. Овсар қишлоқи бундан тоят аччиғланган қиёфада оқсоқлана-оқсоқлана йўлга тушди.

Беш дақиқадан сўнг атроф сув сепгандай жимиб қолди: Шульмейстер қутулганди!

У қутулди, аммо ўлгудай толиққанди...

Ахийри жосус йўл ёнидаги нишаб жойга ўтирди. Уст-боши дабдала, юз-кўзининг sog жойи йўқ, аъзойи бадани чарchoқнинг зўридан безгак тутгандай лақилларди. Жароҳат излари кўринмаса-да, дарахтларга урилавериш зарбидан вужуди қақшарди. Анавиларнинг зуғуми ҳамон хаёлидан, ҳозир ҳам гўё қўпол бир қўл ёқасидан бўғиб, гурзидай мушт елкасига дўппослар, аскар этиги эса биқинига ботиб, тезроқ юришни буюарди.

Үйқу! Бир бурда нон! Бир қултум сув! Булардан ло-акал биттаси бўлганда ҳам бу ёруғ оламда Шульмейстердан баҳтли одам топилмасди! Борди-ю бу уч неъмат бир йўла мұяссар бўлса борми, бурнидан тортса йиқилгудай айгоқчи учун бу жаннатнинг нақ ўзи бўларди!

У беихтиёр эгнидаги увада кийим-бошини титраб-қақшаб тузатган бўлди ва оёқ-қўлидаги моматалоқларни силаб қўйди. Сўнгра ясама сочини юлиб олди-да, илашган хас-хашакни теришга уннади. Шутобда Шульмейстернинг аҳволи ҳамма тошбўрон қилиб, қувиб солган дайди итни эслатарди.

Алалоқибат, у белига боғланган бойлигини чангалилаганича донг қотиб ухлаб қолди. Шу дамда унинг олтиналари бор, лекин бир тишлам нонга зор, икки одимгина нарида шарқираган анҳор оқса-да, томоги қақраб ўчганди. Шунга қарамай Шульмейстёр барини унутиб, бемалол ором оладиган даражада масрур эди.

## МАРШАЛ МЮРАТ – ЖИГАРСЎХТА

Олис йўл босиб, яқин орада згардан тушмаган шаҳзода Мюрат уйча олдида отнинг тизгинини тортиди, бу кеча шу ерда тунаб қолади. Қишлоқ аҳли унинг салобатли ва кўркам қиёфасини, шотирларининг кўплигини анқайиб томоша қиласарди. Ўзидан аввал каретада анвойи идиш-оёқлар, тўшагу чойшаблар, шинам хонаки либослар ётогига келтириб қўйилган. Зеро, бу кийимлар тунда юмшоқ ва қулай бўлиб, қўққисдан уруш бошланиб қолган тақдирда от устида ҳам ўнгай ва ишончли эди.

Ҳамма шароит шаҳзода келмасидан бурун муҳайё этилган. Бу деҳқонча иморат жаноби олийларига гарнибона кўринмасин учун бир эмас, тўрт хизматкор обдан саъй қилишганди. Уй эгалари юқорига кўчиб олишди. Пастки қаватни мулозимлар ўз хожалари учун жиҳозлашди. Отхонага янги похол-сомон тўшалган бўлса-да, маршалнинг аргумоқларига муносабикан деб, кўнгиллари тўлмаган хизматкорлар бари бир дилгир ҳолда эдилар...

Туёқлар дупурини эшитиб, улардан бири эшикка отилди. У маршалнинг узангисини ушлаб туришга интиларкан, шериклари девор ёнига саф тортишди. Мюрат зобит ва адъютантларига «ишингга бор» дегандай имо қилди. Ичкарига улардан биттагинаси ҳамроҳлигида кирди. Бўсағадаги пиллапоянинг сўнгги зинасида кичкина бир болакай турганди.

• Ўзига ўйчан ва синчков тикилган кичкинтой маршални ҳайратга солди: унинг хипча ва озгин сиёқи танишдай эди. Бу чақноқ ва зийрак кўзларни қаерда кўрганди? Бироқ хотираларни кавлаштиришга одатланмаган Мюрат ҳатто қадамларини сусайтиргани ҳам йўқ ва остона ҳатлаган ондаёқ болани унуди-қўйди.

Кечки дастурхон обдан безатилган бўлиб, пивогача ҳозирлаб қўйишганди. Хўрақдан кейин камин рўпарасига бамайлихотир ўтириб олган Мюрат ўзи туфайли тинчи бузилган мезбонларга икки оғиз ширин сўз айтмоқчи бўлди. Унинг буйруғи билан уй эгасини чақириши.

Салдан сўнг ҳузурида туриш-турмуши одмигина бир одам пайдо бўлди. У хийлагина новча бўлиб, қанчалик дароз бўлса, шунчалик озгин эди. Унинг елкаси ва қўллари паҳлавоннамо, бироқ ёнбоши ва оёғидан эт қочган, қуп-қуруқ суяқ эди. Бу жуссаси билан ўмровида бир тиянинг юкини кўтаришга ва забардаст мушти билан буқани ағдаришга яратилган дейсиз. Унинг кўзига тикилмаган одам юлдузни бенарвон уради деб ўйларди. Ана шу бақувват ва суяги енгил одамнинг юзига қараб, ундаги соддаликни ҳам ҳис этиш мумкин. Бироқ унинг юпқа лабларида ўзбилармонлик ҳам намоён эди. Сочларининг бирор дона қораси қолмабди.

Унинг камёб қадди-қоматини таажжуб ичидага кўздан кечирган Мюрат сўради:

- Уй эгаси ўзингизми?
- Аммо бу оқшом эгаликка ҳақли эмасман.
- Шунаقا денг? Демак, бу ерларда бизни ёмон кўришаркан-да, тўгрими?
- Асло, унақа демаган бўлардим, французларни яхшиям – ёмонам кўрмайман. Фақат тинчгина яшаш-

ни, хоҳлаганича юриб-турмоқни истаган кишига доимо бесаранжом қиласверишилари малол келади-да.

– Уруш бари бир уруш-да, биродари азиз!

– Бўлса бордир. Бироқ Франция билан урушаётган оддий халқ эмас-ку! Шу боис хонадонларимизни қўналға қилишдан олдинроқ бир оғиз айтиб қўйилса, менимча, ёмон бўлмасди!..

Мюратнинг адъютанти газабланиб, таҳдид билан интилди.

– Ўзингизни босинг! – буюрди шаҳзода елкаларини қисиб. – Карвонимиздаги иккала командиргаям тайинланг, кундалик ахборот билан ҳузуримга киришсин!

Сўнгра Мюрат уй эгасига ўтирилди:

– Гаров боғлашаманки, бир кечагина тунаш учун қанча тўлашимни ҳали сизга айтишган эмас! Мана, дастлабки тун учун ажратилган ижара ҳақи!

Мюрат калондимоғлиқ билан қўлидаги кармонни стол устига улоқтирди. Чоги унда оз деганда ўнта олтин наполеондор бор эди. Мезбон уни қўлига олди, салмоқлаб кўрди ва яна жойига қўйиб, кимнидир чақиргандай қаттиқ ҳуштак чалди. Ўша дамда унинг ортида сариқсоч боланинг калласи қўринди, у осто-нада Мюратга разм солган кичкинтой эди.

– Манави сенга, Ганс, шаҳзода Мюрат бизга бермоқчи бўлган бу пулни сен ола қол. Агарда ойинг хоҳласа, синглинг икковингга кийим-кечак оберар. Менга ҳеч нарсанинг кераги йўқ.

– Бу бола ким бўлди? – суриштирди Мюрат таажжуб билан. – Қариндошингизми? Сиз ҳозир эслатган онаси ким ўзи?

– Бу хусусда бошингизни оғритманг, маршал жаноблари. У менга мутлақо бегона, болани тарбиялаётган аёл эса сизга бутунлай нотаниш. Улар олдинроқ

келишган ва жойлашишган эди, аёлдан марҳаматингизни дариф тутмасангиз,adolatli iш бўларди.

Хонага ноқулай сукунат чўкди. Қария вазиятни енгиллаштириш ва меҳмондўстроқ кўриниш учун жимликни бузди:

– Менимча, энди ҳаммаси рисоладагидек. Бизга баҳарнав вақт ажратдингиз, шу илтифотингиз ўзи ҳам катта марҳамат. Одамларингизга у-бу зарур эмасми? Кулбай вайронам сизга маъқул келдими? Балки ўзингизга бирон нима керакдир? Агар қўлимдан келадиган иш бўлса, бажонидил бажараман... Мен оддий қишлоқ одами бўлсам-да, сиздай шавкатли саркарданнинг хизматида ўзимни бахтиёр деб биламан, жаноб!

Олдинги эътиrozлар ортидан кутилмаган хушомад беҳад кўнгилли эди. Бундан вақти чоғ Мюрат мезбоннинг сўнгти сўзларидан эса икки ҳисса яйраб олди.

– Йўқ, – деди у хушсуханлик билан, – ташаккур, ҳаммаси кўнгилдагидай. Фақат илтимос, гвардиячиларим оч қолицмасин. Нимаики еган бўлсалар, ҳаммасига пул тўлашади. Яна битта гап қолди: отингиз нима?

- Франц Родек.
- Баденликмисиз?
- Ҳа... ҳозир... баденликман.
- Нега энди «ҳозир»? Кўчиб келдингизми? Айтаверинг-чи?.. Аввал қаерда яшагансиз?
- Этенгеймда турардим.
- Этенгейм? Эшитганман. Шунаقا номдаги шаҳар (балки қишлоқдир) теварагида яқинда жанг бўлганди шекилли...
- У ерда жанг бўлган эмас, маршал, аммо бари бир қон тўкилган.
- Қон тўкилган!? Аниқроқ айтинг!
- Бунга бир ярим йил бўлди. Уруш бўлмаса-да, 1804 йилнинг март ойида ҳарбийлар тажовуз қилиш-

ди. Улар халқнинг ҳақ-хуқуқига, асрий адолат тамо-йилларига чанг солиши - томирида қироллар қони оқсан шаҳзодамизни кишанбанд қилиб...

- Шаҳзода Ангиенскийми?..

- Худди ўша, дарҳол ёдингизга тушди! Ҳа-да, Люд-виг-Антуан Бурбон, шаҳзода Конде, герцог Ангиен-ский, менинг жувонмарг валинеъматим!

- Валинеъматингиз? Сиз унинг хизматида?..

- Мен унинг жондош мулозими эдим. Шаҳзода-нинг баҳодирлигига қойил қолардим, ёшлигини эъ-зозлардим. Шунчалик мард эдики, ўзига соқчилар олганмас, қўриқчилари ҳам умуман бўлмаган. Бироқ у беозоргина кун кечираётган қишлоқни уч юз суворий қамалга олганини мана шу кўзларим билан кўрдим. Буям камлик қилгандай, Оффенбургга замбаракларни ўрнатиб, йўлларни тўсиб қўйишганди. Валинеъма-тимни кўз олдимда Страсбург қамоқхонасига шундай беҳурматлик билан ҳайдаб кетдиларки, у қандайдир фитнакор ё сотқин эди гўё. Биламан, ўшанда биринчи консул бўлмиш Бонапартнинг бачкана буйруғи чиқкан ва икки ҳафта ўтгач, Венсанда кечаси отиб ташлашган. Ростми-ёлғонми, айтишларича, ўша дамда Парижнинг губернатори ва қўмонидони шаҳзо-да Мюрат бўлган экан.

- Йўқ! Йўқ!.. Мен хоҳлаган эмасдим... Қаршилик қилганман...

- Тўғри, шу гап мениям қулогимга тушганди! Афтидан, ўша шармисорлик ҳукмини бажонидил ижро этиш Саварига зарур эди! Хайрият, ўз иқорингизни эшигтганимга минг шукр! Демак, маршал Мюрат қалби ва виждони амрини ўз қайноғаси, эндиликда императорнинг юзига тап тортмай айта олгани чин ҳақиқат экан! Бундай бекиёс матонати унинг шаъни-ни ҳамиша кўкларга кўтарсин! Токи танамда жоним

бор экан, манави кулбада у зотнинг оромини ҳеч ким бузолмайди. Маршал жаноблари, сиз қаерлик эканимни сўровдингиз... Мен немис эмасман, бироқ ўн саккиз ойдирки, французлигимдан ҳам тонганман. Минбаъд энди менинг ватаним йўқ, фақат мана шу уйимгина борки, сиз учун жонфидо мезбонингиз бўлмоққа мунтазирман!

Ана шу гапларни тўкиб солгач, Родек ортига ўтирилди ва боягинда Гансни чақиргандай қаттиқ ҳуштак чалди. Болакай яқинроқда экан, дарровда кириб келди.

Қария ҳам жайдари ва ҳам улугворликдан кам бўлмаган ҳаракат билан кармонни боланинг қўлидан олди ва Мюратнинг олдига қўйди:

– Илтимос, буни оп қўйинг! Қатъият билан айтаманки, менда шуанлар<sup>1</sup> феълидан оз-моз сақланиб қолган ва манавинаقا олтинларга қўлимниям тегизмайман!

Мезбон таъзим бажо қилди ва чиқиб кетди. Ганс ҳайрон бўлиб, эшик кесакисига суюниб қолди. Зоҳирон мўмин-қобил, мулоим, камсухан ва ҳалимгина туолган Родек шу тобда кимсан ҳарбийларнинг энг каттаконига тиккасига ва дангал гапирганди. Сұхбатнинг бошидан бехабар эса-да, қанча-қанча кишилар соясига салом берётган одамга оддий қишлоқи кўркмай, шартта-шартта гапираётганини Ганс ўз қулоқлари билан эшитди. Чол чиқиб кетгач, Мюрат бош эгиб ўтириб қолганини ҳам қўриб турарди.

<sup>1</sup> Шуанлар – Буюк француз инқилоби, Директория ва Консуллик давридаги аксилииқилобий исёнчилар. Шуанлар қўзғолони Франциянинг шимоли-ғарбий ҳудудларида 1793 йилдан 1803 йилгacha давом этган. Улар ўзаро шартли алоқа сигнали ўрнида бойқушга тақлидан ҳуштак чалишган ёки овоз чиқарганлар.

Мутаассир шаҳзода ўрнидан қимирлагани йўқ. Томдан тараша тушгандай ўша мудҳиш фожиа гўё кўз олдида намоён бўлаётгандай эди. Ҳамон ёдида: ҳузурига герцог Ангиенскийни қатл этиш ҳақидаги ҳукмномани олиб кириб, у имзо чекиши лозимлигини айтишиди. «Йўқ! Йўқ! Мен ҳарбий либосимга душманнинг эмас, ўз қонимиз сачрашига йўл қўя олмайман!» Ана ундан сўнг Наполеон қошидаги машъум машмаша... Мюратнинг эътирозини Бонапарт совуққон ва беписанд қиёфада эщитиб бўлгач, бепарволик билан «яхши» деди-қўйди...

Шаҳзода ҳамонли ўйлар оғушида эди: шарафли юришнинг пешқадами бўлишни ҳамма шоншуҳрат ҳисоблагани ҳолда, терскай тақдир қўмондонни аламзада ва жабрдийда хонадонга қамти қилибди... Бу эса эртанги умидаларга кўланка ташловчи бадбин кароматга ўхшаб кетарди.

Мюрат бошини кўтарди ва ўзига термулиб турган рангпар болага кўзи тушди. Унинг нохуш ўйлари тарқагандай бўлиб, иложи борича мулоим оҳангда сўради:

- Кимсан, кичкинтой? Сен ҳам шу уйда турасанми?
- Мен бу ерга кеча эрталаб келганман. Олдин дўстим Франц Страсбургдаги уйимизга бориб турарди, кейин сиз ҳам бордингиз. Мен сизни дарровда танидим, рост айтяпман!
- Мени-я? Адашмаяпсанми?
- Ҳа, адашганим йўқ! Ахир яқингинада эди-ку!
- Бундан чиқдики, мени кўча-кўйда, отда юрганимни кўрибсан-да, шунақами?
- Ие, унақамас! Пиёда, ёлғиз ўзингизни кўрдим, аммо манавинаقا зўр-зўр кийимларингиз йўқ эди.
- Бўпти-да! Қани, яқинроқ келиб, бир бошдан айтиб бергин-чи?

Ганс у томонга дадил юриб бораркан, маршалнинг зарбоф кашталари ва нишонларидан, шпагасидан кўз узолмасди, ушлаб кўргиси келарди. У Мюратнинг тиззасига болаларча ишонч билан суюниб, энди унинг алпона қадди-қоматидан ҳайиқишини ҳам унутди ва кўзларига тик боқди. Сўнгра бошини эгиб, оҳиста ва иккиланиш билан темлякнинг<sup>1</sup> тилла чилвирига бармоқларини тегизди.

- Хўш, айтгин-чи, сен мени қаерда кўргандинг ўзи?
- Уйимизда! Лизбета икковимиз қайтиб келсак, Берта онам билан турган экансиз. У жудаям ранжиган ва жонсарак аҳволда эди, аммо сиз чиқиб кетгач, нимадандир мамнунлигиниям айтувди. Ана ўшанда сиз ёвуз киши эмаслигингизни билганман.
- Мана, мана энди топдим!.. Де-ла-Месанж кўчаси, а? Икки кун бўлдими? Ҳа, ҳа эсимда! Хўш, даданг ҳозир қаёқда?
- Билмасам... Ҳеч қачон билолмайман ҳам!
- Онанг-чи?
- У шу ерда.
- Қанақасига? Манави хоналар уникимиди?
- Ҳа. Сиз келаётганингизни эшитгач, Франц тога бизни юқорига кўчирганди.

Жонон пиёладай жаранглаган боланинг овози таъсиридан маршалнинг кўнгли ёзилиб, ҳозиргина юрагини мижиғлаётган қайгулар қабзиятидан қутула бошлаганди. Сўнгра кўз ўнгida дўкончадаги новдадай нозик қомат, ойсулув бир чеҳра намоён бўлди. Мана энди у куч-қудрати ва шон-шухрати барқ урган дамда ўша санам билан яна юзма-юз бўлади, бугинамас, ёв устига бориб-келаркан, йўл-йўлакай ҳам кўриб турди. Ўзининг бу ширин хаёлидан маршал енгил тортиб, ўтмишнинг қоп-қора булутлари еттинчи осмоннинг аллақаерига учиб кетди.

---

<sup>1</sup> Темляк – қиличнинг дастасидаги попук.

Шу аснода маршал хотирлади: рост, аёлни Шульмейстернинг айгоқчи экани билан қўрқитгач, кейинги илтифоти билан жиндай кўнглиниям кўтарганди. Аммо хипчагина ўша дўкондор жувон нақд бир қошиқ сув билан ютгудай эди-да! Қовуннинг яхшисини ит егандай, шундай оғатижон анави бесўнақай эрга увол-да!..

Мюрат мамнун кулди, унинг мўйлаби диккайиб, бармоқлари боланинг елкасини «аллаларди». Ёнгинангда жаннат ҳури ҳамсоя бўлгани ҳолда нохуш ўйлар чикора! (Кўшнининг ҳурилиқосини Худо ўзи қўшқўллаб бериб турибди-ку!) Голиб ҳарбийларга хос ҳавойилик ахийри ғаразга айланди: «Бунчалар қулай имконият яна келадими-йўқми?»

Ташқарида гала-ғовур қиличлар жарангি, бўсаға ортида этиклар дупури ва дағал, узуқ-юлуқ гап-сўзлар эшитилиб, Мюрат бошини кўтарди-да, болакайга бурчакни кўрсатди:

– Сен анави ерга бориб тур!

Кириб келган тўрт зобитнинг бири драгунлар, иккинчиси гусарлар полковниги, нариги икков капитан эди.

Улар сукут сақлаб, саркарданинг сўровига мунта-зир эдилар. Сўзсиз саволни Мюратнинг кўзларидан уқиб олгач, полковниклар тилга кириб, кўрган-билганилари ҳақида навбат билан маълумот беришди. Бу оғзаки ҳисботлар қуруқ ва сийқа бўлиб, жантгоҳлардаги одатий гаплардан нарига ўтгани йўқ. Бироқ маршал бошланажак ҳарбий ҳаракатлар муқаддимасида-ги ўзига юқланган алоҳида топшириқни асло унуган эмасди.

– Режаларимиз душманга аён экани ҳақида тайинли далил топа олдиларингми? – сўради у. – Йўлда Австриянинг бирор корпуси ё суворийлар қисми учрадими-йўқми?

— Учратмадик! – бирваракайига жавоб қайтаришди полковниклар.

— Маҳаллий аҳолининг муносабати қанақа, қандай кутиб олишяпти?

— Ёмонмас... Босиқлик билан...

— Уларнинг орасида шубҳали шахслар борми? Сизнинг кўз олдингизда тогдан ошиб ўтишга уринган ҳеч ким кўрингани йўқми?

— Дарвоҷе, ҳа, бошқачароқ бир воқеа, – деди гусарлар полковниги, – учинчи эскадроним командирининг айтишича, унинг икки жангчиси бир бегонани ушлаган, аммо у қочиб кетган ва тутқич бермаган. Ўша одам олдин уларнинг бирини отдан улоқтирган ва наригисининг кўзини шамғалат қилиб ўрмонда гойиб бўпти. Ҳамма ёқни элақдан ўтказишган, лекин у топилмаган. Мен бир неча кишини ташлаб келдим, чорраҳада соқчилик қилишялти, у йўқолган жойларни синчиклаб кўздан кечиришади.

— Буюринг, улар қайтишсин, полковник, ахтариш бефойда. Ўзимизни бежиз билдириб юрганимиз йўқ, майли, у бизни кўрганини душманга айтиб берса, бу нур устига аъло нур! Ўша кимсанинг алоҳида белгилари маълумми?

— Билдик, маршал, кўримсиз, суяги бузук, малласоч дейишиди. Долчинранг сюртук ва кулранг чулки кийган. У олисдан драгунларимизни кузатаётган чоги менинг гусарларим ҳибсга олишган. Манави унинг дурбини, афтидан қочиш чоги тушириб қўйган, аскарларимдан бири топиб келди. Уни қўлдан чиқарган иккала жангчини эса жазога тортдим.

— Жазони бекор қилинг! У ўзи билмагани ҳолда бизга жуда катта хизмат қилибди ахир.

Бурчакдаги Ганс енгил ғимирлаб олди. Мюрат ўша ёққа ўтирилиб, унга қаради ва кўнгли ниманидир сезгандай бўлиб, кўққисдан сўраб қолди:

- Айт-чи, ширинтой, полковник тасвиrlаган киши сенга таниш эмасми?
- Ахир у менинг дадам-ку! – деди бола, унинг овозда ғуур ва эркалик ошкора эди.
- Шу гапинг аниқми?
- Бўлмаса-чи! У кулранг чулки кийғанди, анави дурбин ҳам дадамники...

Мюрат сирли илжайиб, қўлини боланинг бошига қўйди:

– Ана шунақа, тақсирлар! Ўша қочоғимиз ким эканни аён. Уни ортиқ таъқиб қилинмасин: бу – императорнинг фармони!. Эртага тонг саҳарда йўлга чиқамиз. Буюринг, уйғониш сигнали соат тўртда чалинсин! Драгунлар Аппенфейер орқали Оберкирх томонга юришади, энг сара отларни минган гусарлар эса Ахернга бориб, мени кутиб туришади. Хайрли тун!

Зобитлар чиқиб кетиши билан остоnада Берта пайдо бўлди ва хонага назар солиб, ҳайратдан тошдай қотди.

Мюрат стол ортида тик турганича харита бўйлаб бармоқларини юргизиб, гўё эртанги йўлларни ўрганар эди. Ундан икки қадам наридаги Ганс пўлат шамширни қинидан суғуриб, худди ўз уйидагидай бемалол томоша қиласди.

– Сен бу ерда нима қиляпсан? – сўради она.

Иккөв бир варакайига у томонга ўтирилишди, аёлнинг ёноклари лола тусини олганди. Берта оналик туйғусига эрк берганидан ва овози кўтарилганидан хижолат чекиб, узр ўрнида ўғлини олиб кетишга имо қилди.

– Хайрият, наҳотки бу ўзингиз!? – Мюрат ушбу хитоб билан уни кўрганидан хурсандлигини изҳор этди. Аёл эса ийманганича ҳамон бир жойда қотиб турарди.

Ганс деворга тисарилиб, эски оромкурсига ўтириб олди, бу олиб кетмоқчи бўлиб кирган онасига унинг саркашлиги эди. Сўрашмоқча қўл узатган Мират эса аёлнинг истиқболига интилди.

– Бу ширин болани койиманг, хоним! Шу ерда ўйнашига ўзим рухсат берувдим... Уни мен олиб қолгаман, сўзларини тинглаш мен учун ҳузур, бунинг сабабини биласизми?

Берта жавоб тополмай каловланди. Нафси замрини айтганда, Миратни кўргач, унинг қалбида бош қўтарган туйғуни миннатдорчилик деб бўлмасди, негаки бу аёл ўз қадрини ҳамма нарсадан устун қўярди. Шундай бўлгач, Бертанинг кўнглида унга нисбатан жиддий бир ҳис бўлиши мумкин ҳам эмас. Ахир шу тобда ёниб, кулиб-қувнаб термулган бу қарчиғайдай зобитни, ҳаммани зир титратган шаҳзодани бир мартагина кўрган, холос. У ҳолда, демак, аёлнинг кўнглида жиндай илиқлиқ бор бўлиши мумкин, чунки иккинчи бор илтифот ва дилсўзлик қилмоқда.

Берта безгак тутгандай титраб-қақшаркан, ўз хаёлларига нуқта қўйди:

– Бу болакай энди сизни холи қўйиши керак, тақсир. Ухлайдиган пайти келди. Ўзингиз ҳам ором олишингиз лозим!..

– Агар сизни кўриб турсам, – унинг сўзини бўлди Мират, – ўшанинг ўзи менга ҳар қандай оромдан афзал! Бунчалар оғир кун ниҳоясида сиздай соҳибжамол бекачининг дийдорига эришмоқ қанчалар буюк мукофот эканини билсайдингиз!..

– Ёлвораман, бунаقا гапларни...

– Иқрорман ва биламанки, биринчи сафардаёқ қўрслигим билан меъдангизга тегиб бўлганман. Аммо ростини айтинг, сиз ўшандаёқ мени тўғри тушунгандирсиз, ахир қалбингни қайноқ ҳислар алғов-далғов

қилас экан, ҳар бир сўзни тарозида тортиб бўлмайди-ку. Кўнглидаги борини айтаман деб, қўполликка йўл қўйган мендай беадаб жангчини кечира қолинг!

У жажоғи кичкинтоини чўчишидан қўрқсан мисоли майин овозда гапиради. Икковнинг ораси шунчалик яқин эдики, Берта ширинзабон маршалнинг кўринимас ришталарига боғланиб борарди. Мюрат сўзлар экан, аёлнинг ихтиёри қўлидан кетардики, бу ҳам лаззатли, ҳам даҳшатли эди. Қайноқ ҳислар ёки оний ҳалимликдан ранги ўчган саркарданинг тунд ва мардона чеҳрасига боқиб, Бертанинг кўзи тиниб кетди... У нигоҳини ўғли томонга опқочди, кичкинтои сўлоқмондай оромкурсида гужанак бўлиб олганди. Боши елкасига тушиб, ортига суянган Ганснинг уйқуси келиб, юмилган кўзларини очиб-очолмасди.

– Нимадан қўрқасиз? – деди Мюрат. – Тансоқчининг шу ерда, ёнингизда... Қолаверса, сизни қўрқитмоқчи ва хафа қилмоқчи эмасман. Ақл-ҳушим ўзимдамас ахир Месанж кўчасида сизни ilk бор кўрганимдан буён оромим йўқ. Айтинг-чи, нега энди шу дардимни изҳор қилишга изн бермайсиз? Шу гапларимнинг нимаси ёмон? Исмингиз Берта... буни билиб олганман. Ҳа-да! Албатта биламан! Ҳайрон бўляпсизми? Шунчалар гўзалсизки, фаришта деворгим келяпти.

– Ёлвораман, бўлди, бас қилинг, бошқа гапираманг... Ахир... унутманг... сиз кимсиз-у, мен кимман...

– Унуган эмасман!.. Аммо жондан кечиб жангга отланган шўрлик йўл устида бир муддат тўхтади, шунинг учун тўхтадики, адо бўлган юрагини бир аёлнинг қўлига топширмоқчи! Айтинг-чи, ўша одам арзини бирор тинглашига ва ишончга муносиб эмасми? Ахир эртага душман ўқидан оғир жароҳат оларман, балки... Шу ҳолимда сизни алдаш мен учун не керак?.. Наҳотки... Наҳотки, Берта, сизга дўст эканимни ҳис этолмайсиз, а?

- «- Йўқ-йўқ! Илтимос, бошқа гапирманг!..

- Ахир биз мутлақо бегона бўла туриб, олис бир хилватда, битта том остида учрашиб турганимиз бе-жиз тасодиф эмаслигини ўйламайсизми? Тақдир ўзи йўлламаса, шундай бўлишини ким билиди дейсиз...

Энди у Бертанинг ёнгинасига келиб олганди, шунчалар яқин эдики, пичирлаб айтиётган сўзлари хонадаги мутлақ сукунатда ошиқона шивир-шивирга айланаёзганди. Ранги бўздай оқарган Берта бутун борлиғи, ақл-идроқи ҳолдан тойганидан, ҳали-замон таслим бўлиб, «хўп» деворишидан қўрқиб турарди. Неча йиллик заковат билан бунёд этилган бугунги баҳти ҳаётини ҳам, эртанги кунини ҳам мавҳум туман батамом тўсиб қолганди. Аммо Мюрат белидан қучган лаҳзадагина аёл ўзлигидан унга қарши журъат топа билди, унинг бағридан бўшалиб, бир қадам нарига ўтди, лекин олис кетолмади, қўли ҳамон маршалнинг қўлида эди.

- Мен шундан хафаманки, - эътиroz билдириди Берта, - сиз менга ножоиз гапларни айтиб, кеткизмай турибсиз!.. Истардимки...

- Сиз буйруқ ва талаб билан ўзингизни қийнаманг... Фақат ўша истагингизни айтсангиз кифоя: нима дейишингиздан қатъий назар, маршал Мюрат сўзсиз адo этади!

- Ўтиниб сўрайман, ўғлимни оп кетайин ва менга ҳеч қачон бунақа гапларни...

Саркарда «ортиқча уринманг» дегандай имо қилди ва аёл сўзлашдан тўхтади. Сўнгра Мюрат унинг қўлини қўйиб юборди ва кресло томон бориб, уйқудаги болани ўта эҳтиёткорлик билан бағрига олди.

Хотиржам туш кўраётган Ганс қилт этгани йўқ. Оромкурсида қандай ётган бўлса, ўша ҳолга кириб, бошини Мюратнинг елкасига бемалол қўйди.

Мюрат жилмайганича ортига қайтди ва оғушидағи қүшдай енгил «юю»ни сулув жувонга авайлаб топшириди. Бола қотиб ухлар, ҳеч нимани сезмаганидан, лоақал киприкларини ҳам қимирлатиб қўймади.

Ҳозиргина алангадай оғушдан халос бўлган аёл Гансни бағрига олгач, яна ваҳимада қолди. Энди маршал ўпид олиши мумкин, бу кулфатдан аёлни ҳимояловчи нажот мутлақо йўқ. Бащарти салгина қалтис ҳаракат қиласа ёки чинқиргудай бўлса, бола уйғониб кетади...

## БЕГУНОҲ ШАҲЗОДАНИНГ ҚОНЛИ ҚИСМАТИ

Тонг отди. Мюрат ва унинг зобитлари жўнаб кетишиди. Салдан сўнг герцог Ангиенскийнинг содиқ маҳрами билан Берта Шульмейстер ўртасида қизгин мубоҳаса бошланди.

– Мен сизга мутлақо қатъий айтаман, шу тобда қаёққадир кетишингизга йўл қўймайман! – дер эди Франц Родек. – Қайга бормоқчисиз, ўзи?

– Францияга ё ўрмонларга, ишқилиб, бошим оққан томонга кетавераман!.. Аммо бу ерда асло қоломайман...

– Афсус! Албатта болаларниям оп кетасиз, шундайми?

– Болаларниям?

– Бўлмаса-чи! Модомики сиз кетаркансиз, уларни оп қолиб нима қиласман? Шульмейстер сизларни – менга, мени – Худога топширганда, бир йўла учовингизни тайинлаб кетган. Уйимда учовингиз бир жон, бир тан бўлишингиз керак, мен шунга ваъда бергман, бошқа гапни билмайман. Тирранчаларингизни оп қолади деб ким айтди? Бошимга ураманми?

— Ундей деманг, жаноб Родек! Сиздан илтимос қи-  
ламан!

— Айтинг-чи, нега қочиб кетмоқчисиз?.. Ахир қо-  
чиб кетмаётган бўлсангиз, бу қилиғингизни яна қан-  
дай аташ мумкин? Хўш, нима гап бўла қолди ўзи? Сиз-  
дай бамаъни ва андишали аёлни қайси жин урдики,  
бундай нодонлик қиляпсиз? Гужтон ўйнаган аскар-  
ларми? Зобитларми? Нимадир сизни зада қилганга  
ўхшайди. Ёки бугун оқшомда бош штаб шу ерда жой-  
лашади деган гапни эшитиб, қочиб кетмоқчимисиз?  
Аммо ўзингизга аёнки, эртагаёқ биттасиям қолмайди,  
кейин эркин яшайверамиз. Мендан ибрат олинг, йи-  
гирма тўрт соаттина сабр қилсангиз, олам – гулистон.

— Асло! Тоб-тоқатим йўқ!

— Бўлди, бўлди, чирогим! Сизни хавотирга ва  
хижолатга солаётган нарса нелигини ўзим билмас  
эканманми? Сиз нимадан қўрқасиз? Менимча, шаҳ-  
зода Мюратнинг сизга нисбатан ширизабонлигида  
бир ғараз йўқмикан? Мен ҳам уни яхши кўрмасам-да,  
иқрорманки, у иложи борича бизни қийнаб қўймас-  
ликка астойдил бел боғлаган. Мана ҳозиргина минг  
хижолат билан узр сўраб кетдики, бу кечаям Оффен-  
бургда қолмаса бўлмас экан. У менинг ҳузуримдаёқ ўз  
мулозимларига маъқул ва жўяли топшириқлар берди.

— Нимасини айтасиз! Албатта, у илтифотли...

— Афтидан, Гансни ҳам мутлақо ўзига оғдириб  
олди, менимча, оқшом чоғи унинг хонасидан чиққа-  
ни йўқ. Мана, ўзингиз ҳам болани ахтариб, аввал Мю-  
ратнинг кабинетига кирдингиз, а? Демоқчиманки,  
ундан хафа бўлмасангиз керак?

— Асло... Бу тўғрида гап йўқ.

— Унда гап нимада?

— Кетмасам бўлмайди!

– Бу ақлдан әмас! Қулоқ солинг, ўзингиз яхши биласиз: модомики менинг уйимда меҳмон экансиз, беътиборлигим ёки бекарорлигим касрига зарра азият чекишиңгизга йўл қўя олмайман. Очиқ айтинг-чи, бу ерда нимадан озор топдингиз ва кўзлаётган манзилингизга сизни не эзгулик чорлаб турибди? Ваъда бераман: отимни извошга қўшаман-да, ўша ерга ўзим элтиб қўяман. Аммо нима бўлгандаям билишга ҳақлимани, кетишиңгиздан тайинли бир маъно борми ёки бемаъни ваҳима оқибати холосми? Сизни кеткизворсам, Шульмейстер мендан хафа бўлади ва тўғри қиласди.

– Аксинча, энг аввал Шульмейстер ўзи бу ишимни маъқуллар эди.

– Ҳа-а... Энг аввал денг? Қаранг-а!

Франц Родек ўрнидан туриб олганди. Шу лаҳзагача у аёлнинг фикрини уқмоқ учун кўзларидан кўз узганийўқ эди. Энди бунинг ҳожати қолмади: чоғи у олдинроқ бўлиб ўтган ноҳушликнинг тагига етди ва феъли айний бошлади. Қариянинг чеҳрасидаги ифода шунчалик қатъий ва ғазабли тус олардики, Берта бунга дош беролмай кўзларини олиб қочди.

– Овсарнинг ўзгинасиман-да! – шивирлади кексашуан. – Аниқки, Мюрат бундай гўзалликка бепарво ўтишга, уни ўз нафси йўлида қурбон қилмасликка ўрганган әмас! Бу аёл кимнинг хасми ҳалоли экани унга бир чақа! Модомики Германияни истило қилмоқчи экансан, юришни немис аёлини забт этишдан бошлайсан-да! У сизга нималар деди? Эсим қурсин!.. Мени афв этасиз!..

Азбаройи қаҳри келганидан бу гап беихтиёр оғзидан чиқиб кетган бўлса-да, Бертанинг қони қочган чеҳрасига, саросима босган кўзларига қараб, хуши ўзига келди.

— Кечирасиз, қизалогим! Нималар деганинг қанчалик аҳамияти бор? Тасаввур қиляпман, куч-кудрати ва сұксурдай суратига бино қўйиб, ўзини мулойим ва ширинзабон қилиб кўрсатган. Биламан! Бунга ақлим етиб турибди! Кераги йўқ, майли, индамай қўяверинг. Сиз шу қадар покдомон ва иболи аёлсизки, унинг алламбало шевада қагиллашини эшитгач, ҳайратда қолгансиз, балки эсингиз оғаёзгандир. Унинг тилла тақинчоқлари фақат Гансингизга ўхшаган болаларнинг кўзини қамаштириши мумкин. Гоҳо аёлларнинг ҳам болалардан ортиқ жойи йўқ!.. Гапирманг, ҳаммасига ақлим етиб турибди. Биз ҳозироқ йўлга тушамиз, бўтам!

Кекса Францдаги топқирлик билан ишонч ўзаро шунчалар уйғунлашгандики, бундан Бертанинг кўнгли кўтарилиб, ийиб кетганди. У оғиз очгани йўқ, аммо Франц ўз тамизи билан бор гапни фаҳмлаб бўлди. Аёл оний нодонлигидан, йўлдан озишига бир баҳя қолганидан уялиб, тошдай қотиб турарди. Эртанги ҳаёт синовлари ҳам осон эмас, машъум ва пинҳоний лаззатлар хуружидан голиб чиқиш учун ўзини қўлга олиши, иродасини метинга айлантириши зарур. Аммо шукрки, бу мушкул йўлда нажоткор дўстни Худонинг ўзи етказди ва у ўз олийжаноблиги билан аёлга кечадан бери қутқу солган бегона ва мавҳум булутларни қувиб ташлади. Родек ҳақ сўзни айтди: ҳа, унинг кўзи қамашганди ҳам. Хайрият, энди ақли ўзида, энди кўзларини мутлақо ёғ босмайди. Чолининг андишали гаплари уни ўзлигига қайтарди.

У Родекка бегубор нигоҳ ташлади, табассумга мояил лабларида ранж унсурлари ҳам йўқ эмасди. Аммо ўша ондаёқ аёлнинг ранги ўчиб, дами чиқмай қолди, негаки мезбоннинг ўзига қадалган нигоҳида ошкора ва аччиқ бир гусса намоён эди.

— Қалбимни не замонлардан буён ўртаётган сирни очиш пайти келди, — деди у оғир сукунатни бузиб. — Аслида бунга эртароқ, мен бу мұдхиш ҳикояни ҳали-бери айтмоқчы әмасдим, афсуски, айни вазият менинг истагимдан зўр чиқди, энди ҳаммасини сизга билдириб қўйишим зарур...

Берта сабрсизликдан кўзлари чараклаб тикиларкан, гап бир ўзигагина тааллуқли бўлмаслигини кўнгли сезиб турарди. Аммо қачонлардир кўз олдида бўлиб ўтган сирли кечмиш юзидағи парда ваниҳоят очилиши аниқ эди.

— Гап анави икки норасида ҳақида, — давом этди Родек ва унга таскин бергандай елкасини енгил силаб қўйди. — Сир уларнинг волидаси, яъни бир йил бурун ғам-ғуссалар адойи тамом қилган соҳибжамол ва шўрлик синглингиз устида. Шунингдек, болаларнинг фақат менгагина маълум падари ҳақида айтиб бераман. Унинг қатл этилиши оқибатида икки гўдакнинг онаси ғамга ботганича жувонмарг бўлди-кетди. Худо катта баҳт-иқбол учун яратгандай туюловчи у мағрур ва беназир хилқат ёдингизда, албатта. Зоҳиран ақл бовар қилмаса-да, у ўз мажбуриятларидан юз ўтириб, қондошларидан жудоликда ва олисларда яшаганини, ҳамма ундан воз кечгани ҳолда, у ўз саодатини ўз иснодидан топганини ҳам эслаймиз. Зеро, унга дўст деган зотнинг энг олийжаноби ва энг вафодори насиб этганди ва жондан ортиқ севилган аёлнинг баҳтига муяссар бўлганди. Уни суйган ошиқ барча ғовларни енгиб, маҳбубасини ўз номига олишга қодир эди, бироқ кутилмаган фалокат ўша буюк саодатни синглингизнинг қўлидан юлиб олди...

— Демак, — Бертанинг сабри чидамади, унинг кўзлари ҳалқа-ҳалқа ёш эди. — Демак, Ганс ва Лизбета...

— Ҳа, Ганс билан Лизбета — уларнинг фарзанди! Синглингиз Жанна Унгер ва герцог Ангиенский

аталмиш Луи Бурбондан қолган етимлар. Бахтиқаро хожам фарзандларининг онасини яна ва яна кўриш орзусида Этенгеймга тез-тез ташриф буюарар ва Франция йўлидаги хилват бинода узоқ-узоқ қолиб кетар эди. У на директорияга<sup>1</sup> ва на биринчи консулга<sup>2</sup> қарши исён кўтариш учун келган эмас. Бу хуфёна сафарлар чоги мен унинг доимий ҳамроҳи бўлиб, ўзим «бекачим» деб улуғлаган аёлни кўришдан бахтиёр эдим. Герцог фақатгина менга ишонарди: унинг ташрифидан огоҳлантирадим, эр-хотин холи қолган кезлари болаларининг қўриқчисига айланардим. Албатта бундай ташрифларда мутлақо бўлакча уст-бошларни кияр, шаҳзода эканини ҳеч ким пайқамасди.

Ўғли билан қувнаб ўйнашаётганини минг бора кўргандирман! Уни еру кўкка ишонмасди, болакай ҳамма учун Ганс бўлса-да, хожам уни Жан деярди, бу ота-боланинг пинҳоний сири эди... Шаҳзода унинг қулогига ана шу исмни шивирларди, қаймоқдай кичкинтойнинг кўзлари ёниб, дадасининг бағрига сингиб кетарди...

Қўшалоқ кулфатдан сўнг шўрлик етимчалар тақдирини сизга ва ҳалол-пок Карлингизнинг қўлига топшириш фикрига келдим. Мен болани бир четга тортиб, бошига тушган қайгуни қўлимдан келганича

<sup>1</sup> Директория (аниқроги – Ижрои Директория) – 1795 йил 4 ноябрдан 1799 йил 10 ноябргача Франция Республикаси ҳукумати. У беш аъзодан (директордан) иборат бўлган ва директорлар Бешюзлик кенгаш билан Оқсоқоллар кенгаси ҳамкорлигига сайланган. Директория ҳукумати йирик буржуазия манфаатларига хизмат қилиб, Наполеон бошлиқ давлат тўнтириши (1799 йил 9 ноябрь) оқибатида тугатилган.

<sup>2</sup> Биринчи консул – Наполеон кўзда тутилмоқда. Консуллик даврида (1799–1804) ҳокимият расман уч консул қўлида бўлса-да, давлат бошқаруви амалда Наполеон Бонапарт ихтиёрида эди.

уқтирдим. «Сен энди холангницида яшайсан, у ҳам онангдай мушфиқ ва меҳрибон аёл. Унинг сўзидан чиқмагин. Бироқ у отанг кимлигини билган эмас, сени жондан азиз кўрган марҳумнинг ёдини қалбинг тўрида сақтайвер. Иккимиз учрашган дамларда да-дангни эслаб, гурунглашамиз.»

Аслида у мангу жудо этилган падарининг на ун-вонидан, на ҳақиқий исмидан бехабар, сизга бу гап-ларни уқтиришнинг ҳожатиям йўқ. Болакай учун у ота эди ва шунинг ўзи кифоя!

Ганс ўзини худди мен уқтирганимдай тутди. У соғ-дил бола, ҳар икки тарафдаги боболарига муносиб улғаймоқда. Унинг юраги деҳқонларга хос, томирида эса қироллар қони оқмоқда. У қатъиятли ва садоқат-ли, мард ва сир сақлай билади. Баъзан иккимиз ёлғиз қолган кезлари ранги ўчинқираб, ёшли кўзлари би-лан менга мўлтираб боқади. Мен жилмайишга ури-ниб, у яқин орада эшитмаган исми билан чақираман: Жан! Шунда у унут бўлган бир сиймони кўрмоқчидай ғамнок кўзларини кўкларга тикиб қолади. Мен... Мен эса шу аснода валинеъматимни қумсайман-да, армон-дан қонга тўлган юрагим ёрилгудай бўлади.

Берта бедарак кетган опасини эзилиб эсларкан, кўз ёшлари ёмғирдай қуйилди. Франц Родекнинг ҳикояси бу қисмат устига тортилган сўнгги парда-ни ҳам кўтарди. Жаннанинг ҳаёти ва севгиси ҳақида билмаганларини мана энди билиб олди. Эсида: отаси Сент-Марио-Минда каттаю кичик ҳурмат қиладиган амалдор ҳисобланарди. Уйдан кетиб қолган опасини афв этиш ҳақидаги қариндошлар илтимоси унга жуда малол келарди. Берта оилани иснодга қўйган ўша қизи кўнгил берган инсон кимлигини отаси ҳеч-ҳеч ўйлаб кўрганмикан деган хаёлга борди.

Аёл ёшлик хотиралари уммонига шўнғиб, ўз тақ-дири номаълум хатонинг қурбони эканини англади.

Ва ўша ондаёқ биринчи имкониятга ёпишиб олиб, уни шоша-пиша турмушга узатган отасининг қарори бежиз бўлмаганини тушунди. Куёв камсуқумгина ажнабий савдогар бўлиб, муқим уйи йўқ, у ер-бу ерда гоҳ яшаб, гоҳ кўчиб юрган ва таниш-билишсиз, бирорга кўнгил қўймаган киши эди. Тўгри, у Бертага қалбан боғланиб қолганди, бироқ астойдил оғиз солган эмасди! Аммо ана шу тасодифий эр уни шунчалар эъзозлаб, ҳатто бошида кўтариб юрдики, шу туфайли келинболанинг ундан кўнгилсиз бўлишга заррача ҳаққи йўқ эди.

Бертанинг фикри қуондай тўзиб, остин-устун бўлиб кетди. Кекса шуаннинг ҳазин ҳикоясидан кейинги оғир сукунатда хаёл устига хаёл бўрондай ёпирилиб, унинг ақлини шошириб қўйганди. Лекин шунчалар саросимада ҳам бағрида яшаётган етимлар бир лаҳза ёдидан чиққани йўқ. Икки норасида қироллар авлоди, ҳақиқий француз шаҳзодасининг фарзандлари эдикни, Берта уларга қалб қўрини борича бериб, ғамхўрлик қиласди ва қўлидан келганича тарбиялайди.

У болажонларни жонидан ортиқ кўрарди, энди бу меҳр ёнига эҳтиром туйгулари ҳам қўшилди.

Бехосдан эшик очилиб, жажжигина болача ўзига хос қадамлар билан кириб келди.

Берта илк бор ўз нигоҳидан қониқмай, унга синчковлик билан назар солди. Гансининг соchlари сарғиш бўлиб, юзи табиий рангпар эди. У жиккак, лекин ҳаракатчан ва чайир қўринарди. Кўзлари мовий тусли, қарашлари эса гоҳ қатъий, гоҳ ўйчан. Бу жиддий ва мардона чеҳрани, кибр-ҳаводан бегона, аммо ҳавасга арзигулик виқор ва салобатни Берта ҳозиргача пайқамай юрган экан.

Бола шу тобда ўзига гайриодатий разм солинаёттанини сезди. У Франц бувага қараб, икковлон хуфя суҳ-

батлашган чоғларидагина кўринувчи таниш чизгиларни пайқаб олди. Сўнгра у Берта онага кўз ташлади ва унинг ички бир түгёндан саросимада эканига эътибор берди. Шу боис ранги тагин ҳам оқариб, чоги нима қилишни билолмай жойида туриб қолди.

Ундан кўз узолмаётган жувон қўлларини чўзди ва титроқ овозда оддий, жуда ҳам оддий бир исмни тилга олди:

– Жан!

Бола гўё кўксига бир нима туртгандай қалқиб кетди, сўнг эса янги... онаизорининг оғушига отилди ва кўзларидан ёш қуйилиб, қайта-қайта ўпаркан, тинимсиз такрорларди:

– Берта онам, онажоним Берта, менинг онам!..

Кейин меҳрибон қўллардан отилиб чиқди-да, индамасдан ташқарига чопди.

Родек билан Берта ҳайратангиз қараб қолавердилар.

Дам ўтмасдан, Ганс жажоки синглисини етаклаб қайтиб кирди. У қизчани оҳиста туртиб, икковларини фарзандим деган аёл сари имо қилди:

– Энди буни Елизавета дейишимиз керак. Унинг французча исми шунаقا бўлади-да...

Соат ўн иккиларда мўъжазгина арава ўрмон оралаб кетиб борарди.

Ундаги йўловчилар меҳмонлар учун уйни очиқ-сочиқ қолдиришган, Мюратнинг одамлари ертўла ва омборда нимаики бўлса, хоҳлаганларича олаверишлиари мумкин эди. Тўғри, ертўла ҳам, омбор ҳам жуда тўлиб-тошган эмас, бироқ ётоқ-жойлар шинам, дастурхон тузатилган, кийим жавонлари очиқ, отхонада боф-боф сомон муҳайё, отлар роҳатланиб озиқланиши учун паншаха ишга солинса бас...

Жуда-жуда олис, тогнинг ортигача туташган бепоён йўлда арава шитобла бўлмаса-да, бетўхтов кетиб

бормоқда. Олдиндаги барваста пиёданинг соchlари оппоқ бўлиб, илдам қадамлари ва чайир жуссасидан сертафаккур ва оғиркарвон киши экани билиниб турарди. Ёнидаги болакай кўзи тушган ҳамма-ҳамма нарсадан ҳайратланиб, ўрмон қушчасининг парвозидан ҳам завққа тўлган. Кўлида кичкина хипчини билан қарагайларнинг ерга бош буккан шохларини савалаб-савалаб қўяди.

Аравадаги йўловчилар икки киши: соҳибжамол, бироқ юзига маҳзунлик соя соглан аёл ва ширин бир қизалоқ. Қизча тошлар ва дов-дараҳтларга, қуёш ва осмонга, от ва чолга, олис уфққа, олдиндаги болакай, учқур ҳашаротларга тикилиб тўймайди. Буларнинг барига кулиб боқаркан, чиннидай жарангдор ва бегубор ширин тили билан бетиним чугурлар, унинг лабида қўшиқ, қаҳқаҳа, қувонч ва ташвиш – ҳаммаси мужассам эди.

Уларнинг йўлга чиқишганига анча бўлди. Наридан-бери нонушта қилиб жўнаганлари боис энди Лизбетанинг қорни очганди. Аммо юришгани сайин тобора қизиқарли туюлаётган томошадан қолишдан қўрқиб, буни айтгиси келмасди. Айниқса, катта одамлардай ва чарчоқ билмай яёв бораётган акасига қараб, қалби жўшиб кетарди! Кошкийди билолса: улардан қай бири олдин чарчайди – кап-катта Францми ё кичкина Гансми? Башарти анави девдай одам ёш боладан бурун ҳориб-толиб ўтириб олса, заб томоша бўларди-да! Дарвоқе, шунчалар дадил юриб бораётган Ганснинг болалиги қоптими? Ҳа-я, болалик қачон поёнига етади ўзи? Аравага қўшилган отдан ҳам қўрқмасдан пиёда юришга рухсат этилган чоғдами? Йўқ, бу одамлар Лизбетанинг эмин-эркин юришига ижозат бериб қўйишмайди. Афтидан, ҳали кичкина қиз бўлгани учун шундай қилишса керак-да. Унақа экан,

нега энди яёв кетаётган акасига ҳеч нима дейишмаяпти? Хўп, бундан чиқдики, демак у катта бола бўлиб қолибди улғайибди.

Ўйлари ана шу нуқтага етганда доимо ёнида ўйнаб ўрганган болага қизчанинг жуда ҳаваси келди. У кўнглидаги ана шу қувончни дарров баҳам кўриш учун акасига қичқирди:

– Ганс, ҳой Ганс! Бу ёққа қарагин!

Йигитча серилтифот соқчидај үнга ўтирилди ва акаларча жилмайди:

– Боролмайман, Лизбета, олдимизда йўл бехавотирми-йўқми, шуни кузатиб кетяпман-да!

Қизча энди амин бўлдики, акажониси кечадан буён улғайибгина қолмасдан, ҳатто қўрқмас қўриқчига айланибди. Лизбета ёнидаги меҳрибон аёлнинг ҳамиша очиқ оғушига сингиб кетди. Кутимагандан унинг чеҳраси йиғлоқи тус олди, ёноқларидан ранг кетиб, кўзлари мўлтиради.

– Берта она, қорним очиб кетди-ю! – арз қилди у.

## ИККИНЧИ ҚИСМ

### АЙГОҚЧИ ДУШМАН ЎРДАСИДА

Генерал Макнинг қаҳри қаттиқ қайнаб кетди. Мана бир неча кундирки, воқеалар унинг синовидан ўтган билимларини йўқса чиқариб, ҳарбий анъаналарнинг зиддича бўлмоқда. Ахир Европа харитасида урушнинг муайян майдонлари мавжудлиги, тажрибали саркардалар томонидан айнан ўша жойлар ҳарбий ҳаракатлар учун боп эканини ҳозир бутун дунётан олган. Ўқиган, оз-моз илми бажо зобитларнинг ана шу мэрралар ҳимояси учун қанча куч зарурлигига дарров ақли етади. Кўшни йўлнинг мудофааси учун ўша аниқ нуқталардан бирига жойлашиш эса стратегиянинг ибтидоий қоидаси, холос. Дейлик, Ульмдаги истеҳкомга чодир тикмай туриб, Германияни французлардан ҳимоялайман дейиш бориб турган аҳмоқликки, бу совуқдан сақланмоқча уринган ҳолда, бошга қалпоқ киймасликдай гап. Таассуфки, ўз генераллари ва етакчи қўмондонлари орасида ҳам ана шундай хаёлпастлар пайдо бўлиб, урушнинг муқаддас қоидаларини назар-писанд қилишмаяпти. Бу шунчаликка бориб етдики, ҳатто бош штабда кимсан генерал Макнинг стратегиясини «эскича эрмак» дегувчилар чиқиб қолди. Уларнинг даъвосига қараганда, аввало душман қайси йўлдан юражаги мутлақо аниқланиши керак, ундан бўлак ҳеч нарса Қора ўрмондан чиқиш йўлларига қўшин тўплашга далил бўлолмас эмиш. Гўё ёв бошқа йўлдан юриши мумкин экан! Бироқ камида

икки юз йиллик тажрибага кўра, французлар Швабия ёки Вюртембергга қўшин тортаркан, шак-шубҳасиз, ё Жаҳаннам водийсидан, ё унга туташ қирлар томондан чиқиб келади.

Мак қоматини ростлаб, хона бўйлаб юра бошлади. У асосан эрцгерцог Фердинанддан хафа эди. (Ҳарбий кучларнинг қўмондони расман у бўлса-да, жанговар ишларнинг бари амалда Макнинг қўлида.) Албатта, шаҳзодага қўрқув бегона. Лекин у ҳам анавилар каби, «Наполеон бўлак йўлдан бемалол ўтиб, генералимизни доғда қолдириши эҳтимолдан холи эмас» деб туриши-чи?

Наполеон! Ҳаммасининг топиб олгани Наполеон! Наполеоннинг номи уларнинг даҳанига елимланиб қолган. Унга Париж аксилинқилобчилари қучоқ очиб турганда Англияни эгаллашга қўли калталик қилиб, аламидан Сен-Клудаги базми жамшидларда овуниб юрган уч пулгаям қиммат ўша император-да! Кўкларга кўтаришаётган саркардалик санъати сариқ чақага арзимайди. Тўпчиларнингчувринди ва жирканч поручиги эси йўқ халқнинг раҳнамосига шунинг учун айландики, у Франциянинг биринчи рақамли телбаси эди!.. Хўш, қозонган зафарлари-чи? Ҳе-е, омад ва тасодиф, холос! Тўғри, у Италияда Альвинцг, Вурмсер ва Меласни ер билан яксон қилди. Нега? Чунки немис генераллари ўзи имкониятни бой берди, энг табаррук, дуо теккан қадамжоларни ҳимоялаш заруратига панжга орасидан қаради.

Устига-устак Италияда Қора ўрмон йўқ ва немислар бегона тупроқда эдилар. Ульм эса уларнинг ўз уйи...

Ваниҳоят, душманнинг асл режаси шунинг учун ҳам аёнки, Страсбургдаги учига чиқсан айгоқчи ҳушиёр, у қўшинлар ҳаракати тўгрисида муттасил хабар бериб турибди.

Мак баланд дераза олдида тўхтади: узун, аммо тору танг кўча, қингир-қийшиқ, пастак уйлар кўриниб турарди. Бу шаҳарга кириладиган асосий йўл. Ана Мисельсберг чўққилари, унинг қўшини худди ўша ерда жойлашган. Енгилмас аскарлар жантга шай, душман қай тарафдан келмасин, янчиб ташлашга ташна! У мана шу ҳақиқатни тушунмаётганларга ачинди ва афус билан кулиб қўйди.

Мак бутун борлиги, фикру зикри, мундири билан эски тузум зобитларининг энг ашаддийси эди. У дераза ойнасини чертганча, ҳам норози, ҳам ўзининг синалган усуллари оқибатидан хавотирланган ҳолда кўчага боқаркан, шовқин-сурон кучайиб, одамлар кўпайиб қолганини сезди. Гуруҳ-гуруҳ суворийлар бош штабга яқин келиб, ёши, сурати, уст-боши ҳар хил ҳарбийлар эшик олдида отдан тушишди. Соқчилар милтиқларини шай тутиб, уларга салом берган бўлишди.

– Вой-вуй! Фельдмаршал Кленаунинг ўзгинаси-ку!  
– деди Мак. – Бугун ҳам алламбало маълумотлар билан бизни жинни қилмаса гўргайди. Агар унга қулоқ солинса, манави Ульмдай шаҳардан чекиниб, иттифоқчи руслар паноҳига чопиш зарур! Жин урсин, душманга товонимизни кўрсатамизми?.. Хўш-хўш! Кленаунинг ортидаги ким бўлди? Ҳа-а, Шварценберг экан, мутафаккир киши, жанг майдонидаги дипломат! Гъюлай ҳам шу ерда, у сара зобитлардан, ўта интизомли. Қанийди ҳамма унга ўхшаса, ишимиз мутлақо ўнгарилиб кетарди!

Овозлар қўшни хоналардан эшитила бошлагач, Мак дераза томошасини бас қилиб, меҳмонлари истиқболига юрди. У ҳозиргина эгардан тушган етакчи генералларни бирма-бир кутиб олди. Сал ўтмай саркардалар сафи янада кенгайди: тунд ва норози Вер-

нек, гусарлар сингари шопмўйлов Иелашиш, у ҳамиша карнайдай ғатиллаб сўзлашга, немис рейтаридай<sup>1</sup> шалоқ сўкинишларга одатланган. Ризе эса жиддий ва камсухан бўлса, Матцеройни одам қиёфасидаги жирканч маҳлук дейиш мумкин. Энг охири шоҳона илтифот билан эрцгерцог Фердинанд кириб келди, у ўзининг сұксурдай қоматига бино қўйиб, олий мақомига кўрсатилаётган ошкора иззат-икром ва таъзим-тавозелардан масрур эди. Башарти ҳарбий ҳаракатлар муҳокама этилгудай бўлса, ягона ҳунари урушни ҳидидан билиш бўлган қўмондонларнинг фикригина шаҳзодани ишонтира оларди. Жасур ва шижоатли бу арбобнинг ягона талаби шуки, ҳеч кимга, у ким эканидан қатъий назар, имтиёз берилмасин!

Тўрдан эрцгерцог жой олиб, ҳамма кенгаш столи атрофига ўтириб бўлганди. Ногоҳон залнинг эшиги очилди-да, ҳеч бир саркарда танимайдиган шахс кириб келди.

У бўйи пастроқ киши эди. Хийла ёш бўлса-да, салобати ва юриш-туришига қараганда, алалхусус, эгнидаги биринчи тоифали бош интендант мундирига кўра у ҳазилакам арбоблардан эмасди. Немисча иерархия тартибига биноан бу одамнинг лавозими фельдмаршалга teng бўларди.

Бироқ у сарой муҳитида комил тарбия топган аслзодалар мисоли эрцгерцог қошига бориб, алоҳида ҳурмат билан таъзим бажо этди. Сўнгра қўл остидагиларга марҳамат қилаётган амалдорга хос илтифотли қиёфада Мак ва бошқаларга ўзини таништирди.

<sup>1</sup> Рейтар – XVI асрда Гарбий Европа ёлланма армияларидағи кавалерия қисмларининг бир тури. Улар тиш-тирногигига қуролланган бўлиб, дубулға ва совут-қалқонлар билан ҳал қилувчи жангларга киришарди. Рейтар қисмлар аксарият немислардан тузилиб, XVIII аср бошларида драгунлар ва отлик егерлар уларнинг ўринини эгаллаган.

– Зоти олийлари мени шарафли бир вазифа билан сийлаб, – деди у, – ҳаракатдаги ҳамма қўшинларни бирма-бир кўздан кечиришимни буюрди. Камина бош интендант Калькнер бўламан... Ўйлашимча, жаноблар, орангизда мени танийдиганлар топилмаса ҳам керак, зотан, истеъфога чиққанимга не замонлар бўлган эса-да, олампаноҳ яна хизматга чорлаб қолди.

Хонага сукунат чўкди. Ҳозир бўлган генералларнинг ҳар бири ўз хотирасини титкилаб, Калькнер деган зотдан бирон ном-нишон топишга уринарди. Айниқса Макнинг ёши улуг бўлса-да, ҳаммадан ортиқ таажжубда эди. У то шу кунга қадар бош штабдаги кадрларни ҳеч ким менчалик яхши билмайди деб юради, шу тобда эса томдан тараша тушгандай янги бир номни эшлиб турибди-да!.. Калькнер!.. Калькнер!.. Ульмдаги қўшиннинг қароргоҳига император Францнинг ваколатли вакили сифатида ташриф буюргунича, Калькнер деган жин ургур қайда яшаб, қайда ишладийкан?..

Шундай бўлса-да, меҳмон бўлмиш тартиб-қоидалардан боҳабар эди. Эгнидаги либоси рисоладаги-дай, андозага биноан тикилган ва ўзига қўйиб қўйгандай эди. Унинг хатти-ҳаракатлари жойида, нутқи ҳам бурро. Фақат жиндай қовушолмаётгани билиниб, айниқса, шаҳзода таклиф эттачгина ўтираётган чоги иймангани ошкора сезилди. Унинг қиличи бор бўйи билан стулга узала тушди, бироқ шапкасини бошидан олиб, столдаги қўлқоп ёнига расамади билан қўйди. Лента ва крест остидаги сўл чўнтагидан ваколатномасини (балки бундай ҳужжати умуман йўқдир) олишга уннаган қўллари сутдай оппоқ эди.

Бироқ унинг қўли мазкур юмушни охирига етказгани йўқ. Негаки эрщгерцогнинг илтифотли табассуми ва дилкаш сўзи бу оворагарчиликка ҳожат йўқлигини

аngлатарди. Бош интендант аталмиш Калькнер ҳам ушбу масалада ортиқ уринмай қўя қолди. У дарҳол генерал Макни синчковлик ва қатъият билан кузата бошлади, чунки бу ердагилар орасида ўзига алоҳида ғашлик билан, еб қўйгудай боқаётган бу одам хийлагина хавфли эди. Калькнер атоқли генералларнинг фикрини билмоқчи эканини қисқача баён қилди.

Айни ўринда биз музокаralар тафсилотини баён этиб ўтирганимиз учун китобхондан узр сўраймиз. Ҳозирча австриялик генераллар французларнинг қўққис тажовузига қарши қўшинлар бағоят аъло жойлаштирилганини мақтай турсинлар. (Айни хусусда улар ўзаро юз марта гаплашиб бўлишган.) Биз эса осмондан тушгандай ташрифи билан ҳарбийларни ҳайратга солган нотаниш арбоб қаёқдан пайдо бўлганини аниқлашга уннаймиз. Кенгашга эса андаккина кейинроқ, аммо тез орада қайтамиз ва унинг якунлари билан ўқувчини таништирамиз.

Аввало, бош интендантдай амалдорнинг ўз зобитлари ҳамроҳлигига ташриф буюрмагани ҳазилакам гап эмас, бинобарин, бу ҳақда энг катта бошлиқка бир оғиз шипшиб қўйиш ҳеч кимнинг ақлига келмадимикан? Калькнерни Парвардигор эҳтиёткорлик ва ўта камтарлик фазилатлари билан ёрлақаган эдики, у каллайи саҳарда истиқболига ногора-погора чалишларини кутмасдан танҳо ўзи Ульмга кириб келаверганди. Бироқ эгнидаги серҳашам мундири унинг кимлигини билдириши, буни эса кимдир пайқаб қолиши керак эди-ку?

Калькнер шаҳарда одмигина уст-бошда пайдо бўлганди-да.

Ваниҳоят, шуниси ҳам борки, анави унвону рутбаларни ўзини шубҳаланмай қаршилашлари илинжида айтганди. У ўзини шаҳардаги энг катта меҳмонхона

соҳиби кутиб олсин деб тайинлади. Мезбон мұхтарам ва давлатманд жаноб бўлиб, меҳмондўст иморатнинг тақдири унинг қўлида эди. Айни муассасанинг пешлавҳасида пурвиқор қарагай акс этган бўлиб, унинг остига «Зумрад дарахт» калимаси битилганди.

Калькнер ана шу қабилда Бавариядаги кўхна қалъа-та бемалол кириб олди. Сўнг эса сеҳрли уч калимадан қисқартма сўз ясаб, ажнабий меҳмонлар саҳифасига бош ҳарфларни битди: «И.Ш.Х.» (император штаби хизмати). Унинг киссаси пулга лиммо-лим бўлиб, ортиқча сўраб-сuriштириш ҳам бўлгани йўқ.

Шундан сўнг эрталаб қаёққадир кетиб, дом-дараги бўлмади. Қайтгач эса шундай талаб қўйди:

- Махсус залда алоҳида стол ясатиб қўйинглар, тушлик қилгани келаман.
- Неча кишилик? – сўради хўжайин.
- Уч киши бўламиз...

У меҳмонхонага барвақтроқ қайтди. Уни бош штабга дахлдор жуда таниқли зобитлардан иккитаси қузатиб келганди. Уларнинг биринчиси – поручик Венд, эрцгерцог Фердинанднинг надимларидан. Иккинчиси эса бевосита генерал Кинмейерга бўйсунувчи поручик Рульский бўлиб, унинг бошлиги бир неча вёрста наридаги Аугсбург йўлига топшириқ билан жўнатилганди. Икков остона ҳатлабоқ алламбалолар тўла зилдай жомадонни олиб киришни буюришди, уни уларнинг хизматкори замбилғалтакда етказиб келганди. Тушлик асносида зобитлар ҳалиги одамга бағоят ҳурмат билан муомалада бўлишарди. Рўй-ростини айтганда, агар улар бу киши ўрнида олий марта-бали қўмондонни кўрганларида ҳам бунчалар иззатламаган бўлур эдилар.

Бош мезбон боягинда рўйхат дафтарига «И.Ш.Х.» деб бармоқ босган киши энди империя генералининг

башанг мундирида қайтганидан ҳайрон эди. Этнида-  
ги заррин уқали «алламбало» либосда у ўзини багоят  
бемалол ҳис этаётгани устига, ваҳимали ва ярашган  
уст-бошларда нисбатан очилиб кетганди. У кам га-  
пирава асосан ҳамма ёқни кузатиб, кўпроқ ўзгалар  
суҳбатига қулоқ солиб ўтиради.

Упа сепилган ясама сочи алдаганми ёки аввал яхши-  
роқ разм солишмаган эканми, ҳайтовур, у эрталабки-  
дан ёши улугроқ кўринаётганди. Тўғри, ҳамон қадди  
шамшоддай, дадил ва илдам одимлари ҳам ўша-ўша.  
У ҳатто камин олдида беҳуда турган курсини телиб  
жилдирди, лекин илгари сезилмаган ажин тарамлари  
энди манглайи ва кўзлари атрофини «безаб» турарди.  
Унинг афт-ангори сўлинқирагандай туюлиб, қимтил-  
ган лаблари ва хиёл тиришган башарасига қараганда,  
мутафаккирнинг ёки касб-кори маҳфий арбобнинг,  
балки даҳо бир зотнинг худди ўзи деяверасиз.

Қиёфасидаги бунчалик ўзгаришнинг асосий са-  
баби ҳам бор: муйлабини батамом олдириб, юзини  
жуда қиртишлаб ташлаганди. Шу туфайли бурун кўз-  
га кўринмаган анчагина чизгилар намоён бўларди.

Икки зобит тушлик жараёнида унга нисбатан  
аввалгидаи муомалада турган бўлсалар-да, ёлғиз  
қолишлари биланоқ гап-сўзлари бўлакча тус олди.

– Хўш, сизни ниқобловчи этнингиздаги манави  
жомалар нега зарур бўп қолди ўзи? Бу дардисарин-  
гизни бутлагунча, она сутим оғзимга келди ахир.  
Ҳали лахтакфурушга, ҳали қуролсозга, чеварга, ҳат-  
то шляпа тикувчигаям бошлаб борибман. Хўш, сиз  
кимга томоша қўйиб бермоқчисиз?

– Ҳамма нарсага тумшугингизни суқавераркан-  
сиз-да, биродарим Венд! – жавоб қилди сохта интен-  
дант, китобхонимиз таниб тургандир ҳамки, у Карл  
Шульмейстернинг худди ўзгинаси эди... – Тўғри, им-

ператор қўшинларининг асл миқдори ва генералларнинг тактик режалари хусусидаги маълумотларни қисман сизнинг кўмагингизда, аксариятини эса ўзимнинг ҳаракатларим билан топдим. Сиз ҳали ноаниқ тафсилотлар борлигини ва улар ҳам албатта қўлимга тушишини билиб турсангиз кифоя!

– Лекигин, – дея эътиroz билдири поручик Рульский, – ўша тафсилотларни эгнингиздаги мундир билан ахтармасангиз керак?

– Буниси – менинг ишим, сизга дахли йўқ.

– Кечириб қўядилар! – гапга от солди Венд. – Учовимиз бирга юрганимизни ҳамма кўрди, сизнинг битта бежо қадамингиз оқибатида Рульский иккимизнинг шўrimизга шўрва тўкилиб қолади.

– Нима бўпти?.. Чамангизда иккаловингизни мен билан ҳамтовоқликда айблайдиларми? Бу хусусда ташвишланманг.

– Аммо, ахир...

– Бас! – овозини кўтарди Карл. – Демак, жонингиз қўлимда эканини айтишимни хоҳлаб қопсиз... Бўпти, сизнингча бўла қолсин! Энди юз-хотир қилиш йўқ! Билиб қўйинг, мен қанчалик интендант бўлсан, сизлар ҳам шунчалик поручиксиз. Венд, эгнингизга манави ҳарбий мундирни кийиб олган бўлсангиз-да, бу билан сиз эрцгерцог Фердинанд ҳазрати олийларининг арзанда айғоқчиси «мартабаси»дан тушиб қопсизми? Мутлақо! Номингиз ҳеч қачон зобитлар рўйхатида турмаган бўлса-да, (эҳтимол бўлак фамилия ёзилгандир) айнан шаҳзоданинг амри билан сизни бош штаб назоратига тиркаб қўйишган. Энди Рульскийга келсак, у ҳамон Кинмейернинг маҳфий агенти «лавозими»да турибди, бунинг аксини исботловчи далиллар жудаям кам, йўқ ҳисоби. Генерал сиздан айрилгиси келмагани учун ҳатто қўлга тушиб, ин-

тизомий кенгашда муҳокама этилганингиздан ҳам кўз юмган. Энди ҳаммасини тўкиб солмасам бўлмайди! Биз – эски қадрдонлармиз, Рейндаги ҳар бир жангда ҳамкорлик қилғанмиз ва шу боис ҳеч қачон сўзимдан қайтмаслигимни яхши биласиз. Менга ёрдам қилсангиз, беш минг франқдан ваъда берганман. Мана ўша олтинлар. Ишонмасангиз, тугунчаларни bemalol очиб кўринг. Энди фурсатни беҳуда бой бермасдан, гапларимга диққат қиласиз.

Нафс овораси бўлган иккала ҳамтовоқ бараварига отилиб, ўзининг улуши бўлган тугунчаларни тирноқлари билан очишга тиришаркан, Шульмейстер давом этди:

– Шу тобда сизларга ҳеч қандай талабим йўқ. Мана, овқатланиб бўлдик, соат икки, мен генерал Мак хузурига бораман... Таажжубланманг, шунга жазм қилдим. Ундан ўзимга керакли сирларни билиб олгунимча, майли, қўйиб бераман, мениям истаганича сўраб-суриштираверсин. Кечки пайт менинг бор-йўқлигимни азмойиш қилиб кўрасиз. Башарти тополмасангиз, ўз уйингиз – ўлан тўшагингизда кутиб туинг. Агарда бошлиқларингиз маълумотни кеч кирмасидан бурун сўраб қолгудай бўлса, қандай янгиликларни айтиш икковингизга ҳам аниқ. Менда бошқа гап йўқ. Хўш, келишдикми?

– Келишдик, – жўровозда маъқуллашди ҳар икки агент, – фақат...

– Яна шуни айтиб қўяйки, ишимиздан мен хоҳлагандай натижа чиқса, саккиз кун ўтгач, яна ҳозирги миқдорда пул оласиз.

Иккала зобитнинг кўзи қувончдан чараклаб кетди. Шульмейстер давом этди:

– Ана ундан сўнг ҳамма ҳисоб-китобимиз тўғри бўлади-да, сиз ўз ишингизга кетаверасиз, мен ҳам ўз йўлимдан қолмайман.

Учовлон ташқарига чиқишаркан, хўжайин ва хизматкорлар бошлари ерга теккудай таъзим билан кузатиб қолишиди. Улар бир-бирларига кўп ҳамроҳ бўлганилари йўқ, салдан сўнг Венд ва Рульский йўлни айросолишиди. Шульмейстер ёки кимсан интендант Калькнер жаноби олийлари эса виқорли ва сипо одимлар билан бош қароргоҳ томонга йўл олди: у ерда Австрия армиясига мансуб саксон минг ҳарбийнинг қисмати ҳал этилаётганди.

## ГЕНЕРАЛЛАР ЧУВТУШДИ

Биз яна ҳарбий кенгашга қайтишимиз мавриди келди.

Бир соатдан ортиқ вақт мобайнида генералларнинг турфа хил ахборотларини обдан тинглаб бўлгач, сохта Калькнер бундан бу ёғига ақли етмаслигини тушунди. Гапнинг ўғил боласини айтганда, у ҳали Страсбургда эканида тегишли маълумотларни ишончли манбалардан олган, ҳаммасидан аниқ хабарим бор деб юрар эди. Бироқ Ульмни ҳимоя қилувчиларнинг стратегик мушоҳадаларини эшилгач, бунга иккиланиб қолди. Бу ердаги вазиятда Шульмейстер уларни (австрияликларни) минбаъд овсар ва нодон ҳисоблай олмасди. Унинг фикри шунчалик алғовдалғов бўлиб кетгандики, ҳатто ўзига-ўзи савол берарди:

– Кўрган-билганларим мабодо тушимга киргани йўқми ёки ақлдан озиб қолдиммикан?..

Дарҳақиқат, Наполеонни кўргани аниқми? Чиндан ҳам у билан гаплашдими-йўқми? Оффенбург йўлида ўзини тутиб олаёзган Мюратнинг аскарлари-чи? Ана ўшалар Наполеон ўйлагандай ҳийла қилиб, ялпи ҳужумга ўтган қўшиннинг ўнг ва сўл қанотларини

ниқоблашга қодирми? Ёки аксинча, генерал Мак фарз қилганидек, улар Қора ўрмон орқали ҳамла қиладиган француз армиясининг авангардидан бир қисм бўлиб қолмайдими?..

Бундан чиқдики, Наполеон Шульмейстерга махфий топшириқ берәтиб, айрим сирларни очиқ айтмаган бўлиши ҳам мумкиндири? Рост-да, унга шубҳаланиб қарашга французларнинг асоси ҳам йўқ эмасди.

Дарҳақиқат, тайинли аломатлар бўлмагани ҳолда душман осонгина алдана қоладими? Австрия армиясининг барча генераллари овсар ё лақма эканми?.. Улар сафида французларнинг манёврдан кўзлаган муддаосини пайқаб, бу ҳийланинг (агар шундай ҳийла чиндан ҳам бор бўлса)чувини чиқара олгудай лоқал бирорта эслик зобит йўқмикан?

Шульмейстернинг ўзига қолса, аввало, уларнинг ана шу манёвр ҳақида сўраб-суриштиришларини ва бу ҳақда бажонидил айтиб беришни афзал кўрарди. Ана ундан сўнг эса фақат Наполеоннинг тактикасига мувофиқ келадиган ёлғонларни австрияликларнинг қулогига лагмондай осарди.

Жосус манави хатарли ўйиндан кўзлаган яккаю ягона самара ҳам худди шундан чиқарди, холос.

У дарҳол мақсадга ўта қолди.  
– Жаноблар! – деди у. – Яқдил фикрингизга қараганда, душман тўппа-тўғри сиз томонга келади, шундайми?  
– Албатта, бош интендант жаноблари, – дея жавоб беришга шошди қалтис жойига дахл қилинган Мак, – иши пухта одамларнинг хато кетиши мумкинмас!.. Шуни ҳам сизга айтиб қўйишим керакки, айни муаммо хусусида мен олган маълумотларнинг аниқлигини сўнгги воқеалар мутлақо тасдиқламоқда, улар қўлимга айнан Страсбургдан – ўта ишончли манбадан келиб тушган.

• Шульмейстер бу гапга муносабат билдиришдан аввал енгил бош бүкдики, бу билан кулгисини базур яшириб қолди. Негаки ўша «ишончли» манбанинг маълумотини Эльзасдан ўзи жўнатувди-да.

– Зобитларингиз-чи, генерал, уларнинг фикрлари ҳам шунақами? Узр, мени тўғри тушунишингизни сўрардим. Ахир камина император Франц Иосиф зоти олийларини турли-туман нуқтаи назарларнинг барчасидан боҳабар этмоқча бурчлиман-да. Лекин бари бир сизнинг фикрларингиз етакчи ва ҳақ эканини таъкидлайман, албатта.

– Мен эса у кишининг фикрларига бутунлай қўшилмайман, – деди Вернек. – Менимча, Бонарапт ўзининг асл режасини яшириб, бизнинг кўзимизни шамғалат қилмоқчи.

– Менимча ҳам шундай, – маъқуллади генерал Ризе бўштоб оҳангда.

– Тўғри гап! – тўнгиллади Иелашиш.

– Ие, кўриб қўйинг генерал! – деди Шульмейстер танбеҳомуз. – Бу жаноблар сизга ишонишмаяпти-ку!

– Буни мутлақо инкор этолмайман, муҳтарам бош интендант. Бироқ ўз фикримнинг ҳақлигига деярли юз фоиз ишончим комил. Шунинг учун ҳам олампаноҳимиз менинг нуфузимни инобатга олиб, тегишли қисмларга иккilanmasdan фармон берив, гарб сари огоҳлантирувчи ҳужумга ташласа яхши бўларди. Энди менинг обрў-эътиборимга келсак, умид қиламанки, иштирокчилардан ҳеч ким буни инкор этмаса керак.

– Албатта! – деди Иелашиш. – Бироқ сизга айтиб қўйишим керакки, қопқонга илинишни истамайман, бинобарин, аскарларимни бошқаларнинг тартибида жойлаштиrmайман, билъакс, французлар тўсатдан орқа томонда пайдо бўлса, тузоқча тушиш хавфи бор.

Мана энди Шульмейстерга ойдай равшанки, аввало анави ақлли зобитларга тезроқ акс таъсир қила билиши зарур. Мак ўз қарашларини ҳимоялаш учун Иелашишга ўлиб-тирилиб фалсафа сўқаркан, агентнинг мақсади ҳозирги вазиятдан фойдаланиб, топган маълумотларини тагин ҳам кўпайтиришда эди.

Шульмейстер ҳалитдан бери жавраётган генерал тин олганидан фойдаланди-да, шартта гапга тўн кийдираверди:

– Умуман олганда, мен шунга амин бўлдимки, босқинчиларнинг режаси ҳақидаги қарашлар турлича бўлса-да, лекин душман ҳужуми қай тарафдан бўлишидан қатъий назар, ҳамма ўз бурчини адо этишга тайёр. Энди Венада тўпланган айрим маълумотлардан сизларни огоҳ этмогим керак, улар император ҳукуматининг расмий ва маҳфий ёзишмаларидан олинган. Олампаноҳ ҳам муҳтарам генерал Мак каби жуда тўғри мулоҳазада: душман айнан Қора ўрмондан ҳужум қилишга ҳозирланмоқда. Сизнинг чегара худудидаги нозирларингиз қайд этган ҳаракатлар ҳам императорнинг мушоҳадасига мувофиқ келмоқда. Гапнинг индаллоси шуки, ҳукмдоримиз зоти олийлари сизнинг қўл остингиздаги қўшиннинг аҳамиятини билади ва нуқтаи назарингизнинг қудратига ишонгани боис ғалаба бизники бўлажагига мутлақо амидир. Ана шу олий ишончнинг тасдиги учун сиз жангга ташлайдиган аскарлар сонини айтсангиз, камина беҳад миннатдор бўлур эдим.

Ҳалигача оғзида қатиқ ивитгандай сўёзиз ўтирган генерал Кленау сўнгги жумладан сўнг ҳушёр тортди.

– Ўйлашимча, – давом этди сохта Калькнер, – Франциянинг ёлғон императори Рейндан олиб ўтадиган аскарлар сони олтмиш мингдан ортмайди. Англияга қарши сафарбар қилиниб, Булонда қўр тўкиб

ётган қүшиндан Наполеон чақыртирган жангчилар-нинг бор-йўқ адади шудир-да. Сиздаги куч ҳам шунчадир ёки жиндай камроқдир, бари бир, улар алохида мустаҳкамланган марраларга жўнатилса, бизнинг вазиятимиз бағоят қулай бўп қолади. Ҳозир сиздаги замбарак, қилич ва найзалар сони қанча?

Мак жавоб қайтаришга оғиз жуфтлади. Ҳамиша яхши ниятли эрцгерцог ўзига хос самимият билан расман ихтиёрига берилган ҳарбий кучнинг ҳисоб-китобига уннади. Бироқ Кленаунинг дўриллаган дағдагаси илк бор янграй бошлади:

– Жудаям таажокубдаман: ахир олампаноҳимиз ва колат берган бош интендантнинг ҳарбий вазият ҳақида мутлақо тушунчаси йўқ-ку! Ҳар ҳолда масъулиятни ҳис қилган ҳолда қатъий айтаманки, унга айни маълумотларнинг ошкора этилишига қаршиман. Бундай рақамлар сир бўлиб қолиши зарур. Башарти менинг марҳум отам тирилиб келиб, олдимга шундай савол қўйса ва қанчалар ёлвормасин, жавобим аниқ бўлади: йўқ!

Ана шу «йўқ» шунчалар даҳшатли чиқдики, «интендант» Шульмейстер нечоғли ҳаволанган бўлмасин, хийла довдираб олди ва ҳаддидан ошганини кечикироқ пайқади. Лекин энг муҳими шуки, бўлар иш бўлганини, ўзининг бу давра қабул қилган мақоми таслим бўлишга ва чекинишга йўл бермаслигини ўша ондаёқ англаб етди. Модомики кимсан императорнинг вакили экан, маълумот беришдан булар бошортган бўлса-да, «интендант» бу ҳақдаги ўз талабини қайтиб олиши тўғри келмасди. Иккинчи томондан, Кленаунинг луқмаси ўринли бўлгани боис кенгаш аъзоларининг бари ҳайронликда қолди. Уларниң аксарияти кечикиб бўлса-да, болтадан тоймас бегонага шубҳаланиб қарай бошлаганди. (Ваҳоланки, оғиздан гуллаб бўлишди.)

Шульмейстер нима қылсин?

Хатарли кирдиқорининг ҳам эҳтимол, ҳам муқаррар оқибати фақат даҳшат эканини чуқур тушунган жосус сир бермасдан ўрнидан қўзғолди. Биргина бежо сўз, биттагина қалтис ҳаракат уни адойи тамом қилиши, кўпчиликдан иборат бақувват генераллар ёрдам чақирмасдан ҳам ҳибсга олиши мумкин эди. Шунингдек, улар гвардиячиларни чақириб, турмага тиқиши ҳеч гапмаски, у ерда тақдирини ҳал этадиган хукмга ортиқ «интизор» қилишмасди.

Шу аснода у Кленауга қараб илтифотли жилмайиб кўйди. Сўнгра бошқа генералларнинг жиддий ва шижоатли юзларига бир сидра назар солиб чиқди. Кейин эса столдаги шляпа ва кўлқопини олди-да, улар билан хайрлашган бўлди:

– Яхши қолинглар! Кўрганларимдан мамнунман, бу ерда ҳамма ўз бурчига содик ва фақат айтиш лозим бўлган гапларни гапиради, холос. Император зоти олийларига бу фазилатни етказаман. Хайр, жаноблар!

У эрцгерцог қошида таъзим қилди ва деди:

– Ҳазрати олийлари, чексиз эҳтиромимни қабул этинг!

Энди Мак ҳам ўрнидан турмаса бўлмасди. Ундан ибрат олган бошқа генераллар ҳам стулларидан қўзғолишиди. Шульмейстер улардан безовта бўлмасликни ўтингандай хуштавозе имо қилди. Сўнгра ўзининг зудлик билан қочиб қутулиш қайғусини шундай ниқобладики, гўё ўта узрли ва муҳим сабабга кўра шошаётган қиёфага кириб, пошналари устида ҳарбийчасига ортига ўгирилди-да, чиқиб кетди.

Эшик ёпилар-ёпилмас ичкаридагиларнинг даҳшатли шовқини унинг қулоқларига қуондай ёпирилди, Афтидан, у ғойиб бўлиши биланоқ лақмаларга ақл кириб, сўқирларнинг кўзи очилганди. Ҳамма ге-

нералларнинг кекирдаги бирданига хуруж қилиб, ҳеч балони тушуниб бўлмаса-да, Иелашишнинг ногорадай гумбурлаши аниқ эшитилди:

— Айтдим-ку сизларга, у бориб турган ғаламис, айгоқчи бўлишиям мумкин!

Тўхташ ва бу бақир-чақирларнинг давомини эшитиш Шульмейстерга зарил келганмасди. У кирган тарафидан қайта қолса бўларди, бироқ у ёққа юриб бўладими? Коридорнинг ўнг томонига борай деса, энг тўрда соқчи турибди, алқисса, сўлга йўл солди. Шульмейстер бирорда шубҳа уйғотмаслик учун қочмоққа шундай жаҳд қилдики, оёқлари майдада қадам бўлса-да, шиддати пойгачидан қолишмасди. У хусусий хоналар сари ошиқиб, кимсасиз буфетга чиқди, ундан емакхонага эшик очилган бўлиб, кейин иккита меҳмонлар ётоги ва яна битта ҳужра бор эди. Жосус шляпа, кўлқоп, шпага, нишонлар тўла уқали либос – хуллас, ҳамма лаш-лушларини бир бурчакка улоқтириди ва шкафни очиб, долчин тусли узун сюртукни олди-да, ўрнига ясама сочини осиб қўйди. Эгнида ана шундай беозоргина «сарпо», бошида барра телпак билан орқа тарафдаги пиллапояда пайдо бўлди. У қай бир қўшиқни оҳиста хиргойи қилганча настга тушиб бораркан, йўлини кесиб ўтаётган югурдақлардан бири қичқирди:

— Хайрли кеч, Вильгельм, қувнаб ҳордик чиқар!

Шульмейстер кулиб жавоб қайтарди:

— Раҳмат!

Қўйидаги эшиқдан кўчага чиқиларди. У ташқарига отилмоқчи эди, бироқ боятдан бери ҳар бир қадамини изма-из таъқиб қилаётган шубҳали овоз жаранглаб кетди. Шульмейстер ерга назар солди-да, дарров ўзини панароққа олди. Уни «таъқиб қилиб», жаранглаётган овоз шпорларидан<sup>1</sup> чиқсан экан. Иккала оёғидан уларни

<sup>1</sup> Шпор – суворийлар этигига тақиладиган металл тепки, халаҷўп.

ечиб, очиқ қолган ертўлага отиб юборди. Энди хотиржам ташқарига чиқиб, иложи борича ҳушёрлик билан меҳмонхона томонга йўл олди. Албатта сарой эшигидаги соқчига олазарак қараб-қараб кўярди.

Кенгаш залиниң деразалари очиқ: бир тарафда Макнинг сўлғин юзи, иккинчи тарафда Иелашишнинг шалтайган шопмўйлови, орқада бўйчан генералларнинг жонсарак афт-ангори. Жанг-жадал ишида даҳо бўлмиш жанобларнинг гаранг қиёфасига баъзи йўловчилар ҳайрон бўлиб ўтишарди. Қоровул ҳам чуқур таажокубда, тепада не кўргилик содир бўлганини билиш ниятида жавдиради.

Ана шу дамда қиёмат қўпди: хизматкору аскарлар телбаларча эшикка томон чопишар, кимнингдир буйруқ бергани эшитилди, соқчининг милтиги шараклади.

Йўлда сартарошхона бўлиб, ана шу ерга кира қолиш Шульмейстерга оқилона туюлди. У кўпик суртиш жойига ўтирди-да, ёқасига сочиқ қистирди ва тайёргина олқиндини олиб, юзининг бурнидан то томогигача бўлган қисмини тўхтамай совунлайверди.

Сартарош устарасини шайлаб ёнига келди-да, ўз оғирини хийла енгиллаштириб тургани учун унга самимий илтифот билан назар солди. Шульмейстер устага ўнг юзини тутди. Кейинги дақиқалар қандайдир қочоқнинг пайига тушган кўчадаги аскарларнинг бақир-чақир ва сўроқ-саволлари билан ўтди. Жосус мутлақо бехабар одамдай сўради:

- Нима бўпти ўзи?
- Билмадим, тақсир. Афтидан, қайгадир ўгри тушибди шекилли.

Шу гапнинг устига остонаяда полициячи кўринди, у хўжайинга, хизматкор ва мижозларга бир сидра назар ташлади. Экс-интендантнинг ярми кўпикка беланган, ярми тарошланган асқиябоп башарасидан унинг кулгиси қистади ва индамай чиқиб кета қолди.

## НОТАНИШ АЁЛ ЖОСУСГА ЎЗ ХИЗМАТИНИ ТАКЛИФ ЭТДИ

Шульмейстер жиддий фалокатга чап берганди. Лекин қанчалар хавфли бўлмасин, ўзининг бу қалтис ишидан афсус чекмаётганди. Шу дадиллиги туфайлигина генерал Макнинг асл режасини билиб олди. Ҳеч қандай разведка унга бу қадар қимматли маълумотларни топиб кела олмасди. Энди у Наполеоннинг топширигини адо этиш учун ўз ҳаракатларини тўлатўқис режалаштириб олиши ва айни чоғда қўлидаги маълумотларни бир имкон топиб, императорга етказиши ҳам мумкин.

Фақат... шунда ақли етди, энди «Яшил дараҳт»-га қайтиб боролмайди. У ердагиларнинг кўзига икки қиёфада, турлича уст-бошларда кўринган: унинг изига тушганлар айнан меҳмонхонадан қидиради ва «интендант»нинг сирини фош қилувчи маълумотларни бир зумдаёқ топади, албатта.

– Буниси ҳолва, Рульский билан Венд-чи? – ўзига-ўзи савол берди у. – Ахир мен огоҳлантирмасам, икковиям қўлга тушади-ку!..

У ана шу хулосага келибоқ, дарҳол ўрнидан турди. Устарасини ўта эҳтиёткорона суртиб, ўз ишини эндинга якунига етказган уста бағоят ҳайрон қараб қолди, негаки Шульмейстер сув тўла жомашовга бориб, юзини ювди-да, кафти билан сидириб «артинди». Ёрдамчи сартарошнинг оғзи очилиб қолганди: «Бу мижоз ғалатироқ одам шекилли, ахир юзига ўзи кўпик чаплаб, атир совун юқиниям ўзи ювиб ташлади-я». Шульмейстер столга кумуш сўлкавой ташлаб, гўё ёрдамчининг «меҳнати»ни тақдирлаган бўлди.

Пул ўлсин: ўша ондаёқ халфа сартарошнинг ҳайрати миннатдорликка айланди ва хушомад билан ялтоқланди:

– Одамни жа-а хижолат қилдингиз-да! Намұнча шошмасанғиз ахир чой-пой...

- Хүш, пул бердими? – сүради уста.
- Бўлмаса-чи! Жудаям хотамтой экан...
- Барака топсин, йўли бехатар бўлсин!

Аммо икки-уч қадам юриб-юрмасданоқ Шульмейстер ташвишда қолди, негаки қандайдир жувон уни кўзлаб келмоқда эди. У юзлари қаймоқдай қорасоч аёл бўлиб, шаҳарликларга хос кийинган эса-да, қишлоқи экани сохта олифталигидан сезилиб турарди. У бошидаги қора шолнинг учларини елкаси устидан танғиб олганди. Бу қалин рўмол уни куз изгириларидан асраш баробарида юзини танитмасликда ҳам асқотарди.

У мафтункор бўлса-да, хийла безбетлиги сезилиб турарди. Айни дамда лаблари кулгига мойил, лекин бу табассумга эмас, истеҳзога ўхшарди. Дарҳақиқат, аёлнинг тийрак ва чақноқ кўзларига одмилик ва латофат бегона бўлиб, фақат қувлик ва ёвузлик тарашиб турарди. У ҳозиргина сартарошхонадан чиққан Шульмейстернинг қошига келди-да, заррача ийманиб ўтирмасдан унинг қўлларидан тутди.

– Сизни ахтариб юрувдим, тақсир. Кетдик, мен билан юра қолинг... Вой шўрим-ей, бунчалар таажжубда боқманг ва ҳақиқий Карл Шульмейстергамас, аксинча, сохта Калькнерга йўлиққанимга ишонтираман деб овора бўлманг!.. Айни хусусда менга изн беринг, токи сизга қойил қолганимни изҳор этайин: сиз анави генералларни боплаб чув туширдингиз. Ўйлаган режангиз шунчалар хатарли эдик, сизнинг ва ўзининг тақдиридан хавотирдаги дўстларингиз ваҳимада қолишганди. Бош қўмондон штабидан тирик чиқишингизга иккови заррача умид қилганмас. Мана энди сизни соғ-омон кўришади ва ҳамма гапни ўз оғзингиз билан айтиб берасиз.

– Аммо, хоним, ахир...

– Бўлди-да энди, мендан хавфсирашингиз мутлақо беҳуда! Башарти ниятим ёмон бўлса, биргина имо қилсам бас, сизни дарҳол қўлга олишади. Аммо таниганим боис ундай қилаётганим йўқки, бундан ўзингиз хулоса чиқаринг-да...

– Жин урсин! – деди вазиятни чамалаб кўрган айтгоқчи. – Демак, сиз ё Вендинг, ё Рульскийнинг сирдоши экансиз. Дарвоқе, улардан қай бирига дахлдор эканингизнинг фарқиям йўқ. Бўпти, ишондим, юринг кетдик, лекин қайсанисига борамиз?

– Вендга-да.

– Шундай денг, у билан танишмисиз?

– Ҳа.

– Маъқул, йўл бошланг! Унга ўзимниям гапим бор эди. Икков сухбатга берилиб, яқингинада Шульмейстер ортидан қиёмат қўпган жойга бориб қолишиди. Бош штаб атрофи энди хийла бегалва бўлса-да, деразалар ҳамон очиқ. Ундан ҳарбий кенгаш аъзоларининг тахлитлари кўриниб туради.

Аёлнинг кўз қорачиқларида маккора учқун чақнади ва заҳархандалик билан сўради:

– Мабодо анави генераллардан бири сизнинг қўл узатса етгудай жойда эканингизни билиб қолиб, «ушланглар уни» деб буюришидан қўрқмаяпсизми?

Шульмейстер сукут сақлаган ҳолда у томонга ўтирилди: унинг кўзлари жиддий, ҳатто ўқрайиб боқарди. Аста-секин у лақма одамдай анқайиб қолдики, гўё қўй оғзидан чўп олмаган мўминқобил кишига айланди. Сўнгра кўзлари чўғдай ёниб, афтини буриштирмагани ҳолда юз мускуларининг сезилмас ҳаракати билан таоман нотаниш кимса бўлди-қолди... Ҳамроҳ аёлга эса ёнида мутлақо бошқа бирор пайдо бўлгандай туюлди ва ҳайратдан бармогини тишлаворай деди.

– Қалай? – писанда қилди Шульмейстер. – Энди-чи, генерал Мак мени мана шу түрким билан ҳам таний олади деган хаёлдамисиз?

– Асло! – ҳаяжонланди аёл. – Күзларимгаям ишонмай қолдым, ақлимга сиғдира олмаяпман... Қойил, қотириб қўйдингиз-ку!

– Испингиз нима? – сўради жосус кулимсираб.

– Доротея.

– Сизга айтиб қўяйки, Доротея, одамнинг башараси аслида бедаво бўлгач, юзини ўзгартиришдан осони йўқ. Аммо нозанин сулувлар буни эплай олишмайди, ахир оғатижон чехрани дабдала қилиш сизга зарил келмаган-ку!

Бу уддабурон одам ҳар қандай хайриҳоҳ киши билан тил топишишга ва ҳеч қандай кўмакни рад этмасликка ўрганиб кетган ва фақат шундай яшарди. Агар ўша кўмакчи эр киши бўлса, ҳақини тўлайди, пул тополмаса, мўл-кўл ваъда бераверади. Мабодо аёл зотидан бўлса, у ҳолда хушомадни астойдил ишга соладики, мақтov дегани бу жинс учун тилла сўлкавойдан аълороқ, ҳаёт буни кўп бор тасдиқлаган. Доротеянинг ҳам бу умумий таомилга қарши келадиган сиёқи йўқ: шу тобда манави ноёб ва суқсурдай йигитга ҳамроҳ экан, у «ўл» деса, ўлиб, «қол» деса қолгудай шаҳди бор.

– Мени қаёққа оп кетяпсиз? – сўради Шульмейстер салдан сўнг. – Вендинг уйига боргандим, бу тарафда эмасди.

– Бизникига борамиз. Венд ўша жойда.

– Қанақасига? Ахир сизникига...

– Уйимиз тепалик ёнида, отам ва акам билан турман, аммо ҳозир икковиям йўқ.

– Улар қаёқда?

– Поручик иш буюрганди, ўшани...

– Нима? Уйингиздагиларнинг бари поручик Венда га ёлланишганми?

– Шунаقا. Мен ҳам унинг хизматини қиласман.

– Йўғ-е! У бошингизни балога қўйишдан қўрқмаяптими?

Аёл қўнгироқдай қиқирлаб кулиб олди:

– У қўрқса-қўрқмаса менга бари бир, негаки ўзим қўрқмайман-да.

– Бироқ Венд бундай қилмагани яхши эди.

– Йўқ, шуниси маъқул! Унинг билгани фақат мен берган маълумотлар, холос. Венд эрцгерцогга етказидиган барча хабарларни ҳам мендан билиб олади. Аёл киши ҳамма жойда эмин-эркин юриб, кўздан пинҳона сирларниям кўришга ва топишга қодир, эркак киши эса бундай қилолмайди! Аёлгина эплайдиган бу ишни чинакам хотинчасига уддалай оладиган ягона эр зоти ўзингиз, холос.

Доротеяning фикрича, Шульмейстернинг зўрлигига бундан муносиб баҳо, хушомад бўлиши мумкин эмасди. У ҳам буни тўғри тушунди ва «хотинчасига» эътиroz билдириб ўтиргани йўқ...

Икков мўлжалдаги манзилга келиб қолишганди. Жумбоқдай сирли жувон ҳамроҳига имо қилди, демак, «кутиб туриңг» демоқчи. Сўнгра жин кўчага кириб, бир зумда кўздан гойиб бўлди. Аммо салдан сўнг қайтиб чиқди ва қўллари билан им қоқди, Шульмейстер унинг ортидан бораверди. Йигирма қадамча юрган ҳам эдиларки аёл тўхтади ва ортига ўгирилиб, жосуснинг елкасига қўл ташлади:

– Венд билан ишлашдан безор бўл кетдим. Хоҳласангиз, сизга хизмат қиласдим...

Қаҳрамонимизнинг эс-ҳуши мутлақо бажо эдики, кутилмаган бу таклифни эшитиб, ақлига келган илк фикр шу бўлди: «Бу дўндиқча дўстига берган пулим-

ни кўрди, энди ҳақини бевосита ўзимдан олиш учун пинжимга кирмоқчи». Ўша ондаёқ қатъий қарорга келди: «Унинг менга кераги йўқ, ёлғиз ўзим иш кўрганим яхши». Бу таклиф билан аёл уни тўшагига чорлаши мумкинлиги ҳам хаёлидан кетмасди. Аммо бари бир самимий ва жиндай ҳазил оҳангида баралла жавоб қайтарди:

– Менга хизмат ҳам поручик билан бўлгани каби тезда жонингизга тегса-чи? Шундай бўлмаслигига ишончингиз комилми?

– Ишончим комил!

Доротея сўзида давом этаркан, тобора овози бўгилиб, ундаги ғалати ҳаяжон безгак хуружига ўхшаб кетарди:

– Тўғри, бу илтимосим наздингизда бемаъниликтан бошқа нарса эмас. Бу табиий ҳол, чунки мени мутлақо танимайсиз. Сизга учраганимга беш дақиқаям бўлгани йўқ. Бироқ сизга шунисиям аёнки, хоинлиги учун сиздан ҳақ оладиган нусхага боғланиб қолганман. Бу ҳол менинг яхши одам эканимни англатмаслигиниям тўғри тушунаман. Аммо, келинг, бир дақиқа, фақат бир дақиқа қулоқ солинг. Онт ичаманки, гапни қудуқнинг ипидай чўзмайман... Сиз ҳозир кўрмоқчи бўлаётган кимса ҳеч нарсага, эшишиб қўйинг, ҳеч нарсага арзимайди! У қиморбоз, пиёниста ва абраҳ! У менинг ақлимни олиб, ёшлигимни барбод қилди. Мен бунақа тубан ишлардан юқори тураман ахир.

Шульмейстернинг энди тоқати тоқ бўлиб, манави жиблажибонга лақقا тушганидан ва беҳуда вақт кетказаётганидан афсусда эди. Венд унинг жонига теккан бўлса, бунга нима дахли бор? Шульмейстер уни тушида кўриб қўйибдими? Жувон қайдан келиб қолгани, нимадан юқори ё паст туришини қаёқдан билсин?.. Ана шу ўйларга берилган Шульмейстер

кета қолмоқчи эканини беихтиёр сездириб қўйди шекилли, Доротея унинг бўйнига қаттиқроқ чирмашди. Овози боягиндан баттар ҳаяжонда эди.

– Ўзимнинг бу иқроримдан хижолат чекмайман, зеро, кўрган-билганларимни анави нусхага айтиб бериш мажбурияти менга маъқулмас. У мен берган маълумотларни пуллаб юрибди! Мен мубтало бўлган хавф-хатарлар бадалига ялло қиласи. Уни кўрага кўзим йўқ. Билиб олдимки, сиз дўстларга ёрдамлашасиз ёки душманга қарши курашасиз, аммо ҳар қандай ҳолда ҳам ўз гоянгиз, аниқ мақсадингиз бор... Шундаймасми? Қолаверса, шунчалар жасурсизки, мана бутун, танҳо ўзингиз ёвлар ўрдасига мардона кириб бора олдингиз. Ёки мен йўлингизда йўлиқсам, қўрқиб кетарсиз дегандим... Ваҳоланки, ўрнингизда бошқа одам бўлса, изимга тушибди деган хаёлга борарди! Сиз эса парвойи фалак! Сўнгра куппа-кундузи ўзим гувоҳ бўлганимдек, қиёғангизни бутунлай ўзгартириб, мутлақо бошқа одамга айлана олдингиз – қойил!.. Менга «йўқ» демант, бўптими? Ҳали ўзингиз ишонч ҳосил қиласиз: жудаям абжирман, зарур бўлганда, кийим-бошимни таниёлмай қоласиз. Сизга қандай маълумот керак бўлса, ҳаммасини топиб бераман... Ҳатто пул тўламасангиз ҳам розиман, сизга ёрдам қилолсан бўлди, менга шунинг ўзи кифоя!..

Бунчалар серҳарорат ўтинчлар Шульмейстерни ҳайратга солибгина қолмасдан, аёл киши қархисида фикрига жиндайгина шайтон оралай бошлаганди. У хавфсираб қолди: француз қўшинларининг манфаати йўлида манави боши берк кўчага кирди, энди бир балога гирифтор бўлмаса гўргайди. Жиқилдоқ эса елимдай ёпишиб олди. Шу тобда қўйнига кирса-чи? Бугинамас, ўзининг жасорати хусусидаги аёлнинг мақтовлари ножиддий бўлгани устига чиндан ҳам

матонатли одам бўлмиш Шульмейстерни хижолат қилаётганди. Хира пашибадай бемаъни гингилашдан озод бўлиш учун у кузатувчисининг қўлларидан тутди-да, беозор шапатилаб қўйди ва деди:

– Бўлди, бўлди! Сиз учун хизматим мутлақо нотанишки, шерик қиласин десам, жа-а тезоб ва қизиққон экансиз-да. Ҳозирча қўя туриңг, мавриди билан алоҳида бир гаплашармиз. Шу тобда мен кўришим зарур бўлган одам анави Вендингиз бор-ку, ўша сизнинг...

Аёл қўли билан унинг оғзига «қулф» солди: ҳатто қоп-қоронги бўлса-да, тил учидаги турган ўша сўзни айтишга йўл бермади, эшитишга истиҳола қилди. Шульмейстер ҳайратга тушди. Доротея уядими? Шундай аёл-а?..

Шундагина жувон ўзини нарига олди ва қоққан қозикдай туриб қолди.

– Сизга нима керак ўзи? Хизматингиздан фойдаланишимми? На сизнинг ва на бошқа бирорвонинг ёрдамига муҳтож эмасман. Мен билан бирга қолмоқчимисиз? Қанақасига? Ахир мен ўзим келгиндиман, бу ерда қолишимнинг сирайм иложи йўқ. Агарда қўлга тушмасам, бола-чақамнинг олдига кетаман, улар жуда олисларда йўлимга кўз тикиб ўтиришибди. Ўзингизга ойдай равшанки, мени ўз ҳолимга қўйиш ва йўлдан қолдирмаслик керак!.. Венд ва Рульскийнинг, жумладан, ўзимнинг ҳаётим ҳам қил устида!..

Шульмейстернинг сўнгги сўзларидан кейин Доротея четга ўтиб, унга йўл бўшатди. У деворга қапишиб қолганди, жосус орадан сирғалиб ўтаркан, унинг шивирлаши қулоқларига илинди:

– Бари бир гапим – гап! Айтганларим ҳар ҳолда эсингизда турсин ва қачон керак бўлсан, тортинмай келаверинг!

У Шульмейстердан бир қадам ҳам ортда қолмай борарди. Икков тор күчанинг дўнглилка туташган ниҳоясига етишгач, Доротея пастак ва мўъжаз уйнинг эшиги рўпарасида тўхтади ва деди:

– Кираверинг. У шу ерда.

## СОТҚИН БАРИ БИР СОТҚИН-ДА!

Эшик очилди ва Венд остона ҳатлаган икковга ноҳуш назар солди. У узун трубкасини тутатиб ўтиради. Олдида пиво тўла кружка. Умуман олганда, Венд бетамиз одам бўлиб, ҳамма жойда ўз уйидагидай талтаярди. Ҳозир ҳам мундириининг олди очиқ, портупеясини бўшатиб, қиличини алмисоқдан қолган омонат жавонча устига ташлаганди. Эрталаб Доротея билан у-бу олгани чиқиб, узоқдан Шульмейстерни танитиб қўйди. Кейинроқ эса унга Шульмейстерни топиб, бошлаб келишни буюрганди. (Бу учар аёлнинг жосус қандай кийимда бўлмасин, бари бир таний олишига ишонарди.) Ҳозир эса қўнглидаги худбинлик хуружга келиб, айнан шу иши алам қила бошлаганди.

Нима бало, чўнтағида нақд тилла тангалар жаранглаб турган жосусга қарши Вендининг юрагида пинҳоний бир хусумат туғилдимиқан? Бу мутлақо мумкин эди, зоро, бирорвнинг киссасига қўл солиш бунақалар учун асло айб эмас.

Бироқ у ўзининг қора ниятини сиртига чиқаргани йўқ, аксинча, хушкаломлик билан қаршилаб, оғзидан бол томди:

– Ана! Бу хонимча шунчалар ўткирки, сизни топиб келишига ишончим комил эди-да.

– Чиндан ҳам ўткир экан, – гапни қисқа қилди Шульмейстер майин жилмайиб ва мақсадга кўча қолди. – Нафси ламрини айтганда, генерал жанобларга

найрангларим ўтмади ва изимдан қувлаб юришибди. Шак-шубҳасиз, сиз, Рульский ва мен эрталаб бирга бўлганимизни аниқлашади. Сиз фурсатни бой бермасдан, мени сотишингиз, шу билан уларни чалғитишингиз керак.

– Сизни сотиш?

– Худди шундай! Чунки бошқа чора йўқ. Уларга айтасизки, гўё биринчи кўрищаёқ мендан шубҳалашиб қолгансиз. Шу боис изимга тушгансиз ва қўлга олишдан бурун узоқ вақт сұхбатлашгансиз. Бироқ мен қўзингизни шамғалат қилиб, қаёққадир гумдон бўлганимни Худо билади! Шунингдек, олдиндан сезганингиз ва самимиятиянгизнинг далили сифатида меҳмонхонадаги буюларимни бош қўмондонга кўрсатишингиз мумкин... Бунинг учун кийиб келган уст-бошларимни, уч пулга арзимайдиган баъзи қоғозларимни «Зумрад дараҳт»да қолдираман. Меҳмонхонадаги қарзимни эса, илтимос қиласман, тўлаб қўярсиз, жа-а катта пул бўлмайди. Қолаверса, император Франц зоти олийларининг сиздай зобити франциялик душманга боқиманда бўлса, бу ярашмайдиям-да.

– Ўзингиз-чи? – сўради Венд, унинг кўзлари ола-кула эди. – Бу вақтда сиз нима қиласиз?

– Менми? Мен бир неча соат шу ерда бўламан, Доротея хоним бошпана ваъда қилди, ҳамма ёқ сув сепгандай экани ҳақидаги хабарингизни кутиб тураман.

– Ажойиб-ку! Жуда тўгри, излар босилиб, йўллар очилгач, сизга айтаман, ими-жимида кета қоласиз-да. Аммо менга пул ҳақида айтувдингиз, бир неча кундан сўнг бермоқчи эдингиз..

– Хўш-хўш?

– Ўша гапингиз ростми?..

– Бўлмаса-чи! Фақат унга лойиқ хизмат лозим-да, аввалгисиниям бекорга берганим йўқ эди-ку.

— Майли-ю... Лекин сиз ўқдай учиб юрасизки, вაльдангиз эсдан чиқмаса дейман-да.

— Мутлақо кўнглингиз тўқ бўлсин, — деди агент, — мен пулларимни ҳеч қачон белимдан қўйган эмасман.

Шульмейстер шундай деб, камариға нўқиб қўйди: унинг бу ҳаракати тилласидан хотиржам ғазначини эслатарди...

Доротея кирган заҳотиёқ эшик ёнидаги деворга суюнган, ҳамон қилт этмасди. Унинг бутун вужуди кўзга айланиб, Венднинг юзидағи ҳар бир ифодани синчковлик билан кузатарди. Чоғи, у Венднинг юрагидаги энг яширин сирларни ҳам афт-ангоридан уқиб бўлганди.

Поручик бошқа гапирмади, ўзини ростлаб, мундириининг тутмаларини қадади. Сўнгра камарли белининг гижимларини текислаб, қиличи қўйилган жавонча томонга юрди. У ортига ўгирилиши биланоқ жувон Венд ва Шульмейстер орасига шошди, ўтаётиб, ўз меҳмонининг қўлини маънодор чимчилаб қўйди.

Шульмейстер Доротеядан бунинг сабабини сўрашга улгуролгани йўқ: унинг кўзи Венднинг бужмайиб кетган афтига тушди — поручик тўппонча ўқталиб турарди. Доротеяning тўсатдан ўртага тушиши туфайлигина ўқ отилмай қолганди.

«Росаям омадим чопиб қоларди-да, — кўнглидан ўтказди Венд. — Аввал чўнтагини қоқлаб, кейин отиб ташлайман ва бош штабда жосусни ўлдирганим билан мақтанавераман! Ажойиб, энг оқилона чора. Башарти сотқинликда айблагудек бўлишса, шубҳали хатти-ҳаракатларимни ўз фойдамга йўйиб, қопқондан осонгина қутуламан!»

Таассуфки, Доротеяning аралашуви билан тайёр ошга пашша тушди.

— Бу нима қилганинг? — сўради у Вендан. — Ўйинчогинг ўлгур чўнтагингда туравермайдими? Ҳа-я,

энди ақлим етди: бosh штабга кетишдан олдин уни менга қолдирмоқчи бўлгансан-да. Жудаям яхши ўйлабсан! Столга қўя қол, хоҳласанг ўқини оп ташла. Негаки мен билмасдан бирорни отиб қўйишим мумкин... Ҳа-а, шундай! Баракалла!.. Энди эса, тўғрисини айтсам, сен жаноб Шульмейстердан миннатдор бўлишинг керак эди. Аввало, бугун эрталаб белингга бутун бир хазинани туғиб қўйди. Қолаверса, кечқурун ҳам сенга ишонди, айниқса ҳозирги нонқўрлигингта эътибор берганиям йўқ... Фақат шуни унутмагинки, бу ерга энди қадамингни босма, бефойда! Қорангни кўришга тоқатим қолмади. Мен сени танимайман ва ҳеч қачон таниган эмасман! Кетишинг мумкин... Жўна! Тўрт томонинг қибла!..

Тўппончани столга қўйган Венд газабнинг зўридан (балки қўрқувдан) дағ-дағ титрарди. Доротея ундан кўз узганий йўқ ва васваса солаётган қуролни чаққонлик билан қўлига олди. Парвойи фалак Шульмейстер кўлларини чалмаштириб, хоинга тикилиб қолганди.

Венд зарда билан юлқиниб, эшик томон ўтаркан, Доротеяниң овози яна ҳам таҳдиидли жаранглади:

— Яхшиликча айтганиларимни қулогингга қуйиб ол, ҳозирги мудҳиш мақсадингга бўлак йўл билан етаман деб хомтама бўлма! Бу сафарча аядим, холос! Асло унутма: меҳмонимга бир гап бўлса, ўзим сени итдай ўлдираман! Қўлимдан ҳар иш келиши ўзингга аён, ёки билмайсанми? Энди йўқол, ифлос!

Аммо Венд чиқиб кетса-да, Доротеяниң кўнгли ўрнига тушганий йўқ. Аёл у қолдирган тўппонча билан қуролланиб, эшикни очди ва боши узра шамни кўтарганича, жин кўча бўйлаб бир неча қадам юрди, Венд даф бўлганига ишонч ҳосил қилгачгина ичкарига қайтди. Ўзини деб жонини гаровга тиккан жувоннинг жасоратидан донг қотган Шульмейстер индамайгина

кузатиб турарди, холос. Унинг саргузаштталаб юраги минг кўйга тушавериб, тошга айланиб кетгандики, бегона ҳислар унга мутлақо дахл қилолмасди, зотан, энг лазиз туйғулари уч нафис хилқатгагина аталган – Берта, Ганс ва Лизбетага. Бироқ тасодифан йўлиққан манави жонфидоликка нисбатан миннатдорчилик лозимми-йўқми?

– Унинг бу яхшилиги эвазига мен нима қила оламан? – сўради жосус ўзидан. – Афсуски, ҳеч нима.

Доротея қўлидаги шамдонни столга қўйди ва ерга боқсанча сўз очди:

– Энди, жаноб Карл, бу ерда ортиқ қолишингиз ярамайди. Анави одам ҳар қандай пасткашлиқдан тоймайди, буни аввал ҳам сизга айтувдим. Гарчи устингиздан чақимчилик қилмаган тақдирда ҳам, қай бир хилватда йўлингизни пойлаши ва орtingиздан ханжар солиши ҳеч гап эмас. Манави уй атрофида тун бўйи айланиб, пайт пойламаслигигаям бирор кафил бўлолмайди. Ўйлайманки, ҳозир ҳам у олислаб кетмаган.

– Бошқа йўл йўқми?

– Бор. Уни Венд ҳам билади. Лекин ҳали у ёққа етиб улгурган эмас. Қулоқ солинг: анави жавонча ёнидаги эшикдан чиқсангиз, тор сўқмоқни топасиз. Эҳтиёт бўлиб бораверинг, ўн қадамча юргач, қалъа деворининг ҳимоя зовури бор, чуқурлиги ўттиз фут келади. Ҳайтовур, соҳил жудаям тик эмас, ҳазир бўлиб тушса бўлаверади. Мен жа-а кўп ўтганман. Аста-секин зовур тубига оёқ қўйгач, салгина ўнг томонга юрсангиз бўлди, қулай жой бор, нариги тарафга осонгина чиқиб оласиз.

– Маъқул! – деди Шульмейстер ва шляпасини қўлига олди. – Мингдан-минг раҳмат, Доротея! Бу оқшомни ва менга қилган яхшилигингизни умрбод унутмайман..., Хоҳласангиз, қўлингизни оп қўяй, дўстона...

– Керакмас! – деди аёл бўғиқ овозда. – Йўқ. Мен хоҳламайман.

– Нега, Доротея?

Доротея ортиқ гапиролмасди. У сокин, беҳарорат, қўллари шалвираган, ерга боққан ҳолда қотиб турарди.

Шульмейстер бир муддат каловланди, у хижолатда, ҳатто жиндай ҳаяжонда эди. Дарҳол аёлнинг қошига борсинми, «нима гап» десинми, миннатдорчиликдан ҳам ўтлироқ муомала қилсинми? Шак-шубҳа йўқки, бу дарёдил нозанин самимияти, ўзгани деб ўз жонини хатарга қўйгани бадалига йигитнинг қалб изҳорига, қайноқ бўсаларига мутлақо ҳақли эди.

Лекин Шульмейстер унга томон қадам босгани йўқ. У нима деганини, нима қилганини ҳам ҳозир ҳис этолмасди, фақат ноаниқ бир овозда билинар-билинмас пичирлади:

– Яхши қолинг, Доротея!

Шульмейстер эшикчани очди ва чиқиб кетди.

Доротея ана шундагина бошини кўтарди: унинг чақноқ кўзлари пинҳона йигидан қизариб кўринарди.

## СОТКИН ЖОСУСДАН ҚЎРҚИБ КЕТДИ

Шульмейстер Доротеянинг самимияти ва фидойи-лигидан қанчалар таъсирланган бўлмасин, аёлнинг йўл-йўриқларига лаққа тушибни хоҳламасди. Аввало, унинг феълига хос қатъият шуки, жосус ўзгаларнинг маслаҳатини эшитиб-эшитмасди, бу хусусият аслида унинг касб-кори учун зарур. Қолаверса, шу қиёфаси билан шаҳарнинг ўртасида пайдо бўлса, олдидан талай мушкулотлар чиқиши аниқ.

Хуллас, у Доротея тайинлаган йўлдан қайтгани йўқ ва зовурга ҳам тушмади. Аксинча, дўнглик бўйлаб юриб, яқин йўлга етиб олди ва ундан эски шаҳарга борувчи кўчага чиқди.

«Шульмейстер тентираб бораркан, хаёлга чўмди: ҳозиргина содир бўлган воқеадан ютдими, ютқаздими? Бундан у йўлаган режа ахийри чиппакка чиқмайдими?

Ҳа, Венд уни ўлдирмоқчи, пулига эга бўлмоқчи эди. Алқисса, у ниятига етгани йўқ ва энди хундор ғанимга айланиши муқаррар.

Қолаверса, шаҳарнинг кўп жойларида уни гринсиз ва кийими ўзгармаган қиёфада кўришган. Меҳмонхонада эса ҳарбий мундирда намоён бўлди. Бундан хулоса шуки, Шульмейстернинг Ульм кўчаларида юриши хавфли, лоақал уст-бошини ўзгартириб олиши зарур.

Венднинг (ва Рульскийнинг) қўлига тушмаслиги, ҳазир бўлиши керак: иккови ҳам уни чақиб қўйиши тайин. У ҳолда Шульмейстер бош қўмондон ҳузурига кира олмайди, негаки сохта Калькнер туфайли Макснинг оғзи бир марта куйган.

– Жин урсин! Қийин кунда қолдим-да!

Аммо шундай бўлса-да, бари бир душманинг қўйнига қўл солди, «ўйин» йўналишини аниқлаб олди. Биринчи уринищаёқ ўрданинг қоқ марказига ёриб киришни уddeлади ва ҳар бир зобитнинг «ичагини санаб» кўрди. Ахир энг муҳим вазифа шу эмасмиди? Буни эплади.

Бирнав этчилик ва матонатини ишга солса, олдиндаги қийинчиликларни ҳам ҳар ҳолда енгиб чиқади.

Унга мушкул кўринаётган муаммо гринини ўзгаришмас, ягона гов Венду билан орадаги ошкора адват эди. Иккиланиши билан фурсатни бой бериши мумкин Шульмейстер бор куч-қувватини сарфлаши, ўз даҳосини ишга солиши шарт.

Бу мураккаб ўй-хаёллар ниҳоясида жосус қатъий қарорга келди: у синчков меҳмонхоналардан бирига киради, агар сўраб қолишса, иккиланмасдан ўзининг асл исмини айтаверади.

Шульмейстер мөхмөнхонага кирибօք фаришталар-ча бегубор уйқуга кетди. У ана шундай мириқиб дам олгачгина эртанги ҳамлага ташланмоқчи эди...

Поручик Венд түн бўйи тайёрланиб, тонг отиши билан кундалик ахборот топширгани отланди. Бош штабда у Макга рўпара келди, генерал нотаниш ким биландир қизғин суҳбатга берилиб кетганди.

Бегона одам афт-ангори ва юриш-туришидан қишлоқи бир сўтакка ўхшаса-да, нигоҳи мугомбirona, гап-сўзи милтиқнинг ўқидай эди. Бироқ қаттиқ ғазабга ботган, тутоқиб гапираётганди. Генерал унинг гапларига ошкора хайриҳоҳлик билан қулоқ соларкан, бу маълумотларнинг ўта муҳимлигини ҳис этиб, жони кириб бораарди. У ўз разведкачисини кўрди ва дарҳол чақирди:

- Келинг, поручик, кела қолинг! Ахир манави кишининг хабари сизниям мендан камроқ қизиқтирамайди. Сиз бу одамни танийсизми?
- Йўқ, генерал, мутлақо танимайман.
- Карл Шульмейстер деганлари шу киши-да.

Башарти момақалдироқ соchlari орасида гумбурлаб, оёғидан яшин урганда ҳам, Венд бунчалар ўзини йўқотмасди. У хушомадли кулганича, башарасида бетайин бир ифода қотиб қолди. Венд бармоқларини чаккасига тегизиб, ҳарбийча саломлашди, аммо қўли кўтарилиган, панжалари очилган кўйи серрайиб тураверди, Шульмейстерга боқсан кўзлари телбанамо эди.

– Сизга нима бўлди, поручик? Афtingиз алламбало тусга кирди-я! Бундан чиқдики, Шульмейстер исми сизга танишмиди?

- Билдим, демак, поручик ўша сохта Шульмейстер билан кўришган! – таъкидлади сўтак қишлоқи.
- Генерал жаноблари, ижозатингиз билан бир гапни

сўрасам: мабодо кеча бу кишиникида менинг номими ни ва пулларимни ўзлаштирган бадкор кимса меҳмон бўлмадимикан? У гўё қўлингиздаги зобитлардан истаганини сотиб олиши ва бош штабгаям кириб боравериши ҳақида жа-а мақтаниб гапирганди. Бундан ташқари, Бонапартнинг асл режаларидан сизни чалғитмоқчи бўлиб юрувди.

– Тушуняпсизми, Шульмейстер сиздан гал сўради? – деди бош қўмондон ўз зобитининг ҳаяжон босган афтига синовчан тикилиб.

– Унинг гапларини эшитдим, бироқ яхши тушунганим йўқ.

– Куни кеча шубҳали бир шахс муайян таклиф билан сизга учраган эмасми?.. Мен бундай бўлмагандир деган фикрга мойилман, негаки бу хусусда менга айтганингиз йўқ эди. Қани, гапиринг-чи: бирор хизмат эвазига пул тақлиф этишдими-йўқми?

– Йўқ, мутлақо йўқ! – дарҳол эътиroz билдириди Венд.

– Демак, кеча ўзини Шульмейстер деб таништирган шахс билан кўришмагансиз?.. Унинг ҳарбий кенгаш аъзолари ҳузурига киришига ва уст-бошини алмаштиришигаям ёрдамлашмадингиз, шундайми?

– Йўқ! Йўқ! Булар бари ёлғон!

– Ёнингиздаги зобитлардан битта-яримтаси шундай қилиши мумкинми? Ким?

– Унақа зобитни билмайман, генерал! Онт ичиб айтаманки...

– Қасамхўрликнинг ҳожати йўқ, поручик, мен сизга ишонаман. Аммо шуни тушунишни истардимки, мана бу ҳалол-пок инсоннинг исми сизни нега бунчалик довдиратиб қўйди?

Венд оз-моз ўзини тутиб, ақл-ҳуши жойига кела бошлаганди. У манави ҳолатнинг оқибати нима бўли-

шини билмаса-да, ўткирлигини ишга солиб, вазиятдан чиқиш умидида эди.

– Менга Шульмейстер номи анчадан буён таниш, – сўз бошлади у. – Аммо ҳанузгача кўрган эмасдим. Яна шуниям билардимки, у энг беназир ва ишончли агентлардан бўлиб, ҳатто сиздай қўмондонга ҳам манзур. Фақат мен бу одамнинг қиёфаси манавинаقا бўлишини хаёлимга сифдиролмасдим... Шу боис гангигб қолдим-да.

– Мен ҳақимдаги самимиятингиз учун ташаккур, поручик. Бирор сенинг номингни сотиб юрса, бу жудаям нохуш эканини тушунинг-да!.. Ё Парвардигори олам! Эй Худо, ўша кимса қўлимга тушсайди!..

– Хуллас, – деди Мак, – Шульмейстерни мен ҳам кўрганим йўқ эди, хат орқали танирдим, холос Унинг айтишича, собиқ разведкачиларидан бири аввал пулини ўмарган, сўнгра Шульмейстер номини сотиб, Ульмда ўгринча пайдо бўлган. Бу киши французларнинг режалари хусусида бизни ўша каззоб янгиштиридимикан деган хавотирда. Мен бугун ҳақиқий Шульмейстер келтирган маълумотлар билан кечагина ўзим гувоҳ бўлган гапларни шунчаки таққослаб кўрдим. Демак, сиз айни масалада ҳеч нимадея олмайсиз, шунақами, поручик? Сиз разведка хизматининг раҳбари сифатида буни билишингиз керак эди. Аммо билмайсиз, тўғрими?

– Зобитлик номусим ҳаққи онт ичаман!

– Яхши!

Мак бошқа гапиргани йўқ. Энди анави қишлоқи башараға келсак, у ҳам сукутда, лекин унинг кўзларига боқсан жирканч товламачи ўзи устидан чиқарилган маънавий ҳукмни яшин тезлигига уқди: «Аблаҳ!»

Бироқ мана шу бақалоқ кечаги Шульмейстернинг айнан ўзи эканини Венд қаёқдан билсин? Ахир рўпа-

расидаги сўтакнинг юзини офтоб олган, ёноқлари қирмизи, соchlари канопга ўхшайди, оёқлари омочдай, қўллари қип-қизил. (У тор енгларини бармоқлари-нинг учигача тортиб олганди.) Кечқурунги одам буткул бўлакча: афт-ангори заҳил, соchlари қизғимтири бўлиб, оёғи чиллакдай, қўллари оппоқ эди-да.

Поручик бир четда қараб қолди: бош қўмондон Страсбургдан келган догоули билан яна анчагина сўзлашди, ҳатто бир нарсаларни ёзиб ҳам олди. Венд уларнинг бирорта сўзини эшитгани йўқ.

Агар мана бу одам ҳақиқий Шульмейстер бўлса, кечаги кунгача олдига похол солган қаллоб ким бўлди? Доротеяни йўлдан уриб, ўзини ҳайдатган ҳам ўша, кейин икков поручикнинг устидан ҳузур билан кулишгандир...

Генерал Мак сўраб-суриштириб, ёзадиганини ёзиб бўлиб, кабинетдан чиқиб кетгач, аввал шерик, бутун эса душманга айланган икки киши холи қолишли. Ана энди Венд бу гаройиб суратли зотни синчиклаб кўздан кечира бошлади.

У bemалол кўриб олиши мумкин эди, чунки бегона кимса унга яқинлашиб, офтоб тифига ўтди. Венд ҳарчанд тикилмасин, унинг сиёқидан кечаги рақибиغا ўхшагудек лоақал бирорта чизиқни тополмасди.

Зотан, Шульмейстерга қойил қолмасликнинг иложи йўқ: у гринни, соч-соқол ва уст-бошларини ҳам мутлақо ўзгартириб ташлаганди. У нафақат кекса бош қўмондонни, ҳатто учига чиқсан разведкачини ҳам гўл қила олди. Шульмейстер эҳтиёткорликка зўр бериб, қиёфасидан ташқари, хатти-ҳаракати ва овозигача янгилаворганди.

Бу «ўйин»да ютуқ Шульмейстерники, албатта. Ўз бошлиғи олдида Шульмейстер билан алоқаси борлигидан тонган Вендинг жиноятини исботлашдан осо-

ни йўқ, бинобарин, унинг жони франциялик жосус-нинг қўлида. Энди уни бир қалака қилиб, хумордан чиқса-чи?..

Шульмейстер «сен ҳам одаммисан?» дегандай битта-битта юриб келди-да, Вендга бақрайиб тикилди. Тўсатдан Вендинг эси оғаёзди: қишлоқининг гўштдор қирмизи ёноқлари бехосдан ялпайиб, ранги ўча бошлади. Дўмбоқ ва қип-қизил қўлларининг бирданига эти қочиб, оқариб қолди.

Бу ақл бовар қилмас илми ғайб томошаси бўлиб, Вендинг кўз ўнгидаги нотаниш кимса тамоман бошқа одамга айланарди. Унинг юзи ўзгарапкан, бўлак белгиларини ҳам таниб бўлмасди. Қишлоқининг то-воқдай башарасидаги қисиқ кўзлари энди чақиндай чақнаб, ўқрайиб қарап, ҳатто қўрқинчли кўринаётганди. Бу «ижод»нинг сўнгги саҳифалари яна ҳам қизиқ бўлди: сўтак оғзига қўл тиқиб, лунжидан бир жуфт йирик золдир олди, ёноқлари ўша соққалар билан гўштдор кўриниб турганди. Кейин бурнини танқайтирган пахтали тиқинларни чиқариб, сўл қўли билан бошидаги ясама сочини сидирди. Хуллас, ўша онда Вендинг кўз олдида кечқурун ўзи ўлдирмоқчи бўлган таниш қиёфа намоён бўлди. У ҳамон сукутда эса-да, лекин авзойи аввалгичалик лоқайд ва анқов эмас, аксинча, таҳдидли эди.

Венд уни бир уриб, айюҳаниос билан қочмоқчи ва ҳам уни фош этиб, ҳам ўз ваҳимасини ошкор қилмоқчи эди. Бироқ Шульмейстер унинг елкасига акаларча шапатилаш билан бу қутқуга барҳам берди ва шунчалар гулдурос овоз билан кулиб юбордики, кўхна Ульм қалъаси бинога келганидан бери бундай қаҳқаҳани кўрган эмасди.

– Бу ердагиларнинг томи кетиброқ қолганга ўхшайди-да! – деди у хушчақчақ эҳтиёткорлик билан.  
– Генералларнинг махфий кенгаши бутунлай бего-

налар иштироқида ўтади, кечагина апоқ-чапоқ дўстлар эртасига бир-бирини танимайди. Бутун дунёдаги алламбалолардан боҳабар агентлар эса ўз уйидаги аҳволдан бехабар.

У сўнгги жумлани шунинг учун айтдики, Венднинг рақобати рашкнинг оқибати эмасмикан? Шундай шубҳага борган Карл жиддий шама қилди:

— Самимий туйгуларга асосланган ҳар қандай бадкорлиқдан кўз юмиш мумкин. Сиз мутлақо янгилишяпсиз, Венд жаноблари, кеча мени ҳузурингизга бошлаб кирган ойимқизни йўлдан урганим йўқ. Эҳтимолки, маъқул муомалада бўлганингизда, у сизни ташлаб, менинг хизматимга ўтишни хаёлигаям келтирмасди. Ахир мен уни мафтун эта олувчи Адонис<sup>1</sup> бўлмасам. Сизнинг менга қасд қилишингиз қанчалар кўрнамаклик бўлса, шунчалар аҳмоқликдир. Энди қўлингиздан нима келади? Ўзингизни-ўзингиз кишнлаб қўйдингиз, сиздан қўрқадиган жойим йўқ: бир оғиз сўзим билан адойи тамом қила оламан. Биз ҳозир шундай одамлар даврасидамизки, улар вазифасига кўра жосус сифатида мени отиб ўлдириши, сотқинлигингиз учун сизни дорга тортиши зарур. Жим, қадам товушлари эшитиляпти... Улар иккимизни юзластириши, кечаги ва бугунги маълумотларни таққослаб, тўгри-нотўгрилигини солиштириши мумкин. Сизнинг феъли бадингиздан хulosа чиқариб, ўзим нима қилишимни яхши ўйлаб олганман. Сизни батафсил огоҳлантириб қўйдим, а? Шунақа бўлсин! Ҳа-я, бир оғиз гапни унутибман: билмасангиз, билиб қўйинг, пул худди ўша жойида турибди! – Шульмейстер Венднинг ичини куйдириб, қорнига ишора қилди.

<sup>1</sup> Адонис – финикияликлар тасаввуридаги ўсимлик ва ҳосил илоҳи, юонон афсоналарида эса бенуқсон баҳодир йигит бўлиб, маъбуда Афродитанинг ошиғи.

Аммо Венд гурбатда қолди, нима қилишга боши қотди. Шульмейстер эса лип этиб хонанинг тўрига ўтди-да, бирлаҳзада гримини «таъмирлаб», Мак кўрган суратга кирди.

Эшик очилганда жосуснинг афт-ангори тагин товоқдай бўлиб, муғомбир қиёфада эди. Дераза олдида қаққайган поручикнинг миясида эса ягона савол: «Нима қилсам бўларкин?»

Мак эрцгерцог Фердинанд ва фельдмаршал Кленавни бошлаб кирди.

– Мен айтган одам мана шу! – Шульмейстерга имо қилди бош қўмондон. – Буниси жаноб Венд, ўзингиз яхши танийсиз. Мен сўроқ қилдим, сиз ҳам суриштириб кўринг. Башарти бу бири-бирига зид маълумотлар мени янглишираётган бўлса ва сиз ҳам муайян хulosага кела олмасангиз, у ёғи кенгашга ҳавола: генераллар нима дейишса, мен ўшанга рози бўлавераман.

Сўнг сўроқ бошланди.

## САРСОНЛИК – САРГАРДОНЛИК

Бу пайтда Доротея нима қилаётганди? Кечаги меҳмони жуда ҳам яқин жойда экани унинг хаёлига ҳам келмасди...

У ўзини гарibu мискин ҳис этиб, ич-этини ерди. Айниқса, кўз олдида юксалиб, қаҳрамонга айланган одам дил изҳорини қабул этмагани қаттиқ алам қиласди. Агар Шульмейстер унинг ёш юрагини рад этган экан, демак, ўзига муносиб маъшук ҳисобламагани тайин.

Доротея ўз-ўзига савол берди:

– Хўш, не сабабдан унга мос эмасман? Анави Венд деган ифлоснинг тўшагида бўлганим учунми? Ахир уни итдай беҳурмат қилиб ҳайдаб солмадимми? Оқланиш ва покланиш учун шугина кифоямасми?

Зеро, у ёш ва гўзал эди. Унча-мунча йигитга қутқу сола олишини ўзи ҳам биларди. Кўнгли сув ичган ҳар қандай эркак қармоғига илинишига ишончи комил. Бироқ айни хусусда Шульмейстер «исёнкор» бўлиб чиқди. У ўзини бағишламоқчи ва маслакдошига айлантиromoқчи бўлган киши терс қараб кетворди! Доротея қатъий қарорга келди:

— Мен унга кераклигимни, наф етказа олишимни кўрсатаман! Ҳа, ҳа, буни амалда исботлаб бераман!

Яна режа ва гоялар безгакдай хуржга келиб, Доротея тун бўйи кўз юмгани йўқ. Аммо чарчаб мизғиши биланоқ ваҳима босиб, кейин даҳшатга айланди. У яна Вендинг қўғирчоги бўлишдан қўрқарди. Ҳайтовор, эрталаб уйғонгач, хийла енгил тортиб қувониб ҳам олди: тунда Венд бу тарафга яқин йўламаган ва хонадонига дахл қилмаган эди.

У тез орада Шульмейстер билан яна кўришажагидан бари бир умидвор ҳолда кўчага чиқибоқ ўша одамга нафи тегадиган маълумотларни ҳар қадамида излайверди. Аммо у эҳтиёткорлик юзасидан поручик билан учрашув манзилларига, унинг уйи атрофига яқинлашгани йўқ. Бир сўз билан айтганда, Доротея хуфёна хабар ахтариб, ўзини танитмай ҳамма-ҳамманни кузата оларди...

У хаёл уммонига шунчалар гарқ бўлгандики, тижорат майдонидаги қалтис ғивир-ғивирнинг сабабини ҳам аранг пайқади. У аниқ нима гаплигини билмас-да, шаҳарда қандайдир янгилик содир бўлганини тушунди. Шундай экан, уйда ўтиргандан кўра, дайдигани маъқулроқ-да.

У кеча Шульмейстерга ўзи кўрсатган эшиқдан чиқди ва ўт-ўланга тирмашиб юриб, зовурнинг нариги тарафига ўтиб олди. Тез орада кимсасиз бир қишлоқча етиб, жиндай тўхтади ва зулмат қўйнидаги теваракка

разм солди. Доротея ақл-хүшини ўғирлаган бетимсол хожасига ёқиши ва қалбига кириш истагида ёнса-да, ҳозир қаёққа йўл олишни билмасди.

Бу кечада унинг Шульмейстерга маъқул келадиган маълумот топиши амри маҳол. Бироқ ҳеч қачон алдамай келган ғойибона сезги Доротеяни Дунайнинг сўл соҳилидаги яқин қишлоққа чорлаб турарди: масофа бир вёрстагина, холос.

У худди ўша тарафга – Вертиңген томонга йўл олди. Аммо йўллар бўйида қаторлашган постларга илинмаслик учун экинзорлар оралаб юриши, говлардан, деворлардан ошиши лозим. Австрия дивизиясининг чодирлари катта ҳудудни банд этгандики, Доротея уларга йўлиқиши асло истамасди. Бу дивизия бевосита эрцгерцог Фердинандга бўйсунувчи иирик корпуснинг бир бўлаги бўлиб, Ульм ортига жойлашганди. Қора ўрмон тарафга саноқли соқчилар қўйилганди. Кўмондонларнинг фикрича, дивизиянинг қўналғаси жуда қулайлиги туфайли ҳар қандай ҳужумдан бемалол ҳимояланиш мумкин. Бу ишончга лаққа тушган ўн минг аскар бамайлихотир уйқуни уриб, ширин тушлар кўриб ётарди. Шундоққина тумшуги остидан сиёҳпўш аёл ўтиб кетгани ва ўзларига мағлубият келтириш ғаразида экани бирор жангчининг хобига кирдимиқан?

Доротея узоқ сарсон-саргардонликдан сўнг Вертиңгенга элтувчи ўқдай йўлга тушиб олган бўлса-да, нишабликдаги кузатув постининг рўпарасидан чиқиб келганди. У девдай аргумоқ ва чавандозни кечикиброқ пайқади: сергак соқчининг назарига тушиб бўлганди.

Коровулнинг босиқ сўрови эшитилди:

– Wer – da?<sup>1</sup>

<sup>1</sup> Ким у келаётган. (Немисча).

и: Доротея бир сакраб қоронгиликка ўтди. У қочиб қутулмоқчи эди. Елкадан олинган милтиқнинг шараклаши уни тўхташга ва ерга ётишга мажбур қилди, тусмоллаб отилган ўқ оловли из қолдирив, аллақа-ёқча учди. Доротея ноилож ўрнидан турди, йўл ёқасидаги соқчи томонга бораверди. Лекин унга жуда яқинлашмасдан, эҳтиёт шарт бир неча қадам берида тўхтади ва тап тортмай чинқирди:

– Нима бало, жинни-гинни бўлганмисиз? Сизларнинг дастингиздан энди ишга бориш ёки уйга қайтиш ҳам мумкин эмасми?

Дарғазаб суворий ҳам бўш келмади:

– Нега сўроққа жавоб бермадингиз? Кимсиз ўзи? Қаёққа кетяпсиз?

– Шаҳардан келяпман, Вертингенга қайтдим. Бўлдими?

– Тўрт томонинг қибла, тезроқ йўқол!

– Ташаккур...

Шунинг устига чопиб келаётган аскарларнинг оёқ товуши яқинлашарди: улар ўқ отилганидан безовталашиб, сабабини аниқлашга ошиқардилар. Доротеяning эса бундай тўқнашувга зинҳор кўзи учиб турмагани боис, энкайганича қочаверди. Салдан сўнг у ҳозиргина ўтган йўлдан от туёқларининг тарақлаши ва гала-ғовур эшитирди. Кейин ҳамма ёқ жимиб қолди.

Доротея яна дарё томонга разм солди: чироқлар энди биттамас, анчагина кўпайгандай кўринарди. Ўрмон билан қолланган тог ёнбағридаги фонарлар дам олға борар, дам ортига тисариларди. Бу ўша ерга катта миқдордаги қўшин тўпланганига далолат, албатта. Австриялик соқчилар йўловчи аёлни ўқча тутгунча (Доротея зўрга қутулди улардан), анави душман билан шуғуллансалар бўлмасмикан?

Кутилмаганда ҳамма чироқлар бирданига сўнди. Икки-учтагина нурли нуқта қолди. Уларнинг ораси

жуда олис бўлиб, афтидан ҳар бир ёруғлик биттадан қўналға марказидан ўрин олганди.

Чамаси гулханлар теварагидаги қўшинлар энди тўла-тўкис жойлашиб бўлиб, австрияликлар каби уй-кута ётишди ва тонг билан яна йўлга тушадилар.

Доротея қишлоқдаги дастлабки уйлар томон қадамини тезлатди. Қимирлаган одамзод йўқ. Деразалар қоп-қора, ҳовлилар бўм-бўш. Ҳатто итлар ҳам ҳурмасди.

Тунги соат ўн бирга яқинлашди.

Ўрмонга элтувчи йўл ниҳоясида биргина хонадоннинг эшиги очиқ. Уй олдидағи шотиси осмонга қанқайган отсиз арава гўё қўлини кўтариб ибодат қилаётган одамга ўхшайди. Эшик кесакисига тирсаги билан суюнган бўйчан одамнинг тахлити кўринди, у хаёлчан ҳолда тамаки тутатарди.

Майсазордан овоз чиқармаслик учун мушукдай юриб бораётган Доротеяниң унга кўзи тушди-ю, тақса тўхтаб қолди. Ҳалиги одам ҳам унга разм сола бошлади ва хаёли бўлинди: бир неча дақиқа аввал отилган ўқ фикри-зикрини банд этганди. У тун кўйнида пайдо бўлган шахснинг (афтидан аёл киши экани аниқ) кимлигини ўйларкан, қўнфироқдай овоз жаранглади:

– Тақсир, менга жиндай похол билан бир парча жой берсангиз, эрталабгача дам олиб, кейин ўз йўлимга кетаверардим.

– Мен ҳам йўловчиман, – жавоб берди осто надаги нотаниш киши. – Уй бўш экан, оилас билан тунашга тўхтагандик. Сизният ихтиёрингиз ўзингизда, мен сизга эшикни на очоламан, на ёполаман.

Доротея яқинлашаркан, бегона одам ундан ўзини четга олиб, коридорга кирди. Эҳтиётан кичкина фонарни қўлига олди ва аёлнинг юзини ёритиб, аёлнинг ўзига ва ҳамроҳларига хатарнок эмаслигига ишонч ҳосил қилди.

Доротея ҳам ёруғда унга назар солди: юз-кўзи жиддий, соchlари оппоқ, елкаси кенг, қўллари бақувват, озгин киши... Тасодифан уй эгаси бўлиб қолган «мезбон» сўлдаги эшикка ишора қилди:

– Бу тараф банд, аммо нариги томондаги хона бўш, кўрпа-тўшак ҳам тахт, bemалол дам олаверасиз. Чамамда, душман бостириб келаётганини кўргач, уй эгалари яқин орада қочиб кетишган шекилли.

– Демак, ёв шу атрофдами?

Бўйчан қария индамасдан қўли билан ишора қилди: у Доротея боягинда эътибор берган чироқлар томонни – тоғ ўрмонини кўрсатарди.

– Бундан чиқдики, сиз французлардан қўрқмас экансиз-да? – сўради аёл.

– Ие, ўзингиз-чи? – эътиroz қилди у. – Ҳатто сизнинг уларда ишингиз ҳам бордирки, ўшақقا кетяпсиз-да, шунақами?

– Меними? Мен билганимча йўқ эди...

Доротея гапини тутатолмади: эшик оҳистагина очилиб, остоnада бир қошиқ сув билан ютгудай сулув аёл пайдо бўлди.

Ёпирай, мазкур учрашувда сирли оламнинг қай синоати яширин?.. Бу шунчаки тасодифми, ёхуд курраи замин мавжудотларини ўз хоҳиш-иродасидан ташқари тасарруф этгувчи муқаррар қонуниятнинг амалда намоён бўлишими?

Эҳтимол, у қисмат китобидаги азал котибларининг ўчмас битигидир: зеро, ушбу номада одамзод учун амри маҳол висол ва ҳижронни, учрашиш ва айрилишни йўқдан бор қилувчи зотнинг иродаси муҳрланганди.

Билъакс болтадан тоймас, эркаклардай шаддод аёл Худо фақат ишқу вафо учун яратган гулдай нафис санамга рўпара бўлармиди?

Венднинг дангалчи ва ўзбилармон собиқ ҳамтовори, эндиликда Шульмейстернинг ҳаётидан ўрин топмоқча ва тўшагидан жой олмоқча аҳд қилган хотин олдида Шульмейстернинг қонуний жуфти ҳалоли турарди!

Ҳа, бу Берта эди. Лекин бу уйга қаёқдан келиб қолди? Бунга бирор воқеа, кўнгилсизлик ё қандайdir интилиш сабаб бўлдимишан?

Нафсилаамрини айтганда, оффенбурглик тўрт қоҷоқ ногоҳоний кўргиликлар қўлидаги қўғирчоқ бўлиб қолишганди. Улар мутлақо бехатар кулбани тарқ этиб, алалоқибат бу нохушликларга мубтало бўлдилар.

Биринчи куни кечки пайт тоғлар ўртасидаги Гегенбаҳда араванинг йўли тўсилганди. Эртасидан эса ҳаммани босган ваҳима уларга ҳам «юқди». Бунинг сабаби – Мюратнинг суворий қўшинлари Қора ўрмондаги дефилеларда гужгон ўйнаётгани ҳақидаги миш-мишлар эди.

Бу гапни эшигтгач, тўртовлон Оппенауга, ундан Фрейденштадтга етиб олишга ошиқдилар. Йўлда улар дастлабки немис полкларига тўқнашдилар. Ҳарбий чегара ҳудудларига тааллуқли шафқатсиз фармонлар уларни ҳам барча қатори янада олис-олисларга, хавфсиз жойларга қочишга мажбур қиласарди.

Тўртовнинг кайфияти тўрт хил: Родек тақдирига лаънат ўқиса, лабларини чўччайтирган митти Лизбета хандон отиб куларди. Қизча ўзининг паккасига айланган араванинг бир бурчида ётиб олса ҳам, болаларча ўнгайсиз, аммо ёқимли талпиниши билан йўл четидаги кечки чечакларни узар, чеҳраси ўша-ўша: тетик ва гулдай қирмизи эди.

Сўлгин ва ғамгин Берта мавҳум ниманингдир ташвишига асира бўлиб, хаёлга гарк. У қандай бўлмасин, эрини топишга жазм қилган, у томонга қушдай

учиб боради ва этагидан маҳкам тутганича умрбод қўйиб юбормайди!

Фақат Гансгина (Берта уни Жан деб атарди) бу юртма-юрт саргардонликдан хушхол, янги-янги үфқулар очилаётганидан мамнун. Болакай одамларга ва атрофга ёшликка хос ҳаяжон билан назар солиб борарди. (Бунда манзара ва қиёфалар хотирада узоқ сақланмаса-да, рангин кўринишлар қалбни қувнатарди.) Унинг навқирон кўзларига адир – тоғдай, сой – дарёдай, гулдаста – гулзордай, дараҳтзор – поёнсиз ўрмондай кўринаётганди. Ўткинчилар, ҳатто тирикчилик ташвишлари билан кетаётган қашшоқлар Ганснинг нигоҳида ё қаҳрамон, ё ўғри, ёки қотил, ёки халоскорга айланарди...

У йўлга чиқсанларида олдинда пиёдалаб юрганди, ўзига қўйиб берсалар, дунёning нариги бошигача ҳам яёв кетгудай чоги бор. Ҳар замонда оёғига дам бериш учунгина аравага ўтиради. Ганс учраган ҳар бир аскарни обдан кўриб олиш учун тўхтар ва ёшига хос бўлмаса-да, ўта жиддий қиёфада ҳамма ҳарбийларни эътибор билан кузатиб, мундирларига, қурол-аслаҳаларига, бош ва оёқ қийимларига синчков назар соларди. Бу «машғулот» туфайли у орқада қолиб кетарди, Берта бақиришга ва койишга мажбур бўларди. Ана шундагина Ганс «Берта она» қошига чопиб, гуноҳкорона жилмайганича, унинг бағрига бош қўярди. Бироқ йўлда саф-саф жангчилар кўринса бас, яна ўз билганидан қолмасди.

Аждодлар руҳи авлодлар сиймосида мангу яшамоги муқаррар! Неча асрлар ўтганида ҳам ўша боқий руҳ фарзандларни, невара-чевараларни – ҳаммани боболар, бобокалонлар ўтган йўлга, уларнинг шон-шавкатига чорлайверади. Айтиш мумкинки, оталардан ўғиллар томирига қўйиладиган улуғларнинг

тоза қони азим дарёning долғалари дири, бинобарин аждодлар қолдирган тарихий юк ёшлар зыммасига ўтади. Бу шарафли меросдан сулоланинг ҳар бир вақили ўз навбатида улушдор бўлади, албатта.

Айтмоқчимизки, Ганс аскарлар сафига болакай бўлиб эмас, гўё Жан Бурбон, яъни кимсан шаҳзода Конде нигоҳи билан шоҳона назар соларди!..

Хуллас калом, Родек ва ҳамроҳлари йўл юрдилар йўл юрсалар ҳам мўл юрдилар ва ахийри Ульм ис-теҳкоми бўсағасидаги постларга етиб келишди. Сайёҳларимиз йўлидан француzlар ҳужумга ўтаётгани учун, генерал Мак барча ноҳарбийларни ҳайдаб, ўёқдаги йўлни бўшатиш ҳақида буйруқ берганди. Бунинг натижасида шаҳарга етиб олиш учун қўшинлаf жойлаштирилган жуда катта ҳудудни батамом айлануб ўтиш лозим бўларди.

Берта, Родек ва икки норасида ана шундай қийинчиликлар билан нотаниш қишлоқ остонасига етиб келганларида кун ботганди. Улар эгалари кўчиб кетган фермада тўхташди. Зотан, энди сафарни давом эттиргандан кўра шу ерда тунаб, эртага йўлга чиққа маъқул эди.

## БЕРТА ВА ДОРОТЕЯ

Бу ўта ажабланарли ва ақл бовар қилмайдиган ҳоj бўлса-да, жуда кўп ҳаётий мисоллар билан исботланган: яқинига йўлашга ҳам арзимайдиган шахсларга кўпинча хайриҳоҳлик билан муносабатда бўламиз илтифот кўрсатамиз. Бунақа вазиятларда саркаш кўнгил истакларимизга бўйсунмайди ва қандайдир гойибона қудрат душманимиз бўлган кишини ё баднамс одамни ёқтиришга даъват этади.

Алқисса, покдомонлик беҳаёликка марҳамат қиласа, фаҳш эзгуликка ошиқади. Ориятли аёллар «ана-

винақа» жувонларга меҳр кўрсатсалар-да, бу ҳавас ва муҳаббатдан эмас, шунчаки ачиниш, холос. Покдомон, номусли хонимларга иззат ила таъзим бажо этувчи беор, бети қотган беҳаёларнинг кўпини кўргансиз. Аммо уларнинг ниятида хўжакўрсинга ўзгалирни алдашгинамас, фурсатдан фойдаланиб, ўз вижденига тасалли бериш орзузи ҳам бор...

Доротея Бертани аввал таниган эмас, ҳозир ҳам дурустроқ назар сололгани йўқ, аммо уни яхши кўриб қолди. У осто на даги аёлга индамай тикилганича нима деярини билмасди. Бертанинг маъсума кўзларига боқиб, Доротеяning йиглаворгиси келарди.

Бертага ҳам унинг хушбичим чеҳраси, чақноқ ва мафтункор кўзлари маъқул тушганди. Тупканинг тагидаги овлоқ қишлоқда ярим тун маҳали одми ва топ-тоза либосли, кўринишидан бамаъни жувоннинг пайдо бўлиши Бертага илоҳий марҳаматдай туюлди. Агар ҳовлиқмароқ бўлганда борми, ўзи ётган хонани хушҳоллик билан очиб, дарҳол ичкарига бошларди...

Шу пайт қия эшиқдан боланинг инграгани эши-тилди. Берта ўтирилиб, қулоқ солди. Доротея олғатомонга талпинди. Ичкаридаги овоз тингач, Шульмейстернинг хотини яна бегона аёлга разм солди, иккак гўё маслақдошга айланиб, деярли ёнма-ён бўлиб қолишганди. Доротея сўради:

- Болаларингизми?
- Ҳа.
- Роза қийналишгандир? Ҳар ҳолда ухлаб қолишдими?
- Нимасини айтасиз? Ана, ётишибди, кўра қолинг.
- Доротея ичкарига қадам қўйди.

Родек унга ҳамон олазарак қараганича, ҳар бир сўзига қулоқ солиб турарди. Нотаниш аёлдан Берта ва кичкинтойларга зиён-захмат етмаслигига ишонч

ҳосил қылгачгина ташқарига чиқиб, әшик олдидағи постини әгаллади. Салгинада иккала жувон тил то-пишиб, юзма-юз үтириб олдилар. Уларнинг ёнидагы кенг ўринда ечинтирмай ётқизилган болалар уйқуни уришарди.

- Ульмача ҳали узоқми? – сўради Берта.
- Йўқ, мен бу ёққа кечқурун тўққизларга яқин жўнагандим... Энди ярим тун бўлди, холос. Хуллас, унчалик узоқмас.
- Кечаси ёлғиз юргани қўрқмайсизми? Қаёқларгэ кетаётувдингиз?
- Шу ерга – Вертингенга-да. Дарвоқе, сиз бу қишлоқнинг номини билмайсиз, а?
- Қаёқдан билайн? Биз етиб келганимизда сўраб-сурештирадиган ҳеч ким йўқ эди. Лаънатк уруш ҳаммани уйидан қувиб солди. Албатта бу ерда ота-онангиз, яқинларингиз бордир-да, шунақами?
- Яқинларим?..
- Улар ҳақида ташвишланиб келдингизми?
- Менми? Нега?
- Ахир ярим кечада манавинаقا саргашта бўлиғ юришларингиз?..
- Бе-е, хавотир олганим йўқ. Аммо миш-мишлар кўпайиб, ўз кўзим билан кўриб, кўнглимни тинчитиш учун...
- Кечирасиз, сурештиравериб бошингизни оғрит-вордим... отингиз нима?
- Доротея. Сизники-чи?
- Берта.
- Эшик тагидаги киши отангизми?
- Йўқ, эримнинг дўсти.
- Шунақами? Демак, турмушга чиққанмисиз?
- Саёқ ва эркакшода аёл шундай деб, болалар ухлаётган ўринга сўник назар солди.

— Мабодо дам олмоқчи бўлсангиз, бемалол ётаверинг, – деди у. – Мен чарчаганимча йўқ, сизларга пойдоқчилик қиласман.

— Э-э, қўйинг! – жавоб берди Берта. – Ухлайдиган кайфиятда эмасман. Кўзимни юмишим билан даҳшатли қиёфалар кўринаверади. Сиз-чи? Сиз нега ухламайсиз?

– Менми? Манави шириントй бояқишилар ёнида-я? Сиз бедор ўтирганда, мен ухлаб ётаманми? Асло, ётолмайман!..

– Уй-жойингиз Ульмдами?  
– Ҳа, – жавоб қайтарди Доротея.  
– У ерда кўпчиликни танийсизми?  
– Жудаям кўпчиликни.  
– Айтишларича, аскарлар тиқилиб кетганмиш, шунақами?

– Асти қўяверасиз! Шу тобда уларнинг сони шаҳар аҳлидан ҳам кўпроқ. Тепаликлар теварагида, айниқса тоққа қараган томонда, истеҳком ва қўналғаларда бутун бир қўшин жойлашиб олган.

– Қаранг-а! Мабодо сиз бир кишини... Эсим курсин, мен нега сўраймани, сиз уни қаёқдан ҳам билардингиз? Тасаввур қилинг, битта одам бор эди-да... У ҳам мен каби Страсбург шаҳридан. Ульмга кеттанига ўн икки кун бўп қолди. Агарда уни кўрган бўлсангиз ва менга бирор хабарини айтольсангиз, заб иш бўларди-да!

– Ким у? Қандай одам ўзи?  
– Табиийки, у зобит эмас, нега десангиз Франциядан келган. Оддийгина шаҳарлик, юриш-туриши, уст-боши содда. Жа-а бўйчан бўлмаса-да, гавдали, соchlари тилларанг, малла десаям бўлаверади. Кўзлари қоп-қора ва чақноқ...

Ранги қув ўчган Доротея унга бақрайиб қолганди. Рўпарасидаги аёлнинг салмоқлаб ва ийманибиги-

на айтган ҳар бир сўзи ва у таърифлаган кимсанин белгилари қулогига қўрғошиндай қуилиб бўлганди Кечагина ўзини рад қилиб, уйини тарқ этган киши Доротеяниг кўз олдига келди. Берта тасвирлаган сайин бу ўхшашлик кучая бориб, аёлнинг юрагид мавҳум ва кутилмаган гараз уйғонди. Соҳибжамо рақибасига қарши васваса бошланиб, унга зулм қил гиси, оромига раҳна солгиси келарди.

Ўйқудаги икки фарзанди бошида парвона ва бедој ўтирган она сўраётган шахс Шульмейстерми-йўқми Мана шу маъсума, фариштадай ҳалим бир аёл ўшойни бенарвон урадиган бесўнақайниг хотини бўлиши мумкинми?

Йўқ! Карлнинг айтишича, унинг оиласи жуда-жуд олисда эди. Илоннинг оғзидағи лукмани юлиб ола диган ўшандай одам узоқлардаги бола-чақаси ўзини қидириб келаётганини билмас эканми? Айтганча, манави аёл айнан Шульмейстерни кўзда тутди деб гу мон қилиш ҳам ақлдан эмас. Қолаверса, малласоч в. қўйкўз одам ёруғ дунёда биргина ўшами?

Доротеяниг афтидаги ногоҳоний ўзгаришда Берта ҳайрон: ахир унинг юзи бир дақиқа олдингиг асло ўхшамасди-да. Табассум ва бегуборликдан асај ҳам йўқ. Унинг чеҳраси энди совуқ, бефарқ ва сўни кўриниб, ҳатто заҳарли бир ифода зухур этарди.

– Ўзингиз ўйлаб кўринг, – ахийри тилга кирди Доротея, – саволингизга жавоб бериш жуда мушкул-да негаки сиз ўша одамнинг қиёфасини аниқ тасвирла ганингиз йўқ. Мен уни учратган бўлишим эҳтимол дан холи эмас, аммо бирибир тасдиқлай олмайман Ҳа-я, балки унинг исмини айта қоларсиз?

– Ҳаққим йўқ, унинг номини ошкор этолмайман Иннайкейин, ҳозир исмини ўзгартирган бўлишиям мумкин.

- Ўзгартирган дейсизми? Бирор сабаби борми?  
— Ким билсин? Балки таниб қолмасликлари учун-  
дир.  
— Гап бу ёқда дeng? — деди Доротея совуқонлик  
билан, у энди ҳақиқатнинг тагига етишга жазм қил-  
ди: — Демак, сиз айтган шахс маълум сабабга кўра  
Ульмда ўзини танитмаслиги зарур экан-да. Шунга  
қарамай мен уни учратишм мумкинлигини тахмин  
қиласизки... Бунчалар сўраб-сuriштиришингиздан  
тушуняпманки, у сизга жудаям азиз, энг яқин кишин-  
гиз, шундайми? Эҳтимол акантиз ёки сизнинг...

- Бўлар иш бўлди, энди айта қоламан: у менинг  
эрим бўлади.  
— Албатта... Тушунаман... Лекин ҳамон отини айт-  
ганингиз йўқ, буни билмай туриб, сизга нима дея ола-  
ман?

Берта жавоб беришдан аввал атрофга олазарак  
жавдираб олди: ўзини багоят махфий сирни очаёт-  
гандай сезса-да, Доротеяning ортиқ ҳаяжони боис  
ундан фойдали бир гап чиқишидан умидвор эди.

Берта нотаниш аёлга яқинлашиб, сирли исмни  
ошкор этишга оғиз жуфтлар экан, Доротеяning юзи-  
да акс этиб турган ички түғённи пайқагани ҳам йўқ.

Кўққисдан эшитилган енгил ғивир-шивирдан  
хушёр тортган Берта каравот томонга ўтирилди-ю,  
кўркувдан тошдай қотиб қолди.

Ганс тўшагида тик туриб олганди ва қўл силтаб,  
кўзга кўринмас мавҳум бир ёвга таҳдид қиласарди, чақ-  
чайган кўзлари деворга боққан. Лекин ҳеч кимни кўр-  
масди: на бирваракайига «дик» этиб қўзголган нав-  
ниҳол икки аёл, на фонардаги пиликнинг лишиллаши  
унинг дикқатини тортолмасди.

Демак, туш кўряпти... Ганс қатъий ва бир меъёрда  
сўзга тушди:

– Вақт фанимат, Берта она! Сен Лизбетани бағринг-га олиб, Родек билан дарҳол кетишиңг зарур. Мен эса Карл дадамни топиб, ўлимдан асраб қолмасам иложи йўқ. Ахир... мени энди ундан жудо этишмоқчи!.. Уни ўлдирмокқа қасд қилишган!

Берта унга томон отилиб, чинқириб юборди:

– Нималар деяпсан, болажоним?

Болакай bemажол ҳолда аёлнинг бағрига қулади. Сўнгра кўзларини очди ва уни таниб, жилмайди:

– Ёмон туш кўрдим: аскарлар бизни ўраб олишган, асир эмишмиз... Бу қанақаси? Айт-чи, бу хоним ким?

– У кишигаям шу уйдан бошпана топилди.

– Танишингми?

– Йўқ, аммо исмини билиб олдим. У биз бормоқчи бўлган шаҳардан кепти.

Ганс у томонга бир дам ишонқирамай қараб қолди ва сўради:

– Бу хотин устимизга ҳарбийларни бошлаб келмаслиги аниқми?..

Доротея эса ҳеч нимани кўрмасди ва эшитмасди. Ганс «Карл дадам» дегандаёқ унинг юраги ўйнаб қолганди. Энди ҳаммаси ойдай равшан: «Карл дадам» деганлари ҳам, Берта юрак ютиб излаётган шахс ҳам худди Карл Шульмейстернинг ўзгинаси. Шубҳасиз, олдидаги аёл ўзини рад этган ўша ношукурнинг хотини, ёнидагилар эса унинг болалари! Бу учовлон Шульмейстерни шунчалар севадими? Бильякс жанг-жадал қайнаган не-не юртлардан ўтиб, шу ергача ахтариб келармиди? Модомики шундай шерюрак, садоқатли рафиқаси, манави жажожи фарзандлари бор экан, уларнинг муҳаббати Шульмейстер юрагини бирор лаҳза тарқ этмаслиги ҳам аниқ-да!

Алам хуружидағи Доротея кўнглиниңг тубида тикланган омонат иморат кунпаяқун бўлганини ҳис

этіб турарди... Сүнгги соатларда у тақдир қўлидаги ўйинчоқ бўлиш кулфатидан қутулиш умидида яшади. Вендинг номардлиги ва абраҳлиги жон-жонидан ўтганники, ўйламай-нетмай шаҳардан бош олиб чиққанди.

Мана, ҳеч қанча юрмасданоқ боши тошга тегди, юрагига эса «шаҳзодаси»нинг бутун бир оиласи ханжардай санчилди.

Доротея ўйга ботди: хотини, ўғли ва қизиям бор! Булар – бутун бир давлатки, Шульмейстерга етар одам йўқ. У хавфли топшириқ йўлида ана шундай жаннатмонанд оиласи тарк этишга жасорат топа олганини қаранг! Бу қанақа одам ўзи? Дейлик, у енгилтак, бузуқи инсон эмас: нафсининг сўзига киргани йўқ, Доротеядек соҳибжамолни бағрига олишдай лаззатдан воз кеча билди-ку! Ваҳоланки, аёл унинг бўйнига осилиб, ўлай деб турувди. Демак, Шульмейстер матонатда беназир, ҳаммадан кўра бурчни юқори қўяди...

Доротеяning миясида гўё бўрон бошланди-да, пала-партиш фикрлари остин-устин бўлиб кетди. Юраги тез-тез тепаётгани қулоқларига эшитилаётгандай эди...

Энди нима қилсин? Қандай тўхтамга келсин? Кимнинг хизматига борсин?

Ана шу саволлар ва уларниң жавобигина унинг келгуси йўлини ёрита бошлади: «Йўқ ва яна йўқ! Ўлсам ўламанки, асло Вендга хизмат қилмайман!» – у қатъий қарорга келганди.

Бу Шульмейстерга хизмат қилмоқ аҳди эмасми? Унинг ишончини қозониш йўлидаги илк қадами суюкли оиласи ҳакида агентга хабар етказиш бўлса-чи? Ҳа, Доротея лоақал шунга қодир-ку!..

Яхши ният ўша дамдаёқ қалбини забт этди. Халқнинг йўлдан озган бир қизи поклик кўчасига қайтди, лекин буни ўзи пайқагани йўқ. Ўз қайғусини енгил-

латиш учун бирор қадам босмади. Яхши бир одамга садоқат түйгуси унинг борлигини банд қилди, зеро, Доротея бир ифлосдан жирканарди. Шу тобда бежавоб ишқдан умиди бўлмаса-да, Вендга нисбатан қалбидаги нафратга содик қолганди.

Энди иккиланиш йўқ! У ўзини фақат эзгуликка бағишлийди, вассалом!

Доротеяning ақл-хуши ўзига келаркан, унинг кўзлари кўриб, қулоқлари ҳам эшита бошлаганди!

Дарвоқе, ҳалитдан бери хонада не ишлар ўтди?

Ўйқуси бузилган иккала бола даҳшат билан эшикка бокқан, Берта уларни бағрига бостган... Ташқарида сўкинаётган Родекнинг тажанг овози, кимнингдиғ бўғиқ жавоби, отлар туёғи, дупур-дупур... Курол-аслаҳаларнинг шарақлаши, жаранглаши... Демак ҳарбийлар шу ерда!

Доротея баланд овозда сўради:

– Нима гап ўзи?  
– Яна немис аскарлари изғиган ҳудудга кириб қолибмиз-да, – деди Берта. – Тағин яқин йўл бу ёқда туриб, узоқ-узоқларни айланадиганга ўхшаймиз...

Аскарлардан бир нечтаси остонаядаги Родекни итариб ташлади ва булар ётган хонанинг эшигида тўхтади. Ганс Бертанинг бағридан сакраб ерга тушди. У онасининг ҳимоясига чоғланган йигит қиёфасида олға ўтди. Доротея эшик сари ошиқди, эшикни ташқаридан милтиқ қўндоги билан гурсиллата бошлаши.

– Эшикни очиб уларни кўриб қўйган маъқул, – деди у ичида қатъият билан ва калитни солди, лекин бурашга улгургани йўқ: австриялик уч гренадёр эшикни бузиб кирди. Йўлида ҳеч қандай ғовга учрамаган учала давангир шиддат билан ваҳимадаги аёллар ва болаларни босиб кетаёзди. Доротея тап тортмай уларга рўпара бўлди ва дангал савол берди:

– Сизларга нима керак? Командирингиз бўлмиш зобит қаёқда? Мен ундан сўрамоқчиман: аскарларнинг тунаши учун бўлак жойлар етарли бўлгани ҳолда, аёллар ва болалар ётогига нега тажовуз қиласизлар?

Унтер-зобит унга ўдағайлай кетди:

– Бас қилинг, ойимқиз! Қишлоқни эгаллаш буюрилган, тамом-вассалом!

– Бошлиқ қайда?

– Бошлиқ – ўзимман.

– Ёлғон!

– Гап қайтарма! – тутоқди унтер.

– Айтиб қўяй, сиз нари борса, взводга командирсиз, холос. Капитан қаёқда?

– Ие, Венд хоним, ўзларими?

Бу савол чексиз ҳайрат ва катта эҳтиром билан айтилди ва эшикдан рота командири бўлмиш келишган бир йигит кириб келди. Шаънига шу маломатли номни тақиб қўйишганини эшишиб, Доротея ўзини шармисор сезди ва лоладай қизариб кетди... Ганс онаси томонга ярим ўгирилиб, маънодор қараб қўйди. Гўё: «Кўрдингми? Ахир мен айтувдим-ку, бу хотин анавиларнинг щериги», – дерди.

– Бу ёқка қайси шамол учирди, соҳибжамол Доротея? – давом этди зобит йигит. – Дарвоҷе, тушуман: махфий хизмат! Шунаقا-да, а? Майли, айтманг, айтишнинг керагиям йўқ. Бироқ мен сизнинг бу ерда ортиқ қолишингизга йўл қўя олмайман! Бир киши, унинг кимлиги ўзингизга аён, бош штабга хабар бериб, душман ҳақида алданганини айтибди ва французлар нариги тарафдан эмас, шу ердан ҳужум қилишини аниқлабди. Энди тушундингизми? Тонг отиши билан катта хунрезлик бошланадики, аёлларнинг ундан нари тургани маъқул. Манави жонон билан

биргамисиз? Бунчалар гўзал! Оббо, ҳали болалариям борми? Шу кам эди ўзи...

Бошлиқни кўрган жангчилар бир четга саф тортишди. Бўсағадаги сержант қад ростлаб, буйруқка мунтазир эди. Командир унга юзланди:

– Венд хонимни Вертигендан сог-саломат кузатиб қўйилсин, йўлини ҳеч ким тўсмасин! Башарти унинг кетишига экипаж топилгудай бўлса, айтинг, бирорта аскар отни бошқариб борсин. Дарвоқе, ташқарида кичикроқ арава турувди, балки ўшандан фойдаланаrsизлар. Хайр, гўзал қиз! Поручигингизга мендан салом!

Шульмейстернинг ғанимларидан бўлмиш зобитнинг бунчалар беписанд ва беистиҳола муомаласини Доротея қаттиқ ҳақорат деб билди. Бу шармисорликнинг Берта ҳузурида содир бўлиши дард устига чипқон эди. Вендинг ҳамтовороги айтган ҳар бир сўз Бертанинг наздида Доротеянинг обрўсини уч пул қиласарди...

Бироқ Берта ўзи билан ўзи овора: энди нима бўлади, болаларнинг тақдири не кечади?

Фақат Ганс ҳушёр: нотаниш хотиннинг ҳар бир ҳаракатини синчковлик билан кузатарди. У аёлни кўрган дамдаёқ «душман» деган фикрга келиб бўлганди. Доротея эса унинг болаларча нигоҳига эътибор бергани йўқ эди. У обдан ўйлаб кўриб, капитанинг тақлифи ўринли эканини, бундан бўлак чораси ҳам йўқлигини англади ва зудлик билан Ульмга қайта қолишга қарор қилди. Негаки эрталаб Шульмейстерни топиши ва немис қўшинларининг ҳаракатидан уни хабардор қилиши мумкин-да.

Доротея ҳеч кимга ҳеч нима демади, ўгрилардай писиб, ташқарига чиқиб кетди.

## РОДЕКНИ ХҮРЛАШДИ, ГАНС ҚОЧИБ ҚУТУЛДИ

Франсуа Родек қаҳри қайнаганидан бўғилиб қолганди.

Аввало, анавилар ўта қўрс муомала қилиб, дағаллик билан туртишди. Ваҳоланки, қария хонадонда аёллар ва болалар ётганини, бинобарин, аскарларга жой йўқлигини унтер-зобитга беозор тушунтиrmоқчи эди, холос.

Кейин қўндоқлар билан уриб, коридор бурчагига суриб бориши-да, ўғирдай келадиган қуйма темирга қўлидан боғлаб қўйиши. Қария тикланишга ҳам, ўтиришга ҳам иложсиз вазиятда азобланиб, қишлоқса хужумнинг оқибатини ўйларди. Шу аснода икки жангчи унинг байталини етаклаб чиқаёттанига кўзи тушди. Олис йўлда тинка-мадори қуриб бўлган шўрлик отга бўйинтуруқни кийгизиб, аравага қўшдилар.

Ана шундан сўнг бояги саёқ аёлни иззат-икром билан ўриндиқча таклиф этиши. (Йўл бўйи бу жойда Берта иккала бола билан ўтириб келганди.) Бир жангчи отга қамчи босди, арава йўлга тушди. Родек тутоқиб ҳайқирди:

— Ўғри! Талончи! Армия деганлари шуми? Шулар аскар эканми? Асло! Қароқчилар галаси, ор-номусли хонимларни таҳқирлаб, беномус ж...ларни бошига кўтаради. Булар ҳалол одамларни занжирбанд қилиб, ўрмондаги йўлтўсарлардай бор-будини тортиб олади. Бу галада жангчиларга бош бўлишга арзийдиган бирортаям жўмард зобит йўқки, қанийди, лоақал ўшанинг юзига тик боқиб, «сен томтешарлар раҳнамоси экансан» дея олсан.

Кекса шуан заҳрини сочиб, ҳоврини босишга шунчалик берилиб кетгандики, ҳатто француузчалаб сўки-

наётганини ҳам пайқамасди. Бўш хоналарга кириб, ухлашга ҳозирланаётган жангчилар дарғазаб чолнинг жаврашини масхаралаб кулардилар, аммо унинг ҳақоратларидан бирорта сўзни тушунганлари йўқ.

Лекин буни тушунган ягона одам ҳам йўқ эмасди. Доротеяни кузаттагач, ёш капитан гўзал жувоннинг ёнига қайтиб кирди: унинг шамшоддай қадди-қоматига суқланиб боқаркан, Родекнинг ҳар бир сўзини илиб олаётганди.

– Дарҳол оғзингизни юминг! – ўшқирди у соғ француз тилида. – Бильъакс, сизни оттирмайман-да, оғзингизга латта тиқиб, ертўлага қаматиб қўяман! Билдингизми-йўқми?

– Тақсир! – деди Родек бирнав ростланиб. – Одамларингиз худди жиноятчига қилгандай муомалада бўлишмоқда. Улар менинг от-аравамни тортиб олиб, анави аёлга бериб юбордилар! Буни нима деса бўлади ахир?

– Хўш, манави уй сизникимиidi?

– Йўқ. Лекин бўш бўлгани учунгина кирдик, аёл киши бор эди, болалари билан ҳордик чиқармаса иложи йўқ.

– Уларни кўрдим. Бироқ эгаси йўқ уйга меҳмон сифатида тушгансиз, бир неча соаттина турасиз, шундайми?

– Албатта.

– Бўпти-да. От-аравангизниям вақтинча олдим, холос. Эрта билан қайтиб келади, ўзингизга топшираман. Хўш, яна нима керак?

– Мени дорга тортиладиган ўғридай чилвирбанд қилишларига чидолмайман. Агар ўлдирмоқчи бўлсангиз, дарҳол ўлдириб ташласинлар, аммо бундай ҳолда яшашни сиräям хоҳламайман.

Қариянинг қаҳрли ва титроқ овозида ҳам, чақноқ кўзларида ҳам мардона шизжоат бор эдики, зобит бир тўлқинланиб олди.

– Башарти банддан бўшатсак, қочиб кетмайсизми? Қўлимдаги аскарларнинг хавфсизлиги йўлида нимаики талабим бўлса, барига итоат қиласизми? Онт ичинг, озод этишади.

– Худонинг номини ўртага қўйиб онт ичаман! Ҳеч қаёқча қочиб кетмайман. Ҳеч кимга зиён-заҳмат етказмайман! Бошқа гапим йўқ. Бу ёғи ўзингизга ҳавола.

– Жуда соз! – бош иргади капитан ва унинг имоси билан сержантлардан бири чолнинг қўлларини бўшатди...

Эркин нафас олган Родекдан уч қадам наридаги эшик ортида унинг ҳимоясига муҳтож заифа билан норасидалар ётишибди. Эшик қия бўлиб, уни яқингинада ичкаридан, айнан ичкаридан очишгани аниқ. Тирқишдан термулиб турган бир жуфт митти кўзни қария пайқади, албатта.

Бу кўзлар! Водариғо!.. Родек бу нигоҳни минглаб кўзлар орасида ҳам танийди, асло янглишмайди! Бурбонлар, шаҳзода Конде ана шундай боқарди. Ёки соддароқ айтганда, бу «Жаннинг кўзлари» эди.

Ичкаридан у қарагани сайин, коридордаги мўйсафид ҳам ундан кўз узгани йўқ. Ўша нигоҳлар нелар деганди? Буниси уни қандай фаҳмлади? Биз айни «сухбатга» кейинроқ қайтамиз...

Рост, Родек қочмасликка Худонинг номи билан онт ичди, бироқ ўзга мазлумларни қутқармасликка эмас. У «бошқа гапим йўқ» деворди, лекин «фикрламайман, ақлимни ишлатмайман» дегани йўқ. Родекнинг олис уфқقا биргина нигоҳ ташлаб ҳам аниқ-тиниқ тафаккур қилмоғи мутлақо осон эди.

Тақдир ҳозиргина бошига солган таҳқир ва ҳақорат унга гайриоддий таъсир қилиб, ўйларини остин-устин қилиб юборди. Шу ҳодиса туфайли австрияликларга бўлган нафрат қалбида қайтадан тугён кўтарди,

айни чогда французлар жон-жаҳонига етказган оғриқ ва азоблар унутилди.

Родек аламзада ўйларга ботди: манави қўллар жанг учун яратилганди, немислар уни ўлимга маҳкум қароқчидай арқонлашди. Уришди, хўрлашди, оппоқ соchlарини ҳақоратлашди, газабланса масхара қилишди, зўрлик билан қасамхўрга айлантиридилар. Бу зулмлар бари унинг юрагидаги мудроқ ватан ҳиссини уйғотди. Французлар ҳам қон тўқадилар, душманни ўлдирадилар, бироқ таҳқирламайдилар...

Родек жангга кирган замонларда асиirlар устидан қулф солиб, эшик ёнига соқчи қўйишарди ёки қатл этишарди. Бу жазолар ҳам фақат хоинларга нисбатан қўлланган, лекин бари бир тутқуннинг шаъни оёқости қилинган эмас.

Гапнинг пўсткаалласи шуки, аламзадаликда ватанини тарқ этган шуан яна ўз Франциясининг фарзандига айланганди.

Шу тобда унинг кўнглидан шу ердан қўл узатса етгудай тоғдаги ватандошларининг, жондош оғаларининг ҳаёти хавф остида қолиши мумкинлиги ўтиб хавотирланди. Уларнинг азиз жонига кўз тиккан ганим ҳақида хабар етказиш зарур – бу мўйсафид шуанинг қалб амри эди.

У кўзлари билан сўзлар экан, жанговар азми ижросида мурғак болакай мададкор бўлажаги хаёлига ҳам келмаганди...

Уйдаги ғала-ғовур босилиб, дақиқалар ўтгач, қия эшик аста-секин кенгая бошлади. Постларни кўздан кечириб қайтаётган капитаннинг шпорлари жаранглаган маҳали бу ҳаракат тўхтади. Зобит йигитнинг қадамлари тиниши биланоқ эшик ланг очилди ва ими-жимида оҳиста ёпилди.

Башарти кимдир ана шу хонага назар солгудай бўлса, фақат соҳибжамол жувонни кўрарди. Олис йўл

толиқтирган бу шүрлик жажжи қизалоқни оғушига олганича оромкурсида ухлаб қолган.

Яқында ҳам унинг ёнида ётган бола эса йўқ, гойиб бўлганди.

Пиллапоя остида ёнбошлаган Родек гужанак бўлиб олган. Болакайнинг қущдай енгил ва нозик тахлити аскарлар оралаб шарпасиз ўтаркан, у юрагини ҳовучлаганича қараб ётди ва унинг омон-эсон гойиб бўлишини ҳаяжону кўз ёшлари билан кузатиб қолди.

## ЖОСУС ҚАЛТИС СИНОВДА

Ҳаётдаги арзимас тасодифлар оқибати ҳам тарихий воқеаларга айланиши мумкин, бунинг мисоллари талайгина. Боссюэ<sup>1</sup> замонидан буён одатки, аҳли олам бир дона қумдан ҳам ҳазир бўлиши зарур, зеро ўша ҳам бутун баҳариятни йўлдан оздириши эҳтимолдан холи эмас. Шунчаки ният эса буюк империянинг тақдирини ҳал қила олади. Ёки жанг майдонида муқаррар бўлиб қолган ғалаба кутилмагандан мағлубият билан якуnlаниши ҳам бор гап. Бунинг сабаби ҳам шунчаки тасодиф: тусмоллаб отилган ўқ қўмондонни ҳалок қилган. Бир дона чириган тахта буюк бир кошонани кунпаякун этишига не дейсиз?..

1803 йил эди. Наполеоннинг бағоят ўткир ҳарбий ҳийласи бесамар кетишига ва қарийб қуршовга тушган душманнинг панд бериб қочишига бир баҳя қолди. Сабаби жуда оддий: донаувертлик бир аллоф сули сотмоқчи эди, бироқ у қўйган баланд баҳони харидор кўтармади ва дон сотилгани йўқ.

Ўша деҳқон Ульм шаҳрига иш билан келган бўлиб, ўз ғалласидан бир халта намунани чўнтағига солиб

<sup>1</sup> Боссюэ Жак Бенинь (1627 ~ 1704) – француз адаби, дин арбоби, епископ.

олганди. Еттинчи октябрь куни бозорда Австрия кавалерияси учун озуқа олаётган интендантлик хизмати агентларига донини таклиф қилди. Ҳарбий харидорлар кўпинча қисиб қўядиган оддий фуқаролар ҳам сулини кўришиди. Лекин на уларга ва на буларга дехқоннинг нархи маъқул келмади. Алалоқибат, дон-фурушнинг жаҳли чиқди ва беҳуда шунча йўл босганидан армон қилди. Унингча, агар урушни бошлаб қўйиб, қўшин учун зарур товарларнинг баҳосини кўтариш кўзда тутилмаган экан, бундан галлакорларга кони заар. Армия ҳали у ёққа, ҳали бу ёққа ўтишдалаларни пайҳонлаб турган маҳалда ҳосилни улағдан ҳимоялаш осон эмас. Галлакор меҳнати қадрлағас экан, улар қандай тирикчилик қиласди?

Бироқ гап шундаки, дехқон сулига отасининг хунигача қўшиб сўраганди. Харидорлардан бири унг тушунтиришга уринди:

– Аввало маҳсулот сиз қўйган баҳога арзийдига даражада зўр эмас, дони енгил ва ўта узун. Шунис ҳам борки, омбордаги ғаллангиз манави намунага ўшайдими-йўқми? Ҳар ҳолда бир ярим баробар қиммат айтяпсиз.

- Ҳа-а! Шунақа денг?
- Шунақа-да. Бозордаги ўртacha нархдан ҳам баланд.
- Негаки буларнинг дони яроқсиз.
- Яроқсизми-йўқми, бари бир сотиб туришибди. Бунақада сулингиз касодга учрайди. Бўлди энди, учдан бирига камайтиринг, ўзим оламан.

– Йўқ, юз марта сўраганингиздаям йўқ! Менг французлар дуруст, яхши пул тўлашаркан...

Аллоф намуна халтачани киссасига жойлаб, гўё кетаётган қиёфага кирди. Харидор унинг енгидан тутди:

- Сиз французларга сотасизми?
- Бўлмаса-чи!
- Сиз уларни аллазамонларда кўргандирсиз?
- Ҳа-а, жудаям аллазамонда!.. Ахир икки кунгина бўлди холос: юз той пичан ва ўн тўрва сули сотдим.
- Донаувертдами?
- Албатта.
- Улар кўпчилик эдими?
- Тўгрисини айтсан, ҳеч нарсани билмайман. Кўзимнинг кўргани карабин тақсан уч юзтacha отлиқ бўлди. Назаримда уларни драгунлар дейишади. Бу суворийлар Дунайнинг ўнг соҳилида кетма-кет сафланиб юришганди. Мен уларнинг каттакони билан байлашгандим, у истараси иссиқ ёш йигит бўлиб, кўзни оладиган тилла тангаларни нақд тўлади. Бор гап шу.
  - Шунга икки кун бўлдими?
  - Бўлмаса-чи! Бугун 7 октябрь, демак, 5 октябрь куни эди. Буни ҳисоб-китоб дафтарим тасдиқлашиям мумкин.
  - Кетмай туриңг! Мен ҳозир келаман...

Галлафуруш ҳайрону лол, негаки савдолашаётган харидор сал наридаги зобитлар томонга ошиқди ва икки-учтасига куйиб-пишиб гап уқтира бошлади. Сўнгра улар деҳқоннинг олдига келиб, шундай назар солищдик, у ўнгайсизланиб кетди.

– Жаноби олийлари, – деди харидор, – ҳозирги гапни мана шу одамдан эшитдим.

«Жаноби олийлари» эса капитан Рульскийнинг ўзгинаси эди.

Яна сўроқ-савол бошланди, билиб-билмай пўк сўзлаган аллоф оғзидан илинганди. Хуллас, у бир неча соат бош штабда қоладиган бўлди. Ҳарбий кенгашда жанговар зобитлар уни обдан ўртага олишди.

Галлафуруш ҳикоясини учинчи бор такрорлаб, шаҳарнинг кунчиқар тарафидаги яқин бир мавзеда

Француз суворийларига сули сотганини оқизмай-то мизмай айтиб берди. Кенгаш аҳлига французларниң режаси ҳалигача ўзгартмаган, улар дарё ёқалаб Верлингенга келиши аён бўлди.

Кенгаш раиси деҳқонга бир қараб олди-да, буюрди

– Капитан Венд ва агент Шульмейстерни дарҳо оп киринг!

Эрталаб юзлаштирилгач, бош штабда ушлаб турдилган икки ҳамтовоқ оёқлари ерга тегизмай олиғирилди.

Венд ёлланиб, Шульмейстердан пул олган, бинобарин, унинг чилдирмасига ўйнашга мажбур ва у нимадеган бўлса, ҳаммасини тасдиқлаганди. Натижада генерал Мак қўл остидаги барча қўмондонлари устидан мутлақо голиб бўлганди. Ахир разведка хизматинин бошлиғи билан агентнинг гапи бир ердан чиқсанди-да. Аммо, бу яна не ҳолки, анави деҳқон бошлаган можаронинг касрига ўлган илоннинг боши қайтадаң қўзғолмоқда?

– Икковингиз қулоқ солинг, – деди эрцгерцо Фердинанд, – Дунайнинг ўнг тарафида, яъни бизнин ортимизда французларнинг кавалерия корпуси бемалол сайр қилиб юрибди, бу – аниқ. Нега билмагансиз? Жавоб беринг!

Венд тол баргидай титраб, нажот истагандай Шульмейстерга ўтирила бошлади.

– Эй капитан, думингизни ликиллатманг! – ўшқирди Кленау қўрслик билан. – Дангалини айтинг: сиз тўплаган маълумотлар анави одамнинг гапларига мутаносибми-йўқми? Бу найрангбозлик! Аниқ ишловчи разведка хизмати эмиш! Ёв ичкарида изғиб юаркан лоақал шундан боҳбар бўлишингиз зарур эди-ку!

Венд абраҳ бўлса-да, аҳмоқ эмасди. Унинг ақли етди: агар ўзини қарийб исботланган воқеликни бил-

ласликка олса, ҳаммаси тамом, бундан ҳеч бир нафүрмайди ва келажагини ҳам бой беради...

– Бу гапда жон бор, жаноби олийлари, – аста тил-а кирди Венд. – Мендаги маълумотларда чиндан ҳам дэхқон таъкидлаган мавзеда душман разведкачилари борлиги тасдиқланар эди...

– Нега эрталаб бу ҳақда оғиз очмадингиз? Нега?

– Негаки таъкидланган душман миқдор жиҳатидан қанчалигини аниқлай олмовдим ва ўйловдимки...

Иелашиш уни ғиппа бўғди:

– Сиз бутун бошли армияни кўришингиз керакмиди? Ўшандагина суворийлар корпусини авангард деб ҳисоблайсизми? Мана энди бизни қопқонга илинтириб ўтирибсиз!

Янги шумхабар ва генералларининг дабдала қайфияти боис тарвузи қўлтигидан тушган Мак нажот умидида эркатой агентига ўтирилиб, Иелашишнинг сўзини бўлди:

– Сиз-чи, сиз билармидингиз?

– Мен бундан бошқа гапларниям биламан, жаноби олийлари, – жавоб қайтарди Шульмейстер.

Ҳамма генералларнинг нигоҳи унга қадалди.

– Хўш, айтинг-чи?

– Бонапарт Париждан чиқиб, қўшинлари томон йўл олиши биланоқ Францияда аксилинқилобий кучлар бош кўтарганди. Ўшанда инглиз кемалари Гаврга келди ва коалицияга ошкора қўшилган Пруссия қиролига ёрдам берди. Генерал Кинмейерга қўшилишни ёхуд унга қарши жангга киришни истамаган Бавария қўшинлари Аусбургга четланиб олганди, бироқ уларга шарқдан руслар, шимолдан прусслар мушт ўқталиб турибди. Галлафуруш кўрган француз суворийлари генераллар Бернадот ва Мармон қўмондонлигидаги икки корпуснинг қолган-қутган олқиндиси,

холос. Булар немислар ва уларнинг иттифоқчиларидан қаттиқ тепки еб, Францияга қуён бўлиш йўлини излаб юрган. Ульмнинг истеҳкоми қочоқлар йўлини тақа-тақ ёпади-қўяди. Аммо мен шуни ҳам биламанки, французлар тумтарақай бўлса-да, орасида жангларда тобланган ва тажрибали полклар анчагина бор, улар зиён-захмат етказиб қўйиши мумкин. Менимча, Дунайнинг чап тарафига ўтиб, бир неча жойда ана шуларнинг йўлини тўсиб қўйилса, оқилона иш бўлар эди. Лекин Қора ўрмон тарафга ҳазир бўлиш ҳам зарур... Жаноби олийлари, маслаҳат беришга журъат қилганим учун афв этинг. Француз разведкачилари масаласига келсак, капитан Вендинг мулоҳазасини мутлақо маъқуллайман. Лекин бу муаммо бош оғритишга арзимайди деб ўйлайман.

Яна генерал Макнинг кўчасида байрам! Бош қўмондон жуда-жуда яйраб кетди, чунки мутлақ ишонч билан баён этилган бу янгиликлар унинг нуқтай назари айни ҳақиқат эканини тўла-тўкис исботлаб қўйганди.

Бироқ фельдмаршал Кленауни ишонтириш осонмас, у ўша ондаёқ айгоқчига синовчан боқди:

– Бу гапларингизга тишга босгудай далил борми? Таажокуб, атиги бир кун ичида бунча маълумот қаёқдан олинди? Нега энди дарҳол айта қолмовдингиз?

– Хабарларимнинг ҳаққонийлигига жонимни кафил қилдим, зеро ўша жон ҳозир сизнинг қўлингизда, жаноби олийлари. Ё буни кам дейсизми? Бугунгача бош қўмондонга фақат ҳақиқатни етказар эканман, айтинг-чи, бирортаси учун ёзма кафолатнома берибманми? Йўқ! Ҳаётимни хавф остига қўйиб, фронт чизигидан кесиб ўтдим. Бу ерга келиб, ишониш-ишонмаслигингиз мавҳум бўлса-да, кўрган-билганларимнинг барини тўкиб солдим. Бугун эрталаб қўлимда бўлмаган янгиликларни маҳфий манбадан яқинда-

гина олдим. Лекин ўша хуфия манба ёлғиз ўзимга маълумки, манави даврада ошкор этолмайман, бунга ҳаққим йўқ! Мен сизларга айтдим – бурчимни бажардим. Бошқа бир оғиз ҳам гапим йўқ...

Корҳол ана шунда содир бўлди: Шульмейстер ўзи ҳам пайқамай қолганди, тилини тишлагач, ваҳима босиб, юраги увишди. Жосус сезгани йўқ: у сўнгги жумлани ирод қиласкан, худди сохта интендантнинг овозида гапириб юборди. Бу гал ҳам фельдмаршал Кленау ҳушёр, бошқалардан кўра хотираси зўр: шартта ўрнидан турди-да, лўппи юзи қип-қизил деҳқон томонга яқинлашаверди. Унинг қошлари чимирилган, кўзлари тешиб юборгудай ўқрайган: кечаги сохта Калькнерга ўхаш ақалли бирор чизгини Шульмейстердан топишга уринарди.

Орадаги масофа қисқаргунча, Шульмейстер оний ҳайрат ва жиндай эсанкирашдан ўзига келди-да, армон қилди: «Кургурей, қаердалигимни унутиб қўйибман-да... Овозим панд берди!.. Гап йўқ: манави одам бошқаларчалик лақма эмас. У мендан шубҳаланиб, уст-бошимни сохта деб ўйладики, қандайдир йўл билан синааб кўради. Лекин қандай?»

Кленау икки қадамгина нарида туради. У ўз текширувига шунчалар берилиб кетгандики, залга қабристон сукунати чўкканди гўё. Бу юзма-юз турган шахслар орасидаги сўзсиз можаронинг мағзини чоги ҳамма ҳарбийлар ҳам чақиб бўлишганди.

– Бу кимсанинг эгнидаги сафар кийимини ечиб кўрмаса бўлмайди, – деди фельдмаршал айгоқчига имо қилиб.

Кленау жиннига чиқариб бўлган Мак орага тушишга оғиз жуфтлаган ҳам эдик, уни ҳайрон қолдириб, Шульмейстер итоаткорлик билан индамай ечина бошлади. У ҳайрат табассуми билан устидаги деҳқон-

ча кафтанни ечиб, оёқлари остига ташлади. Кенгаң қатнашчилари олдида олифта кийинишни асло ўй ламаган қишлоқининг елкадор ва чорпаҳил жуссасі намоён бўлди.

Унинг бу сиёқида куни кеча генералларни алдиқетган сохта интендантга заррача ўхшашлик йўқ эди

Кленау лол бўлса-да, Шульмейстернинг юзидаи Калькнернинг ажинларини қидиришда давом этди Бироқ у ҳам энди ўзининг ҳақлигига шубҳаланиб қулогим алдади шекилли деб иккилана бошлаганди Аксариятга аёнки, қалтис ҳолатда ҳайратга солга овоз эсда қолгандай туулаверади. Бироқ бошқа би рор белгиси муштарак бўлмаса-да, биргина товуши нинг ўзидан одамни таниш мумкинми?

Бари бир астойдил азм қилган Кленау бўш келгані йўқ: ўз ўлжасига ўқрайиб турди-да, дабдурустдан Ма томонга юзланди:

– Бугун эрталаб қўл остингиздаги штабнинг қай бир хонасидан топилган оқсоч парик сиздами? Агај шу нарсани олдириб келсангиз, миннатдор бўлар дим, уни анави агентингизнинг бошига кийдириқ ќўрардик.

Янги таклифдан бош қўмондон тошдай қотиб қол гандики, унинг эсанкираши олдида Шульмейстер нинг юзидаги сохта таажжуб ҳеч нарса эмасди. Бу қа нақаси, ҳазилми-чинми? Атоқли зобитларидан биро шу тобда намунча бачкана бўлмаса?

Энди Вендга келсак, бу можаро давомида оғзиг-толқон солиб олган эса-да, чинакамига даҳшат босиб оёқ-қўлидан жони чиқиб бўлганди. Худо кўрсатма син, Шульмейстер – Калькнер найранги фош этилса ўзининг унга ҳамтовоқ экани ўрнида исботланадики ана унда ҳолига маймунлар йиғлайди.

— Модомики, жамоат жам әкан; — дея давом этди Кленау залдагилардан ҳеч бирининг авзойига парво қилмасдан, — биз оқ мундирни манави шахсга кийдириб кўришимиз ҳам мумкин, уни бош қўмон-доннинг ётогига ўзи ташлаб қочган. Балки у торлик қиласар, аммо менимча, у гавдасини қаппайтиришнинг ҳам чорасини топган: чорпахил қиёфагаям кира оладики, елкалариға ичидан жун қўйиб олса керак деб ўйлайман.

Сершубҳа ва оқсоқол саркарда шундан сўнг Шульмейстернинг елкасидан ушлаб кўрди-да, ҳайронлика қулочини кериб, ўзини орқага тортди. Негаки Шульмейстернинг бадани қаппайтирилмаган, у кутган газмол ёки жун қоплама ўрнида тошдай мускуллар бўртиб ва ўйнаб турибди, ҳеч қандай ҳийла йўқ. Бундай келбат ва мускуллар умри интендантликда ўтган жиккак чолнинг мундирига сифмаслиги аниқ.

Синов тобора акс натижа бераётганди. Шульмейстер қулоқ қоқмасдан бўйсунгани устига, шундай ғалати жилмаярдики, бу Кленауни ҳатто довдирата бошлаганди. Навбатчи ўша оқ мундирни олиб келди, аммо у ҳарчанд уриндики, кечагина рост келган одамга бугун асло сифмади ва энди Кленау янглишгани тушунарли эди. Шульмейстер эса гўё саркарда тараф бўлиб, обдан уриниб кўраверди, шунчалик саъй қилдики, тору танг мундир ёқасидан белигача чокидан сўкилиб кетди.

Бу «ўйин» бошқа генералларга ҳам қизиқ туюлиб, аста-аста яқинлашишди ва саркардада шубҳа уйғотган шахснинг биқинига тўпланиб олдилар, синчков назар сола бошлашди. Уларнинг орасидаги энг довдирни бўлмиш Иелашиб мутлақо иккilanmasdan айғоқчининг елкасига қўлинни қўйди ва ўрнида айланишга мажбур қилмоқчи бўлди.

Ҳарбий синов ана шу босқичга келганды, Шульмейстернинг юзидан қони қочди, күзларидан газаб алангаси отилди. У бир юзланиб, ўзини четта олди ва наъра тортди:

– Бас қилинг!

Бу ҳайқириқ ўзига аталганига ақли етмаган Иелашиб ўз тадқиқотини давом эттириш учун яна олға босди.

– Сизга бас қилинг дедим, генерал! – тутақди жосус. – Мен қўлингиздаги аскарингиз эмасман, қўполлик қилишта ҳаққингиз йўқ. Мен – озод инсонман, бош қўмондоннинг меҳмониман, менга қўл тегизишни тақиқлайман!

– Тақиқлайман?! – қаҳри қайнаган Иелашишнинг юзи қийшайиб кетганди. – Ҳали сиз менга тақиқлайдиган бўп қолдингизми?

– Ҳа, мен тақиқлайман! Билмадим, шунчалик бообрў генераллар мени нега бунчалар ғалвирдан ўтказиши? Аммо ҳаммасига қулоқ қоқмай бўйсундим, ўйлайманки, синов ёмон ўтгани йўқ. Энди эса сабр косам тўлди, бунақа томошага мутлақо тоқатим қолмади.

Бу сўзлар Иелашишга бағоят оғир ботди ва оғзидан кўпик соча бошлади. Ҳамдард қуролдошлар уни юпата кетдилар. Синалган агентига нисбатан бу қадар ишончсизликни Мак ўзи учун ҳақорат билса-да, бош қўмондон сифатида беҳуда можарога нуқта қўйишига жазм қилди. Башарти Шульмейстер тилидан илинган сўнгги сўзларни такрорламаганида, Мак жанжални бас қилолмаслиги ҳам мумкин эди. Айгоқчи ерда ётган кафтанини олиб, енгига қўл суқаркан, дардисар жумлани аниқ-тиниқ ирод қилди:

– Чиндан-да кўрган-билганларимнинг барини тўкиб солдим, бошқа бир оғиз ҳам гапим йўқ.

У Кленаунинг хотирасини уйғотган оҳангни топди, аммо жиндей фарқ билан эсда қоладиган тарзда айтди. Уни эшитган синчков ва холис одам ўзига-ўзи шундай дер эди:

— Ҳа-а, бир жойда янглишган эканман-да. Дарҳақиқат манави агентнинг овози кечаги кимсага ўхшаса-да, орасида нозик тафовут ҳам сезилиб турибди...

Кейин ҳамманинг кўнгли ўрнига тушди. Кленау енгилганига иқрор бўлса, Иелашиш оромкурсида сўкинишни давом эттиради. Мак ўз агентининг қўпол ва бетамиз ҳаракатларини эрталабдан бери кўрарди ва Шульмейстер ўша тўпорилик билан кета қолишга рухсат сўради.

У ташқарига йўл оларкан, генералларга таъзим-тавозе қилишни хаёлига келтиргани йўқ. Зотан, дала-да ўсган қишлоқи назокатни кимдан ҳам ўргансин? Ахир ундан бош интендант Калькнерга хос нафис феъл-атворни талаб қилиш мумкинми?

## ШУЛЬМЕЙСТЕР НАПОЛЕОННИ ИЗЛАБ БОРАДИ

Бу сафар Шульмейстернинг шунгача омади роса чопгани, аммо бундан ортиқ таваккал қилгудай бўлса, бошини балога қўйиши мумкинлигига ақли етди. Дарвоқе, Наполеонга ваъдаси аслида қанақа бўлганди? То саккизинчи октябрга қадар генерал Макни янглиштириб турса кифоя. Мана, ўша муддат битди энди.

Ҳозирги нақд хатардан бир амаллаб қутулди, қувлик ва уддабуронлик қўл келди. Аммо бояги «имтиҳон» Ульмда ҳаддидан ошмаслиги зарурлигини ҳам белига туғиб қўйди. Энди немис ҳарбий кенгашида ҳушёр ва сергак саркардалар сони ошди, биноба-

рин, олдинги найранглар уларни лақقا туширолмайди, иш бермайди. Бугинамас, ҳар куни оғзингга соққа тиқиб, лўнжингни шиширган, бурнинг қаппайган, қорнинг алламбалолар билан дўмбайган ва бошингга парик кийган ҳолда юравериш ҳам жонга тегади-ку ахир!

Ҳали Венд деган ифлос ҳам борки, Шульмейстер устидан чақув қилиб, ўзи сувдан қуруқ чиқиши ҳеч тап эмас. Бунақанги нусхаларни тўхтатиш мумкин, бироқ доимо назоратда тутишнинг иложи йўқ.

Серғалва кенгашдан чиқиб, Шульмейстер билан Венд юзма-юз қолишиди.

– Ўзингизни жа-а яхши тутдингиз, – деди Наполеоннинг айгоқчиси сотқин немисга. – Аммо кутилмаганда оёқларим остидан ҳамкор топилиб, тилимиз бир чиқиб қолганини қаранг. Анави деҳқонни айтаман-да, топиб келган янгилиги олдинига икка-ламизни бир фалокатга гирифтор қилаёзди. Мени ғалвирдан ўтказишаётган маҳалда, унинг афт-башарасига назар солдингизми? Ўшандаги турқини эсласам, ичагим узилади: залда нима бўлаёттанига ақли етмади, тушунаман деб увало уриндики, ҳеч нарсанинг фаҳмига бормади. Менга эса жуда катта ёрдами тегди. Жаҳлим чиқа бошлаган маҳали унга қарайман-да, ҳовримдан тушаман, чунки сабр-бардош ва ювошлиқда аллофдан андоза олардим. «Ўз ролингни қойилмақом ўйнай десанг, мана шу одамдан ўрган! Қизишма! Қўйдай ювош бўл,» – дердим ўз-ўзимга. Ва шу туфайлигина қутулиб қолдим.

Ўз санъатининг нозик сирлари билан ўртоқлашашётган буюк комедиантнинг оғзига анқайган Венд чексиз ҳаяжонда эди. Шу онда Шульмейстерни итидан баттар ёмон кўриши ҳам унинг хаёлида йўқ, нега деганингизда, ўз ролини маромита етказиб ижро этган

актёрни олқишлош иштиёқидаги томошабин ҳам ўз дарду ғамларини унугади-да.

— Айтсам ишонмайсиз, — дея давом этди Шульмейстер, — ўша онда сиз ҳам қалтис вазиятда эканингиз бирор лаҳза хаёлимдан фаромуш бўлгани йўқ. Аммо сизгаям гап йўқ! Сўзлашга оғиз очганингизда, пўкиллаб қолгандим. «Душманнинг ҳаракати ҳақида оддий дехқонгаям маълум ҳақиқатни инкор этса-чи? Бунда қаттиқ янглишади-ку! Тўғри гапни айтиб юбормасмикан? У ҳолда мени сотиши аниқ!» деган ваҳимада эдим. Афсуслансам-да, ўзимнинг кетим очилсаям, сизни сотишни ўйлаган онларим бўлди. Худога шукрки, ақлингиз бажо инсон экансиз! Шундай бўлгач, ташаккур ўрнида сизни тақдирлайман: ваъдадаги пулдан бир бўлагини бермоқчиман. Бунга нима дейсиз?

— Шу бугунми?

— Албатта! Аммо жиндай хизмат бор. Бу жудаям қийин эмас, ишонаверинг. Нега индамаяпсиз? Тағин бир балога мубтало қилишимдан чўчияпсизми? Мен қандай одамлигимни бари бир билмайсиз-да. Хизматингиз оппа-осон: тўппа-тўғри Югенштрассега бориб, менга лойиқ почапўстин откеласиз. Лекин шоҳона эмас, мўйнаси тўкилган, кир-чир, увада бўлиши зарур, эскифурӯш жуҳудлар сотишади. Ўшанақанги битта қалпоқ, учраб қолса, ийиги чиқсан этик, қидириб кўринг, топилиб қолади. Бундан ташқари, қулф-калитли атторқути керак, ичига жиндай лента, икки-учта соат ва яна шунча майда қутича, яъни упадон сифса бўлди. Булар учун нари борса юз австрия флорини кетади, бу пул ўн икки тилла наполеондор қийматига баробар. Ўйлайманки ёнингизда Австрия пули етарли. Мен француз пулини ҳозироқ бераман, воситачилигингиз ва хизматингиз учун юз тилла

наполеондор қўшаман, бу икки минг франк бўлади  
Ёмон даромад эмас!

– Мен бу нарсаларни қаерга опкелайин? – Венд нинг овози ҳам ғазаб ва ҳам очкўзликнинг зўридан титраб кетди.

– Ўз уйингизга! Жудаям осон-ку! Мени ҳозироқ обориб қўясиз, ўша ерда кутиб тураман. Энди бирга-бирга юришимиздан ҳеч ким таажжубланмайди. Ахир шериклар эмасмизми?

Венд иккиланарди, қадамлари секинлади, ранги тоҳ ӯчди, тоҳ «ёнди».

– Нега тайсаллайсиз? – сўради Шульмейстер. – Ё чўнтак касалми? Ҳеч қиси йўқ. Ўзингизга аён, олтинларимни ҳамиши белимга боғлаб юраман. Қўл тиқсам, санасам ва бу ёққа олсан бўлди – олам гулистон... Мана, пул тайёр! Қўлингизни узатинг-чи. Йў-ўқ, бу нақамас, жин урсин! Тезроқ яширинг! Одам кўрса, хитланади ахир!

Тилла тангаларнинг мусиқий жиринглаши эшитилди.

– Биронтасиям эсдан чиқмасин: почапўстин, қалпоқ, этик, лента, соатлар, майда қутичалар ёки упанинг идиши, хуллас, кичкинагина бўлсин, қўлга сифиши керак. Намунча ҳайрон бўласиз? Одатим шу: қаерга борсам, хотинимга бир эсадалик совға сотиб оламан, билъакс хумори бўп қоламан-да.

Венд бозорга кетишдан аввал уни ўз уйига элтиб қўйди. Атиги бир соат ўтди: энди Шульмейстерни таниб бўлмасди. Анигини айтганда, анави ишратпараст ва қиморбознинг хонадонидаги бу одам буткул бошқа шахс эди.

Венд ҳақини олди – ора очиқ бўлди, шартлашилган икки минг франк сотқиннинг киссасига тушди. Сўнгра Шульмейстер бир парча қоғозга Страсбург-

дан чиққанидан буён кўрган-билғанларининг барини ёзди. Номанинг хотимаси тубандагича эди:

«Ульмда қиладиган ишим қолгани йўқ. Австрия генераллари нимадандир шубҳаланаётган бўлса-да, уларнинг бош қўмондони императоримиз ҳазрати олийларининг ҳийласига лаққа тушган. Унинг тасар-руфида 70 минг аскар бор. Бир қисми Иелашиш қў-мондонлигига Тироль орқали, бошқа бўлаги эрцгер-цог бошчилигига Богомея тарафга ўтиб кетиши мумкин, қолган корпуслар шу ердан жилмайди. Шаҳар қўргони мустаҳкам, лекин Эльсинген қўлга киргач, у ҳам таслим бўлди деган сўз».

Шульмайстер хатни олтин суви югуртирилган кумуш атторқутининг маҳфий тубига яширди. (Венд бу матоҳ қуйма олтин деб, ўшанга ярашур пул ундириганди.) Сўнгра айгоқчи Венд келтирган «сарполар»га бурканиб, йўқсил, ювуқсиз ва кир-чир қиёфага кирди. Энди у энг тубан ҳаммолга ё йўлтўсарга, ёки ҳеч қандай ифлосликдан тоймайдиган судхўр жуҳуднинг ўзгинасига айланганди.

Унинг белида Савари берган олтиналардан бир неча боғлам захира бор: хавфли йўл-чўлларда кор келади. Шульмайстер «ясан-тусан»ини яна бир азмойиш қилди ва йўлга тушди. У мезбонига тегишли бирор дона куролни олгани йўқ, ваҳоланки, тўлаган бир дунё тилласи эвазига шундай қилса ҳам ҳақли эди.

Лекин у сафарнинг бехатар бўлиши учун ақл-заковват ва мислсиз жасоратдан ишончлироқ ҳимоя йўқлигини яхши биларди. Зоро у шу лаҳзагача ана шу ҳимоя билангина ўзига йўл очиб келганди.

Аммо шунчалар зийрак ва устакор одам бўла туриб, сафар олдидан қалтис хатога йўл қўйганди. Эҳтиётсизлиги шу бўлдики, ўзи ёллаган анави икки қаллобнинг ҳар бирига қўшимча 5000 франкдан валь-

да қилиб юборди. Аслида бу пулни улар кейинроқ, арзирли хизмат кўрсатгачгина олиши керак эди. Бироқ вазият ўзгариб, воқеалар жадаллашиб кетганди.

Венд ҳисоб илмидан ҳарчанд оқсоқ эса-да, салтина бош қотиргач, ақли бинойидай етди: йўлга отланаётган «ҳаммол жуҳуд»нинг белида саккиз минг франқ (балки яна ҳам кўпроқ) нақд тилла бефойда кетмоқда. У бундан бир наф чиқариш йўлида фикр юрита бошлади:

«Афсус! Куролсиз ғаним қароқчизор йўллардан са-фарга отланди. Сиёқидан уй-жойсиз бенаво, мискин, ғариб, ипириски ва сохта эскифуруш аслида бойлардан ҳам бойроқ. Бу соchlари селкиллаган, жулдур ли-боси исқирт, патаксоқол ҳаммол французлар томонга қуён бўлмоқда, аммо лаънатининг кармони тўла пул. Агар унга қўйиб берсангиз, етар жойига етгунча мас-харалаб, кўксига уриб мақтанади: генералларни чув туширган, улар ўз мағлубиятига ўзи бармоқ босган, бирортасиям олис йўлда унга «тўхта-чи!» демаган. Ва шу зайлда у сотқинларни сотиб оладиган бисотини дахлсиз сақлаб қолаверадики, немисларга минбаъд думини ҳам тутқизмайди!»

Бу фикрлар соҳиби биз билган ўша Венд бўлса, бундай истиқболга индамай қараб қолавериши мумкинми? Ҳали Шульмейстер Ульмда экан чоғлари Венд уни фош этиши мумкин эди, лекин бунинг оқибати ўзи учун ажалга баробар-да. Аммо у шаҳарни тарқ этаркан, вазият Вендинг фойдасига ўзгаради. Дейликки, қайсиdir жар тубидан қандайдир ўлик топилди: ува-дафуруш яхудийнинг бежон жасадига термулиб, уни сохта Калькнер ё беозор қишлоқи Шульмейстерга ўх-шатиб ўтирадиган бекорхўжа борми?

Гарчи у чўзилиб ётгани ҳолда чала ўлик бўлса-чи? Худо кўрсатмасин, у ҳушига келиб, оғзидан гуллаб қўйса нима бўлади? Чумчукдан қўрқкан тариқ экмай-

ди: модомики Шульмейстер французларнинг агенти эканлиги фош этиларкан, унинг гапига ким ҳам қулоқ соларди?

Венд икки кун давомида бу имкониятларнинг барини обдан тарозига солиб, уддабурон ганимга қўйиб берди: тузогига илинди, сотилди. Энди унинг эси жойига тушган, маккорлик ва нафрат унинг қора кўнглида қаддини ростлаб олди.

Сафарга отланаётган Шульмейстер Венд ёрдамида анави бедаво уст-бошларни кийди, ана ўша лаҳзаларда сотқиннинг режаси ҳам етилди. У француз айғоқчисининг пинҳоний сирларини билиб олиши, алалхусус, белидаги олтинни бой бериб қўймаслиги зарур, бунинг учун Венд ҳам изма-из йўлга тушади, вассалом!

Шульмейстер кўчага чиққанда, Венд олисдан кузатиб, у юрадиган йўлни хаёлан хомчўт қилиб кўрди-да, ўзи ундан барвақт етиб боражагига ишонч ҳосил қилди. Унинг омади чопиб, тун қоп-қоронги. Венд шаҳарни тарқ этишдан ва дарёдан ўтиб, Шульмейстерга тузоқ қўйишдан бурун Доротеяни топмоқчи бўлди, негаки ундан бирор оҳорли янгилик чиқиб қолиши ҳам мумкин. Лекин китобхонга аёнки, аёлнинг уйи қулф, тақиллатганда ҳам ҳеч ким «ҳа» демайди.

Бу ҳолдан Венд баттарроқ тутоқди. У от чоптириб бораркан, гўё энди ватанига ҳалол хизмат қила бошлагани дилидан ўтди. (Айни чорда очофат нафси ҳам ором олади, яъни киссасига тиллолар тўлади.)

Шульмейстернинг миясида унақанги чиркин ўйлар йўқ. Аксинча, ёруг олам кўзларига жаннатдай зебо кўринади. Зиммасидаги махфий топшириқни адо этиб, юраги юксалиб борарди. Ҳатто бугун унинг бошига етаёзган корҳол ҳам аслида ўзи қўлга киритган ютуқнинг самараси, негаки душманни адаштира

олгани аниқ. Ахир кутилмаган ерда французларнин пайдо бўлиши жосусни фош қилишига бир баҳя қолди-да!

Шульмейстернинг сўнгги фаолиятига ўн кун бўлди: Ульмга етиб келди, генераллар ҳарбий кенгашига кириб борди, Доротеяning уйида яширинди, Кленаунинг ўқдай назари ва Иелашишнинг зилдай мушти остида имтиҳондан ҳам ўтди... Шу аснода Наполеон сафарбар этган 150000 аскар ўлжасига ташланмоқчи шердай шайланди.

Шульмейстер то эгаси келгунча ўлжани уясига қамаб турувчи този итга ўхшарди. Фарқи шуки, у қуён ёки тустовуқни эмас, бутун бир қўшинни битта жойга «михлаб» қўйди, найранглари иш берди.

Энди у югуриб-елмаслиги, ўрнида хода ютгандай қаққайиб туравериши мумкин, негаки маҳлуқ чангалига тушган. Чангалига тушган?.. Шундайликка шундай, бу тўғри, лекин ягона шарти бор-да: ов узил-кесил тамом бўлиши учун Шульмейстер раҳнамосига маълумот бермаса бўлмайди! (Агар шахсан ўзи етолмаса, хатни етказиши зарур!) Бусиз Наполеон тасодифларни табиий деб қабул қиласерадики, қўшинини тарқатиб юбориши, Ульм мудофаачиларининг хаёлида йўқ жойларга ҳам пистирма қўйиб ташлаши мумкин.

Айни шу боисдан шамолдай шошаётган Шульмейстер ўз муждасини хожасига топшириш учун ошиқиб борарди. Йўл нечогли олис бўлмасин, вақти чоғ: ишончи комилки, бу хизмати бадалига афв этилади, тақдирланади, табрикланади, ўзгаларнинг ҳаваси келади, оз бўлса-да, иззат-ҳурмат топади.

Ажабо, курраи заминнинг у кўзлаган манзилига ёлғиз ўзимас, бир-бирини ардоқлаган ёки ёмон кўрган анчагина бошқа кишилар ҳам ошиқиб боришар-

ди. Бу Худонинг иродаси бўлса ажаб эмас. Уларниң бари ўзаро учрашиш иштиёқида: ё топишадилар, ё урушадилар. Шульмейстер билан Берта, Венд билан Доротея, Ганс, Мюрат, Родек ва бошқалар – бари шу йўлда. Бугинамас, икки эл, Франция билан Германия, уларнинг фарзанди бўлмиш шонли ва ботир аскарлар, маълум ва машҳур саркардалар ўзаро юзлашиш қутқусида...

Империянинг тақдирини уларнинг тўқнашувига боғлиқ. Энг қалтис ва хатарли жиҳати шундаки, ўн бир яшарлик битта болакайнинг азми ва матонати ҳаммасини ё остин, ё устун қилишга қодир. Шу норасида туфайли Наполеон бутун бошли армияни қамалга олиши ҳам, гафлатда қолиши ҳам ҳеч гапмас. Иккичи ҳол рўй берса, императорнинг ҳамма режаси барбод бўлади!

## УЧИНЧИ ҚИСМ

### ШУЛЬМЕЙСТЕР ҚАТЛАРАФАСИДА

Үн бир яшар боланинг мурғак жуғрофий тасаввурни мухтасар ва лўнда: қаерки унга нотаниш экан, ўша жой унга ватан эмас. Унинг стратегияси учун мантиқ тушунчаликни ҳам ягона: ўзингга ёқсан одамларни ёқмаганлар келаётганидан огоҳ этасан, зоро, ўша ёқмаган тараф енгилиши зарур-да.

Энди урушаётган икки миллат масаласига келсак, ёш қалблар учун улардан қай бири ҳақ ё айбор экани аҳамиятсиз. Бир гурӯҳ аскарларнинг уст-боши уларга хуш ёқса, бошқалари эса кўрингандайдек таъби тирриқ бўлади. Улар англаған сиёсий қарашнинг бўлгани шуки, тушунтириб жағингиз чарчайди, холос. Болаларни инстинкт бошқаради ва бу ҳолни ёмонлашга ҳам асос йўқ, негаки инстинктнинг ақлдан тубан экани ҳали исботланган эмас...

Китобхондан аввалги қисмнинг 9-бобини эслашни сўраймиз: «ичкаридан у (Ганс) қарагани сайин, коридордаги мўйсафид ҳам (Родек) ундан кўз узгани йўқ. У нигоҳлар неларни деди? Буниси уни қандай тушуниди? Биз бу сўзсиз «суҳбат»га кейинроқ қайтамиз,» – дегандик.

Родекнинг ўткир нигоҳига кўзи тушмагунча, Ганс вазият ҳақида ўзича мушоҳада қиласади. Унинг фикрича, манави қишлоқда император аскарларининг пайдо бўлиши «бошқа» ҳарбийлар ҳаётига хавф солади. Ганс билардики, ўша «бошқалар»нинг қўналғаси жуда яқиндаги дўнгликлар устида.

Кекса шуан Бертага французлар келаёттанини айтди, буни Ганс ҳам эшилди. Эгнига мовий мундир, оёқларига оқ ё қора штиблет<sup>1</sup> кийган бежириим аскарлар унинг кўз олдига келди. Ганс уларни Страсбург кўчаларида кўп кўрган. Ўша оғир ёки енгил, қудратли ва шиддатли эскадроилар хотирасида жонланди. Айтишларича, жанговар ҳаёт уларга аждодларидан мерос бўлиб, бугунги аскарлар оталари матонатини улуғлашмоқда.

Бу ерда-чи? Ганс бир ухлаб, аксинча қиёфадаги жангчилар орасида кўз очди. Уларнинг кучи – ранжи-тишдан, шон-шарафи – муштдан иборат, кўзларидан гуурдан нишона йўқ, бирортаси кулмайди, қўшиқ айтишни ўрганган эмас.

Мовий мундир кийганларни Ганс дўст ҳисобласа-да, бунинг сабабини ўзи билмасди. Лекин айтинг-чи, бирорни не учун яхши кўришини изоҳлай оладиган одам борми? Йўқ! Нега энди катталар билмаган нарсани болалар билиши керак?

Қанийди Ганснинг қўлидан келса, журъати етса: тепалик томонга учарди-да, уйқудаги мовий мундирли жангчиларга қичқиради:

– Куролланинг!..

Айни ўша дақиқаларда тинка-мадори қолмаган Берта Лизбетани тиззасига олди. Ширин уйқу зўр чиқиб, аввал мудраётган қизчани, сўнг онасини ҳам ўз измига олди. Ганс аёлга сездирмай хонадан чиқиб кетса бўларди. У пайт пойлаб, эшик тирқишидан ҳараган маҳали унинг кўзлари Родекнинг нигоҳи билан тўқнашди. Ана шунда яшиндай тез ва сўзсиз суҳбат бошланди.

– Бу ердаги ҳарбийлар сенинг ва менинг ватанимга душман. Шуни биласанми? – дер эди кулранг кўзлар.

<sup>1</sup> Штиблет – ҳарбийча ботинка.

– Биламан, – жавоб қайтарди боланинг мовий кўзлари.

– Жудаям яқин жойда ватанимиз аскарлари ётибди, шуниям биласанми? Улар ҳозир хатардан бехабар, душманни қўлга олиш учун келиб, ўзи қўлга тушади шекилли.

– Буниям биламан.

– Лекин дўстларни огоҳлантириш учун озгина ажирлик зарур, холос. Мен бу ишни уддалолмайман, чунки мендан кўз узишмаяпти, кузатиб туришибди. Агар енгилроқ, чаққонроқ, ихчамроқ бир киши... манави тош қотган маҳтуқлар ва соқчилар орасидан ўтиб, ўрмонга қочолса... Тушуняпсанми?

– Мен билдим, тушундим!

– Башарти бу ердан бир амаллаб қутулиб олсанг, дарёга оборадиган йўлни қандай топасан? Яхшилаб тушуниб ол: чиқишинг биланоқ ўнгга буриласан. Хўлми?

– Хўп!

– Жон болажоним! Билиб қўйгинки, бу юмушни бажариш билан сени суйган барча ўлигу тирикнинг, руҳларнинг дуосига қоласан. Мен сен билан фахрланаマン! Ва лекин сендан буни талаб этишга юрагим бетламайди, агар сезиб қолишса, отиб ташлашлари мумкин... Буниям биласанми?

– Биламан!

– Бари бир сўзингдан қайтмайсанми?..

Кекса кўзларнинг сўзсиз бу саволига ёш кўзлардан жавоб бўлгани йўқ: яrim очик эшик ёпилди, болакай гойиб бўлди.

Ганс коридор бўйлаб ташқи эшик томонга бораркан, узала тушган аскарларнинг оёғига, милтиги ё қопчиғига ҳеч туртинмай ўтди. Гафлатдаги жангчилар ҳатто унинг шамолини ҳам сезганлари йўқ. У ел-

дай чопиб, йўлдан, дўнглиқдан ва сайҳонликдан ўтиб олди. Ваҳимада ва қилган ишидан пушаймонда безгак тутаётган Родек чол салдан сўнг енгил нафас олди: тун бағрини тилиб, олисдан ҳуштак овози эшитилди. Бу Ганснинг омон-эсон кутулганига далил бўлиб, бундай сигнални унга Родек ўзи ўргатганди.

Соқчилар сергак тортиб, зулмат бағрига олазарак тикилиб қолишиди, қуроллар шарақлади, салдан сўнг атрофга сув қўйгандай жимлик чўқди. Ганс уларга думини ҳам тутқазмайди энди!

Жажжи қаҳрамон! У дадил қадамлар билан илдам олға борарди. Олисдаги милтираётган шуъла у кўзлаган манзил.

Ганс тўсатдан таққа тўхтаб қолди.

Бехосдан кутилмаган жойда гулхан кўринди. Ганс ўша ердан дарёга ўтиши керак эди. Одамлар гивирлашмоқда. Улар қаёқдан келиб қолди? Кимлар ўзи?

Йигитча уларга кўринмаслик учун олдин энкайди, сўнгра ётиб олди-да, кузаттгани хиёл бош кўтарди, эҳтиёткорлик билан шубҳали қўналға тарафга яқинлашаверди.

Салдан сўнг аён бўлдики, бу австрияликлар қароргоҳи бўсағасидаги отлиқ соқчилар отряди. Ганс ёмон кўрган аскарлар шу ерда! Улар қишлоқда дам олаётган қуролдошларини қўриқлаб, айни чорда Ганс ўтмоқчи бўлган дарё тарафга ҳеч кимни қўйишмасди.

Нима қилса бўлади?

Гуриллаб ёнаётган гулхан ёнида икки зобит исиниб, гап билан овора. Коровул у ёққа бориб, бу ёққа келиб турибди. Нарироқдаги яна бир соқчи хода ютгандай қаққайган. Икки зобит баралла ва бемалол сўзлашаётган бўлса-да, орадаги масофанинг анчалиги ҳисобига Ганснинг қулогига келиб-келмаётганди.

– Уларнинг гапини эшитмасам бўлмайди!

Бунга қатъий жазм қилган Ганс ўша тарафга әмак<sup>7</sup> лай бошлади. Гоҳо тўхтаб, йўлни чамаларди. Унинг гап пойлашга иштиёқи шунчалар эдики, қўрқувни ҳам, сезиб қолишлари мумкинлигини ҳам унуди. Йигирма қадамча берида тўхтаб, тупроқ уюми ортига беркиниб олди (каламуш уясидан чиқариб ташлаган бўлса керак). Ана энди зобитларнинг овози аниқ-ти-ниқ эшитилиб туради.

- Ўзиям калласи хумдай экан-да.
  - Одам деганиям шунчалар хунук бўладими, а?
  - Унинг феъли афтидан ҳам совуққа ўхшайди. Қа-ерда қўлга олдиларинг?
  - Коровулга чап бериб, дарё томонга ўтмоқчи бўпти. Бу тоифа одамлар аслида унақа қилмасди, улар ҳарбий қароргоҳни кўрди дегунча чопиб келади, ол-ди-сотдисини бошлайди.
  - Ё қарз беради.
  - Йўқ. Улар уруш шароитида судхўрликни тўхта-тиб, ўликларни шип-шийдон қилишади, чўнтакла-рини қоқлашади. Бу эса орқа-олдига қарамай қочиб қолдики, чақириб, таҳдид қилиб базур тўхтатилди. Бош штаб разведкачилари айнан мана шунақалардан огоҳлантириб, ҳазир бўлишни тайинлашганди. Афти-дан, Аугсбург йўлидаги француз кавалериясининг ҳи-дини олган ҳамма чорбозорчилар ўшаққа чопмоқда, душман уларга яхши пул тўлайди-да.
  - Тинтиб кўрдиларингми?
  - Мутлақо йўқ. Постларни назорат қилиб қайта-диган полковникни кутмасак бўлмайди.
- «Улар ким ҳақида гапиришяпти?» – ўйлаб қол-ди Ганс. У асири кўриш учун бошини сал тиклади, манглайи ва кўзлари тупроқтепадан кўтарилиди. Аммо ана шу дамда гулхан тўсатдан ловиллаб, зобитларни ҳам безовта қилдики, болакай дарров ерга ётиб, на-фасини ичига ютди.

Гансга ўша лаҳзанинг ўзи кифоя қилди, у тутқунни кўриб олди. У соқчилар яқинида ўтиради: селкилланган соchlарига тароқ тегмаган, патаксоқол киши бўлиб, бошига кийган қалпоги алламбало, ҳатто кулгили кўринарди. Асир ҳадиксираган кўйи тиззасидаги чорқирра қутичани ушлаб олган ва чоғи атрофдаги-ларни зимдан кузатар эди.

Ганснинг кўнглидан ўтди: «Турқи бедаво экан!»

Ёш зобитлардан бири гёё унинг кўнглидаги саволни уққандай варанглади:

— Одам дегани бундан баттар иркит бўлмаса керак!

— Карл, унинг яқинига бора кўрманг! – ваҳима қилди нариги зобит. – Буларнинг анчасини асир олгарларнинг айтишича, жуҳудга қўл тегизгач, гусл лозим бўларкан. Агар буни тинтув қилсалар, мен биринчи бўлиб кетиб қоламан.

— Бунинг иложи йўқ, биродар! Биз бу ерда омонат одамлармиз, «кетаман» деманг. Уруш бари бир уруш экан-да, чидаймиз!

Бошидан мағзава ағдарилаётган шўрлик эса ҳеч нарсани эшитмаётгандай парвойи фалак. Ганс яши-ринган жойидан уни бемалол кузата оларди. Афтидан бояқиши ўзур қисматга тан бериб, қўй оғзидан чўп олмаган мўмин-қобил қиёфага кирганди. Совуқкон юзи ҳайкалдай ҳиссиз, жисми сокин, ақалли бирорта мускули қилт этмайди, аммо айни чоғда унинг қўллари ғивирлаётганини Ганс аниқ кўрди.

Ҳалитдан бери атторқутини ушлаб турган бир қўли аста-аста кўтарилиб, кийимлари остига кирди: у сонларига туташ пинҳоний чўнтакдан ниманидар ахтарарди тоги. Асир яна шундай эҳтиёткорлик билан қўлинни чиқарди-да, оёқларини сийпалаб, этиги тарафга тушди, у тиззаси устидаги қутичани салгина очгандай бўлди.

Ана шу дамда муттасил юриб турган соқчи бу ёқقا қайтди: тутқун ҳаракатдан таққа тұхтади. Қоровул ортига үгирілған ондаёқ яна ғимирлаш бошланиб, почапўстиннинг ёқасидаги астар остига ниманидир яширгандай бўлди.

Шу зайлда бу одам то бирор пайқамагунча ҳаракат қила оларди. Лекин текислик тарафдан туёқлар дупури эшитилиб, гулхан ёруғида қандайдир тахлитлар, соялар кўринди. Гилофи олинган катта фонар нотаниш қиёфаларни ёритди, суворийлар отдан тушдилар. Гулхан тевараги сув сепгандай жим бўлиб, шинелини бошига қўйиб ётган жангчилар саф тортишди. (Уларнинг майсазор устидан битта-битта туриб келаётгани худди ўликлар тирилаётганига ўхшарди.)

– Қани ўша одам? – сўради энг катта бошлиқ, унинг ташрифидан ҳамма потирлаб қолганди.

– Мана у, жаноб полковник.

– Бу ёқقا оп келинг!

Ҳаммол бечорани тепки билан турғизиб, қўндоқ билан олға туртишди. Унинг юзига қон тепчиди, бели букчайди, мажбуран олдинга бораркан, олов қиёфасини ёритди.

Ганс уни жирканч, тубан ва чиндан ҳам шундай қўпол муносабаттагина лойиқ кимса ҳисоблади, ахир у инсоний ғурурини унутиб, кучукдай писиб турарди-да.

– Мен отингизни сўраб ўтирмайман, – деди полковник. – Сиздақа саёқларда рост гап йўқ ва ўзингизга мингта исм қўйиб олгансиз. Аммо айтинг-чи, қайдан келдингиз, қаёқса кетяпсиз?

Асири шикоятомуз оҳангда, аммо ишонч билан жавоб қайтарди:

– Тириқчилик қурсин, амал-тақал билан бола-чақа боқаман, аскарларга, зобит жанобларга майда-чуйда сотиб...

М.Д.Х. Мадни

– Қайси аскарларга? Қайси зобитларга? Нега энди айнан душман тарафга кетаётувдингиз, хўш?

– Ахир полковник жаноблари, душман қайдалигини билмайман-да! Нон топишдан бошқаси хаёлимдам ям йўқ эди.

– Ульмдан келувдингизми?

– Ульм дейсизми? Дарҳақиқат, мен ўша жойдан ўтгандим. Чиройли шаҳар экан, ҳарбийлар жуда кўп... Ҳа, ҳа, у ерда савдойим бароридан келиб...

– Шаҳардан қачон жўнадингиз?..

Кутилмаганда иотаниш бир овоз орага тушди. Уни эшишган заҳотиёқ тутқуннинг сурати ва туриш-турмушида туйқус ўзгариш бўлиб, мутлақо бошқа одамга айланиб қолганди.

– Бучувриндини тилга киритиш учун бошидан паригини ечиб, бетидан сохта соқол юлиб олинса бўлди! – деди ҳалиги овоз.

Командирнинг имоси билан икки аскар ҳаммолнинг ёнига келди: улар жуҳуддан жирканса-да, начора, буйруқ – буйрук-да. Лекин икковининг қўл чўзишига эҳтиёж бўлмади. Чунки асир бирдан ўзини ростлади, гўё унга гойибона куч-кудрат ва журъат ато этилганди.

– Ёпирай! – деди у. – Таниш товуш-ку! Жаноби Венд шу ерда эканлар-да! Тасанно, мана энди ҳамма гапга ақлим етди. Йўлимни тўсганларига, ушлаб олиб, сўроқ-савол қилаётганларига ҳайрон бўлиб ўтирибман, ваҳоланки, мендан бўлак шубҳали савдогарлар бу атрофда изгиб, ҳаммангизни алдаб кетяпти. Уларнинг мушугини «пишт» демасдан, битта менга ёпишиб олганларингнинг сабабини тушундим. Полковник жаноблари, менга савол берив, азият чекманг. Ҳаммасини ўзим рўй-рост айти қоламан. Мен на жуҳуд, на ҳаммол эмасман, ё Аврам, ё Иаков, ё Симе-

нон деган исмим ҳам йўқ. Немис фуқаросиман, етти пуштим насроний динида ўтишган, бу ерга император армиясининг бош қўмондони берган буйруқ билан келиб қолдим. Номим – Карл Шульмейстер, генерал Мак хизматидаман.

Аввал сохта соқол, сўнг ясама соч ва қалпоқ ерга отилди. Гулхан атрофидагиларни чўққайганича кузатаётган болакайнинг кўз ўнгида рангпар, жонсарак ва мардона сиймо пайдо бўлди: бу зарринсоҳи киши унинг унинг отаси эди!

– У бари бир алдаяпти, полковник, – эътиroz билдириди Венд ва гулхан ёрутига чиқиб келди. – Башарти тинтишни буюрсангиз, ёнида жуда катта пул бор, кумуш баҳосида неча ўн минг француз флорини бўлиши мумкин. Энг муҳими шундай бир хат топиладики, бу одам Бонапартнинг топширигини бажараётган воқеанавис экани фош бўлади-қолади.

– Аттанг! – унинг сўзини бўлди Шульмейстер. – Очигини айтаверинг-да, ахир сизга менинг белимдаги бойлик керак-ку, шундай эмасми? Демак, мен тўлаган хизмат ҳақидан кўнглингиз тўлмабди-да. Бўити, ола қолинг, савдолашиб ўтирмайман! Мени тинтуб қилиб овора бўлмасинлар, мана ўша белимга боғланган ўн минг франк олтин!

Наполеоннинг айгоқчиси жаҳл билан почапўстинни ярим очди-да, нимчаси остидаги белбоғни ечиб олди: қимматбаҳо металл полковникнинг оёқлари остида «гуп» этди.

– Жаноби Венд ҳали атторқутимни тилга олганича йўқ, – давом этди Шульмейстер. – Аммо уни менга ўзи опкелганди, пулинциям ўзи тўлаган. Рост гап! Мен эса хизмат ҳақига юз флорин, яъни икки минг франкни қўлига нақд бердим. Айтинг-чи, зобит жаноблари, шунинг ўзиям холис ва беғараз одамлигимни, унинг

эса жирканч ва диёнатсиз кимса эканини кўрсатм дими?

Тутқуннинг сўзларидағи истеҳзо шунчалар ишо ли эдики, гулхан теварагидагилар бир қалқиб ол беихтиёр Вендан ўзларини тортишди. Зеро, 1 йўқки, улар қўлга олган шахс душманнинг ода аммо ҳозир келган чақимчи ҳам шубҳали бўлиб сотқин бўлиши ҳам мумкин-да.

Бироқ ўзини ғалаба остонасида сезаётган Венд қалтис лаҳзада чекинишни хоҳламасдан бўш келмад

– Унинг ҳамма гапи сафсата, сувдан қуруқ чиқмоқ. Мен ўз бурчимни адо этиш учун ниқобланиб, хизмага гўё ёлланган бўлдим, билъакс, унинг асл башараси фош қилолмасдим. Гаров боғлашаманки, атторқутги митти олтин идиш бир донадан ортиқ эмас.

– Тўғри гапиринг, – тутоқди Шульмейстер, – ти эмас, тилла суви берилган кумуш экан. Уялмай-ғ май шунгаям қилвирилик қилибсиз-да, тақсир, ссанан дегандим, уч пулгаям олишгани йўқ.

– Ие, сотиб юбордингизми?

– Ҳа.

– Нега сотасиз? – қўйқисдан суриштириб қо полковник. – Эҳтимол ундаги бирон нима ўзингиз оқлашда кор келарди.

Венд кўзининг паҳтасини чиқарди:

– У қутичани бирорга сотолмасди, ёлғон гап япти. Шаҳардан қоронғида жўнаб, ҳеч қаерда тўғани йўқ. Бунга ўзим шоҳидман, негаки йўл бўйи идан қолмай кузатиб келдим.

– Бўпти, керак бўлса, тинтий қолинглар!

– Ҳозир аниқлаймиз-да, – деди полковник.

Бу гал бўйсунмаса иложи йўқ Шульмейстер бир уларнинг кўзини шамғалат қилишга урин. У шоша-пиша почапўстинни ечиб улоқтирди.

шимий ва курткасидаги чўнтакларни тинтувчиларга хотиржам ҳавола этди. Бироқ Венд ошкора ирганиб бўлса-да, пўстинга ёпиши: у полиция хизматининг икир-чикирларини обдан яхши ўзлаштирганди ва сир шунда эканига ақли етиб бўлганди.

– Мен сизларга нима дегандим? – чинқирди ўша ондаёқ. – Мана қутича, пўстиннинг ёқасига яширилган, қўлимга билиниб турибди! Астар остига тиқибди-я, жин ургур! Ҳа-а, йиртиқ жойи... Топдим! Топилди-я!

Венд тантанали қиёфада қутичани полковникка кўрсатди. Шульмейстер эса шунинг учун жонидан кешишга ҳам ҳозир эди.

Энди ҳаммаси тамом! Умид косаси чил-чил синиб тўкилди. Ёв қўлига тушган уч пуллик матоҳ пинҳон сирларини фош этади. Унинг Ульмдаги «ҳунарлари»-дан ташқари барча орзулари ҳам барбод бўлиб, баҳт ва шон-шараф хусусидаги ширин хаёллари батамом чиппакка чиқади. Кутичадаги бир парча қоз сабабкор бўлиб, ҳатто бутун бир урушнинг, катта империянинг тақдири ўзгариб кетиши ҳеч гап эмасди...

Бонбоњеркани очиб кўрган полковник қулочини ёзиб, бошини сарак-сарак қилди:

– Ичи бўм-бўш экан-ку!

Шульмейстер бошини кўтариб, қаддини тиклади, унинг бу ҳоли жаллод кундасига бош қўйган чори афв этилган маҳкумнинг ўзгинаси эди.

Ишончи комил Венд дарҳол луқма ташлади:

– Қутичанинг тубида хуфия таглиги бор!

– Йўғ-е! Шунақамикан?

– Менга беринг! Ўзим кўрсатаман!

Венд митти пружинага бармогини босди. Қоз полковникнинг қўлига ўтди ва унинг шилдираши Шульмейстернинг қулогига чалинди.

Энди Венднинг кўчасида байрам, ҳа-а!

Полковник «айбнома»ни чироқча солиб, нимовозда ўқий бошлади. Елкаси ва бармоқларини икки аскар исканжага олган Шульмейстер рўпарасидаги зобитларнинг кўзига тик боқди. Ушбу таҳликали онларда унинг юзи ўзигагина хос мардона тус олиб, кулиб туарди. Бу асл инсоний ифодани ҳеч бир грин, ҳеч қандай мугомбирлик маҳв этолмайди. Энди ҳам ниқобланиш зарур келган эмас-да! Шахснинг истарали сурати пок сийратидан ҳам покизароқ бўлгач, уни яшириш не керак? Ўз ишига содиқлигидан мағрур Шульмейстернинг кўзлари фахр билан чақнарди. Унинг ақли етиб турибди: ҳализамон камида беш дона қўргошин кўксини поралаши муқаррар. Ва лекин музaffer француздар жуда-жуда яқинда: ўзига ўқ отган ўша аскарларни мағлуб этадиларки, бу зафарда Шульмейстернинг хизмати беқиёс. Кун келиб, Наполеоннинг саркардалик даҳоси шон-шарафлар билан овоза қилинаркан, бу узил-кесил ғалабада Шульмейстер катта иш кўрсаттани ҳам эътироф этилса ажаб эмас!

Ундан кўз узмаётган навқирон зобитлар матонатли қиёфасидан донг қотишганди. Маълумотномани ўқиб бўлиб, рўпарасидаги «ҳаммол»нинг юзига назар соглан полковник ҳам тушунди: бу жасур ва қўрқмас одам ҳазилакам душман эмас!

Бироқ ўша ондаёқ Шульмейстерни даҳшат босди, қўрқувдан афти гижимланиб кетди: зобитлар жон ширинлик қилиб, бари бир ўлимнинг ваҳимаси олдида иродаси ахийри букилди деб ўйлашди.

Йўқ, бунинг сабаби бошқа ёқда. У ҳеч кутилмагандада жажожи бир хилқатни кўриб қолди: ўзига қараган полковник, Венд ва аскарлар ортида кичкина, рангпар бир болакай пайдо бўлганди.

Ганс энди яшириниши ҳам тамоман унутиб, тикка туриб олди. Кўз олдидаги гап-сўзлардан жони ичига сифмай қолганди. Шу билан бирга вужуди титрар, қўркув ва ифтихор хуружидан ёш юраги кўксини ёргудай ларзага келганди.

Наҳотки шу одам ўзининг Карл дадаси бўлса, ахир у мулойим, соддагина эмасмиди? Ҳазил-хузулга суяги йўқ, ҳали унга, ҳали бунга тақлид қилиб, Лизбета икковни шу киши кулдиради-ку! Ака-сингилни етаклаб, дала кезишдан ўзга машгулоти йўқ эди унинг. Ганс ҳақиқий Карл дадани мана шу тобда кашф этди: у бутун бир қўшинга қарши танҳо ўзи уруша олади! Тўғри, шундай баҳодир қўлга тушиб қолган, лекин шу ерда ҳам душмандан устун ва олий эди. Унга қандай жазо беришаркин? Анави қўлидан тутганлар тепиши ва дўппослаш билан кифояланадими? Аммо қийноқча солсалар-чи, башарти ўлдириб қўйсалар нима бўлади? Бечора Карл дада!

Болакай ҳарбийлар тўла уйдан не мақсадда қочиб чиққанини, онаси ва Родекни – ҳаммасини унудди. Унинг учун ёруг дунёда биргина одам бор, фактат ўшани ўйлайди: қизил юзли, олтин сочли, паҳлавон келбат, жулдур либосли бу инсон икки душманинг қўлида, улар икки жаллод мисоли маҳкам ушлаб туриди.

Шульмейстер эса кўзи аниқ қўрган нарсани довдирашга йўйди: жондай яқин болажони бу ерда нима қиласин? Мумкин эмас! Ахир оиласи жуда-жуда олисларда! Демак, ажал соати яқин, шу боис Худо ақлинни олган, ана ундан кейин, қадрдан чеҳралардан бири хаёлида жонланган. Айтишларича, ўлим остонасида йўқ нарсалар намоён бўлармиш, бундан чиқадики, Шульмейстер ўлибди-да!

Уни шунчалар ҳаяжон чулғаб олганники, саволни ҳам англомади. Нимадир қулогига чалиниб, кейин эшитишга уринди. Полковник қайтадан сўради:

- Айтинг-чи, сиз хатни ўз қўлингиз билан ёзганимисиз?
- Нимани сўраяпсиз, полковник? Нима ёзибман?
- Манави хатни-да. У атторқутига яширилган, почапўстиннинг ёқасидан топдик, сиз сотиб юборганман дегандай бўлувдингиз.

Шульмейстер гап нима ҳақдалигини англамаган қиёфада бақрайди. Полковник сўради:

- Қоғозга французча ёзилган. Сиз француз тилини яхши биласизми? Ёза оласизми?
- Тўгри, полковник. Башарти йўқ десам, ёлғончи бўламан. Хато қилиб бўлса-да, беш-олти қатор хатни бир амаллаб ёзаман, бироқ...
- Нега энди «бироқ»?

Шульмейстер узил-кесил жавоб беришдан олдин ўғли кўринган томонга қўрқа-писа яна бир қараб олди. Ҳа, болакай ҳамон ўша жойда, жони ачиб, зийрак кўзларини тикканича турарди.

- Демак, довдираганим йўқ, демак, у рўё эмас, – кўнглидан ўтказди Шульмейстер. Ҳа, бу ўз жигарбанди, орадаги масофа бир неча одим, холос. Аммо у қандай келиб қолди? Берта-чи? Лизбета-чи? Улар қаёқда?

Бечоранинг қалбидаги ирода юзига ниқоб тортиб, касб-корига хос мугомбирлик уйғонди. Унинг кўзларида ноаниқ бир умид учқунлари чақнарди.

- Полковник ўшқирди:
- Энди бас! Намунча имиллайсиз? Аниқ айтинг-да, французча ўқиш-ёзишни билишингизни тасдиқлайсизми?
  - Тасдиқлайман. Аммо ўта ёмон биламан, билимим саёзлигидан болаларимгаям француз тилини ўргатолганим йўқ. Дейликки, бир ўғил, бир қизим бор, уларнинг билгани немисча холос-да.

Бу ёлғон эди, албатта. Ганснинг юзига қон тепди, қичқириб юбораёзди ва ўз норозилигини билдириб, бир қалқиб олди. «Ха, ха, бу чиндан ҳам Ганс!» – ишонч ҳосил қилди Карл дада. Отасининг мулойим нигоҳини, у кўзлари билан тасалли бераётганини англаган йигитча тинчиб қолди.

– Агар менга қандай айб қўйилаётганини билганимда, – дея баланд овозда эътиroz қилди Шульмейстер, – аниқ жавоб берардим, аммо қофозга нималар ёзилганидан хабарим йўқ-да.

– Ие! Ҳали билмайсизми? – кесатди полковник. – Жуда соз, ҳозироқ билдириб қўяман.

Полковник ҳалол одам бўлиб, жосус вақтни чўзаётганини сезиб туради ва Шульмейстернинг айбдорлигига заррача шубҳаси қолмаганди. У фақат бу ишда Вендинг бор-йўқлигини аниқлаб олишни истарди. Қолаверса, маълумот оддий аскарлар англай олмайдиган услубда ёзилган бўлиб, уни шу ернинг ўзида муҳокама қилиш хавфли эмасди.

Полковник ҳужжатни баланд овозда ўқий кетди, бу ҳукм эълон қилишга ўхшарди.

Шульмейстер охирги жумлага етгач, яхши эшитмаганини ва тушуна олмаганини арз қилди. Унинг талаби билан ҳар бир сўзга алоҳида ургу берилди ва шошмасдан, дона-дона қилиб қайта ўқилди:

«Унинг тасарруфида 70000 аскар бор: бир қисми Иелашиб қўмондонлигига Тироль орқали, бошқа бўлаги эрцгерцог бошчилигига Богомея тарафга ўтиб кетиши мумкин. Қолган корпуслар бу ердан жилмайди. Шаҳар қўргони мустаҳкам, лекин Эльсинген қўлга киргач, у ҳам таслим бўлди деган сўз.»

Хуфянома ўқиб бўлингунча, Шульмейстер болага синчков боқиб, кўз узгани йўқ. Гўё унинг маъноли нигоҳи диққат билан тинглашни, ҳар бир қалимани

ёдлаб олишни, керак бўлган жойда айтиб беришни тайинларди. «Манави гапларни яхши эшитяпсанми? Агар менинг ўғлим бўлсанг, бирор сўзни эсингдан чиқарма!»

Полковник ўқиб бўлди. Шульмейстер ҳам бола тарафга ортиқ назар солмай қўйди.

Ганснинг фаҳми етдики, сўзсиз берилган буйруққа бўйсуниши зарур ва бўйсунади. Унинг учун такрорланган мактуб сатрма-сатр миясига жойланди.

Аммо уни кимга айтиб бериши керак? «Карл дадам мен французчани билмаслигимни таъкидлагани ҳолда нега энди айнан шу тилдаги хатни ёд олишни буюрдийкан? Ҳа-а, афтидан қўлга тушгудай бўлсам, французчани тушунмайдигандай кўринишими зарур. Хўш, кимга... кимнинг олдида хат мазмунини такрорлайман?»

Ўша ондаёқ унинг болаларча зукко ва беғубор ақли жавоб топди: «Мен французларни қидириб топишим керак. Родек мени қаёққа жўнатган бўлса, Карл дадам ҳам ўша тарафга боришни буюрмоқда.»

Қаҳрамон бола дарё сари йўл олди.

Ганс кўринмай қолгач, Шульмейстер елкасидан тоф ағдарилгандай енгиллаб, мутлақо хотиржам қиёфага кирди. У қўлидан келган ҳамма ишни қилди, энди виждони пок. Ҳатто асранди ўғлини ҳам ватан хизматига сафарбар этди. «Бу ёғига пешонамдан кўраман. Аммо душман билан ҳисоб-китоб қилмасдан армон ичра ўлиб кетавераманми?»

– Полковник жаноблари! – деди у овозини баралла қўйиб. – Кураш мени чарчатди, сизга ҳаммасини рўй-рост айта қоламан. Қўлингиздаги хатдан хабарим бор, уни ўзим ёзганман. Аммо ўйлаб кўринг, бунча маълумотни битта одам қаёқдан олади? Поручик Венд менга ёлланиб, энг маҳфий хабарларни топиб

берарди. Мен унга ўн минг франк ваъда қилғандим: ҳозиргача етти минг наполеондорни жарақлатиб олди. Сўзим ростлигини текшириш осон. Сўнгги қирқ саккиз соат ичидаги бу зотнинг харажатларини қиморхонада ва бошқа жойларда совурган пулларини тафтиш қилинса бўлди...

– Ўзингизни ҳимоялаш ўрнига Вендни айблашин-гиз қанақа бўлди? – сўради полковник. – Бу ҳам сизни қутқаролмаслиги ўзингизги аён-ку... Қолаверса, сизни фош қилган одамдан ўч олмоқчи эканингизни шу тобда ҳамма пайқаб турибди.

– Нега ўзимни оқлаш ўрнига уни қоралаяпман? Сабаби жудаям оддий: бунақа ишларни қилолган одам ҳимоялангандан кўра фахрланса арзийди-да. Мен сизга ёвман, инчунун истаганимча зиён етказиб, истаганимча алдаш менинг вазифам. Агар сирим очилса, ҳаётим хавф остида эканини билардим, бу – аниқ! Мана энди қўлингиздаман, қатл этсангиз, интиқом оласиз – ҳисобимиз тўгриланади. Аммо менинг пулимга сотилган кимса сирларингизни очди, сизга хоинлик қилди. Эшитиб қўйинг, у хоин, хоин, хоин! У бу кеча мениям сотди, шунинг учун сотдики, яна пул олишга ортиқ умиди қолмаганди. Ўйлайманки, у мени тинтиш чоғи бор бисотимни ўмармоқчи эканиям эҳтимолга яқин. Аниқки, бундай жиноятни кечириб бўлмайди ва мендай ёлловчи ҳам индамасдан, ёлғиз ўзи ўлиб кетавермайди гўсхўр эмасман! Венд жаноблари мен билан бирга қабрга киради! Полковник, на менга ва на унга шафқат қилишнинг иложи йўқ. Менга мутлақо ишонаверишингиз мумкин. Азроилнинг чангалидаги бандайи Худо ёлғон гапирмайди! Жосусни қатл этаркансиз, анави илонни-ям бошини мажақланг-да!..

Шульмейстернинг сўzlаридан мутаассир полковник шаҳд билан Вендга ўтирилди ва сўради:

– Нима дейсиз, бу қанақаси?.. Ие, қайга гумдон бўлди?

Венд туёгини шиқиллатиб бўлганди..

## ВЕНД ГАНСНИ АЗОБЛАМОҚЧИ

Венд аталмиш бу бадкирдорнинг фикри-зикри фақат ўлжада: ҳакамлар оёғи остига ташланган ғазна-белбоғни қандай қилиб қўлга киритса бўлади? Бироқ полковникнинг амирона сиёқи бунга йўл қўймасди, унга бўйсунмаслик эса ақлдан эмас, щунинг учун у ҳакалак отган нафсини тийишга, қилт этмасликка мажбур бўлди.

Хуллас, ўн минг франк мўмай даромад тупроқ устида қолаверди. Асир сўроқ қилиб бўлингач, тиллани маҳкум қатл этилгани хусусидаги рапортга қўшиб, соқчилар қузатуви остида бош штабга жўнатишлари мумкин.

Олтиндан буткул умиди узилган Венд ўша ондаёқ ётиб қолгунча отиб қолишга – қасд олишга маккорона бел боғлади ва Шульмейстернинг ҳар бир ҳаракатини синчковлик билан кузата бошлади. Асирнинг нигоҳи мавҳум нуқтага қадалиб, номаълум даҳшатдан афти бужмайганда, Венд ҳам наригилар қаби ҳайратга тушди, албатта. Лекин дафъатан содир бўлган бу ўзгаришни ўлим талвасасига йўймади. Бошқалардан фарқли ўлароқ, Венд бунинг сабаби руҳий эмас, моддий нимадир эканини фаҳмлаб, ўша нарсани кашф этишга уринди.

У оҳиста эгилиб, гулхан ёғдуси етган теваракни, ҳар бир нуқтани эринмай ва пинҳона кўздан кечириди-да, ахийри, нимани излаётган бўлса, ўшангага назари тушди. Бир болакай, юзи бегубор ва маъсум, тийрак кўзлари билан фақат Шульмейстерга боқиб турибди.

Вендинг полициячиларга хос топқыр сөзгиси дархол иш берди, бу ҳолда сабаб ва оқибат муштарақ эканини аниқ англали. «Айбнома» муаллифи ўзи талаб қылғач, хат баланд овозда қайта ўқиларкан, шубҳали болакай уни жон қулоги билан тинглади.

– Бу бежиз эмас! – хулоса қылди Венд.

Боланинг кимлигини, қаёқдан келганини аниқлаш зарур! Модомики бегоналар қўриши ва эшитиши мумкин бўлмаган сирга бу тирранча шоҳид бўлиб қолган экан, лоақал эҳтиёткорлик юзасидан уни қўлдан чиқармаслик шарт.

Венд даврадан киши билмас гойиб бўлишга киришиди. Унинг номи энди салкам қораланиб, шубҳа остида эдики, жиркана бошлаган зобит йигитлар Вендинг кўринмай қолганидан ҳатто суюнишди ҳам. Инчунин, уни қидиришга ва йўқлигини кимгадир айтишга ҳам уларнинг кўзи учиб турмаганди. Сотқин эса бир амаллаб четга ўтиб, қишлоқ томонга отланди. У хийла айланма йўллардан юриб, болани тўсиб чиқадиган панага жойланиб олди, бу ердан Ганснинг гулхан ёғдусидаги нозик тахлити бемалол кўриниб турарди...

Саноқли дақиқалар ўтиб, полковник айни Вендинг суриштирган дамда даҳшатли чинқириқ янгради. Бу даҳшат ва ғазабга учраган иложсиз мазлумнинг жон аччиғидаги ночор нидоси эдики, Шульмейстернинг ранги кесакка айланиб бўлганди: бу Ганс эканига унинг қалбида гумон йўқ! Ҳамма ўша ёққа отилди. Сал наридан машмаша эшитилиб турарди: кимдир тепди, инграш, қаҳрли боланинг ноласи, унинг оғзига тушган гурзидай мушт... Кейин Венд кўринди, унинг ортида икки аскар асло хоҳламасалар-да, ўн бир яшарча болани қўлидан тутиб келардилар.

– Бу қанақаси? – норози бўлди полковник. – Бу бечорани нега судраб юрибсизлар? Мен сизни қидириб

овораман, сиз эса бир гўдакни қувлаб юрибсизми, поручик?

— Мени афв этинг, полковник, — ўзиникини маъқуллади Венд, — ҳазилакам ўлжани тузоқча туширганим йўқ! Ишончим комилки, анави асир ва манави болакайнинг ўзаро кўз уриштиришида ва имо-ишораларида ўзаро боғлиқ жиддий сир бор. Ваҳоланки, бу гўдакни мендан бўлак ҳеч ким пайқамовди. Иккови бир-бирини танишига шубҳам йўқ: сиз хатни ўқиётганингизда, мишиқи ҳаммасини ёдлаб бўлди. Мана, эҳтиёт шарт деб, хузурингизга тутиб келдим.

— Ие, ҳали болаларга қарши уруш очадиган бўп қолдикми? Сизнингча, ҳозир шу норасидани сўроқ қилишим керакми?

— Албатта унақамас, полковник! — илжайди Венд. — Бироқ сиз айтган мана шу «норасида» ўша хатнинг мазмунини душманга сўзма-сўз етказса-чи? Унда шўrimизга шўрва тўкилиб қолмайдими? Ахир ўзингиз унгаям эшиттириб, баланд овозда ўқиб бердингиз-ку!

— Демак, мен у эшитсин учун товушимни баландлатганман, бу ишим ножӯя эканлигига шама қиляпсизми?

— Йўғ-е, полковник, сиз менинг ниятим нималиги тушунмадингиз чоги...

— Тақсир! Мен ҳеч нарсани тушунишни хоҳламайман! Сиз ўз касбингизни уddaляйпсиз, вассалом! Майли, шундай дея қоламиз-да. Мен эса ўз бурчимни адо этаман. Қани кичкингой, берироқ кел-чи!

Ҳозиргина икки жангчининг темирдай қўлидан кутулган Ганс ҳамон титраб-қақшарди, асаби сирқираб, вужудини безгак тутаётган оғир лаҳзада полковникнинг ўқтам овози қулогига оталарча ҳароратли туюлди. У томонга дадил бораркан, икки соқчи елкаси ва қўлидан тутган гулхан ёнидаги асирга лоақал

кўз қири билан қараб қўйгани йўқ. Аммо ўзига қолса, шу одамнинг бўйнига осилиб олгиси бор!.. Йўқ, Ганс, нинг нигоҳи фақат полковникда, ундан бошқа ҳеч кимни кўрмасди, кўришни хоҳламасди ҳам.

– Ярим кеча бўлса, бу ёқларда нима қилиб юрибсан? – сўради полковник.

– Адашиб қолдим. Оиламиз анави қишлоқда.. отиниям билмайман. Кеча кечқурун келувдик. Биз ётган маҳалда аскарлар кириб, уйни эгаллашди. Уларнинг қўналғасини, чодирларини томоша қилгим келди... Сўнгра адашдим-да.

– Ундан кейин-чи?

– Кейин манави ёқда чироқлар кўринди. Ўша ерга бориб, йўлни сўрамоқчи бўлдим. Бироқ етиб келгач аллақандай одамни турткилашаётгани учун мени ҳам қувиб солишади деб уйлаб изимга қайта қолдим. Шунда бу киши йўлимни тўсди.

– Отинг нима?

– Ганс.

– Бошқа исминг йўқми?

– Менимча, йўқ.

– Хўш, сенингча, отангнинг исми нимайди?

– Отам ўлиб кетган, тақсир.

Жавоб шунчалар оғир ва гуссага йўғрилган эдик, жангчиларнинг юрагида етимга нисбатан раҳмашафқат уйғонди.

Шульмейстер эса оғиз очгани йўқ, у ҳеч нимани кўрмасди, билмасди. Унинг хаёли ҳам, ҳаёти ҳам болаларча ақлли сўзларда, гоҳ-гоҳ қалби қалқиб оларди.

Венд фақат унга бақадай бақрайиб олган. Унингча Шульмейстер кўз қири ё бир имо билан болага маслаҳат ё сигнал бериши мумкин эди. Лекин у исковучдай қанчалар разм солмасин, лоақал салгина шубҳали ишорани пайқай олмай армонда қовуриларди.

– Қулоқ сол, ўғлим, гапларингта ишонгим келади. Лекин менга ҳаммасини бошдан-оёқ очиқ-ойдин айтишинг керак-да, ахир ўзинг тўғрисўз болага ўхшайсан... Хўпми?

- Хўп, тақсир!
- Бу ерга қаёқдан кеп қолдиларинг?
- Оффенбургдан.
- Ҳа-а, Қора ўрмон тарафда... чегарага яқин жойлар. Французларниям кўргандирсан?

Ганснинг юраги шувиллаб, юзи қизаргандай бўлди. Аммо у полковникнинг самимий чеҳрасига тикилганича, чақноқ кўзларини олиб қочгани йўқ. Шутобда кипригининг ортиқча пирпираши ҳам ички түғёнини фош этиши ҳеч гап эмасди.

- Кўрсам-да, танишим қийинроқ.
- Сен уларни ажратолмайсанми?
- Шунаقا, уларни кўргандирман, аммо танимайман-да.
- Олдингда французча гапирилса, тушунасанми?
- Қанақасига, тақсир?
- Мана қараб тур! Ҳозир сўзларимни диққат билан эшитсанг...

Ҳамманинг нигоҳи болакайнинг кўзларига қадалди: тушунган-тушунмаганини аниқлаш зарур! Шульмейстерни унуттан Венд ҳам, Шульмейстер ўзи ҳам малласоч болага бақрайиб қолишганди.

Полковник дона-дона қилиб, ушбу сўзларни француз тилида айтди:

- Сен менга дадам ўлган дединг, тўғрими? Онанг ҳам вафот этган экан-да, а?

Ганс ўзини гангитадиган савол беришларига тайёр эди, бироқ унинг маъноси бунчалар шафқатсиз бўлаҗагини ўйламаганди. Лекин ёш бошига не қўргиликлар тушмаган бу хилқат ҳамма қийинчиликларни ен-

гиб ўтишга, бардош беришга ўзида куч ва ирода топа биларди. Қолаверса, валинеъмати, мададкори бўлмиш Карл дада ёнгинасида турибди ва шу тобда у ўзи валинеъматга, мададга муҳтож. Ганс полковникнинг юзига боқди-да, немисча жавоб берди:

– Жудаям ёқимли сўзлар экан, лекин уларнинг маъносини тушунолганим йўқ.

Жангчилар орасида пичир-пичир бўлиб ўтди. Но расида болани тергов қилганидан, бундаги ўзининг қўрслигидан хижолатда қолган полковник ноқулай аҳволда елкасини қисди ва зобитларга юзланди:

– Ўзингиз айтинг-чи, агар у гапларимни тушунган бўлса, бола боши билан шунчалар догоули ва маккор бўлиши мумкинми?

Лекин Венд бу хulosага тиш-тирноғи билан қарши эди! У Шульмейстернинг юзида пинҳоний тантана аломатини илгай олганди. Сотқин полковникка яқинлашаркан, бу азоб ҳали давом этажаги Шульмейстерга аниқ бўлди.

– Жаноб полковник, яна битта синовга ижозат этсангиз! – деди чақимчи.

– Нега энди? Бу болага берган азобимиз каммиди, тақсир?.. Сизга яна нима керак? Жонимга тегиб кетдингиз! Менда тариқчаям шубҳа қолгани йўқ, сиз эса билганингизни қилинг!..

Полковник «синовинг қурсин» дегандай қўл силтади. Венд боланинг ёнига келиб, катта самимият билан французча сўзлади:

– Бўпти! Борақол, кичкинтой, кетишинг мумкин!

Ганс унга саволомуз боқди, киприклари пир-пира-ди, бироқ ўрнидан жилгани йўқ. Полковникнинг жаҳли чиқди:

– Бунчалик тирғилавериш – болага бераҳмлик!

Лекин қўли остидаги зобитни хижолат қилмаслик учунгина ортиқ индамай кузатаверди.

«Венд Ганснинг елкасига қўлини қўйди, бола силтаниб, ўзини четга олди. Яна французча савол:

– Мендан хафа бўляпсанми?

Жавоб эса ҳамон йўқ.

Венднинг имоси билан аскарлар Шульмейстерни нарироққа ҳайдаб, қуролдошлари панасиға олиб ўтишиди. Ганс уларга терс тургани боис буни кўргани йўқ. Унинг кўзи полковниқда бўлиб, катта зобитнинг норози нигоҳидан ўзи учун қандайдир кўргилик ҳозирлашаётганини пайқади.

Лекин ўша ондаёқ мияси бир чараклаб олди ва ҳаммасига ақли етди: ёруг дунёда Ганс ҳимоялаши зарур одам Карл дада, модомики шундай экан, уни танимаслигига анавиларни ишонтиради, вассалом! Энг ашаддий душман Венд эдики, энг муҳими бу нусханинг на сўзига, на ишига ишонмаслик керак! Бошқа ҳеч нимага ўрин йўқ! Бундай жонфидоликни фақат меҳр-муҳаббат ва матонатга лиммо-лим юракларгина улдалайди!

– Бу ёққа қара! – буюрди Венд.

Ганс ортига ўтирилди: олиста чўзилган қорамтири водий, унга кўз тиккан аскарлар, қаққайган соқчилар, қип-қизил чўғлар устида лишиллаётган гулхан алантаси, лекин...

Лекин Шульмейстер йўқ, ҳозиргина у турган жой бўм-бўш!

Бу янгиликни Ганс беҳаяжон қабул қилди ва немисчалаб сўради:

– Бояги одам қани?

– Уни ўлдиришди, – жавоб берди Венд, бу гал у ҳам немис тилида гапирганди.

Ганс йиглаворгани йўқ. Ўзини тута билди. Лекин кўнглидан нелар ўттани ёлғиз Худога аён. Болакай ахийри оғиз очди:

– Фалати-ку! Аскарлар фақат ўқ отиб ўлдиришади деб ўйларканман! Ўқ овозини эса эшиганимча йўқ.

Дарғазаб полковник тутоқиб ўшқирди:

– Бас қилинг! Бегуноҳ болани қийнашингизга ортиқ бардошим етмайди! Поручик, буюринг, уни қўйиб юборишин! Жаноблар, орангиздан бу ерларни яхши биладиган бир ишончли одам уни кузатиб борсин!

– Яхши қолинг! – деди Ганс полковникка қараб.

– Мана шунака гапларни ёқтираман-да! Лоақал мен билган тилда сўзлашсалар...

У полковникнинг кўзларидағи намни ва муруват учқунларини пайқади-да, унга дадил боқди:

– Анави ердаги... ҳалиги одамни ўлдиришгани ёлғон-да, а, тақсир?

– Шундай, ўғлим! Ёлғон гап, – деди кекса зобит хижолатомуз гўлдираб. – Тезроқ бор, болакай, ухла, дамингни ол!..

Гўё полковникнинг сўзларини қувватлагандай зобитлар ортидан титроқ бир садо эшитилди:

– Венд бориб турган аblaҳ экан-да!

Бу сўзлардан ўн бир яшар қаҳрамоннинг қалби илоҳий нурга тўлиб, яйраб-яшнаб кетди. Агар атроф мунаввар бўлганда эди, беномус жаллод Ганснинг кўзларида гилтиллаган ёшни кўрарди. Муқаддас томчилар...

Бироқ полковник ишонгани билан Вендни ишонтириш осон эмас...

Аммо полковникнинг буйруги бари бир қатъий, ҳеч қандай эътиrozга, ҳатто ижросини пайсалга солишга ўрин йўқ! Алалоқибат, Гансга бир жангчини кўшиб беришди, у Вертингенга элтувчи яқин сўқмоқ томонга бошлаб кетди. Қиличи синиб, қалқони тешилган Венд буни кўриб тургани холда оғиз очишга журъат этолмасди.

Бола йўлбошловчи ҳамроҳлигида олислаб бораркан, бояги титроқ овоз яна нидо берди:

– Алвидо кичкинто! Сенга тасанно, булоқ сувидай тоза қалбинг бор экан!

Қоронгилик қаъридан бўғиқ гала-ғовур эши билди, кимдир кимнингдир овозини ўчиришга мажбур қилаётганга ўхшарди. Сўнгра Шульмейстернинг тақдирни хусусида бир қарорга келиши: у кучли соқчилар кузатуви остида Гогенрейхенга – қўшни қишлоқчага жўнатилади. У ердаги алоҳида ҳибсхонада то қатл ҳукми ижро этилгунча сақланади.

Интиқоми пайсалга солинишидан феъли бузилган Венд сўрашга журъат этди:

– У ҳозир отилмайдими?

– Тақсир! – деди полковник қатъият билан. – Бу ишнинг энди сизга мутлақо дахли йўқ! Билиб турибман, сиз бу одамнинг ўлишини кўриб хумордан чиқмоқчисиз, негаки у сизнинг нозик, балки қалтис сирингиздан бохабар. Бироқ бу ерда командир фақат менман. Қолаверса, уни қатл этишдан бурун аниқлаб олмоқчиман, ҳалиги боладан тетикроқ ҳамтовориям борми-йўқми?

Венд артистона қулочини керди... Лекин полковник бу «пантомима» билан мот бўлиш ўрнига сотқиннинг думини тугадиган оҳангда деди:

– Менимча, бу ерда сизбоп юмуш қолгани йўқ. Мана бу постда мен тайинлаган зобитларгина қорувулликда туриши мумкин, сиз дарҳол кетинг. Оқ йўл, тақсир!

Венд қўзғоларкан, ёш зобитлардан ҳеч бири ҳарбий эҳтиром билан кузатгани йўқ. Салдан сўнг унинг от чоптириб кетаётгани эши билди.

У йўлга тушгачгина полковник тилини тишлади, чунки Венднинг қаёққа отланганини пайқаб, қўйиб юборганига афсуслана бошлаганди.

Бола ҳам айни ўша йўлдан, фақат ўз қораловчиси ва жаллодидан бир неча дақиқа оядинроқ борарди, холос.

## СОТҚИН ЎЗ БОШИНИ ЎЗИ ЕДИ

Биз Родекнинг аравасидаги Доротеяни Вертин гендан чиқиши йўлида қолдирғандик. (У бундай «шароф»га Венднинг ўртоги бўлмиш ёш зобитнинг ҳақо ратли илтифоти билан мушарраф бўлгани ҳам китоб хоннининг ёдидадир.) Бироқ у узокқа боролгани йўқ Жиндайгина тўхтаб-тўхтамасданоқ йўлга чиқиши ва олисдан олис сафар туфайли тинка-мадори адойи тамом бўлган байтал ҳар қадамда қоқилиб, бетиним пишқиради. Салдан сўнг ҳоргин жонивор таққа тўх тади-да, ҳеч бўйсунмай қўйди. Аскар зилдай қўлиги қамчини олиб, аёвсиз савалай кетди, оғриқ жонидаи ўтган шўрлик бия энг сўнгги кучи билан олга отилиб ўқдай учди. Кейин эса ҳаммаси тамом: тўртала оёгини узатиб, дабдала араванинг синган шотилари ўртасига ётиб олди.

Доротея сакраб ерга тушди. Унинг кузатувчиси бўлмиш жангчи ўтинди:

– Тўхтаб туринг, хоним, отни йўлга соламан, аравани тузатиб, обориб қўяман.

Аёл унга жавобан қаҳқаҳ уриб кулиб қўйди-да шаҳар томонга йўл олди: немислар тўлиб-тошга қишлоқнинг бети қурсин! Шимол томондаги нишад ўрмонга чодир тиккан французлар ҳужум фурсатини пойлаб ётишибди. Аммо Доротеяни улар эмас, улар нинг сирли айғоқчиси қизиқтирас, шаҳарга бориб уни топиши керак эди.

Бироқ унинг айни шу фикри янглиш эди. У тал пинаётган ҳамкор ёнгинасида эканини қаёқдан ҳам

билсин? Шульмейстер жондан азиз яқинлари жамланган қишлоқни четлаб ўтгани ҳолда у ари уядай тўзғиётган отрядлардан қочиб, дўстлари жамулжам тог ён бағрига ошиқарди: зеро зиммасидаги бурчни бақадриҳол адo этди, энди францияликлар даврасига етиб олса бўлгани. Лекин унинг атрофида юрганларнинг ҳам йўли битта: хавф-хатардан огоҳлантирилган зобитлар ўз қисмига етиб олишга шошарди.

Суворийлардан бири Доротеяниг ёнгинасидан учib ўтганидан унинг юзига отнинг шамоли урилди. Жувон таққа тўхтади: аввало, юраги бир нохушликни сезиб, ҳаприқиб олди, қолаверса, одам ҳам шунчалар ўхшашиб бўладими? Кулранг от, оппоқ қашқаси бор, унинг устидаги чавандознинг ҳар бир чизгиси Доротеяниг шуурига ўрнаб қолган. Тўғри, у елдай ўтди, юзини кўролгани йўқ. Бироқ шакл-шамойили уст-боши, эгар-жабдуғига минг бор кўзи тушгандики, уни таниши учун юзига қарашга ҳам ҳожат йўқ эди. Доротея ўзига ўзи шивирлади:

– Бу – Венд! Шу бемахалда-я? Нега йўлга чиқдийкан? Қайга бормоқчи? Мақсади нима? Кимнинг изига тушган? Бунчалар ошиқиб, Вертингенга кетаётган бўлса-чи? У ерда нима иши бор?

Доротея туёқлар овозини аниқроқ эшитиш учун ерга энкайди. Чоги от ортда қолган қишлоқ томонга бурилмасдан тўғрига – дарёning нишаб соҳили тарафга чопарди. Бу жумбоқни қандай ечиш мумкин?

Саволларига ақли жавоб топмасиданоқ аёлнинг сезгиси ҳаракатга келди. Мулоҳазадан абжирроқ туйгу уни олға бошлади: шамолдай елган чавандоз ортидан бориш зарур. Шоша-пиша ўша ёқса йўл олди.

Салдан сўнг бояги синган арава билан ҳаром қотган байталга йўлиқди. Солдат кўринмасди, у постига қайтган, албатта. Яна жиндай фурсатда чорраҳага

чиқди. Икки йўлдан бири Дунайга элтарди, Доротея от туёқлари давомли дупурлаган тарафни танлади. Ҳеч қанча юрмасидан олисдан қароргоҳ гулхани кўринди.

У тўхтаб қолди.

У ёқдаги қандайдир шарпалар ҳар замонда оловни тўсиб қоларди. Доротея уларнинг аскарлар бўлиб, ҳозиргина ўзи тарқ этган ҳарбийларга ватандош эканликларини тушунди. Бироқ бунга ишонч ҳосил қилиш учун ортиқ яқинлашиши мумкинмас-да.

Венд ўшалар томонга кетмадими кан? Йўқ, у ўлса ҳам энг олдинги аванпостга қадам босадиган инсон эмас. Ширин жонини хатарга қўйиб ва яrim тунда иссиқ тўшакни тарқ этиб, шахсан ўзи разведкага бориш Венда зарур келибдими, бундай қилишининг унга кераги йўқ. Башарти ҳасад ва разолати ўта хуружга келиб, қутуриб кетсагина танбаллик ва ҳузур-ҳаловатини тарқ этиши мумкин, холос.

Доротея ана шу ўйлар билан гулхан сари одимлайверди. Орада йўл ёқасидаги харсанглардан бирига ўтириб, бир оз тин олди. Кейин яна ўрнидан қўзғолиб, олга интилди.

Тун оғиб борарди. Соат неча бўлдийкан? У вақтни ҳам унуганди. Тўсатдан ҳушёр тортиб, таққа тўхтади: қадам товушлари эшитирарди. Қоронгилик қаърида икки одамнинг паст-баланд тахлити пайдо бўлди: бири – катта киши, иккинчиси – ёш бола. Доротея ўт-ўланлар орасига эҳтиёткорлик билан яширинди. Бироқ қулоқлари динг эди.

- Энди қайтаверсангиз бўлади, – деди бола овози.
- Тоғ тарафдаги дастлабки ўйлар кўриниб турибди.
- Тўгри, – деди аскарча дагал овоз, – аммо йўл хийла нарироқдан бурилади. Сен қаёққа юришни биласанми?

- Албатта, хотиржам бўлинг, энди адашмайман!
- Бўпти-да! Яхши бор, азамат бола! Сен довюраклигинг билан мақтансанг арзийди.

Бошқа гап-сўз эшитилмай қолди. Салдан сўнг қайтаётган аскарнинг залворли оёқ товушлари ҳам тинди. Бола қилт этмасди. У кузатувчининг кўздан гойиб бўлишини кутаётганига шубҳа йўқ.

Доротея ўрнидан туриб, унга яқинлашаркан, Шульмейстернинг хипчагина ўғилчасини таниди ва таққа тўхтади. Яқингинада ҳам ҳарбийлар тўла уйда ухлаб ётган болани энди даланинг ўртасида ёлғиз кўргач, ҳайратдан довдира бўлганди.

Ундан сўнг ўша уйда бирор гап бўлдими кан? Лекин Доротеянинг бу саволга жавоб излашига бирор лаҳза фурсат бўлмади: дарё тарафдан бирданига шовқин кўтарилиб, яқинлаша бошлади. Аввалига у нималигига ақли етмади, салдан сўнг чопиб келаётган от туёқларининг дутурини фарқлади, овоз тобора аниқроқ эшитиларди. Кўққисдан қоронгилик қўйнида кулранг дод пайдо бўлиб, катталашаверди, кейин аниқ кўриниб, қоп-қора шарпа намоён бўлди.

У олдинроқ ўша ёққа учиб ўтган суворий эди: Доротея Вендни таниди.

Аёл дарров Ганс томонга интилди, лекин ўша ондаёқ тўхтади.

Бола сўқмоқ ёқасига четланди холос: тун қоронгилигидан ўзга паноҳи йўқ-да.

Отлиқ Венд билан Ганснинг ораси ҳеч қанча эмас. Чамаси, сотқин йўлда қайтаётган жангчини учратиб, кичкина маҳбус қолган жойни билиб олган ва мўлжалдаги ўша манзилга етиб келиб, шу атрофни ахтара бошлаганди.

Ахийри болага назари тушди.

— Бу ерда нима қиляпсан? — сўради дагаллик билан.

– Сиз ўтиб олсангиз, кейин ўз йўлимга кетарман деб...

– Шунақа дегин! Мабодо мен кеттак, яна изингга қайтиб, айгоқчиликни давом эттириш ниятида эмасмисан?

– ...

– Нега индамайсан? Қани юр-чи! Сени бу ерда қолдириб бўлмайди. Олдимга туш, тезроқ бўл!

Венд жиловни силтаб, боланинг устига от солди.

Ганс қимиirlагани йўқ, поручик қутуриб қичқирди:

– Эшитмаяпсанми, лаънати?

Йўлнинг қарши тарафидан аёл киши садо берди:

– Мен эшитяпман!

Венд таажжуб ва даҳшатнинг зўридан бир сапчиб олди. Сирли овоз такрор жавоб қайтарди:

– Ҳа, мен эшитяпман! – луқмадаги беписандлик ва ошкора жирканиш Вендинг қулоқ чаккасига гўё шапалоқдай тушганди. – Аблаҳ, бир бечора болани хўрлашингдан асло ҳайрон эмасман, ахир кечагина отасининг жонига қасд қилувдинг, бугун ўғлиниям ўлдиришдан тоймайсан-да!

– Отасини? Ҳа, ҳа-а! – қутурган бўридай наъра тортди Венд, зотан, ана шу биттагина сўз унинг қора юрагидаги қўланса ярага малҳам қўйганди.

Зулмат тун бир зум сукутда қолди. Сўнг шодон қийқириқ бошланиб, яйраётган Венд хурсандчилиги ни тўкиб солаверди:

– Зў-ўр!.. Менинг ақлим етганди, бу иккисининг найрангбозликда тили битталигини айтувдим уларга! Энди бас, шўринг қургур Доротеягинам, нимаики билсанг, ҳаммасини менга айтиб берасан! Яширинсанг ҳам, кўзимга кўринсанг ҳам майли, билганингни қил! Ушбу сирни очсанг бўлди, ҳақоратларингни, дўқ-пўписангни – барини кечираман! Ҳа-а, дадажо-

ниси дегин! Демак, Шульмейстер – манави митти ярамаснинг отаси! Иккови ҳозиргина ҳаммага похол солди, гўё бир-бирини танимас эмиш! Бир қарич ҳийлагар қанча одамга панд берди-я! Сенга ташаккур, Доротея, мана энди газандаларнинг оилавий тўдаси қўлимга тушди! Қасос олмогим энди муқаррар! Раҳмат, Доротея!

Бадкор сотқин Гансга ўшқирди:

– Қани, олдимга туш-чи, жосусвачча! Гулхан ёнига қайтиб бормасак бўлмайди, кўз бўямачи!.. Яна устимиздан куларсан...

Венд чаққонлик билан отдан тушиб, боланинг елкасига чанг солди. У жиловни қўйиб юбормасдан қўлига ўраб олганди.

Бироқ шу пайт қоронгилик қўйнидан Доротея чиқиб келди, унинг ранги ўчиб, чеҳраси қандайdir қатъиятдан мардона тус олганди.

– Унингни ўчир, кет бу ердан! – деди у. – Йўқол, ифлос хоин, дарҳол йўқол! Бу гапимни қулоғингга қўйиб ол! Ҳозирча вақт борида даф бўл!

– Хўш-хўш, яна нима дейсан? – Венд мазахлашга ўтди. – Намунча қитигинг келмаса? Сенга кетишим керакми? Бўпти, кетаман, тагин нима талабинг бор? Майли, сен айтгандай «дарҳол» йўқоламан... Фақат манави бола ўз падари билан кўришмоғи лозим. Мен шу эзгулик тарафдориман! Ҳамроҳим бўлишни хоҳламайсанми? Нега? Бу имконият-ку ахир азиз меҳмонингни сўнгги бор кўриб қолардинг, бундай ҳузур-ҳаловат сенга бошқа насиб этмайди!

– Эҳтиёт бўл, Венд!

– Эҳтиёт бўл? Қалбимда қайнаётган холис ниятимни амалга оширишга қаршимисан? Хонимча, дала-даштга тунги сайрга чиқаётib, тўппончани олганимидилар?

- Йўқ! Куролсизман! Аммо менга болани тин қўйишинг зарур!
- Войвўй! Сенга зарурми?
- Албатта!
- Кундошим, яъни мендан кейинги ўйнашинг жа-олғир чиқиб қопти-ку! Жигарингдан шунчалар уриғ дики, ҳатто бола-чақасиниям ғамини еб юрибсан!
- Жим бўл!
- Яна ўша гапми? Тушунсанг-чи, ҳукм ижросиг чоғланган бир взвод аскар милтиқ ўқталади, маҳку тиз чўкади, худди ўша лаҳзаларда Шульмейстер манав зумраша гувоҳнинг дийдорини кўриб турса дейман...
- Қулогинг борми? Жим бўл!
- Ана ўшандада аввал ўғлини қамчилаб, қонга бе лайдилар, сўнгра отасини, яъни сенинг ўйна...

Венд сўнгги жумлани тутатишга улгургани йўл бир жуфт қўл унинг кекирдагига чирмашди.

У жон аччиғида қутулмоқчи бўлиб талпинди. Йўл иложи йўқ! Венд бўғаётган аёлнинг афтига муш солмоққа интилди, лекин бўйини исканжага олга муздай қўллар бунга имкон бермасди. У яна тўлғағди, қиличини олиб, ё тиги, ё дастаси билан бирна ҳимояланмоқчи эди. Бироқ беҳуда, қўллари ҳавод муаллақ силкинарди, титроқ бармоқлари белидаг қуролга етолмасди.

Аёлнинг огуши мудҳиш бўлиб, Вендинг бетағ тиб талvasаларидан ҳеч наф йўқ... Зулмат бағридаг олишув ажал рақсидай машъум кўринарди! Шу тобд уйқашган икки навжувон ва кучли вужуднинг қий шанглаши даҳшатдан бошқа нарса эмас! Ваҳоланкі гажишаётган бу эркак билан аёл кечагина оҳанрабс дай бир-бирига интиларди, ошиқарди.

Бироқ Доротеянинг қаҳри қанчалар қайнаган бўл масин, жон қайғусида ўзини ҳар ёққа ураётган Венд

нинг шиддатига зўр-базўр дош бериб турарди. Бўғи-либ ўлаёзган аblaҳ бўйнидаги жонли сиртмоқдан қутулиш ҳаракатини бас қилди-да, бор кучини ишга солиб, аёлнинг белидан маҳкам қучоқлади ва омбирдай сиқа бошлади.

Доротеяning ҳам тинка-мадори қуриб бўлганди. Венд энди елкасидан жони чиқиб, аъзойи бадани бўшашган Доротеяning қўлларидан ушлаши ҳеч гапмас. Шундай бўлса-да, ноумидлик хуружидаги аёл бўғаверди.

Вендга нозик ва жаллод панжалар кекирдагини тешиб ўтгандай, нафас йўли тақقا тўсилиб, ҳозир қон отиладигандай туюларди. Унинг кўкарган, доф босиб, олачипор тус олган юзидағи қийшайган оғзи каппа-каппа очилар ва олайган кўзлари косасидан чиқар даражага етганди.

Бироқ Доротея ҳам силласи қуриб бўлганини сезиб, асаблари бардош беролмай қолганди. Йўқ! Мутлақо! Аёл қўллари бундан зиёда зўриқишига чидай олмайди!

Жирканч сотқин буни пайқади, бўйнидаги исканжা бўшашгани сайин, у икки ҳисса жазавага тушди. Бармоқлар жиндай сусайди, аммо батамом қўйиб юборгани йўқ.

Вендинг томогидан салгина ҳаво ўтиб, яшаш ва нафас олиш умиди уйғонди-да, ҳайвонларча мамнун хириллаб олди.

Аммо бари бир унинг паймонаси тўлган экан!

Бир-бирига чирмашган икки одамзоднинг тумшугидаги тизгинга ёпишганча потирлайвериши отнинг меъдасига тегиб бўлганди: Вендинг ҳайвоний бақириги эса ўтакасини ёриб юборди. Жонивор ер тепиниб тисарилди-да, олд оёқларини баланд кўтариб, орқа оёқларида тик турди. Тонг шафагида унинг ростланган девдай сиёқи ваҳимали кўринарди.

Хоин чилвири қўлига боғлаб олган эмасми, тизгин таранг бўлиб, уни ҳам судраб кетди ва ерга юзтубан тушди. Унга илашган Доротея тиззаси билан ўтириб қолганди.

От гарчи ақлли эса-да, бари бир инсон эмас-да аргамчисига илакишиб, тупроққа йиқилган икковинг залвори билан мункиб кетди ва пўлат тақализилдай туёғи Венднинг миясини мажақлаб ташлади.

Доротея бармоқларига қайноқ қон сачраганини пайқади. Белига ёпишган қўллар энди оёғига сирпаниб тушди. Аёл унинг бўйнидаги қўлларини бўшатди. Қимирламай қолган Венднинг пажмурда танасижон талвасасида қайта-қайта потирлаб, сўнгра батамом тинчиди.

Бу қандай содир бўлди, лаънати хоинни ким ўлдирди ўзи: Доротеями ёки шамшоддай тикланга жониворми? Ҳуркиб қетган аргумоқ адолатли қатлдә қурол вазифасини адо этганди.

Доротея тошдай қотиб қолган, ҳеч нарсани сезмасди, тушунолмасди, ақли етмасди.

Даҳшатдан караҳт бўлиб қолган жувон бир амаллаб ўрнидан қўзғалди. Доротеяning дабдаласи чиқиб қонга бўялган машғум башарадан кўз узишга ҳам ҳоли йўқ эди.

Аста-секин унинг эси ўзига келди, шундагина ҳаёт-момот олишувининг шиддатли ваҳимаси чекинди-да, қўрқувдан бир сакраб тушди: йўл узра аёл кишининг мудҳиш наъраси янгради.

Доротеяning чинқириги ҳарсиллаб турган жаллод-отга халаҷўп бўлди-қолди: ҳали ҳам ҳурковуҳолдаги ақлсиз маҳлук энди қутуриб кетди ва қоронғи даштга томон ўқдай учди, ортида тизгинга ўралган Венднинг мурдаси судралиб борарди. Ўлик ҳали туёқларга, ҳали узангига уриларкан, тупроқ юзида кераксиз агат очиб кетаверди.

Қонли бу манзарага қарашга ортиқ юраги бетламаган Доротея ўнг келган тарафга ура қочди, тонг ёришиб, дашт ва йўлларга илк қуёш нурлари тарала бошлаганди.

У танҳо. Уни ҳеч зог кўргани йўқ.

Афтидан, Шульмейстернинг ўғли ҳам эсининг борида этагини йигиштирибди, чунки Доротеянинг кўзи илғаган кенгликларда одамзотнинг қораси кўринмасди.

Хайрият! Хайриятки, норасида манави хунрезлини кўрмай қолди! Бу шерюрак, олтинсоч, рангар, жажоғигина болакай кўмакка етиб келган аёлнинг не иш қилиб қўйганини ҳеч қачон билолмайди – шуниси маъқул!

## ЖОСУСНИНГ ЎҒЛИ НАПОЛЕОН ХУЗУРИДА

Уруш даҳосининг мўлжаллари бирма-бир амалга ошмоқда эди. Еттинчи октябрь. Шварцвальд тоғлари ва унинг Вюртембергга туташ тизмалари ортидаги маълум ва машҳур водий. Худди шу жойга французларнинг олтита корпуси ҳар ёқдан етиб келиб, айни ўша куни режа бўйича учрашиб, бирлашди. Лекин улар тоғдан ошиб эмас, айланиб ўтишганди.

Наполеон стратегик муҳим ҳудудларни бирор дона ўқ отмасданоқ фатҳ этгандики, бу узил-кесил ғалабани таъминловчи асосий омиллардан бири эди, албатта.

Мюратнинг кавалерияси императордан аввал етиб келди. У ўз ҳаракатларини ниқоблаб юриб, душманни чалғитиб бўлгач, ваниҳоят, жанговар одатига кўра фронтнинг олдинги маррасидан ўрин олишга эришганди. У ҳормай-толмай интилиши орқали Наполеон учун кўзланган мамлакатга йўлни очиб қўйганди.

Хуллас, 8 октябрь куни тонгда биттагина масала кўндаланг турарди: маршалнинг ҳарбий ҳийласи билан душманинг чалғитилгани қай даражада ва шундан келиб чиқсан ҳолда француз армияси илк ҳужумни қайси тарафга қаратиши керак? Буни аниқлаб олиш – галабанинг асосий гарови!

Шак-шубҳа йўқки, бугун ёки эртага қандай жанг қилиб, қандай зафар қозонишни Наполеон биларди. Лекин унинг тафаккурига бунинг ўзи кифоя эмас, у ана шу икки-уч кундан кейинги жангларни ҳам олдиндан кўришни, билишни истарди. Отряднинг етакчиси муайян жангни билса бўлди, аммо бош қўмондон ва миллат раҳнамоси бутун урушнинг яхлит тақдирини олдиндан кўра билиши шарт. Уруш – саҳна асари, фожиа: дастлабки сатрни битаётган драматургнинг хаёлида сўнгти сатр ҳам тайёр бўлиши керак. Муаллиф хотимага қадар давом этадиган ҳамма эпизодлардан боҳабарлиги учун ҳам муаллиф-да!

Кўринишлар аниқ. Лекин томоша охиригача содир бўладиган эҳтимолларнинг бари ҳам кўзда тутилмаганди...

Мак нима қилмоқда экан? У ҳозир қаерда ўзи? Қайси маълумот унинг ишончини қозона олган? Муратнинг чавандозлари Дунай соҳилида қандайдир қўшинни кўрибди, улар кўп эмас, лекин бари бир қай тарафнинг одами? Ўша дарё бўйидагилар кимга қарашли: Кинмейергами ё Ульм гарнizonигами? Бу пистирма кимнинг йўлини тўсмоқчи: Франциянинг иттифоқчisi бўлмиш бавариялик аскарларими ёки Баварияга дўст француз жангчилариними? Ваниҳоят, Наполеон қўлга олмоқчи бўлган душманинг асосий қўналгаси аниқланганми? Улар қароргоҳидан кетиб қолган эмасми? Ёки у ерни тарк этиш ниятлари йўқми?

Наполеоннинг ушбу саволларини аниқ жавоб билан таъминлай оладиган ягона айгоқчи Шульмейстер эди. Аммо у Страсбургдан жўнаганича дом-дараксиз, на тириги ва на ўлигидан хат-хабар йўқ. Ё кўлга тушиб қолганми? Ўлдириб қўйишган бўлса-чи? Нима бўлса бўлгандирки, жосус ном-нишонсиз эди.

Шунинг учун 8 октябрь тонгида императорнинг таъби тирриқ эди. У Донаувертда тунаб, уйғонгач, қабулига кирган саркардаларнинг ахборотини ҳам ўта дилхиралик билан тинглади. Уларнинг бири-бирига зид маълумотларидан холоса қилдики, ганимларининг ҳарбий режасидан ҳеч кимнинг аниқ хабари йўқ.

Император хузуридаги Ланн, Султ ва Ней одатдагидай у савол бермагунча сукут сақлаб туришарди.

– Тақсиrlар! – деди Наполеон нари-бери одимлаб, бу ер мўъжазгина мактаб бўлиб, император битта зални муваққат хосхона қилиб олганди. – Фараз қилинглар, биз бўрсиқ овига чиққанмиз. Унинг уясига оборадиган биргина лаҳм очдик, лекин унга сиғадиган энг хипча қўмондоним ҳам ўлжани гафлатда босдикми ё унинг бизни доғда қолдирадиган бошқа йўли борми-йўқми, буни айтольмайди. Сен айт-чи, Ланн, ушбу хусусда фикринг қанақа?

– Менимча, сенга куёв бўлмиш анави иблис... Афв этасиз, олампаноҳ... Менимча, шаҳзода Мюрат ҳазрати олийлари душманнинг жойлашуви борасида аниқ маълумот бермаган экан, бошқа ҳеч ким бунинг уддасидан чиқолмайди. Чунки тактика масаласида Мюрат дардисар бўлса-да, разведка бўйича устаси фаранг.

– Ҳой каллакесар, мен сендан Мюратнинг эмас, ўзингнинг мушоҳадангни сўрадим. Сенингча, австрияликлар Ульмда экани аниқми-йўқми?

– Ульмдами? Балки бордир, балки йўқдир. Бироқ фарқи нима? Ахир душман қаерда бўлмасин, бари бир мажақлаймиз, вассалом!

– Нормандияликка ўхшаб жавоб бердинг, таско-  
нияликдай исботлаб қўя қолдинг. Сиз-чи, маршал  
Сульт, бу ҳақда сиз нима дейсиз?

Энг йирик корпус Султнинг тасарруфида эди. У  
биркесар, ўта интизомли, иззатга лойиқ ва эҳтиёткор  
саркарда бўлиб, жавобни ҳам эҳтиёткорона айтди:

– Сиз ҳазрати олийлари билмаган нарсани мен  
қаёқдан ҳам билайн? Бироқ очигини айтадиган бўл-  
сам, ғалабага эрищамиз деган умиддаман. Бутун бир  
армия бошқасининг олдида чекиниб бораркан, бу ҳар  
қандай шароитда ҳам ҳужумимиз суръатини таъмин-  
лайди.

– Багоят маъқул! – деди император. – Ней, сиз ай-  
тинг-чи?

Шерюрак маршал қачон Наполеон олдида сўзласа,  
албатта бир қизариб оларди. Бу гал у ўз нутқига шун-  
дай якун ясади:

– Менимча, шаҳзода Мюрат имиллаб, бизни иш-  
дан қўймоқда. Олампаноҳнинг саволларига ана шу  
одам жавоб бериши лозим эди. Жин ургур қаёққа қа-  
раяпти ўзи? У ганимни кузатиши, бу ерга барвактроқ  
келиши ва ҳарбий вазият қандайлигини бизга айти-  
ши зарур! Мен хомхаёллар устаси эмасман, душман  
қайдалигини айтиб юриш ҳам вазифамга кирмайди.  
Менга ёвларни кўрсатсангиз бас, абжагини чиқариб  
ташлайман! Бошқа иш қўлимдан келмайди!

Наполеон бу жанговар жазавадан кулгиси келга-  
нини яшиrolмади-да, Нейнинг елкасига бир туртиб  
қўйди:

– Тайинли бир мулоҳаза айтганларинг йўқ... Хай-  
рият, кимдир келди шекилли, от туёқлари... Рустан,  
қарагин-чи, нима гап?

Дарҳақиқат, ташқаридан туёқлар дупури эшиги-  
либ, боятдан бери ланг очиқ эшик ёнида қилт этмай

ўтирган мамлук<sup>1</sup> остоңадан ўтиши биланоқ, бўсағада башанг ва жанговар қиёфадаги Мюратнинг келишган қомати кўринди.

– Ниҳоятда кечикдинг-ку! – деди император танбекомуз. – Менга муждалар оп келдингми йўқми?

– Зоти олийлари! Ҳар ҳолда... бебаҳо ва тансиқ муждалар билан қалбингизга ором бағишлай оловчи болани оп келдим... Менимча, шундай...

– Бола?

– Бир қошиқ қонимдан кечинг, марҳамат қилиб, анави манзарага бир назар солсангиз!

Маршалларини эргаштирган император эшикка қараб юрди.

Мюратнинг эгардаги соқчиларидан бири ухлаётган болани бағрига босиб ўтиради.

– Бу нимаси? Сен уни қаёқдан топдинг? Ақлинг жойидами ўзи, шаҳзода Мюрат? Менга гўдакнинг тушига кирган алламбалолармас, ёвларим ҳақидаги маълумот керак.

---

<sup>1</sup> Мамлук (арабча – қул) – Мисрда қул жангчиларни ана шундай аташган. Мамлуклар таркиби турклардан, грузин, черкез каби кавказ халқларидан иборат бўлиб, Айюбийлар суоласи ҳукмронлиги даврида (1171–1250) улардан сарой гвардиячилари ташкил этилган. Ўшанда мамлуклар сони 9 мингдан 24 мингтacha экани таҳмин қилинади. 1250 йили мамлуклар етакчisi Ойбек айюбийлардан тоҷу таҳтни тортиб олгач, Миср то 1516 йилгача мамлуклар ҳукмронлиги остида бўлган. 1516–1517 йилларда турк султони Салим I Сурия, Миср ва Фаластинни истило қилгач, мамлуклар таҳтдан четлатилган. Турклар империяси заифлашган 17-асрнинг охирида яна имконият туғилиб, мамлуклар ҳокимияти деярли қайта тикланади. Миср таҳти Мұҳаммад Али пошшо қўлига ўтгачгина (1805–1849) мамлуклар ва уларнинг беклари қувғин остига олиниб, дунё бўйлаб тирқираб кетди. Наполеон Мисрга юришидан ҳарбий ўлжалар қатори мамлукларни ҳам Францияга олиб кетгани ҳақида маълумотлар бор.

– Бу болани аввалдан танирдим, – мутлақо хотиржамлик билан жавоб қайтарди кавалерия қўмондони.  
– Нима мақсадда оп келганимни исмиданоқ фаҳмлай оласиз, офтоби олам.

– Хўш, исмини айт-чи?  
– Ганс Шульмейстер!  
– Шульмейстер? Шу гапинг аниқми?.. Айт, уни тезроқ уйготиб, зудлик билан бу ёққа оп киришсин!..

Водариг, шу тобда французлар императори бўлмиш собиқ биринчи консулга болакайнинг асл исмини айта оладиган мард топилсайди!

Ганс генераллар тўпланган оппоқ залга Наполеоннинг ортидан кўзларини ишқалаб кириб келди...

Бу тенги йўқ француз фитнагари оламни алғовдалғов қилиб, шоҳлар таъзим бажо айлайдиган энг юксак мақомларга етди ва зафар офтобининг нурафшон ёғдусида яна неча йиллаб давру даврон суриш тақдирига битилган. Бироқ ҳузуридаги юпунгина қишлоқ боласи аслида буюк сулоладан қолган сагир қиролзода экани, унинг отаси бўлмиш дилбар шахзодани эса ўзи қатл этиб, номини тириклар хатидан мангу ўчиргани Наполеон етти ухласа ҳам тушига кирмайдиган соқов тарих!

Учбурчак қалпоқчаси билан буюк бир инқилоб рамзига айланиб қолганидан ҳаволанувчи бу голиб саркарда кошкийди билса: ҳозир унга, яъни Наполеон Бонапартта зафарнинг тилло калитини келтирган болакай Конденинг зурриёти бўлиб, унинг томирида тождор Бурбонлар қони оқмоқда!

Бироқ бу ҳақиқат залдаги зобитларнинг барчасидан ҳам пинҳон эди. Мозийнинг синалган сабоги шундоқ: тақдир шахсларни келажакдаги тасодиф ва қарама-қаршиликлардан кафолатлай олмайди. Қаранг: ушбу дамда қотилнинг виждонида заррача азоб

йўқ, у етим қилган жафокашнинг қалбидан эса нафрат ва алам тополмайсиз.

Ганс рўпарасидаги басавлат зотларга болаларча ишонч ва дадиллик билан қараб олди. Хайрият, мовий мундирларни яна кўриб турибди. Ганс уларга бир кур назар солгач, Мюратта юзланди-да, миннатдор маънода жилмайиб қўйди.

Бироқ ўша дамдаёқ бошидан кечган мудҳиш кўргиликлар ёдига тушиб, юзига ғам-ғусса муҳри босилди...

Тонг чоги эди. Француз соқчиси ўзи тарафга ошиқиб келаётган, олис йўл азоби тинкасини қуритган болани кўриб қолди. У одатий саволларга яккаш бир хилда жавоб бериб, ўжарлик билан битта гапни такрорлардики, қаттиқ саросимада экани билиниб турарди.

– Менга шаҳзода Мюратни топиб беринглар, у келганимни императорга етказиши зарур!

Болага жони ачиған жангчи кулиб қўя қолди. Ахир бу каби ҳолни биринчи кўриши эмас: қишлоқ болалари келиб, «маршал қабул қилсин, капрал бўламан» деб талаб қилишарди. Бироқ манави кичкинтой бошқача, биркесар ва тиришқоқ, гап-сўзи қандайдир фожиона. Соддадил соқчи унга яхши муомала қилди:

– Бўпти, йигитча, ҳани, бу ёқقا ўтавер-чи! Чорак соатдан сўнг мени алмаштиргани келишади. Ўшанда пост бошлиги сен билан шуғулланади, ҳал қиласди.

Ганс ўт устига мунғайиб ўтириб олди. Бироқ соқчи унга милтиқ ўқталиб ўшқирди:

– Коч бу ердан, ҳой тирранча! Бунчалик яқин туриш тақиқланади! Бор, анави ўнг тарафдаги тупроқ юми устида кутақол!

«Тирранча» саркашлиқ қилгани йўқ, алпон-талпон юриб, ўша ёқقا борди-да, нишабликда йиқилди. Унинг тинкаси қуриб, қўл-оёқлари, ҳатто қовоқла-

ри ҳам ўзига бўйсунмасди. Ҳордиқ учун жиндай кўз юмиб, кейин тошдай қотиб уйқуга кетди.

Соқчини алмаштирувчилар келганда ҳам мушти тугилган Ганс туш кўриб ётарди. Постни топширган аскар қўл-оёғидан кўтариб, бағрига олганда, у кўзини очгани ҳам йўқ. Куролдошлари аския қилишди:

– Мана бола-чақаям оттирдинг. Кичкинтоининг тарбияси оғирдир, а?

– Майли, кулаверинглар. Агар бу митти уйқучининг кўзларини кўрсаларинг эди... Унда ташлаб кетавериш шафқатсизлик деган бўлардингиз.

Соқчилар командири бўлмиш кекса ҳарбий зоҳиран қаттиқўл кўринса-да, аслида ҳалим инсон бўлиб, ҳатто ҳазиллашди:

– Кўналғага кўпайишиб бора қоламиз. Капитан йўлда шўхлик қилишибди деб ўйлади, холос.

Ганс аскар қўлдан қўйгачгина уйғонди ва дарҳол рўпарасидаги зобитга болаларча беғубор, аммо қатъий овозда арз қилди:

– Мени маршал Мюрат хузурига бир топшириқ билан жўнатишган. У киши мени танийди. Мени маршалга оборинг, илтимос!

У французларни кўрибоқ қалпоғи жигали қўмондон дўсти ҳам шу атрофда бўлса керак деб хаёл қилганди.

Соқчибоши сўради:

- Шаҳзода Мюратни қаёқдан танийсан?
- У Страсбургдаги уйимизга келган, кейин Оффенбургдаям учрашдик.
- Сен унга топширадиган қофоз қани?
- Менда унақа нарса йўқ. Ҳаммасини ёдлаб олганман.
- Зўр-ку! Хўш, сени ким жўнатди?
- Дадам. Уни австрияликлар асир олишган, отиб ташлашлариям мумкин!

- Даданг ким эди?
- У ёлғиз ўзи императорга хизмат қиласы... Эндиликда отамга сизлардан ёрдам керак...

Бу ҳозиржавоблиги билан Ганс аскарлар наздида юксалиб борарди. Күзларидаги ёлқин, овозида бегубор титроқ, куюнчак сұзлар ва ҳарорат савол берәётгандар дилида шубҳага ўрин қолдирмаганди.

Хуллас, ўз қисмiga қайтаётган гусарлардан бири уни отига мингаштириб олди. Узоқ йўл босиб, манзилiga етгач, Гансни бош штаб зобитларидан биттасига омон-эсон топширди. У ҳам «хўп» дея қолди ва Муратни излаб йўлга тушди. Ахийри, Ганс ахтараётган одамни топиб беришди.

– Ё, Парвардигори олам! Сенмисан, миттивой? – қичқириб юборди шаҳзода, ундаги ҳайрат хуружидан ҳамма ҳайрон эди. – Бу ерда нима қилиб юрибсан?

Ганс имкон борича аниқ тушунтиаркан, овозини пасайтириб, бегоналар эшитиб қолмаслигига ҳам уринарди. У шаҳзодага ахборот бериб, бир кун аввал ойиси, Родек, Лизбета ва ўзи юра-юра бир қишлоққа етиб келишганини, номини билмаса-да, топа олишини, ўша қишлоқ тунда гренадёrlарга тўлиб-тошиб кетганини баён қилди. Болакай австрияликлар мундирини ўта аниқликда тасвирлаб, мовий мундир киядигандарни огоҳ этиш ва отасини учратиш муддаосида уйдан таваккалига қочиб чиққанини ҳам айтиб ўтди. Ундан сўнг отаси қўлга тушиб қолганига гал келди, қутичадан императорга аталган хуфя маълумот топилгач, душманлар отиб ташламоқчи бўлгандаридан арз қилди. Ганс ўз ҳикояси якунида «ёвуз эмас» полковникни тилга олиб, ҳатни ўша киши баланд овозда ўқиб берганини таъкидлади.

У биргина тафсилотга тўхталгани йўқ: ўзини ҳам ушлаб олишгани, француз тилини билиш-бilmасли-

гини, айбдорни таниш-танимаслигини тафтиш қилиб, рұхан азоблашгани ҳақида оғиз очмади.

Чинакам қаҳрамонлар, ҳатто ёши ўн бирда бўлса ҳам, ўз жасоратларини пайқамай қоладилар-да.

– Ўшанда ўқилган ҳамма гаплар ёдингдами? – сўради маршал.

– Албатта! Бирортаям сўзини қолдирмай айта оламан!

– Жуда соз, қани, айта қол!

Кучли сезги ва нозик одоб Ганснинг тилига ушбу жавобни келтирди:

– Ахир... Мактуб императорга эди-да!

– Мюрат ўзидағи оний норозиликни илтифотли табассум билан енга олди.

– Бўпти, кетдик императорнинг ҳузурига!

Ганс ўзининг сир сақлай олганидан баҳтиёр эди. Уни шаҳзоданинг энг ёш ва абжир адъютанти минган баҳайбат аргумоққа ўтқизиши. (Наполеон болакайни худди ана шу вазиятда кўрганди.) Эгар гўё беланчак бўлиб, у тагин ухлаб қолганди. Бироқ уни оёқча тургизиб, оппоқ залга бошлаб киришгач, кўзлари чараклаб, хотираси тўлиқ ишга тушди.

– Энди император Наполеон ҳузуридасан, – деди Мюрат. – Қани, гапир-чи!

Ганс болаларча самимият ва зийраклик билан атрофидагиларга бир сидра назар солди-да, кимга мурожаат этажагини осонгина топа билди: бу шахсда ўзгаларга мутлақо ўхшамайдиган нимадир бор эди.

– Тақсир, император деганлари ўзингизми?

– Худди ўзиман! Хавфсирамай гапиравер! Отанг қаёқда қолди?

Наполеон уни яхшироқ кўриш учун ўтириб олди ва хиёл эгилди.

Ганс Мюратга нима деган бўлса, ҳаммасини қайтадан айтиб берди. Айни чогда у пайқадики, император

билин гаплашиш оддий бир маршалга гап уқтиришга ўхшамас экан. Бола тинмай сўзлайверди, унга савол берадиган рангпар, қорасоч ва ихчамгина киши столдаги харитага қараб-қараб, Ганс тилга олган йўллардан гўё бармоқлари билан «юарди».

– Қишлоқда гренадёрлар мўр-малаҳдай эканини айтдинг. Ўша қишлоқ Вертинген эмасмиди?

Наполеоннинг қўйқис саволи Ганснинг хотирасини уйғотди: ҳа-а, австриялик полковник аскарга тайинлаётуб, шу номни тилга олганди.

– Ҳа, ўша. Вертинген эди.

– Дарёга қайси тарафдан келганингни эслай оласанми?.. Дейликки, мана отанг қўлга тушган жой: сен бу ёққа ўнг томондан келдингми, ё чапданми?

Ганс тўғри жавобга ҳозирланиб, юрган йўлини хаёлига келтирди-да, ўнг қўлини олга чўзди:

– Шу ёқдан.

– Яхши.

Наполеон Мюратга юзланди:

– Гогенрейхендан жанубга йўл очиқлигини эслаб қол!

У яна Гансга мурожаат қилди:

– Аммо нега дадамни ўлдиришмоқчи дейсан?

Демак, Шульмайстерни яқиндан кўриб, ўша ердаги гап-сўзларни эшишиб турувдингми?

Энди ҳаммасини муфассал айтиб, оғзаки маълумотнинг кемтигини бутлаш зарур эди. Ганс буни ҳам аввалбошдаги каби мутлақо табиий ва жозибадор сўзлаб бердики, афтидан у хайриҳоҳ саволлардан тобора жўшиб бораётганини ҳам сезмасди.

Наполеон хуштабассум билан сўради:

– Демак, французчани тушунмасликка олдингми?

– Ҳа, жаноб император.

– Қулоқларига обдан лағмон осибсан-да! Улар сени қай усулда синаб кўришиди? Қанақа саволлар беришиди?

– Полковник француз тилида гапириб, онаны үлди, деди. У мен қандай жавоб қайтаришимни билмоқчи эди-да.

– Бай-бай! – луқма солди Ланн.

– Сен сир бермадингми?

– Бермадим... Аммо ростини айтяпман сизга.

Ланн ва Нейнинг гулдурос овози эшитилди:

– Вой шумтака-ей!

– Гап қўшмасаларинг-чи, – деди Наполеон ўз саркардаларига хушнуд боқиб, – жудаям яхши қипсан-да ўғлим, энди қолган воқеаларни батафсил айтиб бер-чи

Ганс яна ҳам дадилланиб, асосий вазифанини ижросига ўзини чоғлади. У Наполеонга оловли кўзлари билан тик боқиб, титроқ овозда сўз бошлади:

– Бўпти, жаноб император. Гулхан ёнидаги кишилар қутичадан сизга ёзилган хатни топиб олишди. Дадам ундан гапларни гўё билмаслигини айтди. Унини айбини исботлаш учун мактубни ўқиб беришди. Полковник ўқиётган чоғи дадам мёнга жудаям галати қараб, ҳеч кўз узгани йўқ. Шунчалар қаттиқ тикилдики унинг нигоҳи гўё кўзларимга санчиларди... Сўнгра тушунолмаганини баҳона қилиб, полковниқдан яна бир карра секинроқ ўқиб беришни сўради. Аввалда охиригача назари фақат менда бўлди. Ана шунда ақлим етдики, демак, мен ҳам диққат билан тинглашим айниқса, хатнинг ниҳоясига астойдил қулоқ солишим зарур. Бу пайтда мени дадамдан бўлак ҳеч ким кўрганича йўқ эди. Албатта, жуда яхши эшитиб олдим-да ўқиб бўлингач, ҳаммасини хаёлимда такрорлаб, ёдладим ва шунинг учун ҳам унутиб қўймадим... Хоҳласангиз, айтиб берардим, майлими?

– Майли, айта қол, қулогим сенда.

– Хатнинг бошида Карл дадам Ульмда ортиқ қолишига ҳожат йўқлигини ёзганди. Негаки генерал.. Ўша генералнинг отигина эсимдан чиқиб...

— Макми?

— Ҳа-а, Мак... Гап йўқ, сиз ҳақиқий император эка сиз ўзиям, вой, ҳамма исмларни биларкансиз-а! Генерал Мак сиз нимани хоҳласангиз, ўша ҳийлагага лақ тушибди. Хатнинг бу ёгини сўзма-сўз ёддан билама «Унинг тасарруфида 70000 аскар бор: бир қисми Илашиш қўмондонлигида Тироль орқали, бошқа бўлғи эрцгерцог бошчилигида Богомея тарафга ўтиб киши мумкин. Қолган корпуслар бу ердан жилмайд Шаҳар қўргони мустаҳкам, лекин Эльсинген қўл киргач, у ҳам таслим бўлади деган сўз.» Бор гап шу!

Мутаассир Ланн тўлқинланиб, ўзини тия олма қолганди:

— Ажойиб бола! Бебаҳо!

— Қойил! – деди Наполеон қаддини тиклаб. – Себемалол айтишинг мумкинки, Ланн, бу ҳалол-по отанинг муносиб фарзанди, зеро у энг муҳим маъломути оп келди.

Ганс ҳикоясини давом эттирди ва ниҳоясида қшиб қўйди:

— Ҳамонки, жаноб император, вақтингизни чоғли олган бўлсан, бечора Карл дадамни отиб ташлашлига йўл қўймайсизми?

— Албатта! Албатта йўл қўймаймиз!

Наполеон дарҳол Мюратта юзланди-да, қатъи ҳатто қайгули оҳангда пичирлади:

— Қаттиқ, жуда қаттиқ киришасан!

## МАРШАЛЛАР ОРАСИДАН ОЛА МУШУК ЎТДИ

Инсоннинг хоҳиш-иродаси ила узоқ вақт сув тўпланди-да, тўғон очилган дамдаёқ шиддат билан ҳар катта келади. Наполеон армияси ҳам шундай эди: вақтдан бери йўлларда сокин ғимирлаб, сабр-қано-

жиловида куч-қудратини жамлади. Ваниҳоят, ўша тонг чоги бош раҳнамо амр этди: поёнсиз ҳудуд бўйлаб тийиқсиз долға жунбушга келди. Жанговар полклар ҳамма ёқдан бирданига бош кўтариб, Леш, Иллер ва Дунайга элтувчи йўлларга ёпирилди. Французлар шу тарзда душманинг Аугсбург ва Мюнхенга чекиниш йўлини тўсиб, айни чогда Мейнинген ва Тироль тарафни ҳам беркитишганди. Ульм лашкаргоҳини қуршаган қамал ҳалқаси аста-секин торайиб борарди.

Бернадот, Мармон, Даву, Ней, Ланн, Сульт, Мюрат – бу атоқли саркардалар улкан шахмат тахтасидаги олтин фарзинлар бўлиб, ҳамиша музaffer устознинг зафар қуроли эдилар. Бири душман яширинган шаҳарга ҳамла қилса, бошқаси кўприкларни қўлга олиб, дўстни ўтказади, ёвга эса йўл бермайди...

Генерал Макнинг кўз олдига тортилган ҳар қават парда ортида тўсилган йўллар намоён бўлар, ҳар бир аниқ маълумот эса янги таҳликали хатарнинг хабарини берарди. Душманни маҳв этиш муддаосида ўжар хомхаёлга берилиб, биргина манзилга беҳуда тўпланган қудратли қўшин энди тарқатилаётган эди. Аммо кеч, жуда ҳам кеч.

Ана шунда ҳаёт-мамот жанглари бошланди.

Французларнинг йўлини тўсиш учун шошма-шошарлик билан тикланган Верtingен, Гюнсбург, Ландбер, Гальсбах ва Эльсингендаги тезпишар истеҳкомлар битта-биттадан яксон этилди. Бу зафар китобидан ўлмас саҳифалар бўлиб ўрин олди. Ушбу хусусда романнавис неларни ҳам ёза олсин? Бу зафарномалар тош лавҳаларга, тилларанг мисларга битилиб, француз аскарининг шон-шавкатини кўкларга кўтариб, авлодлар мулкига айланиб бўлган.

Буюк саркарданинг ўткир закоси мұяссар этган шукуҳли кунлар ҳар бир жангчига руҳ бағишлиб, жа-

соратини жунбушга солганди. Уларнинг афсонавий зафарига ақл бовар қилмасди, урушга кирган бутун бир қўшин ҳарбий асиirlар галасига айланарди. Французларнинг ўлжаси: олтмиш минг асир, йигирма генерал, бир ярим минг зобит, икки юзта замбарак, тўқсonta жанговар байроқ!..

Душманнинг орқа томонига айланиб ўтиши 8 ноябрда бошланиб, уч кун давом этди ва 11 ноябрда якунланди. Императорнинг амрини бажо қилиб, унинг номидан буйруқ берәётган маршаллар энди Эксельман, Лакюэ, Дюпон сингари жонфидо генералларни кашф этишганди. Ҳар бир учрашув хушбаҳт бўлиб, барча жанглар зафар билан ниҳояланарди ва олга босилган ҳар қандай қадам ғалаба келтираётганди.

Бироқ шундай бир лаҳза бўлдики, буларнинг бари энди чиппакка чиққанди гўё!

Наполеон Гюнсбург, Гогенрейхен, Верtingен томонларга Ней, Лани ва Мюратни жўнатиб, бу билан ўз стратегияси самарадор бўлиши, ҳамда Шульмейстерни кутқаришни назарда туттанди. (Ахир унинг хизмати кичкина эмас-да!) У Аугсбург учун бообрў қўмондон ва кўпі сонли қўшин зарур деб ҳисоблади-да, Сультни ўша ёққа юборди. Шундан сўнг императорнинг кўнгли яна бир заруратни ҳис этди: бўлак генералларга вазиятни шахсан ўзи шарҳлаб, муҳим буйруқларни ҳам шахсан бериши керак! У корпуслар суръатини жадаллатиш ва уларни ягона нуқтада сўзсиз бирлаштириш учун ҳараратдаги қўшинлари сари отланди.

Пешқадам корпуслар эндиликда ёв билан тўқнаша бошлаган эдики, қароргоҳини тарқ этишдан аввал бурчи ҳисоблаган муҳим бир масалани ҳал қилди: салоҳиятининг тафовути еру осмонча эса-да, унвони teng саркардалардан бошлиқ ва унга бўйсунувчилар тайинлади.

Айни хусусда у сарой таомилига амал қилди-қўйди: Мюрат буйруқ беради, унга бўйсунувчи Ланин Ней бажо айлайди... Ахир кимсан императорнин куёви назарда бўлиб, нариги икковнинг назардан қолиши табиий ҳол эмасми?

Наполеоннинг сафдошлари орасида Ланин ўз ақл закоси, жасурлиги ва метиндай иродаси билан ажра либ турарди. У том маънодаги асл саркарда эди. Ней га келсак, аскарларини бошлаб, довулдай жангга кир гудай бўлса, унга бас келадиган баҳодир йўқ: матонаот шон-шавкат деган калималар унинг қаҳрамонлигини ифодалашга мутлақо ожиз! Лекин бу икки марша императорнинг тож-тахтига бегона, уларнинг «шаҳ зода зоти олийлари» деган мақоми йўқ, Бонапарт ои ласининг аъзоси эмас, инчунин, Мюрат сингари ар занда бўла олмайдилар ҳам.

Бу ўз шон-шуҳратига ортиқча бино қўйган закова соҳибининг калтабинлиги эди.

Фармонни эшитган Ланиннинг ранги ўчди-да, дами ни ичига ютди. Ней эса қизариб-бўзарди ва гулдира олди. Аммо улар ҳаёт-мамот жангига отланган саркардалар эдики, буйруқка бўйсуниб, ўз ҳарбий бурчларини адо этадилар.

Мюратнинг эса кўчасида байрам! Император душманни жиловлай оладиган олтмиш минг инсоннин тақдирини унинг қўлига топшириб қўйганди. Бу маршал энди нариги икки маршалга қараб «Буюраман! дейишга мутлақо ваколатли.

Ва у ўша ондаёқ шундай деди:

— Азизим маршал! Мен Дунайнинг ўнг соҳилидан юқорилаб боравераман, маршал Ней тиккасиг Гюнсбург томонга юриб, кўприкларни эгаллайди Сиз эса битта дивизиянгиз билан чап соҳилдан ҳамл қилиб, рўпарангиздан чиқсан ёвни тирқиратасиз.

- Жудаям соз-да, шаҳзода, – жавоб қайтарди Ланн сезиларли истеҳзо билан, – лекин дейлик, ганим сон жиҳатидан менга нисбатан устун бўлса, мададни қаёқдан оламан, кимга суюнаман?
  - Мен қочиб кетмайман, ўша ерда бўламан-ку!
  - Тўгри!.. Аммо сиз дарёнинг у бетида, орамизда кўприк бўлмаса...
  - Нимадан қўрқасиз, ўзи?
  - Ҳай-ҳай шаҳзода зоти олийлари! Менимча, Ланн ҳеч нарсадан қўрқсан эмаслигини билардингиз шекилли.
  - Албатта! Бунга ишончим комил. Лекин мен ҳам бундай демоқчимасдим.
  - Унда нима демоқчи эдингиз?
  - Мен айтиётган гаплар императорнинг буйруги, уни муҳокама қилиш бефойда!
  - Ҳа-а, буйруқ эдими? Фармойиш денг?.. Бўпти-да! Мен уни бажараман! Фақат илтимос, шу буйруқ ёзма шаклда бўлса...
  - Маъқул! Ҳозироқ...
  - Тезлатинг-да! Дарҳол бирорта алоқачи аскарим келади, бериб юбора қоларсиз.
- Эндиғи навбат Нейники эди. Миорат унга юзланди:
- Эшитдингизми, маршал, Ланн буйруқни ёзма равища олмоқчи!
  - Албатта!
  - Сизгаям буйруқ қофозда бўлсинми?
  - Бари бефойда, шаҳзода!
  - Нега?
  - Менимча, буйруқларингиз мантиқсизликдан иборат, уни бутунлай ўзгартирмаса бўлмайди. Менга ижозат беринг, шароитга қараб эмин-эркин ҳаракат қиласин.
  - Бундай қилишингизга сирайм йўл қўймайман!

– Шунақами? Режаларингиз ақлга сиғмайды...  
– Режаларим!.. Менинг режам душман билан юз лашган чоғдагина пишади. Бироқ мен қаёққа бориш кераклигини биламан, сизга шуни айтишимнинг ўзі кифоя қилмоги зарур!

– Ҳа, кифоя қилади, лекин ягона шарт билан: мең билан бундай оҳангда сўзлашмасликни талаб этаман Билиб қўйинг, мен сизга кеча погон таққан тирранчи эмасман! Мени маршал Ней дейишиади!

– Сизга яхши гап тўғри келмас экан! – хитоб қилді Мюрат.

Қаҳри қайнаган икки инсон урушқоқ хўроздаі бир-бирининг устига бостириб келар, қўзлари ет қўйгудай чақчайган эди. Яна бир оғиз сўз айтилса тамом, Нейнинг тугилган мушти ишга тушади! Анунда шармисорликни кўрасиз: аскарлар кўз ўнгиди уларни ёвга томон бошлаб борадиган икки саркард бир-бирининг гўштини ейди! Юрак ютган зобитлар нинг бирортаси уларни ажратишга ботина олмай тош қотганди.

Тасодифгина ўта қалтис бу вазиятта нуқта қўйди икковнинг қулоги остида норасиданинг овози қўнғи роқдай жаранглади. Ҳа, бу ўша бола: муҳим хабарни шу келтирди, шунчалар муҳимки, император ҳам ре жасини ўзгартирди.

Ганс Мюратнинг тезроқ йўлга чиқишига ва ўзини бирга ола кетишига мунтазир эса-да, Удино гренадёрлари сафини кўрди-ю, ҳаммасини унутди. Буларни Страсбургда – араваларда қийқириб куйлаб ўтганларида кўрган ва ҳавас қилганди. Ўшанда Карл дада ва Лизбета ёнгинасида турганларини эслади, йўлдаги азоб-уқубатлар, кечаги машъум кўргиликлар ёдиги келди. Ганс қалбини ўртаган ғам-ғуссалар чекинган дай бўлиб, беихтиёр аскарлар қўшигини пичирлаі

бошлади. Салдан сўнг унинг бегубор ва хийла ийманган товушида жанговар нақорат баралла жаранглай кетди.

Таажоқубдаги икки маршал эшикка ўтирилиб, ўтиб бораётган аскарларни кўришди ва ўша ондаёқ ҳовурдан тушдилар.

– Буйругингиз, бажарилади! – деди Ней аразли оҳангда. – Шу ерда ва шу бугун аламдан чиқишнинг мавриди эмас.

Ўзини ҳамон қўлга ололмаган Мират эса кечирим сўрашни асло истамаса-да, иликроқ ёки мулойимроқ бир сўз айтмоқчи бўлди, аммо ўша сўзни тополмади-да, безрайган ва кеккайган қиёфада қолди. Соқоли ўстган, юзига қон тепган, кўзлари газаб оловини сочэтган Ней шитоб билан чиқиб кетди.

Унга ҳайрат ва даҳшат билан боқиб қолган Ганс хиргойисини бас қилди.

## СОҚЧИНИНГ ЖОСУС БИЛАН УЛФАТЧИЛИК ҚИЛГАНИ

Шульмейстер қаттиқ сиқилиб, изтиробда қолди: Венднинг хиёнати зиммасидаги вазифа ижросини барбод қилди. Ўзи эса жондай азиз яқинларини – заифа аёли ва икки норасидани ҳам балога қўйди. Боз устига тарбиялаши, улғайтириши лозим бўлган ўн бир яшар болачани сарсон-саргардонликка йўллаб, ўз вазифасини унга юклади ва қийнади...

Уни Гогенрейхендаги маҳсус ҳибсхонага ҳайдаб боришаркан, паришон ва бекарор хаёлида ана шу ўйлар бўрондай тутён уради. Шульмейстерни саккиз кишилик қўриқчилар отряди ўртага олди. Унтер-зоббит уларга командир, икки соқчи орқасига боғланган қўлларидағи чилвирнинг учларидан тутиб, иккитаси

отишга тайёр милтиқни ўқталганича борарди. Сүқмоқнинг икки ёқасидан кузатувчи тўрт аскар ҳам йўлга тушди.

Бу қадар ўта эҳтиёткорликнинг сабаби аён: ҳазилакам душман бўлмаган маҳбус, қочиб кетиши мумкин Инчунин, ҳушёрликни ошириб, бунга йўл қўймаслиъ керак. Хўш, Шульмейстернинг хаёлида шундай фикр бормиди ўзи? У каби уддабурон одам учун ҳар қандай тўсиқ уч пул: фақат йилт этган умид учқуни бўлса бас Бироқ ўша учқун қани? Лекин излаган топади-да.

Ҳибсхона деворлари қалин, мўъжаз деразаси иккита темир косов билан тўсилган, бақувват эшиги қулф ташқарида турқи илондай совуқ соқчилар...

Эшик беркилиши биланоқ маҳбус қалбида умид учқуни пайдо бўлиши мумкинми? Ақл бовар қилмаса-да, бўлиши мумкин экан. Шульмейстер гарифона каталакда ёлғиз қолгандаёқ озодликнинг лоақалярми ўз қўлида эканини ҳис этди. У кирмасидан бурун ҳужрадаги темир-терсақларни, арқон-чилвир ва тахта-тараша бўлакларини, яъни қочиш учун қуроқ бўлишга ярайдиган ҳамма нарсани ташқарига чиқариб ташлашди.

Ягона мебель лақилдоқ курси бўлиб, Шульмейстер ўшанга ўтирди-да, ақлинни пешлай бошлади. Аввал ихтиёрида қанча вақт борлигини чамалаб кўрди. Илдам отдаги суворий Вертингендан Ульмга бир ярим соатдагина етиб боради. Бош қўмондон ҳузурида (генераллар иштирокида) кенгаш бўлади, чавандоз буйруқни олис қайтишига камида икки соат керак. Жами - уч ярим соат. Лоақал шу муддат мобайнида Шульмейстернин жонига кўз тиккан балойи ногаҳоний йўқ.

Ҳавонинг авзойига қараганда, чамаси тонгти бешлар бор эди. Шульмейстер ўз-ўзи билан суҳбат бошлади:

– Соат бешни бояги уч яримга қўшсак, саккиз ярим бўлади. Агар саккиз яримгача бу ердан қуён бўлмасам, қатл этишади, демак, ўламан. Ҳа-а, баъзан одам ўз тақдирини олдиндан аниқлашиям мумкин. Аммо менга жиндай ҳордиқ лозим, билъакс, ақлли фикрлар тутқич бермайди. Қани, бемалол оёқ узатайин-чи!..

У курткасининг тутмаларини бўшатиб, аввал чап этигини, сўнгра ўнг...

– Ёпирай! – тош қотди у. – Бу нимайди?

Ўнг пой этигининг қўнжи гулчинидан то тиззасигача чокидан сўкилди-да, қўлига қаттиқ бир нима урилди.

– Э-э, эсим қурсин! Ҳалиям хийлагина давлатим бор, ахир. Минг франк... Тежоглининг иши – бежоли! Ақлимдан ўргилай, жаноб Вендни доғда қўйиш учун харажат катта бўлишини сезувдим-да. Қора кунга атаб тишимнинг кавагида (аслида этик ичида) яширган бойлик мана энди асқатади. Минг франк соат мили уч карра айлангунча етиб ортади. Банкир Увраг ҳам бунақа катта чиқимга ярамайди. Бунча пулни бошқа нимаям қиласдим? Ўлгудай очман, бироқ қорнимнинг ўзига бунинг ҳаммасини сарфлаб бўлармиди? Итдай ташнаман, лекин бу ерда ичклилик қани, омборхона қаёқда?

Ҳа-а, «омборхона»! Шу биргина калима чақмоқ бўлди-да, унинг ақл-идроқи ёришиб кетди: Шульмейстер «пардоз-андоз»ини тузатиб, дарчанинг олдига борди. Башарти деразанинг иҳотаси бўлмаганда, Шульмейстер ундан бемалол чиқиб кетарди. Бинобарин, бунақа орзуга йўл йўқ. Бари бир икки темир орасига бошини суқиб кўрди, юзининг ярми сиғди, бурни гиштга тегди, кўзлари очиқ ҳавога чиқди. Калласини у ёқ бу ёқса айлантириб, кулба атрофини «текширган» бўлди. Шульмейстер ўзининг бу ҳаракатини мантиқан танқидий баҳолади, албатта.

— Тирик жондан ном-нишон йўқ. Лақма одамгина бу ерда фақат соқчи ва ўзимгина борман деб ўйлади... Ҳай, шошган қиз – эрга ёлчимас, жин урсин, ахир биз ёш бола эмасмиз!..

У бир дақиқа обдан ўйлади ва деразадан пойгак сари йўл олди. Манзилга етиш учун икки одимгина «сафар қилди» ва эшикни муштлайверди.

Бунга жавобан ташқаридан кимдир ўдагайлади:

— Хўш! Нима гап?

— Гап шундаки, биродар, очлик ва ташналиктининг зўридан ўлиб қоламан. Соқчибошига айтинг, илтимос, менга у-бу берсин...

— Бошлиқ йўқ.

— Наҳотки?

— ...

— Биламан, оғайни! Австрия қуролли кучларига гап йўқ, Европа бўйича интизомда ҳеч бир қўшин унга teng келолмайди. Менга қўриқчилар тайин қилингач, уларнинг командири хабар олгани бир марта ўрнига икки марта келиб, текшириб кетса керак.

— Зобит йўқ! – такрорлади ташқаридаги соқчи қўрслик билан.

Шульмейстер ўзича пичирлади: – Айни муддао-ку!

— Агар, зобит бўлмаса, – деди у овозини чиқариб, – сержантга айтолмайсизми?

— Ухляяпти.

— Келадими?

— Йўқ!

— Қанақасига? Мени ёлғиз ўзингиз муттасил қўриқлайверасизми, сизни алмаштиришмайдими?

— Бунинг сизга дахли йўқ! Мен сиз билан гаплашмаслигим ва сизниям гапиртирмаслигим зарур, тақиқланган. Жим бўлинг, акс ҳолда чақираман.

— Кимни?

— Сержантни-да!

— Яхши, дарров чақиринг, худди шуни сўраяпман-ку!

Шульмейстер кулги овозини эшитди ва синов учун сукут сақлаб турди-да, ўзича гапирган бўлди, аммо атайнин шундай қилаётганини сездиргани йўқ:

— Бари бир акашак бўлиб ўламан шекилли! Жиндай ароқ топилса, катта пул тўлардим-да!

Кўриқчи индамаса-да, ерга қўйилган милтиқнинг шиқирлагани эшитилди, демак, эрталабда томоқни ҳўллаб олиш ғаразидаги соқчининг нафси ҳакалак ота бошлади. Шульмейстернинг зийрак сезгиси панд бермаганди: посбоннинг томоги тақиллагани аниқ. Қоровул ана шу ширин хаёл орзусида обдан лаззатлансин учун жосус яна синовчан сукутга чўмди. Сўзсиз кечган дақиқалар соқчининг иштаҳасини балойи нафста айлантирганига ишончи комил бўлгач, янгидан қармоқ ташлашга саъй қилди.

— Каллам қурсин! — деди у жўрттага овозини кўтариб. — Каллайи саҳарда ичкилик топиб бўладими? Ҳали ҳеч ким уйғонган эмас-ку. Сабрдан бошқа чора йўқ!

Оғир қадамлар эшик яқинига келди, ичкаридан тирқишига қадалган қулоқлар динг бўлди. Посбоннинг овози бағоят мулойим тортгандики, Шульмейстер мастона ҳузур билан унинг ушбу илтифотини тинглади:

— Мабодо пулингиз бўлса, ароқ топишнинг йўлини қилардим, уй эгаси ҳозиргина уйғонди.

— Ташаккур ошна! — деди маҳбус қувлигини пардалаб. — Мен тақдирга тан бердим, жиндай кута тураман энди. Сизга гап тегиб қолмасин тағин.

Бу саркашлиқ шайтоннинг жиловидаги соқчининг умидларини барбод қилаёзди.

— Ҳеч кимга билдирмайман. Хижолат чекманг.

- Башарти сизни алмаштиргани кеп қолишишса-чи?
- Унгача камида бир соат бор. Хавотирланманг.
- Бўлти! Азамат йигит экансиз-да! Энди диққат қилинг, мен эшик тагидан тангани тиқаман. Сиз унг мезбоннинг бисотидаги ҳамма аъло нарсаларнин ҳам энг аълосини сотиб олинг, қайтими ўзингизга сийлов.

Деворнинг қулоги бор. Бу тўгри, аммо ҳибсхонада деворнинг кўзиям борки, у ҳатто бурганинг.. бурганинг оғзини ҳам кўради. Аслида девормас маҳбус кўради, бу – аниқ. Шульмейстернинг нигоҳи тирқишда: қоровул остонаяга эгилди, мазахўраклињ билан ҳаловат тангасини излади, аммо ҳарчанд уринмасин, тополмади.

- Қани ўзи? – тўнгиллади. – Бўла қолинг.
- Тош бор экан, остона остидан ўтмаяпти. Кулбани бир айланиб, дарчага кела қолинг.
- Иложи йўқ. Бурчакда девор бор.

Шульмейстер буни боя кўрганди, мақсадга етиш йўлида сипоришлаб гапирди:

- Бўлмаса эшикни қия очинг. Қўлингизда милтиқ бор, қиличингиз турибди, сиздан қочиб қаёққаям борардим? Хавотир олманг.

Ташқарида сокинлик. Соқчининг кўнгил кўчасида хизмат бурчи ва балойи нафс ўзаро жангга киришганга ўхшарди. Эшикни очиш – қалтис, ичкилик имаслик – чатоқ. Дарвоҷе, қамоқдаги жин ургурнин афт-ангори беозоргина кўринади. Қолаверса, қочиб қутулмоқча урингудай бўлса, беҳуда овора бўлади соқчининг оёқ-қўли бақувват, абжир, тутади, додини беради.

Валинеъматига айланаёзган қўриқчини нафс бари бир енгажагига ишонган Шульмейстер унинг тафаккур онларига халақит бермади. Аксинча, сұхбатдоши-

ни кўндиrolмагани учун надомат билан оҳ урди ва гурс-гурс қадамлаб курсига қайтганини ҳам эшилтириб қўйди.

У ўтириши билан эшикка қалит солинди ва зангла-ган қулфнинг тили фижирлади.

Бу нима деган гап ахир маҳбус бўлса-ю, очилган эшик томонга отилиш ўрнига шунчаки ёвқараш билан кифояланса! Шу мумкинми? Шульмейстер ана шу «номумкин»га бардош топа билди. Аслида қўлидан нима ҳам келарди? Қочмоқча уринса, остоңада қаққайиб бир дев турибди, боз устига тиш-тирноғигача қуролланганки, дарҳол маҳбуснинг танобини тортади. Жосус бепарвогина деди:

– Ие, ўзларими?

У қўлидаги олтинни аскарга тутди.

– Менга ишониб, заб иш қилдингиз-да!.. Энди тезроқ бора қолинг, эшик қулфлангач, сиз у ёқда, мен бу ёқда туриб, улфатчилик қилолмаймизки, яхиси икки шиша оп келаверинг. Мана, тангаям биттамас, иккита: киссамдаги бор бисотим шу, уни асраб нима-ям қиласдим?.. Эртагача не гап, не сўз...

Аскар яйраб кулиб олди, бу гапни ҳазил деб тушунганди. У пулни олиб, ташқарига йўналган чоғи Шульмейстер яна чақирди:

– Менга қарагин! Стакан оп келсанг яхши бўларди, шишадан ичишга тоб-тоқатим йўқ.

– Жуфтлаб оп келаман: сен ичкарида, мен ташқарида... эшикка уришириб ичамиз-да.

У кетди, қулф-қалит яна шиқирлади. Соқчи милиқни кесакига суюгани ҳам эшитилди. Кейин ҳамма ёқса жимжитлик чўкди.

Шульмейстер курсидан турди, адёл ўрнида устига ёпинаётган почапўстинни ерга солиб ёнбошлади-да, қилт этмай ётаверди.

Саноқли дақиқалардан сўнг эшик очилиб, бошиг стакан «кийдирилган» шиша билан соқчи кириб келди. Маҳбуснинг аҳволидан ҳайратга тушди:

- Мазангиз қочдими?
- Ҳа, сал-пал. Афтидан чарчоқ ва совуқ дард қилд) шекилли. Аммо анави зормондадан қуйиб берсанги: малҳам бўлса ажабмас.
- Юрагингизга қил ҳам сигмайди, ҳа-а... Бай-бай Юзингиз ёруг, номарднинг ишини қилганингиз йўқ ку! Мана, ичиб олинг-чи!
- Сиз-чи!
- Мендан ташвишланманг! Шишанинг биттасин бурчакка яшириб кирдим.
- Ёлғиз ўзим ичгим келмаяпти-да...

Соқчи ялинтириб ўтиргани йўқ. У чиқиб, стака билан қайтиб кирди ва илтимосга илтифот кўрсатиб маҳбус улфатининг шишасидан ўзига тўлдириб қуйди-да, шартта сипкорди. Шульмейстер эса ўз ризқин ерга тўқди ва қадаҳни узатди:

- Яна битта оламан, тўлдириб қуяверинг!

У ичса, соқчининг ҳам ичмоғи муқаррарки, жс сусга худди шу керак...

Чорак соатда аскар оёғида турмайдиган даражад «пишди» ва иккинчи ароқдан ҳам ўз насибасини нўт этмоққа ғайрат қилди. Аммо шишадаги сокин суюқликнинг тўртдан бир қисми унга буюрмаган экағ стаканга ортиқ дахл қилолмади, негаки бир қоп гўшт дай чўзилиб қолди. Энди Шульмейстер унга «ғамхўрлик» қилмаса одамгарчиликдан бўлмасди, «улфат» нинг белидаги камарини бўшатиб, мундирини ечи олди. Сўнгра яхшироқ ҳордиқ олсин учун тумшуғин деворга ўтириб ётқизди-да, устига ўз почапўстинин ёпиб қўйди – шамоллаб қолмасин учун эҳтиёт шарда.

Шундан кейин Шульмейстер Оффенбург полкининг гренадёрига айланди, фақат панталонни алмаштиришга улгургани йўқ. У ана шу қиёфада бошига шапка кийиб, елкасига соқчининг ўқланган милтиғини (ўқдони билан) осди. Эшикнинг қулфини икки марта бураб, қалитини девордан у ёққа улоқтирди.

Ҳеч қанча юрмасдан айғоқчининг хаёлига бир фикр келди. У изига қайтиб, ўзи кетадиган томонга эмас, унинг тескарисига беш-олтита тилла тангани сочиб юборди: ҳам «нўхат полвон»дан эсдалик, ҳам соқчилар янглишиб, бу ёқ қолиб, у ёқдан излашаверади.

Шульмейстер шундан сўнг шоша-пиша водий сари йўл олди.

## ГАНС СОГИНТИРИБ ҚЎЙДИ

Родек анча вақтгача ўғлининг нега йўқлигини аёлга билдирамади. Тонг отди. Уйда чумолидай уймалашган жангчилар яна аввалгида махфий буйруқ олдилар-да, яшин тезлигига ғойиб бўлишди. Айтишларича, жойини ўзгартирган душман томонга бостириб боришармиш...

Бу аснода олис йўлда уриниб қолган аёл ҳамон ухлаб ётарди. Аскарлар жўнаб кетгачгина кўзларини очди ва мутлақо хотиржам кўнгилда ҳар нарсага қизиқувчан Ганс томошалаб юргандир деган хаёлга борди. Родекка ҳам шу холоса айни муддао эди, албатта.

Лизбета ўз навбатида бунга ҳисса қўшиб, ширин тил билан бетиним бижирлардики, она қалбига хавотир ва ғам-қайгу дахл қилолмасди.

Тонг ҳам «қартайди»: Ганснинг ҳамон дараги йўқ. Шаҳарга эса у келмагунча жўнай олмайдилар. Берта Родекка шуни айтаркан, боланинг хаяллашига нисбатан унинг парвойи фалак туришидан ҳайрон эди. Қол-

ган-қутган егуликлар билан тамадди қилиб олишга' у Лизбетани кундузги уйқуга ётқизди.

Ана шундагина Бертанинг қалбини шафқатсұ ваҳима босди. Айтиш мүмкінки, бегубор қизалоі нинг шириң сўзлари онанинг ҳаловатини ҳимояла турғанди. Лизбетанинг кўзлари юмилгач эса уни кўнглида матонат қолмади. Родек ҳам энди изтиро чека бошлаганди, Бертага тасалли бергудай сўзни а тараардикি, тополмасди. Вақт ўтгани сайин ғам-ғусс зўрайиб, у илк бор виждан азоби деган оғир қийноқе учраб борарди.

Гансни не балойи азимга гирифтор қилганини қатил билан айтсин? Ўн бир яшаргина ёлғиз болакаи заифгина норасида, хавф-хатар тўла йўл, зим-зи тун... Бу қўргиликка шу гўдакни кўпни кўрган Родек жўнатди-да, ачинмади, аямади...

Бир-бирининг пайига тушган икки мамлакат, икк қудратли қўшин, олов сочган икки аждаҳо ва улар гижишаётган майдондаги жажожи бола. Тамоман танҳо ҳеч бир најоткори йўқ, мавҳум манзил сари дўстлағни излаб боради... Ҳа, Родек ўша онда эсини еб қўйга экан шекилли, тентакларча жиноят содир этди.

Модомики манави онаизор билан икки гўдакни-хавфсизлиги ва ҳимоясига кафил экан, шу аҳдин бузганига, ўзининг ўрнига муштдай болани жўнатганига иқрор бўлиб, жавобини берсин-да!

Родек аввалига Ганснинг ҳеч кимни тополмай теда қайта қолишига умид сақлаб, шу билан виждан олдида ўзини оқлаб олишга кўз тутганди. Бироқ эндек, бола ё ўзича, ё кимнингдир зўри билан оли олисларга кетганки, қачон қайтиши ёлғиз Парвади горга аён.

Родек эрталабдан бери бир неча бор у ёқ бу ёқн беҳуда айланиб, ахтариб кўрди. Аммо бехосият жим

житлик ва ташландик қишлоқнинг нохуш сукунатидан довдираб қайтди, холос. Унда Бертани овунтиргудай заррача мадор қолмагандики, ҳатто сўзлашгани ботина олмаётганди.

Ахийри Родекнинг юзига ҳам ошкора саросима соя солиб, бу Бертанинг ташвишини даҳшатга айлантириди. Ҳозиргача бирнав ўзини тутиб, сабр қилган бўлса, энди мудҳиш бир васвасанинг чўриси эди.

Ўша ондаёқ машъум хаёл миясини чулғаб олди:  
Ганс қайтмадими, демак, уни ўлдириб қўйишган!

У ўзини ўша болага жон риштаси билан боғланиб қолганини чуқур англади.

– Болажоним, қайлардасан? Нима қилиб юрибсан? Родек, айтинг, жигаргўшам қани?..

Онаизорнинг кўз ёшлари, оҳу-ноласи қариянинг бағрини ўртади ва кўнглида борини тўкиб солди. У аскарлар хўрлаганини, оппоқ соchlари билан оёқости бўлганини, қалби интиқомга тўлганини айтди. Ва ўзининг аҳмоқона фикрига, ўта енгилтаклик билан, ўйлаб-нетмай бир лаҳзада ножӯя қарорга келиб, бола бечорани французларга йўллаш қутқусида кўзлари билан сўзлашганига иқрор бўлди.

– Жажжи Жанингизни жонимдан ортиқ кўришимни билардингизку! – деди у армон билан. – Икки марҳумга уни кўз қорачигидай асрашга ваъда бериб, буни ҳар ҳолда бажара олганимни ҳам билардингиз. Шу боис уни ўша ёққа юбораётиб, қандай аҳмоқлик қилганимни ёки мени жин чалиб кетганини баҳолаш ўзингизга ҳавола. Демак, эсим ўзимда бўлмаган, ваҳоланки, бу юмушга у мажбур эмасди. Тўғриси, бу аҳмоқликка қандай йўл қўйганимниям билмайман. Унинг кетиши менга зурур келган эдими? Мана энди ақлим етялтики, ўшандаги кўз менини эмасди, Жан кўринмай, билинмай, сездирмай эсон-омон қутулган-

да ва ҳуштак чалиб белги берганда, бундан суюнган одам ҳам мен эмасдим. Ҳа, шунақа эди...

Берта йиғлашни бас қилди. У қишлоқ томонга азмойиш назари билан тикилиб қолдик, гүё хавф-хатарга ўзини урган ўғилчасининг новдадай сиймоси намоён бўларди. У мўйсафид оғасига қўл чўзди.

– Сиз ҳақсиз, оқкўнгил Родек. Худо хоҳласа, кичкингийимиз қайтиб келади, албатта. Аммо уни йўлга отлантирган сиз эмас. Руҳлар ҳамиша барҳаёт, уларни фоний дунёда биз кўрмасак-да, жондан азиз жигарбандларини бокий дунёда ўзлари кўриб турадилар! Эҳтимол, шундай бўлишини унинг падари хоҳлагандир, ахир унинг руҳи биз билмагани билади, кўрмаганимизни кўради-да... Ўша руҳ сизнинг кўзларингиз ёрдамида ўғли билан гаплашган бўлса ажаб эмаски, бу ҳам фикримнинг исботи-да. Ганс бизни бунчалар ҳалак қилган бўлса-да, унинг мақсад йўлида жонини тика оловчи баҳодир ўғлон бўлаёттанидан отасининг арвоҳи шодмон эмас дейсизми? Биз боятдан бери Жан деб атаётганимиз-чи? Ҳолбуки, кечагина Ганс демасмидик? Буларда сир-синоат йўқми?

Тақводор бретониялик бу олийжаноб мантиқдан бир тўлғаниб қўйди. Бертанинг ўта бамаъни хулосаси унга тасалли берганди: қайғуси ўша-ўша бўлса-да, виждони хийла ором олганди. Дарҳақиқат, ҳозирги кўргиликда у сира ҳам айбдор эмасдир. Негаки хотирамиздаги барҳаёт ва ҳур аждодлар то тирик эканмиз, ҳамиша ҳамроҳимиз бўлгани ҳолда бизнинг тутқиндаги жисмимиз билан гоҳо сўзлашмоқча йўл тополмайдилар. Хўш, бунинг аксини қим исботлай олади?..

Бертани ортиқ ғамга ботирган ҳол шу эдики, энди ўзини ўққа-чўққа урувчи бир жони иккита бўлди, азоби ҳам икки ҳисса ортди. У уйқудаги Лизбетанинг тўшагига яқин борди. Қизалоқ кўзларини очди. Уй

тинч ва сокин, тунги ғала-ғовур йўқ, гўё дилҳоҳ янги вазият унинг уйғонишини табрик этарди. У мовий осмонни деразадан кўриб, қия эшикдан қушлар чугурини эшитди-да, беғубор ва баҳтиёр жилмайди. Қизча Бертанинг бўйнига осилиб, пинжига тиқилди.

– Акам қани, Берта она?

Шўрлик аёл ўз ғамини яширди:

– Уни бугун кўролмайсан, асалим. Ҳалигача қайтгани йўқ.

– Қайда ўзи?

– Аскарларни томошалаб юрибди шекилли.

– Зўр-ку! Ганс мазза қиласкан-да!..

Акасининг ҳузур-ҳаловати учун қувонган сингилча қарсак урди. Сўнг каравотга ўтириб олди-да, жиддий қиёфада сўради:

– Ўғил болалар жа-а ҳарбийларни яхши кўради, а, тўгрими?

– Лекин... ҳа, миттивой.

– Ҳамма болалар шунақамикан?

– Буни нега сўраяпсан, қизим?

– Менимча, аскарларга ҳеч бир бола Гансчалик қизиқмайди-да.

– Шундай деб ўйлайсанми?

– Бўлмаса-чи! У доимо ўшалардай бўлишни хоҳлади. Аммо милтиқ кўтаришга ҳали кичкина-да, а?

– Албатта, жудаям ёшлиқ қиласди.

Лизбета бир лаҳзагина ўйлаб (у ҳеч қачон узоқ ўйлаган эмас), дарҳол ўта беғараз маслаҳат берди:

– Бу гапни ўзига айтиш ярамайди. Жудаям кичкинасан дейилса, хафа бўп қолади, Берта она!

– Хавотир олма, оҳугинам! – деди аёл ва ўзини тутолмай йиглаб юборди. – Афсуски, энди мен у билан гаплаша олармиканман ўзи?

Лизбета бу ташвишга ақли етмай бир довдираб олди ва ўша ондаёқ ўчган рангига тагин қон югурди.

— Лекин... ҳа-я, Берта она, нима гапинг бўлса ҳози  
роқ айта қоласан! Қара, ана Ганс, ўзи!

Берта ўгирилди ва жигаргўшасини ўз кўзлари би  
лан кўрди: у эшикка суюнганича қулиб турарди. Онаи  
зор унининг борича чинқириб юборди, бу қувончдағ  
кўра қўрқувга ўхшарди:

— Жа-ан!

У дарҳол олға отилиб, боланинг рўпарасида ти:  
чўкди-да, чўлпиллатиб ўпаверди.

Бехосдан бўғиқ отишма овози эшитилиб қолди  
Деразалар зириллаб, уй силкинаверди, қўрқиб қетгағ  
Лизбета йиглаб Бертанинг оғушига отилди. Ганс эса  
магрур ҳолда эшикка суюнганича бошланаётган жанг  
ни баҳодирона қиёфада кузатарди.

## РОДЕК МАРШАЛ МЮРАТНИНГ ЙЎЛИНИ ТЎСДИ

Уруш деганлари шугина экан-да! Наҳотки?

Боланинг хаёлий тасаввуридаги даҳшатли манза-  
рага нисбатан мавжуд жангларнинг кўламидаги та-  
фовут еру осмонча эди. Поёнсиз кенгликлардаги ҳар-  
бий ҳаракатлар болалар ўйинидай арзимас ва шунча-  
ки тууларди унга.

Ганс Мюратнинг бош штабидаги зобитлардағ  
бирининг отига мингашган ҳолда совут-қалқону қу-  
рол-аслаҳаларга ҳайрат ва ҳавас билан боқиб борарди  
Вертиген энг тепада жойлашган бўлиб, ташланди  
қишлоқларнинг қоқ марказида эди. Ана шу кимсаси:  
манзилга яқинлашиб боришаркан, Ганс суворийдағ  
илтимос қилди:

— Тўхтаганимизда мени отдан тушириб қўйинг  
бир оёғимнинг чигалини ёзиб олай.

Ерга тушгач эса унинг ортиқ сабри қолмаганди  
олисдаги таниш уйни зобитга кўрсатди-да, дала ошқ

ўша ёққа ўқдай учди. Ганс кеча ўз кушандаларидан қочган бўлса, бутун дўстларидан қочиб борарди.

Ана шу югуришида немис соқчилар отрядининг отларига икки марта кўзи тушди, улар узун чилвир билан боғлаб қўйилганди: олдиндагиси ҳашакка анқайганича бош эгган бўлса, яна бир гала аргумоқ девор ортида туарди. Совут кийган суворийлар тўда-тўда ҳолда ўтириб, индамай кавшанишмоқда. Нарироқдаги дўнглик ёндарасида эса оппоқ мундирдаги пиёдалар гурӯҳи кўринди. Чоги улар ҳужум ниҳоясида шу ерга кўтарилиб, кўринмас ёвдан ўзларини панага тортишган эди.

Буларнинг бари бўлғуси «гўзал» ҳужумнинг, «қизиқарли» штурмнинг ва «чиройли» хунрезликнинг аломати эдик, бола минглаб «актёр» иштирокидаги гаройиб «томоша»ни ҳалитдан тасаввур қила бошлиганди.

Аммо остоңада кузатиб турган боланинг кўз ўнгида бўлак бир «саҳна» намоён бўлди: – ердан бир ҳовучгина булут кўтарилиди-да, унинг ёнидан пайдар-пай ўшанақа булут чиқаверди ва ўзаро туташиб, оппоқ ва узун ҳошия тусини олди. Водийнинг ўртасидан бошланган бу чизиқ Ганс ўтиб келган қишлоқлардан бирига уланди. Бошқа бир тутун отнинг жигасига ўхшаб кетарди: у ҳужум қилинаётган яқин ферма ва боғлардан кўтарилиб, тезгинада ҳавога сингиб кетаётганди.

Бу «беозор» булутлар ажал уруги эканини Ганс қаёдан ҳам билсин? Уларнинг ҳар бири биттадан қонли белги бўлиб, аскарларни тутдай тўкаётганини ҳам у билмасди, албатта.

Ҳозиргача муттасил олға босаётган қоп-қора ҳошия эса тараддулданиб, тўхтади-да, хийла орқароқса гисарилди. Сўнгра бир ёйилгандай туюлиб, тартиб билан сафланди. Лочинкўз Ганс кузатаётган бу оний

ҳолат француз қўшинини шон-шарафларга бурковчи жанговар қадам эди. Эскадрон командири ҳозиргина икки юз нафар драгунга шундай буйруқ берганди:

– Ҳамма отдан тушиб, менинг ортимдан олға! Қишлоқни қўлга оламиз!

Бу Мюратнинг ишончли адъютантларидан бири бўлиб, Гансни Наполеон штабига олиб борган Эксельманнинг ўзгинаси эди. Драгунлар ҳужумга отилишдан аввал ўқ ёғдириб, пистирмада писиб ётган австрийлик суворийларнинг жонини олиб бўлишганди.

Ана ундан сўнг французлар қишлоқдаги уйларни бирма-бир ишгол қила бошлишди. Агар тешиктуйнуклардан йўл топиб, орқа-олдига қарамай ўзи томонга қочиб келаётганлар кўринмаса эди, Ганс ватандошларининг марди майдонлигига шоҳид бўломмай қоларди. Эгасиз отлар ўнг келган тарафга ўқдай отилар, тизгинига оёги илиниб, ағдарилиб тушарди. Мюрат қўл остидаги икки эскадрон герцог Альбертнинг икки эскадрон кирасирларини ва Латур қўмondonлигидаги икки эскадрондан иборат енгил кавалерияни батамом қириб ташлади...

Ганснинг саргузаштга ташна кўнгли энди ўрнига тушди: жанг дегани ана шунаقا бўлса-да! Ҳалиги тутунлар ортидан замбараклар гумбури эши биларди. Ие, анави аскарлар жа-а тонги талқон этгудай эди-ку, нега энди думини хода қилган бузоқдай қочмоқда? Анавилар-чи? Бошқалар ҳужумта ўтса-да, нима учун ерда узайганича ётибди?

Ўзи ландовур ва қуёнюрек деб ўйлаган бу жангчилар тирик эмас, ўлик экани Ганснинг хаёлига ҳам келмасди!

Жажоқи ҳакамнинг назарида инфантериянинг<sup>1</sup> ҳамласи ҳам мақтовга арзигулик кўринмади. Битта

<sup>1</sup> Инфантерия – пиёда аскарлар.

карега<sup>1</sup> уюшган тўққизта австрияликлар батальонини минг кишилик суворийлар отряди бутун бир соат мобайнида исканжага олиб, тўхтамай ўққа тутди. Четдан қараган одамга бу ёш болаларнинг беозор ўйини эди: бир қатор пиёдалар таслим бўлиб, уларнинг олдидан қилич силтаган чавандозлар у ердан бу ерга ўтиш билан овора...

Дам-бадам француз драгунлари ўз жонлари қасдидаги душман найзалари томон отилардилар-да, дадил олға ўтолмасдан парокандаликда чекинишарди. Сийраклашган сафларни тартибга солиб, яна ва яна ёв устига ташланардилар. Бу ҳужумларнинг барига ягона зобит раҳнамолик қилаётганини жигасидан сезиш мумкин, лекин у ҳар гал отини янгилаб жангга киради. Буни қотиб кузатаётган Ганс ўша чавандоз Эксельман эканидан, ҳар сафар оти нобуд бўлиб, бошқасини минишга мажбур бўлаётганидан бехабар эди.

Француз кавалеристларининг сиқуви шунчалик зўрайдики, енгилмасдай кўринган беш минг кишилик зич ва мустаҳкам каре тумтарақай бўлиб кетди. Замбаракларини ташлаб, ҳалок бўлган ва ярадор қуролдошларини ҳам унуган икки минг душман қўл кўтарди... Боиси маршал Ланн майдонга кириб, жонли қалъа ортига Удино гренадёрларини сафарбар этиб, чекиниш йўлинни тўсиб қўйганди.

Кути учган ёвнинг қолган-қутгани ҳеч нарсага қарамай қуён бўларкан, тўғри Ганс томонга ёпирилиб келарди. Қочоқлар сони дақиқа сайн ортиб, ё боланинг ёнидан ўтиб кетиши, ёки жонини сақлаш учун уйга кириб олиши ҳам мумкин. Ганс шу лаҳзадагина урушнинг нималигини англади, негаки у энди қўрқа бошлаганди.

<sup>1</sup> Каре - ҳамма томондан бўладиган ҳужумни қайтариш учун тузилган пиёдаларнинг гужланган сафи.

Ана, қочоқлар овози, юзлари ҳам аниқ күринмоқда чарчоқ, ғазаб ва даҳшатдан бу чеҳраларда ранг қолма ган. Анча-мунчаси қуролини ташлаб, командирларға бўйсунишни бас қилган ва дуч келган тарафга ўзини урмоқда. Аксариятнинг милтиги қўлида, йўл-йўлакаи ўқлаб боради. Агар уларнинг нияти қишлоқча кириш бўлса, демак, яшириниб олиб, сўнгги томчи қони қолгунча жанг қилишдан тоймайди.

Ганснинг бунга ақли етиб туради. Лекин унинг яқи нида «томоша»ни кузатаётган яна бир «мухлис» борки болани эҳтиётлаш бирор дақиқа хаёлидан чиқсан эмас. Душман қишлоқ остонасига етиб келгач, кекса шуан нинг забардаст қўли Гансни ичкарига тортиб олди. Ўшадамдаёқ эшик зич ёпилиб, ортидан темир тамба қўйилди. Деразалар мустаҳкамланди, йўлакларга рўзгор ан жомлари ва мебеллардан «баррикада» кўтарилиб, орқи эшикларгача очилмайдиган қилинди. Берта ва Лизбетани пастки хонага киритиб, устидан қулф солиши: ўл тегмайди, бирор очолмайди...

Ганс нимқоронгилик тутқунига айланганди Ташқарида душман сурони, ўнгда, сўлда – ҳаммёнда ноинсоний бақир-чақир. Милтиқ қўндоги зарби, синаётган ойналар, томдаги ғалва, черепицанин қарсилаши, хирқиллаган чинқириқлар, шошилинг буйруқлар, ур-ийиқит – буларнинг бари дўзахни ёдга соларди.

Сўнгра жимжитлик чўқди!.. Демак, жангга орзу манда душман қулай маррага ўрнашди ва ҳимояланган ҳолда француз сафларини қаршилашга шай, милтиқлар ўқланган.

Француздар узоқ куттиришгани йўқ.

Тиш-тирногигача қуролланган «соққабош» гре надёрлар қишлоқча ҳамма ёқдан ёпирилиб, аёвси: қирғин бошлишди. Ҳеч бир.gov уларга писанд эмас

таслим бўлмаган душман фақат ўлиб қутулади, қўл кўтаргандаргина афв этилади.

Улар бир йўла йигирмата уйни беаёв исканжага олишди. Нисбатан сокин қўшни уйдаги оффенбурглик ўн икки нафар гренадёр сўнгти имкониятга қадар қаршилик кўрсатиб, охирида ёлғиз ўзи остона ҳатлаган пастаккина бир поручикка таслим бўлишди. Поручикнинг тўрт қуролдошидан учтаси душман ўқидан йиқилди. Тўртинчиси найза ўқталиб, олга отилмоқчи эди, поручик унга имо қилди: «шошмай тур!» Ўзи қиличини қўлтиғига қисди-да, қўли етадиган немислардан бирининг елкасига туртди: «бу ёқса чиқ!» Ана шунда ўн кишининг ҳаммаси португесини бўшатиб, қуролини деворга сужди ва қўлини кўтарди. Поручикнинг шериги эса асиirlар қаторлашиб бўлгач, ўлжа қуролларни қўлга олди. Поручик зинада ётган уч ярадор шеригини асиirlарнинг гарданига юклади.

Энди душман қаршилик кўрсатишни бас қилди. Французлар узил-кесил ғалаба қозонди. Шульмейстернинг маълумотларигачув тушган генерал Мак мутлақо додга қолганди. У ишонган дивизияларни французларнинг авангард қўшиниёқ яксонлаб, омон қолган ва ярадор бўлган австрияликлар асири олинганди. Дунай соҳилидаги қишлоқлар ҳам биринкетин французлар қўлига ўтди, ҳамма уйлар тинтиб чиқилди.

Вертигенда биргина уй дахлсиз ва бетараф қолди. Барча деразалардан милтиқлар олов пуркади, фақат шу уйнинг деразаси очилгани йўқ, бу хонадондан кўчага бирор дона ўқ узилмади. Қишлоққа яширган австрияликлар қўндоқлар билан эшикни бузмоққа бекуда уриниб кўришди, французларга эса жанг-жадал чоги бу бинога киришнинг асло зарурати йўқ эди. Зоро, бошқа иморатларни мажбуран тинчлан-

тирган бўлсалар, бунинг ўзи кўнгилли равища сукут сақлайверганди.

Асиrlарни аввал Донаувертга, ундан Франция чегарасига жўнатишмоқчи эди. Улар сафланар экан, зобитлар жимжит уйга ҳайратангиз қизиқиб қолишиди.

- Ичкарида ҳеч ким йўқмикан?
- Қараб кўриш керак.
- Бирор ўлжа бизни кутиб тургандир?
- Балки кирамиз...
- Нега? – эътиroz билдири биров. – Кириб кими кўрамиз? Ўтакаси ёрилиб, ертўлага бекиниб ётган бир тўда хотин-халажними?

Шунинг устига генерал Эксельман келиб қолди ва уни ҳам бу гапдан огоҳ этишиди.

– Эътиборли бўлиш керак! – деди у. – Бирортаям кулба тинтувдан мустасно эмас! Қани, кўрайлик-чи.

Генерал дарҳол отдан тушиб, қиличнинг дастаси билан эшикнинг лўкидонини тақиллатди.

Ўша лаҳзадаёқ оғир темир тамба даранглади, гўё уйдагилар фақат шу сигнални кутиб туришганди. Калит шиқирлаб, эшик оҳиста очиларкан, ичкаридан бўладиган ҳужум эҳтимолига қарши бир газод жангчи милтиқларини шайлашди.

Остонадаги соchlари оппоқ мўйсафид билан жажоқи бола пайдо бўлди.

– Ие, ие! Ўзимизнинг болакай-ку! – жонланди Эксельман. – Ҳой, ўзингмисан?.. Хайрият, топиб олдим сени! Бизни боплаб қўйдинг-ку! Нега қочиб кетдинг, йигитча?

Ўзига шунча одамнинг тикилиб туришидан Ганс бир эсанкираб олди.

- Мени шу уйда кутишаётганди-да.
- Ким кутарди? Манави одамми?

— Албатта! — у мўйсафид дўстини хафа қилмасликлари учун алоҳида таъкидлади: — Албатта! Маршал ҳузуригаям мени шу киши юборувди-да.

— Азизим, бу фикр миянгизга қандай келди, а?

— Ўзим бора олмасдим, командир, — деди Родек жиддий қиёфада, — қўл-оёғим кишанбанд эди.

У кўчада тўпланган оқ мундирли асиirlарга бир сидра назар солди.

— Анавилар мени зинапоянинг темир тўсинига боғлаб қўйишганди.

— Биродар, уларнинг додини бериб, ўчингизни олдик.

— Албатта! — деди Родек.

Ганс гапга қўшилди:

— Онам ва кичкина синглим ҳам шу ерда бўлиб, мендан хавотир олишаётганди.

— Жуда соз! Айни муддао! Қара-я, бошка уйлар бизни қийнаб турган мушкул дамларда манави уй мустаҳкам француз истеҳкоми бўпти-да. Ижозат беринг, дўстларим, мен бир кириб кўрайин. Ҳамманинг номидан матонатли мададингиз учун бу кичик гарнizon аҳлига миннатдорчилик айтишга бурчлиман ахир.

Родек ва бола четга ўтиб, Эксельманга йўл бўшатишиди. Шу пайт чопиб келаётган отлар дунури эшистилиб, еру кўкни титратувчи олқишлиар, «ура» садолари янгради. Йўлда уймалашган асиirlар ўзлари хоҳламаган ҳолда икки ёқقا терилиб, суворийларга йўл очиб, эҳтиром кўрсатдилар. Ўз штаби ва шотирлари билан маршал Мират пайдо бўлди. Зафар қувончи ва ифтихордан юз-кўзи ял-ял ёнаётган маршалнинг мундирни ҳам юлдуздай чараклаб, от устидаги бекиёс қомати қиличга ўхшарди. Унинг ортидаги маршал Ланинг юзи тунд ва жиддий.

- Гренадёрлар қичқириб олқишилашди:  
– Яшасин император!  
Мюрат уларга хуштабассум билан бош иргади:  
– Император номидан ҳаммаларингизга ташак-  
курлар! Зоти олийлари сизлардан хурсанд!
- Маршал очиқ эшик олдидаги Эксельманни кўрис  
қолди. Шердил зобит қаддини гозлаб, ҳарбий эҳти-  
ром бажо қилди. Мюрат отини у томонга бурди.
- Командир, ҳамманинг оғзида бир гап: бугун барча  
хужумкорлар аввалида фақат сизни кўришибди, – деди  
Мюрат барчага эшиттириб. – Мен карени яксон қил-  
ганингизда иштирок этдим, холос. Маршал Ланнині  
айтишича, эрталабдан буён йигирма карра ўлимнин  
юзига тик боқибсиз. Бунинг учун энг олий мукофотга  
муносибсиз, инчунин, ўлжа байроқларни император-  
нинг оёқлари остига ўзингиз ташлаб, зоти олийларига  
зафар муждасини ҳам ўзингиз топширасиз. Зоро бундай  
шараф ҳеч бир мукофотдан кам эмас!
- Гурур ва ифтихор тўлқинидан Эксельманнинг юзи  
дувва қизарди. Ланн эса табриқ ўрнида унга оталарча  
мехр билан боқиб, қўулларини самимий илтифот би-  
лан маҳкам қисди.
- Ие, сиз бу ерда нима қилиб юрибсиз? – сўра-  
ди Мюрат ҳайратангиз. – Кўзларимга ишонмайман!  
Ахир бу йигитча менинг жажжи қадрдоним-ку!.. Ана  
холос, Оффенбургдаги мезбоним ҳам биргами? Хайр-  
ли тонг, Родек жаноблари! Ўшанда – икки ҳафта бу-  
рун – жудаям шошилинч кетиб қопсизлар-да. Сиз би-  
лан айнан ғалаба айёмида яна топишамиз деб ўйла-  
ган ҳам эмасдим.
- Кекса шуан гулдираб қўйди:  
– Баъзан хоҳламаган ишингни қилишгаям мажбур  
бўларкансан-да!
- Шунинг устига ичкаридан Берта чиқиб келди.

– Ажабо! Ўзингизми, хоним?! – ҳаяжон аралаш хитоб қилди Мюрат.

Ўша дақиқада Франция маршали ўзининг кимлигини тамомила унуганди: бирор жиловдан тутгунича ҳам тоқати етмай шартта отдан тушди. У сочлари олтин мисол нотаниш паривашнинг истиқболига беҳад эъзозу эҳтиром билан ошиқардик, бундан ҳамма чексиз таажжубда эди. Остонада ҳайкалдай Берта ва унга ёпишган жажожи Лизбета: аёл шу туришида муқаддас она сиймосининг ўзгинаси эди!

Маршалга йўл бериб, барча ўзини четга олди.

Мюратнинг шу маъсума аёлни ёқтириб қолгани рост ва маршал Бертага бу кунги ғалабанинг раҳномаси бўлиб кўриниши ҳам ҳақиқат. У бекиёс шодликка ёки қалб сирларига уйғун ғолиблик ифтихоридан масур эдики, ақлинни олган гўзалга қўлларини чўзиб, олга ошиқди.

Аммо унинг йўлини Родек тўсиб чиқди: юзи қатъий, нигоҳи жиддий эди, афтига қараганда, у шу тобда болтадан ҳам тоймасди. Кекса шуан шаҳзоданинг кўзларига тик боқди ва секингина таъкидлади:

– Маршал жаноблари, мени афв этасиз, аммо бу уй ажалдан жон сақлаган шўрликларнинг бошпанаси, илтимос, кирманг!

Ҳайратдан кўзлари чараклаб кетган Ганс оқсоҷ дўстига анқайиб қолганди. Ранг-рўйи бўзарган Берта ўзини ичкарига олди. Қаҳри қайнай бошлаган Мюрат хижолатини яшириш учунгина хоҳолаб кулди.

– Бу нима деганингиз, азизим?

– Демоқчиманки, жаноби маршал, кунлардан бир куни бирорларга меҳмондўстлик билан бағримни очгандим ва улар тузлиғимги туфламоқчи бўлишди.

Шу-шу Парвардигори оламни ўртага солиб онт ичдимки, модомики мен манави заиф бандаларнинг

дахлсизлигига кафил эканман, минбаъд ҳеч бир инсонга меҳмоннавозлик қилмаганим бўлсин!

– Сиз шу гапларни обдан ўйлаб гапиряпсизми? Дарҳол ҳибсга олдириб, турмага тиқишга қодирлигимни ва бу оиласдаги ўрнингизни эгаллашим мумкинлигини билмайсизми?

– Биламан. Сиз маршалсиз, мени йўқ қилиб юбориши сиз учун паша ўлдиришдан ҳам осон!.. Аммо мен нодон уруш тугади деб ўйловдим-да!

– Хуллас, ичкарига киролмайман, сиз бунга йўл қўймайсиз, шундайми?

– Мутлақо шундай!

Эксельман олға чиқиб, қўмондонга нимадир деди ва маршал Родекка ўдағайлади:

– Манави зобитнинг айтишича, мен келгуним-ча уни ичкарига таклиф этибсиз, демак, бошқаларга мумкин, фақат менга мумкин эмасми?

Жавоб қайтариши лозим кўрмаган Родек бош иргаб қўя қолди.

– Бунга чидаш мумкин эмас!

Тутоқсан Мюрат «мени ҳақоратлашганини кўриб ҳам индамай тураверасизларми?» дегандай зобитларга термулди. Бироқ улар Мюратни ҳайрон қолдириб ўзларини четта олишарди. Лани Удино гренадёрларининг командирини чақириб, асиirlарни сафлантириш ва жўнатиш ҳақида буйруқ берарди. Эшик олдида соқчилик қилаётган адъютантлар қўмондон ўз танишлари билан суҳбат бошлаганини кўрдилар, бинобарин, улар постни ҳам, иккала маршални ҳам тарқ этишди... Эксельман ҳам нарироққа бориб олганди.

Бу билан Мюратнинг иззат нафси топталмаган бўлса-да, ғуури азият чекканди. У Родек томон ўтирилиб, амирона оҳангда савол берди:

– Булар ҳазилингиз эдими? Хўш, энди бас қиларсиз, а?

Унга жавобан вандейлик қария қулочини маънодор кериш билан кифояланди.

Бироқ Мюратнинг кўз ўнгида бу қалтис вазият дарҳол ўзгариб кетди. Ҳалитдан бери бир сўз демаган Ганс тилга кирди:

– Эсинг жойидами, Франц тога? Нима деяпсан ўзи?

У мўйсафидга шундай қаттиқ тикилдики, боланинг кўзларидағи теран маъно ва сўзсиз танбеҳ ҳар қандай эътироиздан, ҳатто фармондан қудратлироқ эди. Гўё гойибдан пинҳоний буйруқ келиб, Родек қулочини йигди ва деворга суяниб, йўл бўшатди.

Ҳеч шубҳа йўқки, болакай ҳайратини изҳор этмоқчи бўлганди, холос. (Ахир кечагина ўзи шу басавлат арбобнинг мададига муҳтож эдики, бугун унга беиззат муомала қилиш мумкин эмас-да.) Бироқ боланинг отасига мулозим бўлган қария унинг талабини бўлакча тушунди. Унингча, шу биттагина жумла аслида илоҳий ироданинг изҳори бўлиб, ҳамма гина-кудуратни, кекни унутишга чорлардики, меҳмондўстликка, ҳатто маршалга қучоқ очишга буюрарди! Родекка қолса, бу қачонлардир ўзи сўз берган хожасининг, яъни энг одамий бир инсоннинг гойибона амри эдики, шу тобда боламас, ўша валинеъматининг барҳаёт кўзи кўриб, тили сўзлаб тургани аниқ!

Родек аждодлари руҳи мужассам жажоқи хилқатга бош эгди, унинг талабига бўйсунди ва йўлни бўшатди. Оний машмашани қамал саросимаси оқибатидаги руҳий довдирашга йўйган Мюрат тезда ҳовридан тушиб, мийигида кулиб қўя қолди ва осто надан ўтди. Родек болакайга ўртаниб ва орзиқиб тикилганича, ичкарига кирган маршални ҳатто кўргани ҳам йўқ.

Лизбетани бағрига босган Берта ерга боқиб, тек қотди. Мюрат оҳиста савол берди:

– Демак, хоним, мени кўргани кўзингиз йўқ эканда, шундайми?

– Албатта шундай! Ҳа, жаноб маршал, сизни кўраман деб, кўзим учиб тургани йўқ эди! Дарвозабонликни зиммасига олган покомон инсон сизга нисбатан ноҳақлик қилди, у йўлингизни тўсишдан олдин менга лоақал бир оғиз индамаганди. Лекин сизнинг келишингизни олдинроқ билганимда, бу ерлардан аллақачон бош олиб кетган бўлардим.

Аёл маршалнинг кўзларига тик боқди. Шаҳзода гўё эркалагандай уни бағрига босаркан, ўзига мутлақ ишонч билан сўради:

– Бу гапингизга қараганда, мендан жудаям ўпкалаб қолганга ўхшайсиз.

– Сиздан? Кечириб қўясиз, шаҳзода, аммо мен фақат жондай азиз яқинларимнинг – эрим ва манави гўдакларнинг тақдирини ўйлайман, холос. Ёруғ дунёда бошқа бирор инсоннинг менга сирайм қизиги йўқ.

– Биламан, бу ҳақда айтгансиз. Билардим... Бунга шубҳам йўқ.

– Энди бас, шаҳзода, ортиқ чакагингизни чарчаверманг! Сизнинг бурчингиз – аскарларни олға бошлиш, менинг бурчим – эримни севиш ва олдингиздаги икки болани тарбиялаш! Келинг, бурчларимизга садоқатда собит бўлайлик!

Аёл Наполеоннинг ноибига астойдил таъзим бажо қилиб, кетишга чоғланди. Берта қадам босар-босмас Мюрат яна сўз очди.

– Эрингизнинг ҳаётини сақлаб қолишни император менга буюрганини биласизми?

– Сизга? Эримнинг ҳаётини-я? У ўзи ҳозир қаерда?

– Ие, хабарингиз йўқмиди?.. Мен ўғлингиз айтгандир дегандим!

Ҳамма ҳаяжондан юзи бугриқсан болакайга қарди. Ганс индамай Берта онанинг ёнига келди, у кўё

ёшларини зўрга тийиб турарди, аммо бир амаллаб ўзини тутди.

– Мени кечиринг! Бу ердан қуён бўлгач, тунда Карл дадамни кўрганимни айтишга тилим бормади, сени хафа қилгим келмади-да, онажон. Қолаверса, император уни қутқаришга аскарларини жўнатди ва бундан бир иш чиқадими-йўқми, буниям билмайман! Мен уни дарё бўйида кўрганимда асирикда эди, ўзимни танимаганликка олдим. Негаки мени тутиб, у билан юзлаштиришганди, Карл дадам агар таниш эканимиз аён бўлса, оқибати жуда ёмон бўлажагини англатди...

– У сен билан сўзлашдими, ўғлим?

– Энг охирида сўзлашди. Аммо аввалига кўзлари билан... Сен ўша онда уни кўрсайдинг, унинг кўзлари меҳр булоги эди, Берта она! Мутлақо хотиржам! Чехрасида қўрқувнинг зарраси ҳам йўқ. Қойилман! Сирам кўрққани йўқ... Кейин, император Наполеон билан кўришганимда, отамни австрияликлардан қутқаришни сўрадим. Унинг ҳузурига мени шаҳзода Мюрат олиб борди-да. Ахир Карл дадам ёнимиздамас, душман қўлида бўлиши армон эмасми? Ўшанда император елкамга қоқди ва «хўп» деб ваъда қилди...

Берта Ганснинг ҳикоясини охиригача эшитиш учун ўқраб юборишдан базур тийилди. Болакай гапириб бўлгач, уни бағрига босди-да, Мюраттга юзланди:

– Ахийри нима бўлди? Эримнинг тақдири сизнинг измингиизда экан, маршал, императорнинг буйругини адо этдингизми?

– Бурчимни бажардим, хоним, бор имкониятни сафарбар этдим. Онт ичиб айтаманки...

– Демак, дадам қаерда эканини биларкансиз-да? – унинг сўзини бўлди Ганс.

Бу кўндаланг савол бошқа ҳар қандай одамни довдиратиб қўярди, фақат маршал Мюратни эмас.

– Шошмай турасиз! – деди ва эшик томонга юзланиб чақирди: – Командир Эксельман! Сизга австрияликлар қўлидаги бир асир, императорнинг Шульмейстер номли махфий жосуси ҳақида топшириқ берувдим. Хўш, уни бутун ахтардингизми? Нимаики билсангиз, биздан яширманг, барини рўйрост айтинг! Хўш?

– Маъзур тутасиз, маршал, – деди Эксельман. – Мен асирининг Гогенрейхенга жўнатилганини, ўша қишлоқда кучайтирилган соқчилар назорати остида қаттиқ қўриқланишини аниқлаган эдим. Қўлимдаги ҳарбий асиirlар орасида уни танийдиганлар «одам қиёфасидаги иблиснинг ўзгинаси» деб таърифлашди. Эмишки, Шульмейстер ўткир соқчилардан бирининг мундирини кийиб, ҳибсонани тарқ этган. Қандай чиққанига, қаёққа кетганига ҳеч кимнинг ақли етмаяпти.

– Шу гапларингиз ҳақиқат эканига ишончингиз комилми?

– Шак-шубҳа йўқ, маршал жаноблари! Ўша соқчилардан бири қўлимда: мен уни ўзим уйғотдим, Ҳа, ҳа уйғотдим! Негаки у ўлгудай бадмаст эди, Шульмейстер шу қоровулнинг мундирини ечиб олган, милтигиниям ўмарган ва . . . улган.

Ганс терисига сифмай қарсак урди ва сакрайверди.

– Билардим! У тутқич бермаслигини аниқ билардим! – хитоб қилди у.

– Аммо кейин-чи? Бу душман мамлакат бўлса, ҳамма ёқда ёв қўшинлари тўлиб-тошиб ётиби, йўллар тирбанд, ўта олдимикан? – сўради Мюрат.

– Албатта ўтган, жаноб маршал. Негаки мен ўз кўзим билан кўрган ўшандоқ мустаҳкам ҳибсонадан қочишни, озодликка чиқишни эплабдими, энди тамом, юлдузниям бенарвон ура олади!

Мюрат Бертага юзланди:

– Мана эшитдингиз, хоним, мендаги маълумотлар ана шулардан иборат. Энди айтинг-чи, императорнинг амрини бажарибмизми-йўқми?

– Гап йўқ! – деди аёл. – Эрим озодликка чиққанига шубҳам қолмади. Аммо... у тирикмикан?..

Мюратнинг кўнглидан кечди: «Ношукур аёл! Хизматимизга раҳматниям лозим кўрмади-я!»

Маршал худбинлик билан ўзига қанчалар бино қўйган бўлмасин, шу тобда батамом енгилганига иқрор эди: на куч-қудратнинг нуфузи ва на саркардлик шон-шуҳрати номусли аёлнинг вафо қўргонини забт этолмади.

Оффенбургда икков ёлғиз эдилар, бу ерда эса қайсар хотиннинг болалари ҳам ёнида. Энди ҳарчанд ҳужумга зўр бергани билан ғалабадан асло умид йўқ: унга бутун бошли оила қарши турибди. Жўяли биргина йўл қолдики, ими-жимида этагини ёпгани маъқул: қулай вазият ёки воқеалар ривожи йўл берса, обрўсининг борида кетиб олиши керак.

Остонада Ланн кўринди. Унинг истарали, шижаатли ва тўпори қиёфаси дилҳоҳ бўлиб, Мюратнинг девдай гавдаси бошидаги жига-пигалари бачкана, ҳатто кулгили туюларди. Бу одми матонат соҳиби жанговар кийимда, жигарсўхта маршал эса ясан-тусан қилиб олганибери – урушда, бошқаси – томошада гўё.

– Шаҳзода! – мурожаат қилди Ланн ҳурмат юзасидан қўлинин чаккасига тегизиб. – Менимча, вақтимиз беҳуда кетяпти. Башарти сиз бу ерда қолмоқчи бўлсангаз, мен бари бир кетишим керакка ўхшайди. Негаки биринчи дивизионим хийла олиста бориб қолди, унга мадад кучларини обормасам иложи йўқ.

– Албатта!.. Албатта! – маъқуллади Мюрат. – Бораверинг, муҳтарам маршал, сиз аллақачон кетиб бўлгансиз деб ўйловдим.

- Мен-а? Сизга индамасдан кета оламанми?
- Сафсатани қўйинг! Келишувимиз эсингизда йўқ-ми: ахир мендан сўраб-нетмай ҳаракат қиласверадиган бўлгансиз-ку!.. Дарвоҷе, кўнглингиз тўқ бўлсин, мен ҳам ҳозир йўлга тушаман.

Унга жавоб бериши лозим кўрмаган Ланн аёлга юзланди:

- Хоним, яхши қолинг!

У боланинг юзига енгил шапатилаб, елкасига қоқди-да, чиқиб кетди. Ланн индамагани билан ниҳоятда дарғазаб эди.

## ГЕНЕРАЛ МАК СЎНГГИ ТАЛВАСАДА

Берта билан хайрлашадиган сўнгги дамдагина Мурат ўзини қўлга олиб, хотиржам кайфиятга қайтди. У ақлини олган одми, магрут ва ориятли жувон билан самимий ва мулоим хайр-хўш қилди. Аниқки, маршал жанг майдонида ғолиб бўлса-да, бу аёл қошида мағлуб эди.

Берта ва Родек болалар билан ёлғиз қолишгач, ягона савол кўндаланг бўлди:

- Модомики Шульмейстер Ульмда йўқ экан, шаҳарга қайтиб нима қиласиз?

Бироқ шаҳарга боришимаса, жанг-жадал тинчигунча қаерда туришади? Францнинг ўйлашича, Оффенбургга қайтганлари дурустроқ эди. Аёл эса Вертингенда қолмоқчи, чунки бу ерда озми-кўпми дунёнинг ишларидан хабардор бўлишга имкон бор. Ганснинг фикрини бирор сўрагани йўқ, лекин у ҳам ўзиникини маъқуллади:

- Берта она, Карл дадам французлар томонга бориши аниқ экан, биз ҳам уларнинг ортидан кетаверайлик.

Булар ана шу уч маслаҳат устида иккиланаркан, қўққисдан эшик тақиллади. Родек меҳмонни кўрди-да, қаҳрли овозда бақирди:

– Сиз! Сизмисиз? Бу ерда сизга пишириб қўйибдими?

Ичкаридагилар ҳайрон: бобой нега заҳрини сочяпти? Келган киши ким бўлди ўзи?

Ганс коридордан ўтиб, қария «сийлаётган» хотинга кўзи тушар-тушмас суюниб кетди:

– Франц тога, уни ичкарига олайлик, – деди у. – Сен билмайсан-да! Мени мана шу аёл қутқариб қолган! Карл дадамни отмоқчи бўлган одамни қуролсиз қўллари билан бўғиб... У кекирдагидан бўғиб турганда, мен қочиб қутулганман. Билиб қўй, ўша ёмон кишининг қиличига қарши қуруқ қўл билан жанг қилган. Қўя қол, йўлни оч, ичкарига кирсин! Хуш кепсиз, Доротея хоним, марҳамат, Берта онам сизга раҳматини айтиб олсин!

Родек ҳеч нарсага ақли етмаса-да, кичкина хожасининг амрига яна бўйсунди! Ахир бутун бир оиласа хиёнат қилган сотқин аёл Шульмейстер билан Гансни қутқарган эмиш! Ё Парвардигори олам, нималар бўляпти ўзи?..

Ўта изтиробдаги Доротея бояқишининг инон-ихтиёри қўлидан тутган болакайдо бўлиб, ўттан тундаги таниш хонага кириб бораркан, ўша зулмат кечани эслатувчи буюмларни кўриб, юрагидаги машъум яралар янгиланди. У Ганс қўйиб берган стулга ўтириш ўрнига, Бертанинг қошига бориб, икки оёқлаб тиз чўқди. Берта унга мутлақо беадоват боққанча, ҳайратда эди. Доротея ҳоргин овозда арзи ҳолини бошлади:

– Хоним, мени танидингиз, а? Ўғлингиз ҳам, қувиб солмоқчи бўлган мўйсафид ҳам мени таниди... Лекин ишонтириб айтаманки, эрингизнинг дўсти менга

нисбатан ноҳақлик қилди! Мен маккорамас, баҳтиқаро бир қизман. Авваламбор, ҳузурингизга не мақсадда келганимни айта қолайин. Олдинига юрагим дов бермади, бироқ танамга обдан ўйлаб кўрдимки, келмаслигим мумкин эмас! Ёлвораман, гапимга қулоқ солинг, негаки гапиришнинг ўзи бўлаёттани йўқ. Муҳим хабарни етказишим зарурлигини биламан, лекин оғиз очишгаям мадорим етмай турибди-да! Ахир кечаси билан йўл юриб чиқдим ва туз тотганим йўқки, ўлгудай очман!

Бертанинг юраги ачишиб кетди:

– Шунчаликкайм борасизми, а?! Ганс, тез чиқиб, бир бурда...

– Йўқ, хоним, йўқ! Ташаккур! Шу тобда томогимдан увоқ ҳам ўтмайди, овқат кўнглимга сигмайди! Фақат қулоқ солинг, сўзлашимга изн беринг! Сизга бўлак ўтинчим йўқ!..

– Аммо... Родек, сиз холис одамсиз, бечоранинг аҳволини кўринг! – ён бермади Берта. – Ҳозир, шу тобдаёқ очликдан сулайиб йиқилади-ку!

– Гапимни айтиб олай! – деди Доротея ва гўё кувватини кўрсатиб қўймоқчидаёт қаддини жиндайгина тиклади. – Ахир биргина лаҳзаям ғанимат-да. Карл Шульмейстернинг топшириги билан келувдим... Сиз унинг хотинисиз-ку, шундай эмасми?

– Ҳа, албатта! – ўша онда рўпарасидаги очликдан силласи қуриган аёлни ҳам, унга жони ачиёттанини ҳам унугти. – Айтинг, тезроқ айта қолинг! Сиз уни кўрдингизми?

– Сизни кўриб тургандай кўрдим: эгнига немис гренадёрлари кийимини кийиб олганди, менга айтишибча, тезроқ чопиш учун милтиқниям ташлаб юборибди. Тинка-мадорим қуриб йиқилиб ётгандим, шунда кеп қолди ва мени таниди. Иккимиз Ульмда

тасодифан кўришган эдик. Раҳми келиб, ўрнимдан туришга ёрдамлашди. Шунда сизни кўрганимни, болаларингиз билан қайда эканингизни айтиб бердим. Афтидан, бу ҳақда эшигтан шекилли, ҳайрон бўлгани йўқ. У киши ўша ондаёқ бу ёқса келмоқчи эди, аммо ортида аскарлар тургани боис бунинг иложини қиломади. Шунда у ўйлаб кўриб, мана шу гапларни сизга етказишни қаттиқ тайинлади...

Доротея худди шу нуқтада ўз ҳикоясини тўхтагишга мажбур бўлди жажоқи бир қўл унинг енгидан тортди. У ўтирилиб Лизбетани кўрди, юзлари лола тусини олган қизалоқ қўлчалари билан бир тўғрам нонни узатиб турарди. Айтиш жоизки, уч энликкина шу егулик унинг ўзига эҳтиётлаб қўйилган сўнгти захира эди.

Қизчанинг кўзлари жиқقا ёш. Доротея бир сўз демасдан, бош буқди, бўзарган лабларида аянчли табасум кўриндики, бу билан гўё ташаккур изҳор этарди. Бироқ уни оғзига солмади-да, кафтига олиб, илоҳий мўъжизага боққандай ихлос билан тикилиб тураверди. Унинг бу қиёфаси дуо теккан табарруқ насибадан улуш олган тақводор аёлга ўхшарди.

Ганс хайриҳоҳлик билан қараб турганини кўргач, Доротея ўзини янада бардам ҳис этди. Кўнглида шундай бир эзгу истак жўш урдики, ҳозир ва ҳамиша фидойиликка қодир эди. Ундаги бу матонат ва жонфидолик фақат ўзига яхшилик қилган одамгагина эмас, ўша кишининг ализлари саодатига ҳам бахшида этилгусидир. (Аввал уларга Доротеянинг тоб-тоқати йўқ эди.)

– Жаноб Шульмейстер менга тушунтиридики, – яна тилга кирди аёл, – у зиммасидаги вазифа тақазосига кўра, шу яқин орадаги Эльсинген қишлоғига зудлик билан етиб бориши зарур экан...

– Эльсинген!.. Жудаям тўгри, мен императорга етказган хабарда худди ана шу жой бор эди.

Боланинг луқмасидан тагин ҳам руҳланиб, мулойим тортган Доротея майин жилмайиб қўйди. Ўзига нисбатан бу ишонч ва илтифот муҳитидан дадиллашиб, бамайлихотир давом этди:

– У менга: «Аёлим мени топиш учун йўлга чиқиб аҳмоқлик қилиби. – Кечирасиз, хоним, эрингиз айнан шундай деганди-да. – Унинг кўнглини тинчтиб мени ўша ердан (Эльсингендан) топиши мумкинлигини етказиб қўя оласизми? Ана шу жой тинч ва хавфсизроқ» деди. Ҳақиқатан ҳам бехатар жой... Шундан сўнг мен бу ёқса отландим, хоним, агар хоҳласангиз сизни ва манави норасидаларни Эльсингенга бошлиб борардим...

У сўнгги жумлани ирод қиласкан, ҳатто ёлворарди Доротея ҳалим ва муте қиёфада гўё садақа сўрамоқда фақат ваъдага вафо қилиш ҳуқуқини эҳсон қиласалаф бўлди!

Берта ўрнидан қўзголиб, ўзига пешвоз чиққач, Доротеяниң юзи кўклам чечагидай яшнаб кетди. Шульмайстернинг рафиқаси уни ҳам турғазиш учун қўл чўзган лаҳзада эса кўзлари ёшга тўлди. Сўнгра баҳтиёрлигидан беҳуш йиқилаёзди, негаки Бертанинг қуидаги самимий сўzlари тоза қалбнинг ишонч садоси бўлиб қулоқларига қуийлди:

– Таклифингиз учун минг-минг раҳмат, уни чин кўнглимдан қабул қиласман ва дарҳол йўлга отланаман.

Шундай қилиб, жанг-жадал саҳнасига уйғулаштирилган кенг кўламли ва зукко ҳарбий ҳийлалар ҳар томонлама хотималаниб борарди.

Наполеонга қолса, қўшиннинг яқдил ҳаракати ва уруш тасодифларига таяниб, бу уддабуронлигини ҳали давом эттириши мумкин. Негаки ўзи ҳужум қилгани сайин у томоннинг хом-хатала режалари пучга чиқаётгани аниқ кўриниб турарди.

Йўллар тирбанд: ҳарбий сафлар олдинма-кейин олға борар ёки бир-бирига қарши юриб қирғин бошлади. Французларнинг ҳаракатини тушунолмасдан Ульмдаги қўмондонлар саросимага тушиб қолишиди ва энди ишлар пачава эканига ҳам ақллари етди. Урушдан олдинги маълумотларни уруш кўламига таққослаб кўришди: бири – боғдан, бири – тогдан.

Эҳтиёт шарт деб, душман ўтиши кутилган манзиларга Ульмдан бир неча дивизияни жўнатиш лозим кўрилди. Эндиликда фронт чизигига айланиб бўлган ушбу мудофаа марраларига ҳар куни янги ва янги полклар юбориларди. Лекин бу оҳорли кучлар ҳам французларнинг сон жиҳатидан устун қўшини домига илинарди ёки зўрга қочиб қутуларди

Фурсатни бой бериб бўлган австрияликлар қаёқса бош урмасин, отни қамчилаган душман улардан барвақт етиб бориб оларди. Октябрнинг ўн биринчисида Гаслахда генерал Макнинг қиличини синдирган жанглардан бири бўлди.

Ўша куни эрцгерцог Фердинанд қўмондонлигидаги йигирма беш минг аскар генерал Дюпоннинг олти минг кишилик дивизияси билан «сузишди». Дюпон дивизияси Ней бошлиқ корпус таркибига киради ва Дунайнинг сўл соҳилида асосий француз кучларидан ажралиб, ҳеч қандай мададсиз қолганди. Агар австрияликлар дадил бўлиб, шунчаки ҳужумга ўтсалар ҳам уларни дарёга улоқтириб ташлашлари ҳеч гап эмасди. Бироқ амалда бунинг акси бўлиб чиқди: Дюпон ёв ҳужумини кутгани йўқ, шартта ўзи бостириб бора-верди. Қишлоқ ва ўрмонлар неча бор душман қўлига ўтмасин, қайтариб олаверди: ҳужумга ўтди, чекинди, яна ҳамла қилди. Бу тактикани у шунчалар ҳарбий санъат билан ишга солдики, кечки пайт майдонда ғалаба билан қолди. Музаффар генерал қўлида қанча

аскари бўлса, ўшанча асир олди: беш минг австриялик қўл кўтариб, таслим бўлганди!

Дюпон қанчалик шерюрак бўлмасин 12 октябрь куни кечаги зафар маррасини тарқ этди. Бу оқилона қарор эди, негаки оз сонли жангчи билан кўп сонли қўшинга қарши яна бир бор таваккал қилиш хавфли. Йигирма беш минг кишининг фожиаси ҳақида генерал Мак хабардор этилди, албатта. Ахийри унга ҳам Худо ақл берив, узоқни кўра биладиган генералларнинг сўзига кирди ва французлар очиқ қўйган йўлдан (Мюратнинг хатоси туфайли) фойдаланиш ҳаракатига тушди.

Мак генерал Ризени маҳсус буйруқ билан Эльсингенни фатҳ этишга юборди. Икки кундирки, округнинг тинч аҳолиси олдинги жанглардан ва бўлажак қирғинбаротлардан қўрқиб, шу ерда жон сақлаб ётарди. Ризе баландликларга келувчи йўлни мудофаа истеҳкомига айлантирди, чунки тепаликлар бой берилса, Михельсберг воҳасига йўл очилади, у ёги Ульмгача бир қадам қолади, холос. Генерал устунли ёғоч кўприкни бузиб ташлади. У французлар учун Дунайдан ўтишнинг ягона воситаси эди. Ризе бу тайёргарликларни яқунлагач, тасарруфидаги қисмлардан энг лочинкўз жангчиларни саралаб олди. Сўнгра улар дарёнинг австрияликлар кўлидаги соҳилига терилиб, мерганлар чизиги пайдо бўлди, орқадаги артилерия ҳам мададга шай эди.

Ана шу ҳолда улар душманни кута бошлидилар.

## ЖОСУСНИНГ ГОИЙБ БЎЛИШИ

Наполеон Аугсбургдан қайтган заҳотиёқ Мюратнинг манёврлари самараси ҳақида алоҳида ҳисобот талаб қилди. Ва ўша ондаёқ душманни қуршовга олган занжирнинг битта ҳалқаси айнан куёвининг айби

билан узилганини кўрди! У гапни чўзмади, иккитаги-на сўз айтди:

– Бу – аҳмоқлик!

Сўнгра у топқирлигини ишга солди: айбдорни уриб-сўккунча, бировлар бузган ўз режасини тузатиш ҳаракатига тушди. Муродини ҳосил этувчи кўприк йўқ экан, демак, янгисини қуриш зарур.

– Ёки эскисини таъмирлаймиз, олампаноҳ! – деди Ней.

– У қайси экан?

– Рўпарамиздаги кўприк-да, олампаноҳ, ҳайтовур унчалик бузилган ҳам эмас.

– Шуни-я, маршал? Ҳали шуни унчалик бузилган эмас деяпсизми?

– Албатта, зоти олийлари! Ана, ўзингиз аниқ кўришингиз мумкин, сувдаги устунлар бут-бутун!

Император Нейга юзланди, унинг кўзларига синов-чан боқиб, жилмайди. Нейнинг эса юзиға қон тепди.

– Агарда шу юмушнинг уддасидан чиқа олсангиз, ёруғ дунёда сизга teng келадиган инсон йўқ деган бўлур эдим, – кейин унинг елкасига қоқди-да, илтифот билан таъкидлади: – Айтишларича, Эльсингенни қўлга олсак, Ульм ҳам таслим бўлармиш. Жуда соз, биродарим, ўша Эльсингенни сизга топширдим! Башарти уни фатҳ этаркансиз, сизни герцоглиқдан юксакроқ шундай мақомга муяссар қиласинки, бунақаси ҳеч кимда бўлган эмас!..

Ней магур қоматини гоз тутиб, устидаги оғир жанговар чакмонини улоқтирди: саф-саф аскарлар кўз олдида байрамона мундир кийиб, орденлар тўла кўксини керган Франциянинг асл маршали намоён бўлди. У олга чиқиб, оғзаки буйругини эълон қилди:

– Кўприк тузатилиши билан, интизом ва тартибга биноан нариги соҳилга ёриб ўтамиш! Биринчи бўлиб ўтиш шарафига муҳандислар мушарраф бўладилар!

Зобитлар бир нарсадан қуруқ қоладигандай говур-ғовурга тушдилар. У бардам ва қувноқ овозда хитоб қилди:

- Хотиржам бўлинг! Иш ҳаммага топилади.
- Сўнгра у тап тортмай дарё ёқасига яқинлаши.
- Ўша ондаёқ душман мерганлари ишга тушди.

Наполеон ҳайратда: маршал ўзининг асл муддаосини ёв кўзидан жиндайгина ниқоблаш ўрнига дабдурустдан вазифанинг бошини тута қолди. Шу боис император қаттиқ безовталаниб, ташвишини ошкора изҳор қилди.

Ней ҳозиргина кўприксозларнинг пешқадам сафидаги жангчиларини йўқотди: улар Дунай соҳилидаги дастлабки устунлар ёнига борган заҳоти дарёга гарқ бўлди. У бошқаларни чақириш учун ўгирилганда олисдан кўзи тушди: император ординарецларидан бирига топшириқ бериб, ўзи томонга жўнатарди.

Наҳотки қандай қилишни ўргатишмоқчи? Ўз билганича иш тутгани қўймайдиларми?

У дарҳол буйруқ берди: ҳамма ҳаракатлар таққа тўхтади, кўприксоз сапёрлар бир амаллаб сафланиб олишди. У қаҳр билан отга минди ва император томонга учди, у шу дамда довулнинг ўзгинаси эди.

Йўлда ўзи томон келаётган адъютант билан тўқнашди ва сўради:

- Императордан буйруқ борми?
- Ҳа, маршал жаноблари!
- Жуда соз!

У бошқа гап сўрагани йўқ, тулпорига устма-уст қамчи босди, чолар зобит норози ҳолида қолаверди.

Ней яқинлашгани сайин ола-қуруқ киборлар давраси тобора яққолроқ кўринаркан, унинг кўзи илғатан биринчи одам Мюрат бўлди. У аниқ ҳис этди: ҳаммадан ажralиб турган, ўзи учун бадҳоҳ бу кимсанинг

яқиндаги ҳақоратидан алами зўрайиб борарди. Кеккайган олифтага қарши маршал қалбидаги газабнинг таърифига тил ожиз ва бу нафратни остидаги отнинг ҳар бир одими янада улғайтираётганди. Шу тобда аскарлар айнан Мюратнинг хатосини тузатишмоқда, у эса афтидан, ўз нодонлигининг қурбонларини томоша қилиб ҳузурланиш билан андармон!

Ней маршаллар ва шотирларидан олдинроқдаги Наполеон турган тепалик бўсағасига етиб борди: у ичидаги бор заҳрини оловга айлантиришга, куйдиришга шай эди. У овоз эшитилгудай масофага борганда, Наполеон қичқирди:

– Нега келдингиз, маршал?

– Менинг ҳаракатларим сизни қониқтиrolмаганини кўриб турувдим, олампаноҳ. Бироқ менинг қисматим аслида шунаقا: ҳамсоям қилган хатонинг касрига ҳужум боши берк кўчага кириб қолгач, жонимдан кечиб бўлса-да, қўшинга йўл очаман, ўша хатони тузатишнинг бундан ўзга чорасини билмайман!

– Бўпти!.. Майли!.. Мен сизни тўхтатмоқчи эмас, огоҳлантирмоқчи эдим, маршал! Ахир менга ҳали шунчалар кераксизки, сизни асрамасам, кимни асрайман, менинг маршалим?!

Икковнинг ораси уч қадам холос. Ней унинг қошида отдан ҳам, жаҳлидан ҳам тушгани йўқ.

– Сизни ўтказмаслик қасдида ўт очаётган душман мудофаа чизигидагилар, менимча, камида ўн саккиз минг кишига боради. Михельсбергдаги захира қисмлар бу ҳисобда йўқ. Улар қирқ мингдан кам эмасдир.

– Айтаверинг-чи, офтоби олам!

– Кўприксоз сапёрларингиз етарлими?

– Менимча, етарли! Агар камлик қилса, гренадёрлар бор.

– Гренадёрларингиз ҳам ҳалок бўлса-чи?

- Драгунларни сафарбар қиласан-да!
- Қанақасига? – пўк сўзлаб қўйди маршал Мюрат.
- Кавалеристларни сувга туширасизми?
- Ҳа, шаҳзода! – момақалдириқдай гулдиради тутоқсан Нейнинг заҳарли овози. – На чора, командири кўприкни бой бергач, аскарларини сувга ташлаймиз-да! Камина қалпогига жига боғлаб, катта йўлда от чоптириб мақтанган олифталардан эмасман! Бугун мана бу орденларимни кўксимга қараб отаверсинлар деб тақдим! Булар ярақласин, душман нишонга олсин, аскаримнинг юрагига санчиладиган ўқнинг адади камайсин!.. Сўнгра, ҳай майли...

Унинг рангида қон қолмаганди, маршал ҳамма гапни эшитиб турган валинеъматига юзланди:

- Ҳазрати олийлари менга кўприк ишини тўхтатиб, орқага қайтишимни буюрадиларми?
- Йўқ, маршал! Буюраман, қандай хоҳласангиз, ўшандай йўл тутинг!
- Миннатдорман, олампаноҳ! – бош эгди Ней.

У шундай деб, шпори билан отнинг биқинига урди-да, бир зумда Мюратнинг қошида пайдо бўлди. Эгардаги Ней императорнинг куёви томон эгилиб, унинг билагидан тутди: ҳамма генералларнинг, шотирларнинг кўзи унда эди.

- Томоша қилгани боринг, шаҳзодам! – деди у аччиқ киноя билан. – Агар бетингиз чидалса, бораверинг! Ўшанда кўрасиз, маршал Ней душманнинг кўзини бақрайтириб не ишлар қила олишини!

У бошқа бир сўз дегани йўқ.

Ҳамманинг юраги увишиб қолганди.

Ахир император кўриб турибди-я! Унинг кўз ўнгига шаҳзода зоти олийларининг қўлидан тутиш, дўқ қилиш, ҳақоратлаш қанақаси? Шунча одам олдида беҳурмат бўлиш, Мюрат учун тарсакидай гап эди!

Мюратга қўркув деган туйғу бегона экани барчага аён, лекин шу тобда ранги бўзариб, мурда тусига кирганди. У ер остидан император қайногасига назар солди. Унинг бу нигоҳидан шуни үқиш мумкин эдики, гўё у ўзигагинамас, олампаноҳга ҳам содир этилган беандишиалик учун ўч олишга ва қиличини қинидан сугуриб, Нейни тавбасига таянтиришга ижозат сўрарди.

Наполеон буни тақиқлагандай қўлини кўтарди ва Нейга қатъий танбеҳ берди:

– Сиз каби матонат соҳиблари ноҳақлик учун фақат душмандан қасос оладилар. Иш тўхтаб қолмасин, маршал, боринг, қандай хоҳласангиз, ўшандоқ қиласверинг. Менинг кўзим сизда бўлади.

Ней императорга сидқидилдан бош эгиб, таъзим бажо этди. У жонига кўз тиккан ақл бовар қилмас ballo-қазодан қутулгандай шодмон руҳ билан отига қамчи босди. Маҳрам зобитлари кузатувидаги маршал ўз жангчилари ва душманлари сари лочиндай учиб борарди.

Император, Мюрат, Данн ва бошқалар қонли қиргингагина эмас, мана бундай ажабтовур саҳналарга ҳам гувоҳ эдилар...

Бу ерда Дунайнинг кентлиги олтмиш метрга бориб-бормасди, ана шу оралиқда жуфт-жуфт устунлар сувдан чиқиб турарди. Уларни ўзаро туташтирувчи тўсинлар ниҳоятда узун ва йўғон бўлмоғи лозимки, ўша харилар тиш-тирногигача қуролланган қўшин ва оғир артиллериянинг залворига дош берсин.

Кўприксоз муҳандисларга керакли ходалар дарё яқинидаги дўнгликлар ортида ҳозирланиб, тупроқтепа бу жараённи ёв кўзидан тўсиб турарди.

Ней сал ичкаридаги устунларга яқинроқ бориб, бақирди:

– Юрагида ўти бор битта зобит ва битта сержант олдимга келсин-чи!

Отилиб чиқсан талабгорлар кўп эди. Маршал капитан Куазель ва номи тарих китобларида қайд этилмаган бир унтер-зобитни танлади.

Ней отини шигаб, Дунайга тушди, сув узангисигача чиқди, атрофига ўқ ёмғирдай ёғилиб кетди. Душман замбараклари ҳам гумбурлай бошлади, орқа тарафда снарядлар портлаб, маршалнинг бошига тупроқ сочилди.

Шунда ҳамманинг кўз ўнгида Куазель ва кичик зобит биринчи оралиққа яқинлашдилар: икков елкасидаги узун ходанинг икки учини устунларга қўймоқчи эди. Улар пайдо бўлиши билан даҳшатли портлаш гумбури эшитилиб, орқада бораётган кичик зобитнинг бел суяги парчаланиб йиқилди.

Бошқа бир шерюрак унинг ўрнини эгаллади, у сафдан чиқиши билан учинчи азамат олга отилди, ваниҳоят, тўсин устунлар устига ўрнатилди.

Ней бир қадам ҳам орқага чекингани йўқ, от устидага гоз туриб, буйруқбардорликни давом эттиради. Унинг зарбоф уқали мундири, кўксисда товланаётган олтинранг орденлар немис ўқчиларига осонгина нишон бўлиб, мерганлар фақат уни кўзлаб отишарди. Чиллаки чиллакини кўриб, чумак урармиш деганларидай, қаҳрамонлиқда ҳам ана шу ёзилмаган қоида бор: маршалнинг теварагида ўлимдан қўрқмай, жонини сўнгги гаровга тикканлар адади тобора ортиб бораарди. Бамисоли чумоли уясидай тинимсиз гимирлаб, ёғоч кўтариб келаётганлар ва уни қўйиб қайтаётганлар гужғон ўйнарди.

Бироқ жанговар қурилиш силжигани сайин мушкуллашиб, ахийри ўта хавфли тус олдики, тепадаги сапёrlар тахталарни ололмай каловланиб қолишиди.

Чунки аввалда сув кечеётган жангчилар тўсинни юқоридаги қуролдошлари қўлига бемалол узатардилар. Лекин дарёning ўртаси чуқур экани энди бунга монелик қилаётганди.

Боз устига ёв томондаги мерғанлар хуружга келиб, муттасил ўқса тутар, ўтирак сапёрларнинг қанчаси Дунай сувларига гарқ бўларди.

Энди нима қилса бўлади?

Кўпrikни битказмасликнинг эса мутлақо иложи йўқ! Боши қотган маршал Ней бирданига таажижубда қолди: бунга ақл бовар қилмаса-да, юқоридан зилдай ёғоч оқиб келарди. У биттагина бўлиб, гўё гойибона қудрат соҳиби имконсиз юмушга имкон яратиб қўйганди. Маршалнинг сапёрлари ҳам уни кўришди ва ўқ етмас масофага келгач, чангак билан тутиб олдилар-да, тепадаги ўртоқларига узатдилар.

Уни кўпrik тўшамасига ўрнатиб бўлдилар ҳамки, сув бетида яна бир тўсин лопиллай бошлади, уни кимдир абжирлик билан оқизаётганди. Сўнгра яна битта, иккита, учта...

Буни ўйлаб топган маршал Ней қўл остидаги зобит ҳатто оқимни ҳам ҳарбий кўпrikсозликка сафарбар этганди гўё. Бироқ бундай бўлиши мантиқан мумкин эмас! Негаки юқорироқда дарёning шундай эгирими борки, оқизилган ёғоч-тахта кўпrikка етиб келишининг шарти оғир: у фақат австрияликлар қўлидаги қарши соҳилдан сувга туширилиши зарур.

Хўш, нариги қиргоқдаги жанговар қуролдош ким бўлди?

Салдан сўнг бу саволнинг аниқ жавоби топилди. Афсуски, француз сапёрларига катта мадад йўллаётган кишини ёв ҳам пайқаб қолганди. Немис ўқчилари ўша нуқтани нишонга олиб, қўрғошин ёмғирини ёғдира кетди. Нейга ўхшаш малласоч одамини ана шу

дамда кўришди. У нафақат зобит, ҳатто оддий аскар ҳам эмасдики, эгнига оқ кўйлак ва тўқ жигарранг иштон кийиб олганди. Кейин ўзи яширинган бегона соҳилни тарқ этди ва бир-бирига боғланган учта тахта устида тик туриб, инон-ихтиёрини азим дарёга топширди. Но-таниш баҳодирни бу ёқдагилар қийқириб, завқ-шавқ билан олқишлий бошладилар, нариги қирғоқдан эса энди ўқ ёмғир эмас, жала бўлиб ёғиларди.

У эса душман томонга беписанд ва мағрур боқиб келар, қўлларини кўкси устига чалиштириб олган ялангтўш баҳодирнинг олтин соchlари дарё шамолида ҳилпиради.

Тўсатдан у ортига қалқди ва тиз чўкиб ўтириб қолди: манглайига мерган ўқи тегди... Йўқ, қўргошин фақат терисига ботган бўлиб, зарбнинг зўридан бир лаҳза ганиди, холос. У кўзига оқиб тушаётган қонни енгининг жияги билан сидирди-да, уни кутиб турган французлар қошига етиб, кўприк устунига тирмашиб олди.

Сапёрлардан бири уни ва маршал Нейни кўрсатиб, шундай луқма солди:

– Башарти омон-эсон битказолсак, унга «Икки зарринсоҳ кўприги» деган ном беришимиз мумкин!..

Чиндан ҳам кўприк битди! Аммо унинг ҳар бир ёғоч-тахтаси инсон қони билан ювилди, қоқилган ҳар бир мих аскар жисмини поралаган ўқча баробар эди. Икки соҳил туташиб, душман томонга йўл очилиши биланоқ пиёдалар тўлқини долғадай ёпирилди. Ана шунда кўтарилиган ур-тўполнонни кўриб, ганим кўприк ҳали ҳам ўз қўлида эканидан бир қувониб олган бўлса ажабмас. Негаки ҳамма ёпирилиб жангга ошиқарди, қуролларнинг бари урушга ташна. Француз қўмон-донлари уларни сафга тизишни, қалбида фидойилик ва матонат жўш урган шерюракларни тартибга солишини қийналиб бўлса-да, улдалашди. Гуж-гуж

французларга қарши отилган душман ўқи ҳам «яйраб» олди: қўрошиннинг зирачадай парчаси бекор кеттани йўқ, инсон кўксига бехато қадалди.

На чора, уруш – уруш-да! Лекин кўприкка ёв дахл қилолгани йўқ. Тутдай тўкилган роталар, сафлари сийраклашган батальонлар бари бир қаддини ростлади, омон қолган шунқорлар қарши соҳил тупроғига қадам қўйдилар. Мустаҳкам душман қўрғонидан йўл очилиб, улугвор қўшин ёппасига ташланди.

Қирлар, қишлоқлар бирма-бир забт этилиб, ахийри монастир ҳам эгалланди.

«Иккинчи зарринсоч», яъни бизнинг Шульмейстер ўз хизмати билан битказилган кўприкдан кўнгли тингач, милтиқ, ўқдон ва найзани олди-да, биринчилар қатори ҳужумга ўтди. Ҳамма унинг юрагига қойил қолиб, абжирлигига ҳавасда эди. Олдинги сафларда гренадёрлар Шульмейстерни танимасалар-да, уни мутлақо ўзлариники қилиб олгандиларки, уни тутунлар орасидан излашиб, чорлашар, унга етишга, ўзиб кетишга интилардилар.

Ҳеч кутилмаганда у кўздан ғойиб бўлди.

Шульмейстерга етолмай додга қолган ёш бир поручик ёмғир сувлари ювиб кетган сўқмоқдан бораётиб, унинг ўқдони ва найзасини топиб олди. «Зарринсоч»-нинг ўзи қани? Унинг ном-нишони йўқ. Ҳалок бўлдими? Жароҳатландими? Асирга тушиб қолдими? Буни ҳеч ким билолмасди.

Жанг барҳам топди. Туннинг қора пардаси дўстудушманга баробар: голиблар шон-шавкати, аёвсиз ўлим, зафар ва мағлубият – ҳаммаси тонггача пинҳон. Музаффар аскарлар хунрезлик лашаларини орзиқиб сўзлашар экан, ўз матонати билан ҳаммани қойил қолдирган, қони ва жонини бебағид бахш этган сирли шунқорни топа олмаётган ўдилар.

Шульмейстер қўшиннинг оғирини енгил, мушкулини осон қилгач, муҳим фикрга келди: энди у ўз жонажонлари, хотини ва болалари ҳақида ўйлашга ҳақли, албатта.

Афсус! У бошбошдоқлик ҳукм суроёттан қишлоққа умид билан кириб борди, бироқ на Бертани, на Ганс ва Лизбетани тополгани йўқ!

## АЛҚИССА, ҲАММА МУРОДУ МАҚСАДИГА ЕТДИ

Орадан тўрт кун ўтди. Генерал Мак енгилганига иқрор эса-да, Наполеоннинг таклифига жавобағ узил-кесил таслим бўлиш учун муҳлат сўради.

Мюрат австриялик қочоқларнинг изидан тушди Эрцгерцог Фердинанд бошчилигидаги бу тўда қуршов ҳалқасини ёриб чиққани билан ортидан қувис бораётган Франция маршалидан тепки еб, қунпаякун бўлди. Мюрат стратегия бобидаги ўз айбини суворийларининг матонати билан батамом ювганди: ў катта «ҳосил» кўтариб, ўлжа олинган байроқ ва замбараклардан «хирмонлар» уйди.

Маршал Ней энди ҳовридан тушганди. Император эса Вена устига қўшин тортиш тадоригида: «ўроқчи» легионлар шай, олисроқдаги «ҳосил» майдонига етис олсалар бас, «хирмон» чакана бўлмайди!

Шульмейстер императорга ҳазилакам хизмат қилмаган бўлса-да, унга кўриниш бериб, суюнчи олишга шошмасди, гир айланиб оиласини, фақат оиласини изларди. Улар шу яқин атрофда бўлишса-да, ҳеч-ҳеч топиша олмасдилар. Уни гоҳо ваҳима босади: уруш дегани тасодифларга бой, Худо кўрсатмасин, асирга тушган бўлсалар-чи?!

У Эльсинген атрофидаги ҳамма қишлоқларни кезиб чиқди. Вергинген орқали ортига қайтаркан

француз зобитларига ўзини танитмасликка жуда қаттиқ уринди.

Аёли ва кичкин тойларнинг лоақал изи топилса-чи? Доротея унинг топшириғини бажарганми – йўқми? Сўраб-сурештириб кўрди, шунга даҳлдор бир оғиз сўз эшиттаний йўқ. У Берта нинг олдига бордимикан? Эльсингенга кузатиб қўймоқчи бўлдимикан? Берта унинг таклифини қабул қилдимикан?..

Шульмайстер энди власвасага туша бошлаган, ўз иштирокидаги катта ғалабанинг лаззати ҳам татимаёттанди. Австрия қўшини батамом таслим бўлган лаҳзаларда урушнинг бу сирли қаҳрамони узлатга чекиниб, Михельсберг тог ён бағридаги ташландик чайлада ёш болалардай ҳўнграб йиглаб ётарди...

Ўша куни тонгда Ульм шаҳри рўпарасидаги тепалик ёндамасига ўрнашган Наполеон турнақатор ўтаётган қирқ минг ҳарбий асири кўздан кечирди. Атрофини бош штаб зобитлари ўраб олишганди. Француз пиёдалари тог ёнбағрига ярим доира шаклида сафланиб, суворийлар қуийидаги сайҳонликда бир чизиқча терилиб туришибди.

Асирларнинг энг аввалидаги генерал Мак қиличини узатди; Наполеон олиб, яна ўзига қайтариб берди. Ундан сўнг генералларнинг, кейин аскарларнинг гали келди. Улар белгиланган жойга қурол-аслаҳаларини ташлаб ўтишарди, ахийри катта «хирмон» яралди.

Маглублар музaffer саркардага қараб-қараб қўйсалар, зобитлар ундан кўзларини яширишарди.

Асирлар ўтиб бўлишди, ҳеч ким қолгани йўқ. Улардан кейин уруш шароитида «нонхўр оғизлар» аталувчи ҳарбийларнинг хизматкорлари, қариндошлари, хотин ва бола-чақалари ҳам бор эди. Ана шунда Наполеон кетишга чоғланди, аммо бу аянчли оломон орасидан бақир-чақир эшитилиб, қандайдир саросима

бошланди. Тутқунлар ғалаён күтарди деган хаёлдагы император ўша тарафга синчиклаб нигоҳ ташлади ва бир гала одамлар ўзи томонга келаётганига кўзи тушди. Оралиқ хийлагина бўлиб, бирор кимнинг афт-ан горини аниқ кўриб бўлмасди, бироқ улардан бир болға отилиб чиқди. У Наполеон сари чопиб келди-да отдан икки қадам нарида айюҳаннос солди:

– Жаноби олийлари! Анави ерда дадам бор!

Наполеон болани таниди ва жилмайди:

– Ёпирай! Яна сенми, шумтакавой! Дадам бор дейсанми? Хайрият! У тирикми? Нега ҳузуримга келмайди? Бориб айт, мен уни қачондан буён кутаман ахир.

Асиrlардан сўнг Наполеон қошида икки болғрага олган бир киши ҳозир бўлганини энди ҳамма кўриб туарди. Ганс уни шитоб билан судраб келарди, орқада қолмаслик учун пилдираётган Лизбета эса югуришга мажбур эди. Ҳам ийманган, ҳам ял-ял ёнган Берта уларнинг ортида, Родекнинг қўлига суюни олганди. Наригилар хийла олдинлаб кетган, сиёҳпӯш бу нозанин эса уларнинг изидан ҳадиксираб қадам ташларди. Уларни то сулҳ тузилгунча ўз уйида яширган Доротея бояқиши энди бу манзилга бошлаб келганди. Алқисса, у ўз бурчини адо этди ва орзуларига ҳам нуқта қўйди. Манави тўрт беозор инсон тўрт күн мобайнида унга гўё оиласий баҳт ҳадя этишган бўлса шу тобда ундаги қалб ардоғи ва садоқатни етим қилиб айрилмоқда эдилар. Мана, ўзини четга тортадиган лаҳзалар етди...

– Ана холос! Ахир мен берган топшириқнин ижроси ҳақида ҳисобот оп келиш ўрнига нега қочиқ кетдинг? – дея дағдага билан сўз бошлади Наполеон бироқ юзи сўзининг акси бўлиб, кулиб туарди. – Ҳузуримга ўғлингни юборибсан, ўзинг қаёқларда юрибсан?

- Асирикда эдим, офтоби олам!
- Биламан. Хўш, кейин-чи?
- Қутулдим.
- Оқилона иш! Хўш, ундан кейин-чи?

Императорнинг ўнг тарафида турган Нейнинг овози сўнгги саволга жавобан гулдиради:

- Кейин бу тақсир кўприксозлик қилди-да!
- Кўприксозлик? Тушунолмадим, маршал.
- Демоқчиманки, ҳазрати олийлари, Эльсингенга ўтиладиган кўприкни битказища унинг хизмати катта. У бизга ниҳоятда зарур охирги тўсинглар билан сузив келди. Бу билан қўшиннинг дарёдан ўтишига бекиёс наф келтиргани устига, ўзи яралантан бўлса-да, ёнимизда баробар ҳужумга отилди.

– Ўжар экансан-ку! – деди Наполеон Шульмейстерга. – Страсбургда менга жанг қиласман дегандинг, сўзингнинг устидан чиқиб, муродингта етибсан-да!

– Ўтмасам бўлмасди, зоти олийлари, хотинимни, болаларни қидириб топишим зарур эди.

– Ўзинг айтгандинг: ўғлинг асранди экани ростми?

– Рост, олампаноҳ!

– Маъқул, сен шу боланинг ихтиёрини менга топширасан! У жуда уддабурон ва довюрак экан, бир куни матонатли зобит қилиб етиштирамиз. Унинг тарбияси билан шахсан ўзим шугулланаман. Ўглим, айт-чи, ҳарбийлар мактабида ўқиши, йиллар ўтиб, полковникка, генералга, ҳатто маршалга айланишини хоҳлармидинг?

Ёноқлари оловланиб, кўзлари чараклаётган Ганс «ҳа» деворишга тайёр эди, лекин Родекнинг қўллари унинг елкасидан босди.

- Ҳазрати олийлари! – дея орага тушди кекса шуан.
- Менинг бир қошиқ қонимдан кечсангиз!
- Бу ким ўзи? – сўради император.

– Холис бир дўст, олампаноҳ, – жавоб қайтарди Шульмейстер. – Миллати – француз, бретониялик, иккала норасидани тугилган кунидан бери эҳтиётлаб юрибди.

– Яқинроқ келинг-чи! – амр қилди Наполеон.

– Бу боланинг император зоти олийлари томонидан тарбияланиши жоиз бўлармикан? – паст овозда сўз бошлади жуда яқин борган Родек. – Олампаноҳ, у душманингизнинг ўғли. Шундай душман эдик, мард ва ҳалол... энди ёруғ оламда йўқ. Агар болакай аждодлари номини олмаган экан, бунинг сабаби оддий: ногоҳоний қазойи қадар уни гўдак чогиёқ етимликка маҳкум этган. Агар шу кулфат содир бўлмагандан эди, қошингизда ҳозир Жан Бурбон-Конде, яъни герцог Ангиенский турган бўларди.

Наполеоннинг рангпар юзи лола тусига кирди, қошлари чимирилди, у бўғилиб сўради:

– Рост гапни айтяпсизми?

Родек марҳумлар руҳини ёдга олиб, маъсум қиёфада бош эгди ва индамади...

Цезарнинг<sup>1</sup> қалбида қарама-қарши туйгулар түғён уради. Салгинадан сўнг юзи асл ҳолига қайтди, кўзлари мамнунлик ила чўғланди.

– Шульмейстер! – деди у. – Билмайсанми, Страсбург атрофида яхшироқ бир қаср бормикан. Агар бўлса, Эльзас томонларга келганимда, дам олиб кетардим. Жуда катта бўлсин демайман, ҳатто кошона бўлмасаям майли. Кенг ва қулай бўлиб, теварагида экинзор ва боғ-роғлар бўлса кифоя.

<sup>1</sup> Цезарь Гай Юлий (эр. ав. 100 ёки 102 – эр. ав. 44) – қадимги Римнинг давлат ва сиёsat арбоби, саркарда ва ёзувчи. Ҳатто XIX асрда қўмондонлар Цезарнинг ҳарбий санъатини алоҳида ўрганишарди. Айниқса А. Суворов ва Наполеон унинг асаларини ҳар бир зобитга мажбурий қўлланма ҳисоблашган. Айни ўринда Наполеонни ўша Цезарга ўхшатилмоқда.

- Мейнау, олампаноҳ.
- Мейнау? Сотиладиганми ўзи?
- Сотилади.
- Бўпти-да, оғайни, Мейнауни олганим бўлсин. Бугуноқ фармон қиласман, ўша сарой сотиб олинади, уни дарҳол асранди ўғлинг ва унинг синглисига ҳадя этаман. Истайманки, улар у ерда униб-ўсиб, рафиқанг ва бретониялик кекса дўстинг қаноти остида тинч-осойишта яшасинлар. Бу қилган хизматларинг учун сенга аталган мукофотимдир.

Император Родек томонга ўтирилди:

- Шундай қилишга ҳаққим борми? Сиз ушбу хусусда нима дейсиз?
- Мен... – сўз бошлади қария. – Менимча, олампаноҳ, бугун шунчалар шоҳона муруват қилдингизки, бу билан сизни кечириш...
- Мен-чи? – дарҳол орага сўқилди Шульмейстер, у Родекнинг миннатдорчилиги қовун туширишга айланниб кетишидан қаттиқ чўчиб, унинг сўзини бўлганди.
- Мен Мейнауда яшамайманми?
- Сен? Ҳозирча йўқ. Ўзимга ёрдамчи қилиб оламан...

Эртаси куни Шульмейстер оиласи билан хайрлашиди. Император адъютантликка олиб, вақтинчалик штаб хизматига тайинланган собиқ жосус Наполеон билан кетиши лозим эди. У Бертани сафар олдидан сўнгги бор бағрига босди. Кўнгли батамом тинчиган ва эртанги саодатли турмушга ишонган аёл гулдай яшнаб турар, эшик рўпарасидаги Ганс эса ўтиб бораётган ҳарбийларга маҳлиё эди.

Шульмейстер хайрлашиш учун Лизбетани излаб қолди. Аммо ширин қизалоқ анчагача топилмади. У уйнинг шундоққина биқинидаги саройнинг тўрида экан. Аскарларни томоша қиласвериш жонига теккач,

ахийри бу машғулотни бас қылган қизалоқ ўз «кашфиёти» билан машғул эди: у мушукларнинг бутун бир оиласини топиб олганди. Шўрлик ҳайвон қирғинбарот кунларида болалаб, мушукчаларини чордоқнинг бир бурчида боқаётган экан...

Лизбета ҳаяжонланиб кетганди. Лекин унингча, бундай «кашфиёт» устида ўзининг шунчаки ҳаяжонланиши камлик қиласарди. Қизча қалбидан тошаётган туйғуларини кимгадир тўкиб солмаса иложи йўқ. У ёлғиз бўлса-да, хаёлида гўё сирдош дугона яратиб олди: ҳам ўзидан кичкина, ҳам камсухангина. Лизбета катталардай, балки оналардай ролга кирди ва ўзи сўраб, ўзи айтиб бижиллайверди:

- Мушукчамиз болалади!
- Шунақами? Зўй-ку! – деди хаёлий жајожи дугона.
- Ҳа-да!
- Болалайи нешта?
- Тўртта.
- Зўй-ку!
- Зўр-да!
- Оқми, қойами?
- Биттаси – оқ, бошқаси – кулранг, иккитаси худди онасига тортган.
- Зўй-ку!..

«Суҳбат» шу нуқтага етганда, Шульмейстер кириб келди ва Лизбетани суюб оғушига олди. Бахтиёғ ота-болага қараб, қалби ийиган Бертанинг кўзларидан дувва-дувва ёш қуяиларди...

## ТАРЖИМОНДАН

Шарль Лоран «Наполеоннинг жосуси»да қаламга олган давр тарихий хронология бўйича 1805 йилнинг кузига тўғри келади. Илк саҳифадаёқ бош қаҳрамон – разведкачи Карл Шульмейстерни, унинг ёнидаги икки норасидани кўрамиз. Улар ака-сингил Ганс ва Лизбета: болакай ўн бир яшар, қизалоқ ундан уч ёш кичкина. Асар бобдан-бобга ўтгани сайин Ганс гўё кўз ўнгимизда улгайиб бораётганга ўхшайди. Шульмейстернинг ўта хатарли курашидаги энг яқин ва энг ишончли ёрдамчиси, ҳатто халоскори ҳам ана шу кичкинтай бўлиб, у китобхон қалбидан тобора чуқур ўрин олаверади. Бола шердил, аждодлари шаън-шавкатига муносиб, унга қўркув бегона, ажалнинг кўзига тик боқа олади, ҳеч тараддуудланмайди. Ганснинг жажожи қалбида баҳодирлик ва матонат чашмаси жўшиб турибди, қарчигайдай зобитлар соясига салом берадиган саркардалардан ҳам ҳайиқиб ўтирмайди. Гўдак боши билан Наполеон Бонапартнинг ҳузурига-ча дадил кириб бора олади. Шульмейстернинг зиммасидаги жанговар топшириқни бенуқсон бажаргани устига, ҳатто дадасининг жонига ҳам оро киради.

Мутолаа асносида китобхонга маълум бўладики, кичкина қаҳрамонимизнинг исми аслида Ганс эмас, Жан. Карл дада ва Берта она уни сақлаб олишган. Боланинг туғилиши ортида ҳам сирли тарих бор: воқеалар ривожи жараёнида парда кўтарилиб, ўша сир очилади.

Лекин сир очилган эса-да, унинг остида ҳар ёқса томир ёйтган илдизи йўқ дейсизми? Бизнингча, Шарль Лоран Ганс-Жан ва унинг синглиси образини роман-

га бежиз олиб кирмаган, бунинг замирида муаллиф кўзлаган жиддий мақсад бор.

Бинобарин, асарда тилга олинмаган, лекин роман мавзусига бевосита дахлдор айрим тарихий воқеаларга бир сиðра назар солиш билангина муаллифнинг муддаосини яхшироқ тушуниш мумкин бўлади. Бунинг учун Наполеоннинг ҳали император бўлмаган даврига қайтамиз. Кези келгани учун эслатиб ўтамизки, Бонапарт 1804 йилнинг декабрь ойида тож кийган...

Наполеоннинг ғалабалари бутун Европани Франциянинг душманига айлантириб қўйганди. Мамлакат ҳудуди унга тиш қайраган коалиция давлатларининг жосусларига тўлиб кетганди. Уларга берилган энг мухим топшириқ эса Бонапартни йўқ қилиш эди, албатта.

Дастлабки суиқасдлардан бири 1800 йил 10 октябрь куни содир бўлган, ундан кейингиларининг эса ҳисоби йўқ. Вазият шунчалик қалтис тус олдики, бугун ё эртага, исталган жойда Бонапартни ўлдириб кетишлирага гўё шак-шубҳа қолмаганди. Айниқса Англияда айни хусусдаги «хушхабар»ни интиқлик билан кутишарди, ҳатто «иш битди» девориши: «Наполеон ўлдирилди» деган хабар Лондон биржасини остин-устун қилаёзди. Париждаги суиқасднинг муроди ҳосил бўлмаса-да, бари бир Англиянинг бош биржасида Ў-рақамли француз ҳалок бўлгани икки ҳафта-гача ҳар тонг муттасил суюнчилаб турилди.

Деярли ҳамма ўлдига чиқараёзган Наполеон ўзи хавфсирамасинми? Албатта хавфсирайди ва албатта буни сездирмасликка уринади. Айниқса 1804 йил бошидаги аҳвол жуда таҳликали тус олди. Наполеоннинг буйругига биноан террор ва суиқасдларга қарши энг кескин чоралар кўрилди. Аввало, ташки ва ички агентура – жосуслик тизимиға алоҳида эътибор

берилди. Мамлакат ичкариси ва хорижий давлатларга Наполеоннинг юзлаб айгоқчилари йўл олишди. Генерал Мюрат Париж ҳарбий губернатори, Реаль эса пойтахт полициясининг бошлиғи вазифасига тайинланди. Шаҳар ағдар-тўнтар қилиниб, тинтилмаган жой қолгани йўқ, сунқасд ва исёнда гумондор кўплаб одамлар (Пишегрю, Кадудаль, генерал Моро ва бошқалар) ҳибсга олинди.

Полиция тергов жараёнида мухолифлар монархия режимини тиклаш ниятида эканликларини аниқлади. Улар қатл этилган марҳум қиролнинг укаси д'Артуани ёхуд шаҳзода Кондени, хуллас, Бурбонлар сулоласидан бирор талабгорни таҳтга ўтқизишни хоҳлайдилар. Аён бўлдики, бу ҳаракатлар Англия расмий доиралари томонидан уюштирилиб, таҳт даъвогари бўлмиш муҳожир шаҳзода ҳам айнан ўша ердан жўнатилади.

Наполеон ўша тарафни сергаклик билан кузатарди. Бироқ қироликка номзоднинг шимолдан эмас, шарқдан дараги чиқиб қолди. Герцог Ангиенский (Энгиенский), яъни Луи-Антуан де Бурбон-Конде кунчиқар томондаги жон қўшни Баден герцоглигига экан. У қироллар наслидан бўлиб, Бурбонларга яқин қариндош Конделар сулоласига мансуб сўнгги шаҳзода эди. Герцог Ангиенский Буюк Француз инқилобидан сўнг отаси ва бобоси билан Англияга кетиб қолди. Люневиль сулҳ шартномаси (1801 йил 9 февраль) имзолангач, шаҳзода қитъага қайтди, Баденда яшаб, Англия ҳукумати ажратган нафақага тирикчилик қиласлар ва бирор билан иши йўқ эди. У Франция республикасининг зарарига нима қилмоқчи, Наполеонга қарши шахсий хусумати ёхуд таҳтни эгаллаш қутқуси борми, Париждаги ғаламислар билан алоқаси қанчалик? Бундай шубҳалар аслида қироллар авлодининг қонига ташналиқдан бўлак нарса эмасди.

Кейинчалик, Наполеон Бонапарт ўз мемуарларидан токи Талейран қайрамагунча, герцог Ангиенский унинг хаёлига ҳам келмаганига иқрор бўлди. Талейранга қолса, шаҳзодани зинданбанд қилиш кам, унинг бу дунёда яшашга ҳаққи йўқ! Лекин Баден герцоглиги Францияга қарам бўлмаган бетараф ҳудуд бўлиб, чегарадан ўтишни у ёқда суверенитетта тажовуз ҳисоблашлари мумкин эди.

Кейинроқ ўз таклифида мустаҳкам Талейранга (ташқи ишлар вазири) эса ўз таклифида Фуше (полиция вазири) ҳам қўшилди. Наполеоннинг боши қотди ва бир неча кун ўйлаб кўрди-да, ўзидағи ботиний зиддиятни енгди. 10 марта (1804) тор доирада кенгаш ўтказиб, энг яқин ва олий мартабали ёрдамчиларининг фикрини олгач, герцог Ангиенский тақдирини ҳал этувчи муҳим ва қатъий тўхтамга келди. Шунингдек, ўша йигилишда операцияни ўта маҳфий ва тезкорлик билан амалга ошириш режаси белгиланиб, умумий раҳбарлик Коленкурга юкланди.

Шунга асосан 1804 йил 14 марта 15 марта ўтар кечаси француз драгунлари ва бошқа отрядлардан иборат қуролланган алоҳида гурӯҳ Баден ҳудудига бостириб кириб, герцог Ангиенскийни қўлга олди. Асир 20 марта қадар Венсендаги ҳибсхонада сақланди. Тергов жараёнида герцог Ангиенский Париждаги сунқасдларга, Пишегрю ва Кадудаллар фитнасига алоқадор эмаслиги аниқланди. Бироқ уни Наполеонга қарши исён уюштириш учун Англиядан пул олганинда айблашди. Бу шаҳзодага туҳмат эди, албатта. Полковник Юлен раислигига 20 марта қуни бўлиб ўтган суд мажлиси герцог Ангиенскийни олий жазога ҳукм қилди.

Шаҳзода Конде ўзига муносабат бунчалар қаттиқ ва беаёв бўлишига, ҳукм ижро этилишига ишонмасди.

У ўз аъмолини шарҳлаб, Наполеоннинг номига ариза ёзди ва қабул қилишини сўради. Бонапарт маҳкумнинг мурожаати билан танишгач, Реални чақириб, Венсенга бориб масалани ўрганиб келишни буюрди. Реаль буйруқни бажарди, лекин эрталаб ухлаб қолганлиги учун (шу гапга ким ишонади?) Венсенга етиб борганда, ҳукм ижро этиб бўлинган экан.

Герцог Ангиенский қатл этилгани ҳақидаги расмий баёнот 21 март куни эълон қилинди. Луи-Антуан де Бурбон-Конде фожиасидан Европагинамас, бутун дунё ларзага келганди. Бу таъкиднинг мублағаси йўқ. Аввало, у бегуноҳ ва жуда ёш эди. Қолаверса, шаҳзода Конде бағоят келишган, қарчигайдай йигит бўлиб, холис ва сермулоҳаза давлат арбобига, шерюрак қўмондонга хос ноёб фазилатлари билан Франциядан олисларда ҳам оғизга тушган, халқаро майдонда катта шон-шувхрат, хурмат-эҳтиром қозонганди.

Шу қатлнинг сиёсий оқибати боис Наполеон жиддий маломатга қолди. Париж кўчаларида уни қораловчи шиорлар пайдо бўлганди: «Келгинди, корсикалик, узурпатор, жаллод...»

Шаҳзода олийнасаб қиролзодалар хонадонига мансуб бўлгани ҳолда бетайин бир ўғри ёки томтешар қароқчидай қатл этилганди. Уни Франция шаҳзодаси Конденинг ватанининг ёвлари эмас, бир взвод француз аскарлари, яъни ўз ватандошлари отган ўқ ўлдиргани унинг шаън-шавкатига мутлақо номуносиб эди. У Бонапартдан уч ёш кичкина бўлиб, бор йўти 32 йил умр кўрганди...

Алқисса, «Наполеоннинг жосуси»даги Жан ва Елизавета ана шу жувонмарг қиролзоданинг етим фарзандлари эканини муаллиф китобнинг бир неча ўрнида билдиради. Биз уларнинг отаси гирифтор

этилган қонли фожиа тафсилотлари билан ўқувчини бир қадар таништириб ўтдик. Ўйлаймизки, Наполеоннинг фаол иштирокидаги ушбу асар воқеалари ва қаҳрамонлари силсиласида романнависнинг ҳақли имо-ишораси, мантиқий бир рамз ҳам мавжуд. Ахир Шульмейстер ва уни «Карл дада» атовчи икки гўдак нимаси биландир Бонапартнинг ўз оиласини эслатмаяптими? Чунки Наполеоннинг ҳам икки асранди фарзанди бор, уларнинг ҳам тўнгичи – ўғил, кенжаси – қиз: Евгений (Эжен) ва Гортензия.

Энди рамзга келсак, йиллар ўтади: Наполеонни оиласидан, ўғлидан зулм ва зугум билан айирадилар. Унинг валиаҳди ҳам шаҳзода Конденинг қисматига учрайди. Тўғри, уни отиб ўлдирмайдилар, лекин заррача айби йўқ бўлса-да, ҳамиша ҳар қадами тазиқ остида бўлган йигит, ахийри бедаво хасталик билан ғариблиқда вафот этади. У ёғидан келсангиз, Наполеон Бонапарт ўзи ҳам олис Муқаддас Елена оролида кимсасиз ғариб ва қувғинди мусофирир бўлмаса, ким эди?..

Бевафо дунё деганлари рост.

Аммо қасосли дунё деганлари ҳам ёлғон эмас-да!..

**Рустамжон УММАТОВ**

## **МУНДАРИЖА**

### **БИРИНЧИ ҚИСМ**

|   |    |
|---|----|
| Жосус қўлга тушди.....                      | 3  |
| Бертанинг хавотири, маршалнинг таҳди迪 ..... | 14 |
| Эр ва хотин.....                            | 23 |
| Наполеон билан юзма-юз.....                 | 31 |
| Жосус жанг қилиш иштиёқида.....             | 38 |
| Императорнинг қаҳри келди .....             | 44 |
| Жосус икки аскарни<br>доғда қолдирди .....  | 53 |
| Маршал Мюрат – жигарсўхта .....             | 66 |
| Бегуноҳ шаҳзоданинг<br>қонли қисмати.....   | 80 |

### **ИККИНЧИ ҚИСМ**

|   |     |
|---|-----|
| Айгоқчи душман ўрдасида .....                     | 91  |
| Генераллар чув тушди.....                         | 101 |
| Нотаниш аёл жосусга ўз хизматини таклиф этди..... | 109 |
| Сотқин бари бир сотқин-да! .....                  | 117 |
| Сотқин жосусдан қўрқиб кетди .....                | 122 |
| Сарсонлик – саргардонлик.....                     | 130 |
| Берта ва Доротея .....                            | 138 |
| Родекни хўрлашди, Ганс қочиб қутулди .....        | 149 |
| Жосус қалтис синовда.....                         | 153 |
| Шульмайстер Наполеонни излаб боради .....         | 163 |

## УЧИНЧИ ҚИСМ

|  |     |
|--|-----|
| Шульмейстер қатл араfasида .....               | 172 |
| Венд Гансни азобламоқчи.....                   | 189 |
| Сотқин ўз бошини ўзи еди .....                 | 198 |
| Жосуснинг ўғли Наполеон ҳузурида .....         | 207 |
| Маршаллар орасидан ола мушук ўтди .....        | 219 |
| Соқчининг жосус билан улфатчилик қилгани ..... | 225 |
| Ганс согинтириб қўйди .....                    | 233 |
| Родек маршал Мюратнинг йўлинни тўсди .....     | 238 |
| Генерал Мак сўнгги талвасада .....             | 254 |
| Жосуснинг гойиб бўлиши .....                   | 260 |
| Алқисса, ҳамма муроду мақсадига етди .....     | 270 |
| <br>Таржимондан.....                           | 277 |

*Адабий-бадиий нашр*

**ШАРЛЬ ЛОРАН  
НАПОЛЕОННИНГ ЖОСУСИ**

**Мұхаррир  
Жақонгир ЖҮРАЕВ**

**Мусақҳих  
Мадина МАҲМУДОВА**

**Бадиий мұхаррир  
Уйғун СОЛИХОВ**

**Саҳифаловчи  
Суннат МУСАМЕДОВ**

**Техник мұхаррир  
Умидбек ЯХШИМОВ**

**Лицензия рақами: АI № 252, 2014 йил 02.10 да берилган.**

**Босишига 2016 йил 30.06да рухсат этилди.**

**Бичими 84x108<sup>132</sup>.**

**Босма табоги 9,5. Шартли босма табоги 15,96.**

**Гарнитура «Constantia». Офсет қоғоз.**

**Адади 5000 нұсха. Буюртма № 224.**

**Бағоси келишилған нархда.**

**«Янги аср авлоди» НММда тайёрланди.**

**100113. Тошкент, Чилонзор-8, Қатортол күчаси, 60.**

**Китоб матни «Print Line Group» ХК босмахонасида чоп этилди.**

**100097, Тошкент ш., Бунёдкор шоқкүласи, 44.**

**Мурожаат учун телефонлар:**

**Нашр бўлими – 147-00-14; 129-09-72;**

**Маркетинг бўлими – 128-78-43; 397-10-87; факс – 273-00-14;**

**e-mail: yangiasravlod@mail.ru**

**«Янги аср авлоди» НММ  
қўйидаги янги китобларни нашр этди:**

**Лев Толстой**  
**«УРУШ ВА ТИНЧЛИК» 1-2-китоблар**  
**Бичими 84x108 1/32, 976 бет**  
**Қаттиқ муқова**

Бу китоб фақат уруш ёхуд тинчлик ҳақида эмас. Унда мавзулар қамрови – одамлар қисмати, уларнинг тақдири, ўйлари, қарашлари ва айни пайтда бўлаётган жараёнга муносабати китобхон эътиборидан четда қолмайди. Қолаверса, мутолаа жараёнида қалбингизга яқин бўлиб қолган ёхуд жамиятда қандай мавқега эга бўлишдан қатъи назар урушни ўзининг тақдири билан боғлаган ва бўлаётган воқеаларга фаол муносабат билдираётган қаҳрамонлар қисмати сизга фавқулодда ҳодиса эмас, балки ўз эрки, ўз номуси учун курашаётган тимсол сифатида гавдаланади.

Андрей Болконский, Пьер Безухов, Николай Ростов, Natasha, Соня, Mari – улар билан узоқ муддат ўзингизни ҳамфикр, йўлдош, ҳамсуҳбатдек ҳис қиласиз...

**Теодор Драйзер**  
**«АМЕРИКА ФОЖИАСИ» 1-2-китоблар**  
**Бичими 84x108 1/32,**  
**1-китоб - 624 ва 2-китоб 688 бет**  
**Қаттиқ муқова**

Теодор Драйзернинг эътиборингизга ҳавола этилаётган икки қисмдан иборат йирик «Америка фожиаси» романи ҳамиша бутун дунёни ўз гоялари атрофида бирлаштиришга уринган гигант давлат – Америкада ўша вақтларда юз берган воқеликни кенг қамраб олганлиги, воқеаларнинг изчиллиги билан ҳамиша китобхонлар эътиборини ўзига жалб этиб келган.

Асарнинг бош қаҳрамони Клайд Грифитс камбағал оиласда туғилиб-ўстган йигит. Унинг бойлик орттириш йўлида қилган ножӯя хатти-ҳаракатлари, бу йўлда ҳеч қандай қинғир ишлардан қайтмаслиги ва уни шундай ишларни қилишга қўйиб берган табиати – юзсизлиги, шафқатсизлиги кабилар бир қаҳрамон тимсоли орқали ўша давр Америка муҳити ҳакида ўқувчида яхлит тасаввур пайдо қиласди.

**Юлиан Семёнов**

**«ТИРИК ҚОЛИШ БУЮРИЛГАН»**

**84x108 1/32, 480 бет**

**Қаттиқ муқова**

НРБ

УБЖ

ЭБХ

Муаллиф «Баҳорнинг ўн етти лаҳзаси» романинг узвий давоми бўлган ўзининг янги «Тирик қолиш буюрилган» деб номланувчи асарида гитлерчилар рейхининг ўлим олдидаги талвасасини, фашизм пешволарининг ўз ҳаётларини сақлаб қолиш йўлида ҳар қандай қабиҳликдан ҳам тоймай қилган беҳуда уринишлариши тасвирлайди.

**Генри Райдер Хаггард.**

**«ҚАСОС ВА МУҲАББАТ»**

**84x108 1/32, 512 бет**

**Қаттиқ муқова**

НРБ

УБЖ

ЭБМ

ДНР

УЧУ

Адабнинг сара асаларидан саналмиш «Қасос ва муҳаббат» романида Мексика ҳиндуларининг 4-5 аср бурунги миллий озодлик ҳаракати хайриҳоҳлик билан қаламга олинган. Асалдаги Томас Вингфилд, Фонсека, де Гарсиа, Лили каби бош қаҳрамонлар муаллиф фантазиясининг маҳсулидир. Шу билан бирга Кортес (Малинцин), Берналь Диас, Монтесума, Куатемок, Марина сингари тарихий шахслар ҳам бор.

Райдер Хаггард «Қасос ва муҳаббат»га материал тўплар экан, тарихий манбалар билангина кифояланган эмас. У ўрта асрларда истилочи конкистадорлар ўтган йўллардан юриб, Мексикани кезиб чиқади. Ўшанда адиб тўплаган маълумотлар, жуғрофий, биологик, этнографик кузатишлар қаҳрамонлар тақдирига уйғунлашиб кетган. Бинобарин, китобхон аянчли тақдирлар ва қонли фожиалар ёнида Мексика табиатини ва манзараларини, ҳиндулар тарихи ва ҳаёт тарзини ҳам ўз кўзи билан кўргандай бўлади.

«Қасос ва муҳаббат» жаҳон мумтоз адабиётида тарихий-жуғрофий ва саргузашт жанрининг дурданаларидан бири сифатида эътироф этилган.

**Оноре де Бальзак  
«ДАҲРИЙНИНГ ИБОДАТИ»**

**84x108 1/32, 208 бет**

**Юмшоқ муқова**


Оноре де Бальзак асарлари Европа адабиётининг гултожи саналади. Гобсек, Деплен, Горио Ота, Луи Ламбер – уларнинг ҳеч бири бир-бирини тақрорламайди, улар қалбидаги муштарак мақсад, ички зиддиятлар, орзулар, борингки, адабиётнинг инсониятга кўрсатадиган хизмати нуқтаи назаридан бир-бирига жуда яқин. Мана шу ички кечинмаларни юракдан ҳис этган Бальзак ўз асарларидан бирида шундай ёзади: «Киши ҳақида ҳукм чиқаришдан олдин лоақал унинг фикр-асрори, унинг баҳтсизлиги, унинг ҳаяжонига шерик бўлиш керак».

Қадрли китобхон! Агар Бальзак қаҳрамонларининг ички кечинмаларини тушунмоқчи бўлсангиз, албатта ушбу асар мутолаасига шошилинг.

10800 00


84(49р)  
1780

Шарль  
**ЛОРАН**  
НАПОЛЕОННИНГ  
ЖОСУИ



  
ЯНГИ АСР АВЛОДИ

ISBN 978-9943-27-801-1



9 789943 278011